

BIBL. NAZ.  
VITT. EMANUELE III

148


F


57

NAPOLI

1487.57

148.F.57.







# VITAE ITALORUM

DOCTRINA EXCELLENTIUM

QUI SAECULIS XVII. ET XVIII. FLORUERUNT.

VOLUMEN XIV.

AUCTORE

ANGELO FABRONIO

ACADEMIAE PISANAE CURATORE.



PISIS MDCCLXXXIX.

\* ــ \*  
EXCUDERAT ALOYSIUS RAPHAELLIUS  
SUPERIORIBUS ANNVENTIBUS.



ANTONIO CELSISSIMO  
AC SERENISSIMO  
*SAXONIAE PRINCIPI.*

ANGELUS FABRONIUS.

UT testatus omnibus esset, CEL-  
SISSIME AC SERENISSIME PRINCEPS,  
meus in Te gratus animus, &  
singularis observantia, a Te vehe-  
menter efflagitavi, dum superiori  
anno Dresdae eram, ut aliquod  
mearum vigiliarum munus in Tuo

nomine apparere sineres . Benigne ,  
ut soles , id a Te mihi concessum  
est , pro quo aliisque immortalibus  
erga me Tuis beneficiis , si minus  
ad referendam gratiam satisfacere  
potero , ad celebrandam certe &  
habendam satis sum facturus . Equidem  
satiari non queo , cum de Tua  
clementia , mansuetudine , humanitate ,  
ingenio , religionis studio ceterisque  
virtutibus , quae Principes maxime  
commendant & ornant , praedico ; &  
delector hoc ipso , quod uno ore omnes  
consentiant ex Te , & ex Augusta Uxore  
Tua in sinu Sapientiae apud nos  
educata , magnarum virtutum exempla  
petenda . Faxit Deus O. M. ut diu  
fospites sitis , omniaque Vobis  
fauste , feliciter prospereque eveniant .

# VITAE ITALORUM

DOCTRINA EXCELIENTIUM

QUI SAECULIS XVII. ET XVIII. FLORUERUNT.

---

ANGELUS FABRONIUS HIPPOLYTO

PINDEMONTIO PATRICIO VENETO ET  
HIEROSOLYMITANO EQUITI.

S. P. D.

**H**anc damus veniam, petimusque vicif-  
sin, ut tanquam nostratium exponantur vi-  
tae hominum exterorum, qui tum in illa  
vestra Patavina Academia, tum in hac no-  
stra Pisana magistri munere gloriose perfun-  
cti sunt. Ea propter vitam Paganini Gau-  
denti, quamvis Rhaetici hominis, Latinis lit-  
teris mandare decrevi, quam tibi nuncupo,  
vir clarissime & amicissime, ut monumentum  
aliquod extet mei erga te amoris atque ob-  
servantiae. Cognovi enim semper te ita cu-  
pidum rerum mearum, ut nullos aequae stu-

*diosos me habere existimem, pro quo beneficio nescio equidem quas tibi gratias rependam. Si quisquam fuit unquam remotus & natura, & ratione atque doctrina ab inani laude, & sermonibus vulgi, ego profecto is sum. Nihilominus cum tui similes, hoc est doctos & eruditos invenio, qui me non frustra consumpsisse tempus iudicent in historia conscribenda, & in prodendis memoriae magnorum virorum factis, non mediocri laetitia persuor, eoque magis incendor ad iter reliquum conficiendum. Cuperem equidem Pisani Gymnasii historiam & mea sponte, & multorum cohortationibus, & Principis iussu, cujus beneficentia illi praesum, contexere, sed deterreor argumenti magnitudine: innumerae enim sunt res, quae ex memoria nostra, ac patrum majorumque nostrorum, ex annalium monumentis, ex commentariis rerum Etruscarum, atque ex omni scriptura sunt conquirendae; peregrinandum etiam in alienis civitatibus, quod undique ad nos confluerent non solum discipuli, sed et magistri; iudicandum differendumque de omni disciplinarum ge-*

nere, dum scripta hominum, qui in iis excelluerunt, referuntur atque inter se comparantur; circumspiciendae quoque res civiles, quod eae saepissime cum re litteraria conjungantur; & quod non minus in Republica, quam in litteris maximae sunt conversiones inclinationesque temporum, omnia momenta sunt observanda, atque causae investigandae, quae mutationem asserere potuerunt. Tu saepius expertus es quanti laboris sit vitam vel unius hominis omni ex parte declarare, quamvis is non magno temporis intervallo a nobis disjunctus fuerit, quamobrem tu, cujus iudicio plurimum semper tribui, statues ipse, num mearum virium esse possit de tot viris dicere, quorum aetates non annis modo, sed & saeculis a nobis remotae sunt, quorumque facta obruta hominum interitu & oblivione posteritatis pene extincta esse videntur. Quoniam id suscepi muneri, ut vitas explicarem virorum doctrina excellentium, qui hoc & praeterito saeculo floruerunt, & quod ex iis maxime admirari soleam humaniorum litterarum cultores eximios, quod haec studia adolescentiam

alant, senectutem oblectent, & quod pernecant nobiscum, peregrinantur & rustificantur, postquam de Averanio, de Polito & de Corfinio dixi, non recusabo de iis quoque dicere, qui superiori saeculo qua voce, qua scriptis, dum operam praestabant suam huic Academiae, earumdem litterarum causam strenue praeceptis atque exemplis egerunt. Sunt ii quidem magni nominis, merenturque omnes, ut suus honos, suaque laus iis reddatur. Quo in numero quod fuerit & Paganinus Gaudentius, a te vehementer peto, ut ejus imaginem a me expressam sic intuearis, veluti hominis, cujus lineamentis eorum pigmentorum, quae inventa aut nondum erant, aut barbaries superioris saeculi infuscaverat, color & flos defuit. Ex quo factum est, ut ex multis operibus, quae ipse scripsit, quamvis eruditione & doctrina etiam abundant, nulla nunc legantur, lateantque omnia in bibliothecarum angulis. Quis negabit nobiscum actum esse praeclare, quod in ea devenimus tempora, quibus exigui a scriptoribus solet, ut purum & accuratum orationis genus asserant, ut aequae ne-



gligentiam & munditiam odiosam & exquisitam nimis vitent, ut, circumcisa & amputata inanitate omni verborum & rerum, apta inter se & cohaerentia, & quid maxime deceat, sic ut neque absit quidquam, quod ad rem facit; neque redundet, persequantur ac videant, ut omnia quasi in critices lance ponant, & philosophiae luminibus illustrent? Sane dum Paganinus & effuse, & ambitiose, & inaniter etiam saepe exultat in eruditione aliqua quaestione tractanda; libenter illum assimilaverim viti serpenti multiplici lapsu & erratico, quae delectat foliorum copia, sed quae parum fructus, quo cum jucunditate vescaris, edit. Nihilo tamen minus deberi hoc a me homini, qui ingenio et eruditione affluit, & qui voce praeceptisque suis multos nostrorum, quo in numero etiam fuit ille medicorum princeps Franciscus Reditus, excitavit ad locupletandas & ornandas verborum dote magnarum artium disciplinas, ut cum etiam nunc vivam illius memoriam teneremus, hanc immortalem redderem, si possem. Quod vero in hac concinnanda vita & memor tuorum erga me meritorum, & gra-

tus fuerim, hoc, ut spero, valebit ad tuam erga me voluntatem & studium confirmandum, cuius fiducia peto a te, ut quanto citius poteris ad me mittas quae de Antonio Contio, aliisque nobilissimis Poetis Venetis promissisti. Non enim tam sum peregrinator, quam solebam, & sic utor Pisano otio, ut sine ulla interpellatione in litterulis meis verfer. Vale, & revise nos aliquando; neminem enim habemus, quocum & joculari liberior, & de temporum conditione confidentius, & de communibus studiis utilius & jucundius loqui possimus.

*Pisis Kal. Januarii MDCCLXXXIX.*

PAGANINUS GAUDENTIUS.

**P**AGANINUS GAUDENTIUS Pesclaviensis, tantam apud nonnullos doctrinae famam collegerat, ut quemadmodum Galileo in matheſi, Fortunio Liceto in philoſophia, ſic illi in philologia nemo par poneretur. Quod Gabrieliſ Naudæi ſive teſtimonium, ſive iudicium licet aſſentatione aliqua ſuffuſum videri poſſit, magnum tamen virum illum appellare minime dubitamus. Quod vero ei, quamvis in Rhaetia nato, locum dederimus in pinacotheca Italorum doctrina excellentium, utemur excuſatione ſtudii & amoris in Academiam Piſanam, cui nos præſumus, cuique Paganinus viginti & amplius annos operam ſuam præſtitit. Jam ſi quaeras ſitum oppidi, in quo ipſe natus eſt, ex ipſo comperies: ait enim.

*Trames ubi aerias Rhaetorum detigit alpes,  
Et lento incipiunt surgere colle juga;  
Qua bene cultus ager glacialeſ ſubmovet  
Arcton,*

*Et lacus occiduam prospicit Italiam,  
 Pesclavj haud humilem est operae cognosce-  
 re vallem,*

*Quam natura arcto muniit ipsa loco.*

*Hic ego vitales quondam hausi luminis auras,*

*Hic lusi, puer hic litterulas didici.*

*Hic etiam reliquae traducere tempora vitae,*

*Hoc cupiam haud alio consenuisse solo.*

*Aspera fit tellus quamvis, tamen haec mea  
 dulcis*

*Haec patria est. Patria quis caruisse velit?*

Eodem quoque auctore compertum habemus in vitam ipsum introiisse anno MDLXXXVI. nactumque fuisse praeceptorem in iis studiis, quibus pueri ad humanitatem informari solent, Petrum Menghinium virum doctrina & optimis artibus eruditissimum. Quantos autem, illo duce, progressus fecerit, quantumque illi tribueret hoc epigrammate indicavit.

*Te duce, litterulas didici, didicique docente*

*Te, Petre, Romuleis reddere verba modis,*

*Fontibus Arpini puros deducere rivos,*

*Et placare sitim flumine Virgilii.*

*O studii generosa tui pietasque fidesque ,  
 O cura ignavas nescia ferre moras ,  
 Qua celerare gradum pectus juvenile jubebas  
 Magnorum referans dia reperta Viram .  
 Parvis ergo aliquid rebus si forte paratum est  
 Laudis , & horresco jam minus invidiam .  
 A te principium sumptum est , Menghine , la-  
 boris ,  
 Auspice te , stratam nunc quoque curro  
 viam .  
 Te sine nil mea mens molitur amore sciendi ,  
 Te sine nil urget , te sine nil peragit .*

Laudis amor, ad quam vel a prima aetate totis viribus Paganinus incubuit, ab eo obtinuit ut celebriores Germaniae Academias peragraret; & cum audivisset Othonem Gryphium, Paullum Bombergerum & Christophorum Vilcoverum, maximarumque rerum & plurimarum suavitate, copia, varietate pectus compleisset, locum in illustri aliquo Gymnasio aut speravit, aut cogitavit. Quod non parum studiorum suorum divinis rebus impertiverat, quorum causa non Graecam modo, sed & Hebraicam atque Chaldaeam linguas didi-

cit, coepit ad sanioris theologiae praecepta multa Haereticorum dogmata perpendere, eaque praviſſima reperit. Quae ſecum diſſeruerat communicavit cum homine catholico, huiusque cohortationibus deliberavit Calvinī ſectam, in qua doctus & altus fuerat, deferere. Is nulla re, nulloque praemio deterreri a propoſito potuit, & cum videret totam Rhaetiam ac Valtellinam miſere jaſtari ac lacerari Haereticorum immanitate atque perfidia, nihil tam deſteſtabile atque peſtiferum eſſe iudicavit, quam illorum ſequi partes atque errores. Multa & ipſe, cum ad ſuos rediiſſet, perpeti debuit ab illis omnium malorum ſeminatoribus, & ſpoliatus ſcriptis ſuis cum de vita quoque timeret, conſulentibus amicis & propinquis, ſolum vertere ſtatuit. Fuit aliquandiu in Inſubria, poſtea Romam venit, ſperans in urbe, in qua domicilium & ſedem doctrina & religio habere putantur, ſe poſſe fortunae ſuae conſulere. Sedebat tum ad catholicae Reipublicae gubernacula Paullus huius nominis v. qui cum doctrinarum, ſi unam excipias Juris prudentiam, rudis eſſet atque ignarus, non admodum magnis ingeniſis favebat; quin immo illi ſuſpecta

atque invisa esse videbantur. Nihilò tamen minus benigne & comiter ipse excepit Paganinum, cum audiisset a Mutio Vitelleschio, qui Jesuitarum familiae tum praeerat, illum deferuisse patriam, lares familiares, & munera satis ampla recusasse, ut in Ecclesiae catholicae castris militaret, & operam suam Romanis Pontificibus deferret. In parentis loco colebat Paganinus Vitelleschium, virum profecto cum paucis humanitate, dexteritate & prudentia comparandum, quo conciliatore, ad amicitiam accessit Bellarminii Cardinalis, Alexandri Pallavicinii ejusque filii Sfortiae, aliorumque nobilitate & doctrina praestantium virorum. Cum coepisset frequentare Humoristarum Academiam ceterosque litteratorum hominum coetus, qui tum maxime celebrabantur, statim cognita ejus doctrina est, & saepe a cuncto confessu plausus multiplex dabatur dicenti ex tempore de maximis gravissimisque quaestionibus. Cum de natura rerum, aut de humanis divinisque rebus loquebatur Paganinus, nullis prope terminis circumscribebat ac definiebat jus suum, quo minus sibi licere putaret magna facultate & copia vagari qua vellet. Quam-

obrem sic sentiebant omnes, multis illum esse artibus instructum, quibus ipsis, si in dicendo non utebatur, tamen apparebat utrum esset earum rudis, an didicisset. Quanquam fero ac leviter Graecas litteras attigisset, eas tamen sic tenere putabatur, ut earum tradendarum in Archigymnasio Romano munus illi assignatum fuerit. Et quia tum perpauci erant his studiis dediti, de eorum utilitate sic differebat, ut omnes, qui ad eum concurrebant, intelligerent magnam in iis esse vim ad eloquentiam & poesin, ad philosophiam omnemque sapientiam adipiscendam. Sane genus orationis adhibebat huiusmodi, quod multum discipulorum animos excitare atque inflammare debebat (fervidum enim erat, & interdum etiam furiosum); at illi plane deerat ille quasi sermo corporis, qui adeo in dicendo dominatur, hoc est actio, nec vocis varietates ac modos noverat. Studio autem nemo, neque industria maiore erat, ut nullum tempus illi unquam vacaret aut a legendo, aut a scribendo, aut a cogitando. Cum autem Pontifex Maximus factus fuisset Urbanus VIII., quo imperante ad dignitatis pristinae spem revocatae



tae litterae videbantur, de illo et Barberiniis omnibus sibi demerendis toto animo Paganinus cogitavit. Quoniam autem nullum genus litterarum aut nobilius, aut iis temporibus aptius videbatur rerum divinarum tractatione, quas praesertim excolebat Paganinus, quod ab iis ex diuturna perturbatione animi tanquam ad adspiciendam lucem se fuisse revocatum dicebat, opus edidit an. MDCXXV. *de dogmatibus & ritibus veteris Ecclesiae* duas in partes divisum, illudque ipsi Summo Pontifici nuncupavit. Ille vero & praeclara quidem multa attulit, & eam utilitatem, quam requirebat, ut, explicatis praecipuis catholicae Ecclesiae dogmatum capitibus, uno in conspectu poneret quid veteres Patres de iis docuerint, quidque his ipsis tribuerint doctissimi Calvinii sectatores, mirum in modum obtinuit. Sic praeteritam culpam, quod eorum sectae adhaeserit, videri voluit redemisse, & ad catholicae Religionis auxilium non cum bona voluntate nudus, sed cum facultatibus ingenii atque doctrinae accessisse. Quod tum ipsa scientia, tum etiam fidelitate & studio bonis omnibus se satisfecisse intelligebat, non mul-

to post aliud opus emisit, quod inscripsit: *Velitationes adversus Chamieri Panstratiam*. Hic Calvinistarum caussae dux, et quasi signifer aliquot iis temporibus volumina ediderat, quae idcirco *Panstratiam* appellavit, quia videri volebat diligentius atque accuratius de iis rebus, de quibus erat controversia Catholicos inter & Calvinistas, disputasse. Paganinus, cum duo priora volumina in manus sumpsisset, exarsit desiderio confutandi audaciam nocentissimi hominis; sed minime a se obtinere potuit, ut opus contexeret, cujus omnes partes inter se aptae colligataeque viderentur & essent. Perinde ac si esset levis armaturae prima excursio, modo hoc, modo illud argumentum adversarii nullo ordine refellit; sed quia hastae amentatae velitibus etiam trahebantur, has suas *velitationes* Auctor magno rationum pondere roboravit. Gloriatum se more patrio loqui, id est libere, & libertatem & doctrinam haud mediocrem prae se fert, dum vulgatam sacrorum librorum editionem, Ecclesiae & traditionum, ut loquimur, auctoritatem, & multa catholicorum dogmata atque instituta defendit. Quod in detegendis

Haereticorum machinationibus, eorumque furore atque petulantia contudenda se satis acutum & robustum arbitrabatur, alia plura hujusmodi scripta paraverat, quae ita compressit, ut illa emanatura speraret, quando meliori uteretur fortuna. Multum ingenii & virtutis, modice fortunae & temporum munera illum tangebant, quorum non tam facultatem unquam & copiam expetendam putavit, quam vel in utendo rationem, vel in carendo patientiam. Sed cum videret saepe otiosos et loquaces, raro doctos & eruditos donari praemiis amplissimis, confidentius de studiis & laboribus suis honestissimis loquebatur, quam hominem modestum decere videri possit. Ut meliora speraret, faciebant etiam cohortationes & commendationes Cassiani a Puteo, qui Peireskius Italicus ob miram industriam ac liberalitatem in excitandis hominibus ad laudis amorem merito appellabatur, Alexandri Pallavicinii, Joannis Ciamposii, Augustini Mascardii, aliorumque, quorum magnum tum erat nomen atque auctoritas, & cum quibus Paganinus ipse familiarissime vivebat. Quanquam haec magni facienda essent, cepit

tamen consilium non diutius in Urbe fortunae periculum facere, quae amica varietati respuere videtur constantiam; & suffragatoribus Mutio Vitelleschio atque Francisco Niccolinio Senatore amplissimo Florentino, quem Ferdinandus II. Magnus Etruriae Dux ad Summum Pontificem legatum miserat, obtinuit, ut in locum succederet Ludovici Scapinellii, qui quanquam luminibus semper caruerit, Pisis admirabiliter humaniores litteras docuerat. Accidit id an. MDCXXVIII. decennio postquam Gaudentius Romam venerat. Non tam illi gratum fuit muneris genus, & stipendium quingentorum centussium, quod illi assignatum fuit, quam jucunda commoratio in Etruria, in domicilio scilicet philosophiae & omnium nobiliorum artium atque disciplinarum, quae quidem eo magis florebant iis temporibus, quod Ferdinandus Magnus Dux nulli parcebat sumptui ac studio, cum esset ipse acerrimus ingeniorum aestimator, ad illas provehendas. Quod ei de statu suo, de Magni Ducis humanitate ita gratulatus sit Alexander Tassonius, ut Romanam aulam perstrinxerit, quasi in ea nullus virtuti esset locus, cum omnia avaritia occupasset, minime mira-

buntur ii, qui norunt libertatem loquendi hominis, cui maxime dolobat, quod Barberinios nunquam propitios habuisset (1). Tum quidem

## B 3

---

(1) *En epistolae exemplum datae VIII. kal. Decemb. an. MDCXXVIII. Eam primum vulgavit vir Clarissimus Tiraboschius, cum Tassonii vitam exposuisset in Bibliotheca, ut vocatur, Mutinensi.*

Gaudio gavisus sum magno valde alla ricevuta della vostra lettera e del trattato di V. S. veggendola finalmente uscita dagli stracci della Corte di Roma e dalle mani de' Barbari. V. S. canti in exitu Israel de Aegypto & de populo barbaro, perchè mi pare che faccia giusto a proposito per lei, che è stato tanto tempo imbarbarito per non dire imbarberinato. Ora V. S. si goderà i tordi e il Greco di Pisa in cotesta terra di promissionse, e lascerà le cipolle d' Egitto a que' poveri sfortunati, che fabbricano le piramidi nel deserto. Io fui nella mia gioventù a cotesto studio, e v'ebbi di molti amici e particolarmente Fiorentini; ma i Dottori di quel tempo ora sono tutti morti, e anche la maggior parte degli scolari. Ringrazio poi V. S. dell' onore che mi hà fatto in Fiorenza con quel Serenissimo Principe ne' ragionamenti che ha tenuti con lui, e la prego ad esser costì fautore e protettore dell' opere

Academia Pisana plena erat virorum doctorum, sic ut nulla tota Italia nec illustrior, nec frequentior dici posset, quapropter Paganinus omni cura sibi conandum putavit,

---

mie, come io all' incontro farò delle sue. Costi ella avrà campo d' esercitare il suo natural talento, che la fa appunto nata alla cattedra; ma V. S. non si addomestichi molto cogli scolari, e mantenghì la gravità magistrale per non essere disprezzato da loro, come al mio tempo interveniva al Dot. Talentoni da Fivizzano, che voleva far troppo del galantuomo, o del buon compagno, e gli scolari non lasciavonlo mai leggere. Qui il nostro (cioè *Lodovico Scapinelli*) si porta egregiamente. Non so come a Roma riesca il Mascardi. Lo Scioppio è tuttavia a Milano. V. S. gli scriva che ne avrà gusto, perchè egli ancora è uno di quelli che fanno quel concetto della Corte di Roma, che si fa di quella del Turco, dove chi non ha denari rimane escluso, e non può aspirare al titolo di Bassà. Noi ce la possiamo qui in Bologna come tanti scappati di galea, sebbene ci abbiamo trovata carestia d' ogni cosa quest' anno, eccetto che di Dottori e di pollami magri. De' Dottori se ne veggono le truppe per le strade come di

ut per se quoque studia recta ab optimis concelebrata enitescerent. Una atque altera oratione exposuit statim quid sentiret de universa eloquentia. Probavit enim sine graviorum artium instrumento, et multarum rerum, ac praesertim civilium usu & prudentia illam non posse existere. *Homerus*, ait ille, *ut sapientiae, sic eloquentiae parens duos memorat, quos prae oculis habeamus, si sapienter disertum esse volumus, Nestorem & Ulysses. Ex illius ore melle dulcior prodibat oratio. Hic ad excidium Trojanorum forte plus contulit lingua, quam Achilles gladio. Utrumque, quod multiplici usu in vita civili fuere instructi, multum eloquentia valuisse haud mirari debemus.*

## B 4

---

montoni, e i pollami sono assai a buon mercato, ma hanno la pipita, e potrebbero servire per lanterne. V.S. mi scriva spesso, ma non con carattere così da Principe, che mi dispero poi per intenderlo, e qui non ci è interprete nè di Ebraico, nè di Arabesco, Fra otto giorni ce ne andremo alle nozze di Parma a faginarci, e staremo là fino a Natale; e le bacio le mani.

Sane gaudebat Paganinus, quod & sibi onus impositum fuisset docendi historiam & politice, quia haec studia maxime conducunt ad noscendas hominum naturas voluntatesque, civitatum mores conversionesque rerum publicarum, et ad vitam, omnisque fortunae motum ratione quadam gubernandum, quae qui tenent, eos civilium rerum peritissimos judicare debemus. Profecto perpauci tum noverant artes, quibus fontes eloquentiae continentur: nam humaniores litterae tot vitiis contaminatae erant, ut omnem pristinam dignitatem amisisse viderentur. Sed Paganinus dum differebat satis perite de eloquentia, ab illa aberat plurimum; de ea perfecta loquor, quae ad elegantiam verborum adjungit oratoria ornamenta, quae tantopere in Demosthene, Isocrate, Cicerone aliisque hujusmodi oratoribus admiramur. Non ille semper pure & emendate loquitur, quamquam multum se studii tum in Latina, tum in Italica lingua posuisse affirmet; non utitur imaginibus agentibus, acribus, insignitis, non permovetur iis ipsis sensibus, ad quos auditores suos adducere vult, non tenet locos, quibus impetus animorum aut impellan-



tur, aut reflectantur, non inventa ordine ac momento quodam judicioque dispensat ac disponit, non semper ad rerum dignitatem apte & quasi decore dicit, modo inops est, modo nimium abundans, & saepe ab eo, quod sibi proposuit, minus opportune aberrat. Adde quod cum voce absonus, & vultu motuque corporis vastus & agrestis esset, etiam si ingenio valuisset, tamen in oratorum numerum venire non potuisset. Solemus quidem de iis artibus, in quibus non utilitas quaeritur necessaria, sed animi libera quaedam oblectatio, non diligenter modo, sed et prope fastidiose judicare, quapropter non multum consuluisset famae suae contendimus Paganinum, quod in lucem protulit omnes, quas Pisis habuit, Latinas orationes, quae si laudatae fuerunt iis temporibus, quibus emisit ipsas, nunc quidem pulvere oblitae paucis latent in bibliothecis. In hoc etiam se gloriose vires exercere suas arbitrabatur, cum ex tempore dicebat; & extemporalis quidem dictionis saepe in scriptis suis defensionem suscepit, quam magno cum plausu in Insubria, Romae & in Etruria se magnorum virorum exempla secutum adhibuisse affirmabat. Etsi au-

tem utile sit subito saepe dicere, praesertim in schola, tamen illud utilius, sumpto spatio ad cogitandum, paratius atque accuratius dicere; atque si diligentem et accuratam scriptiorem subitae et fortuitae praetulisset Paganinus, si opera polisset lima, si paucis contentus fuisset, profecto memoriam suam ab oblivione hominum vindicasset. Verum cum ipse abundaret doctrina & eruditione, nec mediocrem operam consumpsisset in omnibus iis artibus, quae ad humanitatem pertinent, in theologia atque in juris prudentia, cum facilis & expeditus esset ad scribendum, cum otio disfluere, multa & varia eodem tempore suscipiebat, sperans quo plures foetus procreasset, fore ut traduceret homines ad magnam sui admirationem. Prima, quae dixit Pisis, spectabant ad Tacitum, quem interpretans interiora & reconditiora politices praecepta se traditurum discipulis suis pollicebatur. De illo Diatribas etiam quasdam vulgavit, quod idem de Svetonio, ceterisque Augustae historiae scriptoribus se facturum spondit. Quam historiam ut magis magisque illustraret, separatim de Caesarum philosophia, ac studiis praesertim poeticis, de eo-

rum in judiciis ferendis consuetudine, peregrinationibus, actis, funeribus tractandum suscepit. Sed dum, uti diximus, in multa & varia intendebat animum, non omnia perficere potuit. De philosophia quidem Caesarum disseruit, cum omnium nobilissimae facultatis ortum, progressionemque a Numa usque ad Theodoricum, edito libello, exposuisset, quem tanti non esse merito iudicavit Jacobus Bruckerus, ut hoc adiumento indigeret ad suam philosophiae historiam contexendam. Sed gloriosum fuit formam operis adumbrasse, in quo sane maxima inesse poterat utilitas. Magni enim refert scire quid contulerint Principes ad scientiarum & artium incrementum, parvi quos triumphos egerint, quasque injurias calamitatesque populi intulerint. Quod Platonem maxime admirabatur Paganinus, et in illius scriptis legendis plurimum studii consumpserat, videbatur irasci iis, qui se esse Peripateticos profitebantur; quapropter ut audivit Leopoldum Medicum cogitare de restituenda Platonica Academia, quae tantam pepererat gloriam majoribus illius, ei gratias egit, et Pisani Gymnasii et totius Etruriae nomine gratulatus est. Quam

esset Platonicae philosophiae retinendae studiosus plurimis in locis ejus scripta declarant; quam esset vero Scholasticis adversus maxime ostendit, cum *de Aristoteleo veterum contemptu* librum vulgasset. Nihil praetermisit quin homines ab Aristotele avocaret; et dum in schola Lucretium interpretabatur, Democritum sic efferebat, ut ejus fontibus physicos omnes, sicuti ab Epicuro factum videmus, hortulos suos irrigare cuperet. Attigit et Pythagorea, *de animarum transmigratione* una atque altera dissertatione agens, ut se perfecte eruditum omni philosophica doctrina ostenderet. Saepe etiam quaerebat quae quasi semina philosophiae suis in scriptis sparsissent Ecclesiae Patres, et quae de Origenis dogmatibus cum Platonice conlatis, et de Tertulliano, loca quaedam ab Cerda et Rigaltio non satis animadversa explicans, vulgavit, doctorum hominum testimoniis laudata fuerunt. Plura etiam de Tertulliano litteris mandare decreverat, sed haec rudia reliquit, si illa excipias, quae *de vita Christianorum ante Constantini tempora* vulgavit, quae magna ex parte e Tertulliano deprompta sunt, in quo tanquam in speculo expressam imagi-

nem esse ajebat Christianae antiquitatis. Imitatus Pythagoreos, qui carminibus soliti erant et praecepta quaedam tradere, et mentes suas a cogitationum intentione traducere, spargebat libros Latinis versibus, quorum plura milia habes vel in solo opere *de Romanorum philosophiae historia*. Ferebat illa aetas hunc morem, et quod pauci tum discernebant quod rectum esset in oratione, laudabat Paganini Mufas, quae ex recordatione omnium temporum omniumque gestarum rerum depromebant carminum argumenta. Diligens hic investigator antiquitatis non modo philosophorum judicia, sed etiam somnia magni facere videbatur, et quae *de prodigiorum significatione* scripsit, fatis ejus credulitatem arguunt. Postquam homines minus creduli esse coeperunt, cum risu narrabant levissima ejus auguria rerum futurarum, et quae habebat signa, quae observaret, ominis capiendi causa. Si quid hujusmodi offendisset, cum pedem efferebat aedibus, intro statim redibat malus infortunii augur. Laudavit, quod sane miraberis, ejus discipulus Franciscus Reditus dicta ab eo in schola de mon-

stris et prodigiis (1) an. MDCXLVI., sed tum Redius aberat plurimum ab illa perfecta philosophia, atque poesi, quibus postea immortalitatem est consecutus. Plura persequi de editis a Paganino libris, quorum index erit in extremo commentariolo, prohibet timor, ne quid injucunditatis habeat narratio. In quibusdam enim eorum ita confusa est materies, ita perturbata, tantae sunt digressiones a proposito, tantae opinionum levitates, ut omnino carere videantur judicio illo polito et limato, sine quo in scriptis nihil quicquam egregium. Nihilo tamen minus is iniquus esset, qui Paga-

- 
- (1) Madrigale di Francesco Redi all' Eccellentissimo Paganino Gaudenzio per il suo eruditissimo discorso de' mostri e de' prodigi dell' an. 1646.

Fra' tuoni d' eloquenza oh ! come bene  
 Con amabil ferezza a noi dimostri  
 Dai prodigi e dai mostri  
 Ciò che sperar, ciò che temer conviene.  
 Nè maraviglia prenda  
 Chi te di lor gran dicitore intenda.  
 Tu discorrer ne dei,  
 Che di saper sì nobil mostro fei :

nino non concederet multam eruditionis vim, qua fiebat ut magna de eo effet opinio non Pisis modo et in Etruria, sed etiam apud abfentes. Cum veniffent aliquando Pifas Joannes Fridericus Gronovius, Ifaacus Voffius, et Joannes Priceus, plures hic dies commorati funt, ut Paganini confuetudine fruerentur, cui uni tribuebant plurimum. Ab Henrico Spondano, a Sigifmundo Boldonio, ab Antonio Quaerengio, a Guafparre Scioppio aliifque tum Italis, tum exteris doctiffimis viris, quos fingulos commemorare minime eft neceffe, multas amoris declarationes habuit. Quanta vero benignitas in illum Ferdinandi II. Magni Etruriae Ducis! Aderat faepe Paganinus ejus menfae cum magni nominis Medicis Stephano Roderico Caftrenfi, et Julio Guaftavino, et valde jucundum erat Principi omnis praeclarae artis studiosiffimo audire hominem promptum ad refpondendum de quacumque, quae poneretur, quaefitione. Magni etiam facere videbatur Ferdinandus illius judicia de viris doctrina excellentibus; et merito quidem, cum ex illius difsertatione *de Scriptoribus a Politices studiosis legendis*, quae extat in libro *de evulgatis*

*Romani Imperii arcanis* conjici possit fuisse illum sapientissimum judicem. Neque illius iudicia ulla aut malevolentia, aut invidia suffusa erant; quamquam nunquam sibi praecidebat libertatem dicendi quae sentiret. *Aliae nationes*, aiebat ille, *servitutem pati possunt, populi Rhaetici est propria libertas, quam dum vivam retinebo*. Erat et in eo virtus & probitas, & summi officium & summa observantia erga Mediceos omnes, ut testatus est, qui tum Academiae Pisanae praeerat (1) qui virtutis amor efficiebat, ut illorum consuetudinem vitaret, qui ab illa deerrasse putabantur. *Cur mihi vitio dant nonnulli humunciones* (inquit) *quod non patiar esse vitiosos eos, quibuscum confabulor, quibuscum deambulo in Gymnasio, ad Arnum, aut quibuscum in Bibliopoliis sto, aut sedeo?* Aequi sane homines ei laudi da-

---

(1) Quae de Paganino memoriae prodiderunt tum Hieronymus a Sommaja, tum Alexander Minerbettus, qui, illo docente, praesuerunt Academiae Pisanae, hoc loco exscribemus.



dabant, quod discipulis cohortationibus suis non modo ad studium cognoscendae doctrinae, sed etiam exercendae virtutis concitaret atque inflammaret, eique gloriosum fuit habuisse plu-

*T. XIV.*

C

An. 1632. Informazione di Monsignore Girolamo da Sommaia

Paganino Gaudenzio Grigione Umanista con scudi 500. Ha dieci anni di dottorato, e fu condotto a Pisa nell'anno 1628. E' uomo di circa a 40<sup>3</sup> anni. Non ha altro gusto, che studiare, nè altro passatempo, che comporre. Di quel nasce, che ha così gran facilità nel fare una lezione, o orazione all'improvviso, che non spende neppure un' ora, e ci farà materia per due. Lesse in Roma in Studio lingua Greca. Ha notizia non piccola dell'Ebraica, Araba, e Caldea. E' praticissimo degli scrittori Ecclesiastici, Concilj e Riti antichi. Ha ottima notizia delle Istorie antiche e moderne, e particolarmente delle Romane. Ha stampate molte operette, e molte ne ha in pronto, e ne v'è meditando; e se le lima un poco, come promette, si crede siano per dargli grandissima riputazione. Vive alquanto alla filosofa, è però d'ottimi costumi, e di ardenza grande. La fatica è suo continuo commensale. La maniera del porgere

rimos omnium sermone celebratissimos, inter quos honoris causa nominare lubet Julium Rospiliosum, qui Pontificatu Maximo dignus inventus est. Gratus erga auctores salutis & for-

---

non solo le erudizioni, ma anco le dispute, e dei discorsi pubblici, potria esser migliore, e non sì ruvida, ed impetuosa, che lo rende poco grato, ed alcune volte quasi ridicolo. Però si va mitigando. In somma è un misto di molte parti degne di gran lode, e di alcune degne di non piccola compassione. E' gratissimo al Generale de' Gesuiti.

Anno 1649. Informazione di Monsignore Alessandro Minerbetti.

Serenissimo Gran Duca.

Paganino Gaudenzio della Rezia fu negli anni della sua gioventù negli errori dell'eresia, ma conosciuta poi la verità, con generoso rifiuto di onorevoli impieghi, e grossi stipendj, che gli offerivano quelle Genti della Rezia, passò alla fede cattolica. Si trattenne in Roma poco tempo, d' onde

tunae suae saepe et libenter de iis praedicabat Paganinus; verum quamquam in largitione laudum interdum effusus esset, minime tamen a se obtinere poterat, ut ad aliorum vo-

C 3

---

venne chiamato dalla pietà, e liberalità di V. A. R. alla cattedra delle lettere umane in questo studio di Pisa con stipendio di 500. scudi. Ha letto molti anni continui, essendo stato tenuto non solo nell'Italia, ma dagl' Oltramontani ancora uno dei più celebri Letterati della nostra città. Non enno da lodare la sua letteratura, perchè è notissima; dico bene che nel tempo, che ho avuto occasione di trattar seco, ho sempre scorto in lui sentimenti di un obbligo infinito, e una somma reverenza verso V. A., e di tutta la Serenissima Casa; e ne avrebbe forse data alle stampe qualche notabile testimonianza, se non fosse stato sopraggiunto dalla morte in età fresca ancora, e proporzionata appunto ai parti migliori degl' ingegni per l'immortalità. Morì nel 1648., avendo fatto in quest'anno il corso delle lezioni della prima terzaia, nel qual caso non mancano esempi che la liberalità di V. A. ha fatto grazia agli Eredi dei Lettori benemeriti di questo Studio dello stipendio di tutta l'annata.

luntatem loqueretur, cujus rei haec indicia esse poterunt. Amabat Jesuitas et pro illorum

---

*Singularis Paganini studii in Mediceos Principes, cujus mentionem fecit Minerbettus, plurima sane extant monumenta in ejus editis operibus. Ex his unum exscribere lubet carmen satis molle & tenerum de obitu Francisci Medicei Ferdinandi II. Fratris, qui in flore juventae gloriose occubuit, dum Ratisbona a Caesareis obsidebatur.*

Omnia nunc arent, nunc sicco in pulvere Nymphae  
Languidulae latitant.  
Dum canis allatrat campos, saeviqne leonis  
Cauda flagellat agros,  
Floriferis gratus pratis subducitur humor,  
Floraque deflet opes.  
Frustra quaeruntur flores in vallibus imis.  
Quid facies tumulo,  
Si defunt violae cum purpureo narcisso,  
Idaliaque rosa?  
Scilicet ut cecidit Tuscae flos inclitus aulae,  
Omne decus periit,  
Quo pallent violae, quo candida lilia vernant,  
Quo rosa pulchra rubet.

merito, & pro maximis, quibus erat illis obstrictus beneficiis. Ili soliti large liberaliterque aestimare quidquid a suis prodibat, de Famiano Strada sic praedicabant non esse historicum unum ex multis, sed potius inter multos singularem, ut vel ipsi Livio esset praeferendus. Itaque, ut audierunt Paganinum emissurum Diatribas suas ad Famianeam historiam & in Tacitum, vehementissime ab eo petierunt, ne quid vulgaret quod suorum dictis adversaretur. Sed ipse minime in eo se exorari sivit, in quo adulator videri potuisset, & ea de Famiano protulit, quibus probavit, ipsam tantum differre a Livio, quantum differunt mediocres a summis viris, nec semper vera dixisse. Graviter haec tulerunt Jesuitae, sed ipse in omnibus suis dictis & factis hoc spectabat unum, quod rationi & aequitati congrueret, non quod alii laudaturi essent. Hinc factum, ut vel in magna gloria multorum animos habuerit inimicos & invidos, quos neque officiis, neque blandimentis homo oratione & moribus durus leniebat. Inflammabat etiam interdum arroganti suarum laudum praedicatione, & acerba accusatione eorum, 20

praefertim collegarum (1), quos infra se labore & celeritate in conficiendis operibus esse putabat. Si illum audivisses, tam bonus erat Italicus Poeta, ut cum Petrarcha contendere posset; & miror equidem, cum vix tolerabilia carmina panderet, Apollinari laurea aliquando illum donatum fuisse, dum

---

(1) *Hæc sane valebant ad excitandum collegarum odium atque invidiam. Ait enim, postquam nunc-ravit libros a se editos, dum Pisis docuit, in ejusmodi operibus subinde leguntur, quæ faciunt ad gloriam Etruscae nationis, ac praefertim ad laudes Serenissimorum Etruriæ Magnorum Ducum Principumque. Ita dum Professores Gymnasii Pisani plerique omnes indigenæ & Tusci aliis curis incumbunt, & a componendis evulgandisque libris abstinent, unus externus apud Rhætos natus suum studium suamque observantiam hac ratione Serenissimo Ferdinando II. Domino benignissimo probare satagit, jubetque in ventos ire garrulorum, tenebrionum & ignotorum hominum non hominum voces, quibus ostendunt se dolere ab alio praestari, ad quod ipsi prae hebete tardaue socordia & animi imbecillitate aspirare nequeunt.*

Florentiae erat apud Scipionem Capponium (1) sed hoc condonandum temporum infelicitati. Quod tamen erat satis a philosophia, optimeque a jure civili, & ab historia instructus, munus aliquando habuit ab Academiae Curiatoribus jus feudale, ut loquimur, extra ordinem explicandi, & de illius origine quaedam vulgavit. Haec omnia in instrumento & supellectili Paganini numerabantur, quae ut consequeretur, tantum evigilavit in studio, ut nemo illi par industria, & in labore ferendo constantia poneretur. Carmine quodam Latino Sfortiae Pallavicinio totam rationem vitae suae

## C 4

---

(1) Ita ille in libro, quem inscripsit; La Galleria del' Inclito Marino. Io ho sentito più volte con mio gran gusto il Lenzoni, il Cicognini, il Malatesta, Piero Strozzi, Marco Lamberti, i quali due nell'an. 1635. essendo io stato coronato poeta dal Sig. Marchese Scipion Capponi dopo un solenne banchetto, nel quale si trovò il fiore della gioventù e nobiltà Fiorentina, entrando in carrozza dell'istesso Sig. Marchese per farmi honore improvvisarono sopra tal laurea fin a casa mia, alla quale la cortesia di quel Signore mi condusse.

exposuit, ex quo apparet suavissimum illi fuisse pastum vigilias & labores, fuisseque eundem hac indole virtutis & continentiae, ut respueretur omnes voluptates atque leviora consuetudinem. Quoniam igitur omnes illius carae cogitationesque in vero exquirendo & in officiis magistri exequendis semper versatae sunt, dignum factis exitum ejus vita habuit. Sancte enim mortem obivit. III. Non. Jan. an. MDCXXXVIII., ejusque cadaver conditum fuit in sepulcreto Pisano, quod Campum Sanctum dicimus, cum hac inscriptione, quam fecit Bartholomaeus Chesius Juris consultus, collegae amicissimi morti illacrimans.

D. O. M.

*Paganino Gaudentio Pesclaviensi incliti nominis Philosopho, Theologo, I. V. Cons. probitate naturali, ingenuitate, studio Reip. praedito ad exemplum; humanioribus vero litteris & politice ad invidiam, quas in Pisano Gymnasio per annos XXI. professus exterius multos ad se vocante fama pertractos, praesenti eruditione obruit, posteros, eâto multiplici volumine, locupletavit, editurus*



*plura si dies adfuisset, qui de re quacumque  
consultus indeficientem pandebat ex tempore  
dissertationis doctissimae venam, de se tan-  
tum parvus. Sic habens fato propinquus &  
quasi praescius*

*Rhetia me genuit, docuit Germania, Roma  
Detinuit, nunc audit Etruria culta docentem.*

*Obiit Pisis impavidus an. D. MD. D. CIL.  
tertio non. Jan. natus an. LIII. Bartholomeus  
Chesius Pis. I. C. & in Pis. Gymnasio J.  
Civ. Ord. Professor executor testamentarius  
tantam literarum jacturam deplorans*

*P.*

- De dogmatibus & ritibus veteris Ecclesiae. Haereticorum hujus temporis & praesertim Calvinianorum testimonia, quibus pleraeque illorum haereses confutantur collecta a Paganino Gaudentio sacr. Theol. Doct. Romae typis Francisci Corbelletti 1625. in 84 . . . . . Pars altera Romae apud eundem 1626. Paganini Gaudentii S. Theol. Doct. & Protonot. Apost. adversus Danielis Chamieri Panstratiam velitationum Pars I. Romae typis Francisci Corbelletti 1627. in 8. parvo.
- Ad Dissertationem Academicam de Cauponibus Fa-  
mae Appendix. Romae 1628. in 8.
- Excursio duplex I. in obitum V. cl. Hieronymi Aleandri II. Politico-litteraria. Pisus 1629. in 8.
- Paganini Gaudentii &c. Declamationes VIII. extra ordinem habitae an. 1629. Florentiae apud Simonem Ciottum 1630. in 4. *Sunt autem hujusmodi:*  
I. de ratione consequendi eloquentiam per multiplicem usum in vita civili. II. de nobilitate. III. de Jubilaeo. IV. de causis ruinae Imperii Romani V. de praesidiis memoriae VI. de triplici catena. VII. de augmento magnorum Imperiorum VIII. de triplici mutatione rerum Romanorum.
- Expositionum juridicarum libri duo, quibus etiam Tacito, Svetonio aliisque lux conciliatur cum additamento critico, auctore Paganino Gaudentio in Gymn. Pis. Juris civilis interprete, Florentiae

ex typographia Sermartelliana 1631. in 8. *Cœpiss Paganinus res civiles tractare, postquam an. 1630. ut ipse ait, explicatione Feudorum extra ordinem honestatus est. Magnam in eo sane laudem meretur, quod & voce & scriptis docebat discipulos suos, necessariam esse notitiam Romanae antiquitatis ad Juris prudentiam assequendam.*

Considerazioni Accademiche, Firenze 1631. in 8.

Della Peste discorso Accademico, Firenze 1631. in 4. *De peste etiam, quae fuit magna an. 1630. carmen scripsit, inde sumens carminis argumentum, quod sparsus fuerat rumor se illa obiisse.*

De Illustrissimo & Rever. Giuliano Archiepiscopo Pisarum, Sardiniae & Corsicae Primate, & de Ill. Joanne Marco S. Angeli Raphaelis Medicis filius fratribus germanis, Pisis 1631. in 4.

La Fortuna pentita, ottave di Paganino Gaudenzio nell' Accademia de' Disfiniti, Pisa 1633. in 4.

Origine di Pisa. Ottave di Pag. Gaud. Pisa 1634. in 4.

Contraddizione morale intorno al sospetto. Discorso nella morte del già Generalissimo Valslein. Pisa 1634.

Orazione funebre in lode del Dot. Cammillo Accarigi Senese, Lettor delle pandette nello studio di Pisa. Pisa 1634. in 4.

Orationes XIV. Pisis apud Franciscum de Dotibus 1634.

Confini regolati, Esercitazione istorica e politica, In

Pisa per Francesco Tanagli &c. 1634. in 4. *Plura hoc loco de Deo Termino exponuntur.*

Rerum Germanicarum conversio an. 1633. mense Octobri, Ratisbona capta & recepta. Florentiae 1635. in 4.

Accademia Disunita del Dot. Paganino Gaudenzio pubblico Professor di Politica ed Istoria nello studio di Pisa. In Pisa appresso Francesco Tanagli 1635. in 4. *Tum erat Pisis Academia, cui nomen Disunita, quam cum frequentaret Paganinus, dixit in ea, quae in hoc libro continentur, dissertationes, quarum aliae ad philosophiam, aliae ad ethicam, aliae ad antiquitatem, aliae ad poësin, & aliae ad historiam pertinent. Ex his apparet se exercuisse in Etrusca lingua scribenda, & voluisse scriptores, qui in ea excellere putabantur. Anno 1644. vulgavit aliud opus, cui titulus*

*L' Accrescimento dell' Accademia Disunita.*

De Justiniani saeculi moribus nonnullis liber, Florentiae typis novis Amatoris Massiac & Soc. 1637. in 4. *Editus iterum fuit Argentorati 1654. in 8. cum Dissertatione Auctoris de successione foeminarum.*

Chartae Palantes, in quibus Oratoria & Poetica sic exercetur, ut multiplex rerum cognitio exhibeatur a Paganino Gaudenzio I. C. publico eloquentiae Professore. Florentiae typis novis Amatoris Massae & soc. 1638. in 4. *Sunt varii argumenti Dissertationes, quarum hic est index.*

- I. An S. Marcus Evangelium scripserit Latine ?  
Salmasii aliorumque confirmat sententiam, qui as-  
firmarunt Evangelium secundum Marcum Romana  
lingua scriptum fuisse.
- II. Narrationes de rerum Germanicarum conversione  
An. 1633. mens. Octob de Ratisbona expugnata,  
de eadem recuperata.
- III. De renovandis studiis Praefatio in Gymnasio  
Pisano recitata in magna Aula an. 1630. kal.  
nov. cum contagio lacefferet urbem.
- IV. De Epidauro Liburniae & Peloponnesi, de Ra-  
gusio & Ragusina Republica Dissertatio. *Exara-  
verat carmen in obitum Thomae Cellefii Archiepi-  
scopi Ragusini, atque hinc occasionem sumpsit de  
Epidauro differendi. Probare nititur Liburnicam ve-  
terum Epidaurum esse Ragusium. In Peloponneso  
quoque duas fuisse Epidauros probat.*
- V. In natalem Magni Etruriae Ducis Ferdinandi II.  
qui incidit in Festum S. Bonaventurae narratio  
an. 1630.
- VI. Ferdinandus Intrepidus, sive de praesentia Ma-  
gni Ducis cum Florentiae glisceret pestis. Dictio  
lecta Pisus inter amicos. *Quaeritur praecipue, an  
saeviente contagione deceat Principem degere &  
manere in primaria urbe, sive metropoli.*
- VII. Docti laboris defensio, oratio habita Pisus in  
instauratione studiorum an. 1632.
- VIII. Luctus Academicus, sive oratio in funere reli-  
giosissimi viri Henrici Antonii Burgi Novoca-

- strensis Ord. Serv. B. V. Generalis, & Theologiae in celeberrimo Gymnasio Pisano Professoris eximii, habita Pisis in Aede S. Antonii Ord. Serv.
- IX. De barbarie depellenda, Oratio habita in majori auditorio kal. Novembris 1633.
- X. Praefens discessus, Gratulatio cum Antonius Curinus Eques, juris Civilis in Gymnasio Pisano ordinarius Professor, nunc vero amplissimus Auditor Camerae Fiscalis Magni Ducis Consiliarius renuntiatus fuisset.
- XI. De Eminentissimo Card. Oreggi dignitate ad ipsum gratulatio.
- XII. In laudem Johannis Caroli Coppolae eximii poetae excursus.
- XIII. De Platonica Academia Serenissimi Principis Leopoldi ab Etruria Nuncius allatus Cal. Nov. in magna Aula celeberrimi Gymnasii Pisani.
- XIV. De gloria Gymnasii Pisani Oratio habita Cal. Novemb. 1636.
- XV. Carmina varia.
- De discessu Margaritae Costae Roma, Elegia, Florentiae 1638. in 4. *Extat haec, ut & extemporalis conversio ejusdem in Italicam poësin facta, ut ait, per ludum in Galleria del Marino.*
- De Prodigiorum significatione liber Paganini Gaudentii Theol. & I. C. in Gymnasio Pisano e prima sede eloquentiam profitentis. Florentiae typis novis Amatoris Massae & Soc. 1638. in 8.

Obstetrix litteraria, sive de componendis & evulgan-  
dis libris Dissertationes & epigrammata nova;  
Florentiae apud eundem 1638. in 4. *Constat li-  
ber Dissertationibus XI. quarum haec sunt argu-  
menta.*

I. De litterarum emolumento.

II. De calore extemporalis.

III. De diuturna meditatione.

IV. De consanguinitate disciplinarum.

V. De obscuritate in scribendo.

VI. De exquirendo amicorum iudicio.

VII. De magnorum virorum imitatione

VIII. De recitatorum quorundam consuetudine  
apud Romanos.

IX. De fructu ex recitationibus colligendo.

X. De librorum jam editorum retractatione.

XI. Inepti libri quomodo supprimantur.

Epigrammata nova. Florentiae &c. in 4.

Academicum instar, in quo ex multigena disciplina  
non pauca strictim enarrantur a Paganino &c.  
varia carmina de iisdem aut similibus argumentis  
inferuntur. Florentiae &c. 1639. in 4. *Quae in  
hoc libro continentur omnia fere Pipsis dixerat.  
En indicem eorum.*

I. In obitu Serenissimae Mariae Magdalenae Magnae  
Ducis Etruriae, Archiducis Austriae allocutio.

II. De eruditione cum doctrina conjungenda.

III. De diligentia veterum in excolendis disciplinis,  
Oratio habita Pipsis 1634.

- IV. De promptitudine Professoria, Prolusio umbra-  
tica.
- V. De librorum delectu, Scholastica dictio.
- VI. De causis immutatae Juris prudentiae, Recitatio  
ad juris studiosos.
- VII. Pro Justiniano Imperatore Expostulatio.
- VIII. De laudibus Germanici Caesaris, Disserta-  
tiuncula.
- IX. In quaedam dicta Sallustii philosophi specie re-  
pugnantia, Declamatoria animadversio.
- X. De Juris Romani circuitu, Enarratio.
- XI. An Imperator sit Dominus totius mundi?
- XII. De origine Feudorum a Longobardis repe-  
tenda.
- XIII. De Mariniana poesi apologetica Oratio.
- XIV. De vario oculorum motu Dissertatio.
- XV. De paranda eloquentia.
- XVI. De ortu & interitu nobilitatis.
- XVII. De praefidiis memoriae.
- XVIII. De Jubilaeo.
- XIX. Catena triplex Homérica, Paulina & Hercules.
- XX. De tribus mutationibus rerum Romanarum.
- XXI. De inclinatione Imperii Romani.
- XXII. De augmento Imperiorum.
- XXIII. De cognoscendis saeculorum vitiis.
- XXIV. De irritamentis sensuum.
- XXV. De admirandis fluviorum.
- XXVI. De pace Italiae an. 1631.
- XXVII. Latina carmina

Ad



Ad antiquitates Etrufcas , quas Volaterrae nuper de-  
derunt, observationes , in quibus difquifitionis A-  
ftronomicae de Etrufcarum antiquitatum fragmen-  
tis auctor quoque notatur. Amftelod. 1639. *Sunt  
qui tribuunt Gaudentio opus quod infcribitur*

Bennonis Durkhundurki Slavī, Academici Sepulti e-  
piftola pro antiquitatibus Etrufcis Inghiramiis ad-  
versus Leonis Allatii contra eafdem animadverfio-  
nes Examen. Coloniae 1641.

Dell' anno fecolare folennemente celebrato in Roma  
da' PP. della Compagnia di Gesù nell'an. 1639.  
Lettera di Ventidio Gongazano Gentiluomo e Ac-  
cademico Ricovrato di Padova in 8.

De Evulgatis Romani Imperiī arcanis, iis praeci-  
pue, quae ad electionem & fucceffionem Impera-  
torum faciunt, Digreffio habita Pifis an. 1640 in  
magna Aula a Paganino &c. cum interpretaretur  
Tacitum. Florentiae typis Amatoris Maſſae &  
Laurentii de Landis 1640. Accedunt Diſſertatio-  
nes I. de Funere Heroum. II. de Funere Caefa-  
rum. III. La ſingularità delle Guerre di Germa-  
nia. *Extant etiam in hoc libro*, Diatriba de he-  
roica praefantia Jul. Caefaris Scaligeri, in qua  
quaeritur I. An Scaliger ediderit de vita ſua epi-  
ſtolam? II. An ſi eam edidiſſet foret culpandus?  
III. An inter Senatorii ordinis homines ſit recen-  
ſendus? IV. An Heros cenſendus? V. An &  
quatenus cum Maſſiniſſa & Xenophonte compara-  
ri queat? Diatriba hiftorica de Caefare Cremoni

*T. XIV.*

**D**

no, Julio Pacio, & Joanne Barclaio, & Dissertatio de Scriptoribus a Politices studiosis legendis. Quae ipse dixit de Platone, de Thucydide, de Polybio, de Plutarcho, de Tacito, de Bodino, de Arniseo, de Launovio, de Lipsio, de Bentivolo, aliisque, sapientem illum fuisse existimatores alienorum operum declarant.

De comparatione Dogmatum Origenis cum Philosophia Platonis, & Salebrae Tertullianae, quas complanare conatus est Paganinus Gaudentius. De vita Christianorum ante tempora Constantini. Florentiae typis Amatoris Massae & Soc. 1641. in 4. Non levia & inerudita retulit Paganinus de illis, quos commemoravimus, Scriptoribus. Egit quoque accurate de damnatione Origenis facta in V. & VI. Synodo, & reprehendit Picum Mirandulanum & quosdam Parisienses theologos, qui ausi fuerant illum a culpa haereseos defendere. Laudat illud Justiniani Imperatoris dictum. Quid aliud exposuit Origenes, quam Platonis, qui Paganorum insaniam dilatarat, doctrinam? Etsi autem (inquit Paganinus) in multis senserit cum Platone Origenes, non tamen voluit videri sua dogmata a Platone hausisse. Depromebat ex sacra scriptura dicta, quibus suas muniret sententias; Hinc adeo factum, ut cum Platoniceis opinionibus conjunxerit ea, de quibus Plato ne quidem somniando cogitavit. Non sibi vero insolenter gloriari videbatur Paganinus, quod primus sensus quosdam Ter-

*tulliani obscuros explicaverit. Pauca quae tum in lucem protulit veluti ex naufragio quodam erepta fuerunt. Ait enim magnum se fecisse, dum in Rhætia erat, scriptorum suorum detrimentum, & inter aetera surreptas sibi fuisse a furenti populo laboriosas enarrationes, quas in totum prope Tertullianum fecerat. Multa & paraverat de Conciliis, quae non edidit.*

**De Pythagorea Animarum transmigratione opusculum;** accedunt exercitationes I. de Aristoteleo veterum contemptu, II. de Juliani Imperatoris philosophia, III. de Aperipato Julii Caesaris Scaligeri. IV. Reintegrazione de' Poeti opposta a Platone, Pisis typis Amatoris Massae & Laurentii de Landis 1641. in 4. *Extat etiam in hoc libro.* Discorso se l'anno del 1640. chiamar si deva fortunato • fortunevole. *Ex eo liquet quantum astrologiae tribueret Paganinus*

**Di Cleopatra Regina d' Egitto la vita considerata** da Paganino Gaudentio, e poi dall' istesso riletta con non piccola varietà di cose tanto moderne quanto antiche, in Pisa 1642. nella stamperia di Amador Massa e Lorenzo Landi in 4.

**De Philosophiae apud Romanos initio & progressu** Paganini Gaudentii volumen, in quo praeter historiam multa ad contemplationem rerum & diffidentes veterum sapientum scholas facientia enarrantur. Pisis typis Amatoris Massae & Laurentii de Landis 1643. in 4. *Hic liber a nonnullis di-*

*citur rarissimus, & praeferrì videtur ceteris Paganini operibus. Hujus epitomen extat in Tom. III. Observationum selectarum, qui editus est Halae 1703.*

Della Peregrinazione Filosofica, in Pisa, 1644. presso Amador Massa e Lor. Landi

De Errore Labyrintho Sectariorum hujus temporis. Conatus in Genesim divinam novus. De philosophicis opinionibus veterum Ecclesiae Patrum Opuscula tria, Pisis apud eosdem 1644.

La vita d'Alessandro il Grande in Pisa &c. 1645.

Diatribae ad Famianeam historiam & in Tacitum. Pisis ex typographia Philippi Papinii 1646. in 4. *Inscripsit etiam hoc opus de Candore Politico.*

De' non fausti segni dell'anno 1646. Della felicità, dell'anno 1647. Discorsi.

Del seguitar la corte o no, Operetta, in Pisa 1647.

Della morte di S. Giovanni Evangelista discorsi due recitati nell'Accademia Helicea di Pisa. In Pisa 1647.

Galeazzo Tirrene: Acclamazione al Ser. Gran Duca di Toscana Ferdinando II.

La Galleria dell'inclito Marino considerata vien dal Paganino con alcune composizioni dell'istesso Paganino. In Pisa per Ferdinando Chelli e Francesco Stefanelli 1648. in 8. *Saepe corrigit Marinium, quem aut male, aut non satis prudenter judicasse putabat in sua pinacotheca de quibusdam viris doctrina excellentibus. Addidit libro binas funebres orationes, quarum altera Latina est in obitum Hierony-*

*mi Aleandri, altera Italice in morte di Camillo Accarigi, nec non varia Italica carmina.*

*Vereor ne quid mihi effugerit in signandis Paganini operibus. Optare se aiebat Chr. Thomassus, ut scripta hominis eruditione summa conjunctim ederentur (Specimen Juris Prudentiae Universalis pag. 107.) quod ad laudem illius, quamquam alii aliter judicent, sane non mediocriter facit. Multa & paraverat ad illustrandum Lucretium, Martialem aliosque Latinos poetas, Dantem etiam, quae se editurum spononderat, quod tamen minime praestitit. Sunt qui narrant Ferdinandum II. ut facilius quae paraverat ipse edere posset, potestatem ei dedisse domestici typographii. Nihil sane non ei indulgit Princeps litteratorum omnium fautor eximius.*

## ANGELUS FABRONIUS

IO. ALEXANDRO BRAMBILLAE  
VINDOBONENSIS ACADEMIAE MEDICO-  
CHIRURGICAE PRAESIDI.

S. P. D.

**E** *St profecto Italiae nostrae gloriosum, quod excussa jam superiorum saeculorum barbarie, ipsa omnium prima optimarum artium vias tradiderit, quodque in ea multi & ingeniis & dicendi & intelligendi laude floruerint, quando ceterae nationes harum rerum omnium rudes atque ignarae esse videbantur. Ex quo tempore physica studia, quae experientiam ducem & magistram sequuntur, apud nos in honore esse coeperunt, nova, ut ita dicam, creata est medicina, quae plerumque aegris prodesset. nunquam, aut perquam raro noceret. In quam intuenti maxime occurrit & quasi luces Etruria nostra, qua in regione primum*

*se extulit experimentalis, ut vocatur, philosophia, primumque etiam monumentis & litteris ejus inventa sunt coepta mandari; & hoc quasi gradu quodam jacto ad veram medicinam, sive illa arte pariatur aliqua, sive exercitatione quadam, multi, praeunte omnibus viro prope divino Francisco Redio, impulsī atque incensī sunt ad noscendam rerum naturalium vim & proprietates, & ad consulendum vitae hominum paucis, veris, & simplicibus remediis. Sunt quaedam artes, quae se ipsas per se tueantur, sed medicina pluribus eget, atque has nisi gubernaverit peracris prudentia, quae ratione & experientia debet delectum habere bonorum & malorum, periculum ab iis constabitur, a quibus parari sibi subsidia posse speraverat. Nemo profecto dubitabit, quin chemia, ut unam rem exempli causa ponamus, utilis futura sit medicinae; nihilo tamen minus multo plures animas illa spopondisse orco videtur, quam sanitati redditura sit aegra corpora, & qui ipsi magnopere confidunt, nesciunt quidem quam paucis, & quam simplicibus natura gaudeat remediis. Ea quae composita dicun-*

*tur, si perpauca excipias, bene assimilaveris furialibus monstris, quibus sunt*

Nomina mille, mille nocendi artes,

*ut non dubium sit, quin melius sanitati hominum consultum foret, si illa prorsus ignorarentur. Vox quaedam naturae esse videtur, quam pauci auscultant, ut quemadmodum ad valetudinem tuendam praefenda est potus & cibi simplicitas, sic ad amissam recuperandam potiora haberi debeant simplicia, quam composita remedia. Postquam Hippocrates divino prorsus, quo praeditus erat, ingenio, & observatione diuturna notandis rebus medicam fecit artem, aut quod ipsi deerat, explevit, homines novitatis cupidi, quasi ad majora illos fortuna destinasset, extraordinariis multiplicibusque remediis, depravatisque opinionibus tam bene fundatam artem everterunt, ut nullum amplius naturae lumen in ipsa appareret; quod malum magis quoque crevit, cum eadem in manus Arabum pervenit. Quanto in honore fuerit apud veteres Graecos simplicior,*



feu quod idem esse puto, salubrior medendi ratio, ex iis Homericis versibus conjici potest, quibus describitur *Helena* medicamen parans *Menelao* atque *Telemacho* ad consopriendas graves curas, quas illis longa & laboriosa peregrinatio attulerat. Nihil enim illa in *Nepenthes* infudit, nisi radicem *Oenopiae*, qua planta in *Aegypto* a *Polydamna Theonis Regis* uxore donata fuerat (1). Contra ea *Virgilius*, cujus aevo vix ulla erat apud *Latinos* *Graecorum* medicinae effigies, dum medicum quemdam nomine *Japidem* curantem inducit *Aeneam*, quem sagitta misere in pugna sauciaverat, ait (2)

..... ille retorto  
*Paeonium* in morem senior succintus amictu,  
 Multa manu medica, *Phoebique* potentibus  
 herbis  
 Nequidquam trepidat, nequidquam spicula  
 dextra  
 Sollicitat, prensatque tenaci forcipe ferrum.

---

(1) *Odys.* l. IV. v. 221. & seq.

(2) *Aeneid* l. XII. v. 400. & seq.

*Ex quo homines minus creduli esse coeperunt, fateri minime dubitarunt, plura se nescire, quae antea se scire credebant, & quae putabant prima, in experiendo repudiare, cumque pauca diuturna & constanti observatione comprobata sibi ad medicinam faciendam reservassent, illud & cavendum sibi putarunt, ne quod optimum natura erat, arte aut deterius, aut perversum fieret. Pleni sunt Redii libri his monitis atque exemplis, ejusque voces odiosae iis tantummodo fuerunt, qui dum plurima de narthecio promunt medicamenta, aegrorum animas, ut aiebat Plinius, negotiari velle videntur (1). Sane quae praesidia naturae sapientissimus Auctor*  
*& Mo-*

- 
- (1) Ex multis unum afferemus Redii dictum in epistola quadam ad amicum. *La nostra natura gode della semplicità delle cose, ed abborisce quei tanti mescolamenti di medicamenti, che da' Greci dopo il secolo d' Ipocrate, e dagli Arabi più superstiziosi de' Greci furono inventati per acquistarsi venerazione presso la credula ed ignorante gente.*

& Moderator nobis paravit vel ad tutandam, vel ad recuperandam valetudinem, simpliciter & ex sua vi adhiberi debent, & qui illa ex dissimilibus rebus misceri & temperari praecipiunt, non solum veteres non sanabunt morbos, sed etiam novos eoque tristiores excitabunt. Neque opponat quispiam simplicia remedia non omni prorsus noxa carere, ac propterea aliarum rerum commixtione emendanda. Esto. Verum quoties id fieri necesse crit, etiam atque etiam videre debet prudens & cautus medicus, ne quid addat, quod aut vim extenuet, aut nimium augeat simplicis remedii, & prorsus abstinebit ab iis, quae non habent inter se quamdam, ut ita dicam, cognationem naturae. Vetus haec opinio in multa saecula opplevit medicinae scholas, opii, quo nullum frigidius esse medicamentum putabatur, narcoticam vim, calidiorum aromatum permixtione emendari, & alia huiusmodi plura ridicula sententiose praecipiebantur, quae recentior medicina bono omnium explofit. Quid etiam de illis solutionibus chemicis dicendum? Meminerint qui talia amant, ab Helmontio ignem rerum corru-

ptorem appellari, & bene & prudenter allatam a Plinio quaestionem fuisse (1) num ignis plura absumat, an pariat, & aliud esse quod primis ignibus, aliud quod secundis, aliud quod tertiis gignit? *Nolo hac in re pluribus immorari, ne ad te scribens, qui arte medendi excellis, videar, quod erat in veteri proverbio, sus Minervam docere. Nonnulla tamen leviter tangere de innocentia, ut ita loquar, medicinae, & de impudentia illorum, qui scelerate illam contaminare adlaborant, opportunissimum judicavi, cum de Ramazzinio scribendum suscepissem, viro sane cum paucis calliditate & prudentia in Hippocratica medicina excolenda comparando. Memini, dum Vindobonae elapso anno essem, quam saepe abs te audierim sapientissimi hominis laudes, neque illa in postremis fuit, cum ajebas te illa sequi, dum valetudini consulis omnium maximi Regis, qui tuae prudentiae unice confidere videtur, quae ipse in aureo-*

---

(1) Lib. III. cap. ult.

*lo sane libello de Principum valetudine  
tuenda proposuit. Ex illo tempore mihi  
in mentem venit ejusdem vitam Latinis lit-  
teris mandandi, eique nomen tuum inscri-  
bendi, tum ad operis ornamentum & decus,  
tum ad declarandum animum erga te meum  
gratum & benevolum. Accipe igitur, qua  
soles humanitate, levidense munusculum, me-  
que ut facis ama.*

*Pisis xv. Kal. Martias MDCCLXXXIX.*

## BERNARDINUS RAMAZZINIUS.

**B**ERNARDINUS RAMAZZINIUS Carpi, in regionis Cispadanae civitate, quae est in Mutinensium Ducum ditione, ortum habuit Non. Novembris an. MDCXXXIII. honestissimis parentibus Bartholomaeo Ramazzinio, & Catharina Federzonio. A Jesuitis tum Carpi, tum Parmae institutus fuit, prout illa ferebant tempora, humanioribus litteris atque philosophia. Grandior factus insolentiam temeritatemque disputationum, & insulsiatam ac vanissimum strepitum verborum ac sententiarum, tanquam insanias quasdam odisse coepit, & sive soluta, sive numeris adstricta oratione scriberet, respiciebat veteres dicendi magistros, quorum elegantiam si minus imitatione exprimere poterat, voluntate certe consequeretur. Cum aliquandiu incertus fuisset quam praesertim artem profiteretur, tandem medicinae se dedere decrevit, cujus scientiae insignibus an. MDCLIX. Parmae decoratus est. Post id Romam venit, & in disciplinam traditus Antonio Mariae Ru-

beo Ravennatenſi, qui medico & hiſtorico illuſtri genitus medicus & ipſe haud ignobilis erat, non mediocriter ſub ipſo profecit. Hujus vero conſilio & commendatione exercendae medicinae cauſſa accitus fuit a civibus Canini & Martae, quae oppida ſunt in Caſtrenſi Ducatu; ſed qui ceteris mederi didicerat, haud potuit ſibi, quippe ex diuturna quartana regium morbum contraxerat, utque valetudinem recuperaret ad Carpenſes ſuos rediit. Cum melius ſe habere coepiſſet, in matrimonium duxit Franciſcam Richiam antiquo inter ſuos genere natam, ex quo connubio pleno concordiae, genitus eſt filius, qui octimeſtris obiit, & binae filiae quae patri minime ſuperſtites fuerunt. Nobilis jam erat medicus, cum prudentia non ſolum, ſed etiam felicitas quaedam ejus curationibus faſſeretur, & hac fama, & commendatione Alphonſi Molzae Marchionis vocatus eſt Mutinam ad publice docendam medicinam. Nam per illa tempora Franciſcus II. illius civitatis Dux novum in ipſa inſtituerat Lyceum. Ibi plures ſuarum laudum & aemulos & invidos naſtus eſt Ramazzinius; & ex eo etiam nonnullam

habebat invidiam, quod promptus & non inexercitatus erat ad pangenda carmina. Id enim decorum esse aiebat illius Numinis cultoribus, qui medicinae & poesis inventor dicitur. Et cum magnum aliquid se jam tentare posse arbitraretur, argumentum sumpsit a bello, quod Ludovicus XIV. Gallorum Rex moverat Siculis & Batavis, ut ejus laudes caneret tum Latinis tum Italicis carminibus. Verum Latina carmina quasi vermiculatum opus dixeris, cum ea ex Virgilio, diligenter sane, composuerit, unde *Centonem* ipsa appellavit. Non inepti poetae libellum judicavit Ludovicus, & fertur illum regali dono remunerari auctorem jussisse, quod tamen ad ejus manus, quo fato nescio, minime pervenit. Laudavit & Italicis carminibus Margaritam Farnesam Atestinam, quae publica luce digna putavit, & quoad vixit cum musis commercium habere voluit. Cujus rei praesertim indicia dabat in conventibus Mutinensis Academiae, cui Diffonantium nomen erat, quaeque ad excolendas humaniores litteras instituta fuerat. Tum quidem non mediocris tribuebatur laus illius poesi, eloquentiae item, sed ex multis, quas ha-



habuit orationibus, si unam excipias dictam in  
solemni Mutinensis Academiae instauratione,  
illae tantummodo extant, quas Patavii reci-  
tavit, cum in illius civitatis Gymnasio Magi-  
stri munere fungeretur. Verum ipse magnam  
famam existimationemque, immo uominis im-  
mortalitatem a Medicina habuit, in cuius e-  
xercitationibus commentationibusque ita versaba-  
tur, ut odoraretur semper aliquid novi, quo  
illam ornaret. Potuit interdum falli ut homo;  
attamen ex scriptis, quae pro se edidit, cum  
aut ab Hannibale Cervio, aut ab Andrea  
Monelia medico Florentino infimulatus fuit suis  
curationibus mortem attulisse binis feminis,  
quarum altera pleuritide, altera partu labo-  
raverat, cognosci poterit, nihil non egisse  
aut consuluisse, cuius probabilem rationem  
reddere non potuerit. Illa vero disputatio cum  
Monelia, quae triennium usque duravit, mul-  
tis hinc atque illinc emissis scriptis (nihil e-  
nim erat Monelia petulantius) quaque conten-  
debat Ramazzinius arte haud extrahendam se-  
cundinam, etiam cum cito illam natura non  
emiserit, non solum probabilis, sed etiam ve-  
ra doctioribus medicis nunc videtur. A cu-

ra harum concertationum solutus Ramazzinius practicam medicinam studiosius excoluit; sic vero aderat discipulis suis, ut non solum artem medendi ab ipso discerent, sed etiam illam exornandi multarum disciplinarum subsidiis. Callebat enim philosophiam & chemiam, in naturali historia se exercuerat, doctus erat Latinis litteris, & quantum medico satis est, etiam Graecis, multa legerat atque audierat, retinebatque memoria singulari, quae vero ipse tradebat, condiebat non solum elegantia orationis, sed saepe etiam salibus, poetarum sententiis, & historicorum narrationibus, sic ut ejus sermone nihil posset esse jucundius. Quare minime est mirandum, si magna ad eum multitudo discipulorum concurrebat, quam ut ejus collegae pati possent. In arte vero medica exercenda cum intelligeret magnopere expedire similium morborum causas & remedia exquirere, imitatus exemplum summorum virorum Hippocratis & Sydenamii de epidemicis febribus, quae passim per Mutinensem agrum an. MDCXC. vagatae sunt, scribendum suscepit. Opus doctrina praestans Antonio Magliabechio inscripsit, cujus opera factum est,

ut per Germaniam late diffeminaretur, tanta quidem commendatione Auctoris, ut in Caesaream ipse Academiam, cui Naturae Curiosorum nomen inditum erat, cooptaretur. Hinc additus illi stimulus, ut de binis aliis epidemiis, quae consequentibus annis fuere, & de caeli Mutinensis constitutione per illa tempora dissereret, acute sane & docte, tantoque plausu non Italorum modo, sed etiam exterorum, ut inter salutaris artis antisites jam numerari coeperit. Ex quo factum est, ut nemo clarus vir Mutinam accederet, qui eum videre & alloqui, & amicitiam cum ipso jungere non cuperet; e quibus Guilelmus Leibnitius, cum duos menses in illa urbe fuisset conquirendi causa monumenta, quae ad historiam pertinerent Atestinae & Brusvicensis familiae (una enim eademque gens esse putatur) nullum diem abire siverit, quo non ad plures horas cum Ramazzino familiariter versaretur. Tum hic in manibus habebat librum de fontibus Mutinensibus, quem paullo post, ipso & hortante Leibnitio, emisit. Illius epitomen & laudes tum in Actis eruditorum Lipsiensium, tum in Diario, ut appellatur, Italico Montisfauconii invenies.

Vix dum etiam ille ad Britannos pervenit, cum in Anglicam linguam translatus & Londini recusatus fuit. Cui rei causam praesertim dedisse reor quae Ramazzinius attulit ad convellenda dogmata, seu potius somnia Thomae Burnetii *de telluris theoria*. Nova enim illa non esse, ut hic gloriose nimium jactabat, probat, cum non aliter sensitse veteres Abyssini videantur. Narratur enim in Aethiopiae annalibus, postquam homines superbia elati a majorum bonitate deflexere, Deos iratos terram adeo concussisse, ut major illius pars intra proprias cavernas defederit; hoc pacto aquam in latebrosis recessibus conclusam violenter expressam fuisse, atque ita fontes, flumina, lacus, & mare ipsum ortum duxisse; eam vero terrae partem, quae intra has cavernas non decidisset, sed reliqua elatior stetisset, montium formam exhibuisse; insulas & scopulos medio in mari nil aliud esse, nisi segmenta terrae cavernosae ab illo totius terrenae molis praecipiti casu superstitis. Hujus narrationis testimonium sumpsit Ramazzinius a Francisco Patritio, qui, edito Italico libro an. MDLII. de Antiquorum Rhetorica, aperte affirmat Balthaf-

farem Castilionem, dum in Hispania erat, illam rem accepisse a gravissimo ac sapienti quodam viro Abyssino. Ceterum quod ad fontes Mutinenses spectat, mirum omnibus videri debet nullum esse locum tum intra urbis moenia, tum extra eandem ad aliquot passuum millia, qui si effodiatur, non perennis & purissimae aquae magnam vim effundat, & antequam putei penitus effodiantur, ipsa non murmuret. Minime dubitat Ramazzinius e sublimi aliquo loco aquas istas subterraneas descendere, & continuo ab aliis premi & urgeri, cum subito impetu ad altitudinem pedum LXVIII., saxa & arenam eructando, erumpant. Horum aliorumque phaenomenorum dum rationem reddere studet, plura affert de prementium fluidorum corporum proprietatibus, seque hydrostaticae scientiae litterate peritum ostendit. Confutat sententiam illorum, qui tota illa loca subterraneo flumine irrigari putant, quod si esset, illud multorum millium alveum habere deberet, idque incredibile illi videtur. Ipse autem inclinatur ad credendum, mare in illa regione cum apennino, quando ei propius erat, occulta habuisse, & nunc

tiam habere commercia, & per fistulosae terrae intervenia aquam deduci & per totum illud spatium, in quo & cavernae sint, extendi, sic ut, laxatis repagulis ac referatis ostiis, non fecus ac in aquae ductibus evenit, ipsa in altum resiliat. Quemadmodum autem horum fontium ortum a mare praesertim repetit, ita non negat plures alios fontes e pluviis & solutis nivibus oriri. Plura alia affert de Mutinensium aquarum natura, nec dubitat, quin cum a Romanae Reipublicae temporibus tanta soli accretio facta fuerit tum in urbe, tum in vicino agro a fluviorum aquis, quantam ipse ex antiquis rudibus definit, tandem hi fontes ob novas accretiones desituri sint. Multa sunt in hoc libro praeclara, quae declarant fuisse Ramazzinium diligentem naturae observatorem; deceptus tamen a philosophia, quae tum in usu erat, non omnium phaenomenorum satis probabilem rationem reddere potuit, & quam a diluvio repetit varietatem terrae & corporum, quae in excavandis hujusmodi fontibus reperiuntur, & ab antiperistasi varietatem caloris in excavatis puteis, cum major sit hyemali tem-

pore, minor aetivo, haud fortasse probabunt recentioris philosophiae cultores. Multa alia observatione digna suppeditat Mutinensis ager: sunt et in eo vulcani, de quibus mentionem facit Plinius, ex iisque unus fontes habet petrolei. De his differuit Ramazzinius, cum iterum in vulgus edidisset Francisci Ariosti opusculum de petroleo montis Zibinii, quod hic CCXXXV. ante annos scripserat. Quae ipse observationibus medici suis temporibus clarissimi addenda putavit complexus est Latina epistola data ad amicissimum suum Felicem Vialem, in qua non historici modo & physici, sed etiam medici partes agit. Indicat enim quos ipse morbos petrolei usu sanaverit. Si quis vero erit, qui alia initia, unde concretum sit petroleum, quique aerem, ut nunc loquuntur, inflammabilem, minime vero bitumen & sulphur, causam dare vulcanis contenderit, non magnopere repugnabo. Illa potiora putantur, quae Ramazzinius de barometris paullo post vulgavit, quaeque ad acutissimi physici famam illi conficiendam plurimum valuerunt. Principio is barometricas observationes quotidie per annum habitas emi-

fit, ut emendaret sui aliorumque errorem, qui decepti auctoritate Borellii existimaverant hydrargyrum in barometro, cum sudum est, deprimi, pluvia vero impendente, attolli. Contrarium enim ab experientia conficitur, cujus rei probabilem rationem reddere se posse speravit. Ponit e terra non solum vapores, pluviarum materiem, sed alias multas exhalationes diversae indolis continuo exurgere aerique misceri, atque idcirco aerem nitrosis particulis potissimum refertum esse, ita tamen ut vapores in altiore, ceterae vero exhalationes in inferiore atmosphaerae loco, ut pote crassiores, natent. Haec autem corpuscula a pluviiis nivibusque impendentibus solvi, ad imum deturbari, & ad terram usque praecipitari putat, liberatumque iis aerem leviores effici, atque hydrargyro levius incumbere, atque propterea hunc, pluvio caelo, descendere. Qui in hujusmodi phaenomenis quid electricitas efficiat non vident, magnas profecto laudes Ramazzinio tribuent, quod docuerit quomodo aeri vapores conjungantur, & quanta vis sit illius in iisdem solvendis. Quae dum proponit, & multis argumentis



explicat, modeste profitetur se fungi vice coctis, & alios acuere voluisse, ut vel veriore, vel saltem probabiliorem afferrent rationem & causam. Sunt in binis Ramazzinii opusculis de Barometris alia de natura aeris, ventorum, pluviarum & nebularum, et de effluviis, quae ad nos usque a planetis emitti arbitratur, sed singula referre non juvat. Ejus sententiae defensores & oppugnatores habuerunt; ex illis eminuit Boccabadatus & Placentinus, ex his Guntherus ac Christophorus Schelamerus, cui postea tanquam subsidiarius miles accessit Samuel Reyerus. Priori ipse respondit, ac demum an. MDCCX., dum Patavii erat uno volumine complexus est quidquid de hac disputatione hinc atque illinc exaratum fuerat. Solitus ipse de suis scriptis sine arrogantia dicere, & quae instarent difficultates libere proferre, & contraria argumenta sic diluere, ut elevaret potius, quam deprimeret adversariorum auctoritatem atque existimationem, illud facile consequebatur, ut illos, cum quibus, non contentionis, sed veritatis cupiditate pugnabat, benevolos sibi redderet. Nam cum natura illi dederit non

parum humanitatis, nullum esse vitae tempus aiebat, in quo non deceret illam exercere. Dum vero illam cognitionem rerum naturalium magnam & difficilem esse affirmabat, videbat ne de arte sua multa promitteret, dumque castigabat impudentiam quorundam, qui vagantur magna cum caterva totis scholis praesidium aegrotis, atque omnibus naturae investigatoribus lumen ingenii sui porrigentes, segnitiam atque inertiam vitabat, & utilitatis magnitudine ad summos suscipiendos discendi labores impellebatur. Vidiſſes ſaepe illum campos & montes peragraré, viliores officinas ingredi, & artium mechanicarum ſecreta contemplari, & ſi quem ex iis, qui illas exercebant, aegrotum inveniret, interrogabat quae pateretur, & ex qua cauſſa, & quot jam diebus, & quo uteretur victu, & quae eſſent bene valentis corporis exercitationes, & dum illi opitulabatur, ſeponebat multa in rem ſuam, quibus ſalutaris artis praecepta contineri putabat. Tum mirari coepit perpaucos eſſe medicos, qui ſciſcitarentur ab aegroto quam artem exerceret, & quam tractaret materiam, qua in re cum haud leve momentum ad faciendam medicinam eſſe judica-

ret, magnum utilissimumque opus, & novitate ipsa praeestabilissimum suscepit, quod *de morbis artificum* inscripsit. Quinquaginta usque tria artificum genera fuere materies, in qua ipse versatus est, & ad unamquamque rem examinandam, quae varios morbos, sive materia, quae tractatur, sive corporis motus spectentur, afferre possunt, tantam adhibuit diligentiam, ut magnum beneficium hominibus & medicinae ipsum tribuisse reamur. In quo conficendo opere dum erat occupatus, Triumviri Patavini Gymnasii honorificentissimis litteris ab eo petierunt, ut operam suam eidem Gymnasio navare vellet. Is aliquandiu ancipiti contentione distractus fuit. Multum enim in illo poterat suorum Mutinensium amor; sed quod maiora esse instrumenta ad adipiscendam sapientiam Patavii esse existimabat, cessit illorum invitationibus, & ad eosdem venit ineunte saeculo XVIII. practicam medicinam publice traditurus. Orationem, quam habuit in ingressu muneris, idcirco saecularem appellavit; quod in ipsa recensuit quanta ex nobilissimis inventis tum anatomicis, tum physicis, tum ex tribus illis regnis, in quae dividi solet historia naturalis, fa-

cta fuerit anteaeto saeculo accessio ad medicinam. Romani carmine saeculari celebrabant fortunam aeternae Urbis, eamque Palatino Apollini commendabant; Ramazzinius oratione fortunam celebravit medicinae, ad cuius subsidium, decus atque ornamentum tot inventa sunt unius saeculi curriculo, ut nullum ipsa fortunatius habuisse videatur. Tum enim, ut de ceteris fileam, innotuere sanguinis in corporibus animalibus circuitus, abdominis & thoracis vasa lactifera, vesicularis pulmonum structura, hepatis & lienis glandulosa compago, vera nervorum origo, varia & copiosa glandularum soboles & usus, vasorum lymphaticorum valvulae, ductus salivales, & illa quasi quaedam societas & communicatio omnium fluidorum, quae sunt & moventur in humano corpore. Sane ex hac Ramazzinii oratione intelligi potest fuisse illum perfecte eruditum in arte, quam profitebatur, legisse studiosissime veteres Latinos scriptores, ac praesertim poetas, quorum versus & sententias saepe citat, plurimum se exercuisse in Latina scriptione, quamvis non semper puris & electis verbis utatur, & multa instrumenta habuisse ad eloquentiam, si hanc ni-

hil aliud esse dicere velimus, quam copiose loquentem sapientiam. Verum si de illa eloquentia sermo erit, quae vehemens & volubilis est, quae constat non ex sententiis solum, sed etiam ex verbis grandioribus, plenis, junctis, fluentibus, propriis, & quae admirationem facit, nec delectat modo, sed & rapit auditores, frustra illam requires in Ramazzinii orationibus, quarum tredecim usque vulgatae sunt. Sed hanc exigere a medico injustum esset: bene enim a Cicerone: *A Philosopho, si affert eloquentiam, non asperner, si non habeat, non admodum flagitem.* Verum si eloquentiae luminibus carent Ramazzinii orationes, lucet tamen semper in iis praeclara eruditio atque doctrina, & illa prudentia & calliditas, sine qua nulla est medicina, quae constat ex diligenti, & diu multumque considerata faciendi aliquid, aut non faciendi excogitatione. Hinc si quae- ras quae ratio fuerit Ramazzinii in medicina facienda, facile cognosces ex his ipsis orationibus, Hippocraticam, simplicem, illam, quae obsequitur naturae, unice per se amasse, & commendasse discipulis suis. Hos etiam admon-  
nebat nil temere agendum, nil negligendum,

rationi multum, plurimum vero experientiae tribuendum, recentiorum monita non sic amplectenda, ne suus quoque honos esset antiquitati, medicinam multarum disciplinarum praesidio & comitatu muniendam atque sepientiam, eam denique esse ejusdem amplitudinem ac difficultatem, ut nauticae scientiae comparare illam se posse putaret. Nam cum minime semper, ut ajebat Aratus,

*Signum veniens poterunt praenoscere nautae,*

nec semper navis, licet scientissimo gubernatore utatur, bene conficere possit cursum suum, cum tempestatibus, ventis, procellis, turbini-bus inter scopulos & syrtes feratur, idem evenire ajebat medicinam facienti, cui saepe periculum procreatur vel ab eo ipso, quod in subsidium vocare se posse arbitratur. Nimis longus essem si omnia orationum, quas habuit Ramazzinius totis iis annis, quibus Patavii medicinam docuit, argumenta, & sapientissima praecepta, quae in iis continentur, recensere vellem. Per haec, quidem ipse prudentissimi doctoris famam apud Patavinos suos

obtinuit, celebritatem vero sermonis absentium maxime consecutus est ab illis operibus, quae & de morbis Artificum, & de Principum salute tuenda conscripsit. Illud alterum postquam Mutinae ediderat an. MDCC. & recusum jam fuerat Lipsiae, Ultrajecti, & Venetiis, quinto Patavinis typis impreffit cum corollario de aliorum artificum morbis, & de Virginum Vestalium salute tuenda, in quo non minus accurate exposuit, quid ad vitanda, aut saltem minuenda pericula expediat, quae sint morborum causae, signa ac remedia, ut vere judicasse videatur vir doctus Tissotius (1) neminem eorum, qui eandem rem postea tractarunt, Ramazzinii gloriam aequasse. Laudavit & Hallerius alterum, quem commemoravimus, libellum, quem simplicem, facilem, verum dixit, sic ut omnes, qui Principum valetudini consulere debent observatione maxime earum rerum, quae prodesse et obesse iis solent, nunquam illum de manibus deponere

---

(1) In Praef. ad librum, cui titulus: *Essai sur les maladies des Gens du Monde.*

deberent. Omnia, quae sunt in diversis vitae statibus, bene novisse Ramazzinium & ad artem suam retulisse facile ex his scriptis conjici poterit. Quapropter quantum eitribuendum sit, statuent illi, qui non ignorant quantae artis, quantique laboris sit morborum causas indagare, & hypotheses in his assignandis vitare. Etsi autem medici gravioribus morbis periculosas curationes & ancipites interdum adhibere cogantur, absuit tamen semper Ramazzinius a temeritate ac audacia, & peccare potius in eam partem volebat, quae est cautior, quam in illam, quae est audacior. Quapropter se felicem & beatum fore dicebat, si sua causa nulla domus pullam vestem indueret. Tam cautus erat medicus, ut aliquando ei suspectus fuerit Peruviani corticis usus, qua de causa a Tortio, qui illius semper laudator, semper auctor fuit, graviter infimulatus est. Verum ille non usum, sed abusum hujus medicamenti improbat, qua de re Dissertationem scripsit. Quanta vero vis ejus esset in sanandis quibusdam febribus, praesertim tertianis, & vesicalis, quae pestilentiam comitantur, non uno in loco suorum operum exposuit. Abuti quibusdam remediis



mediis ad libidinem usque imperitiae cujusdam esse dicebat Ramazzinius, & vel eos medicos castigabat, qui abutuntur aqua in febribus, quae de re, si fides Cinellio (1), opus inchoavit, quod tamen minime absolvit. Id quod nullo non in morbo, nulloque non in tempore utilissimum esse judicabat, erat sobrietas in victu, de qua nonnulla exaravit, cum ad ea, quae vulgaverat vir nobilitate generis & doctrina praestans Ludovicus Cornelius *de vita sobria*, cumulum addidisset commendationis suae. Nihilo tamen minus commodissimum est laxas habere sobrietatis habenas, quas vel adducas, cum opus erit, vel remittas. Consulendus est enim stomachus, quid ferre recuset, quid valeat, dandum est etiam aliquid consuetudini, aetati, loco & temperamento, & ut recte monebat Celsus, *qui sanus & suae spontis est, nullis se debet obligare legibus* praeter quam illa, quae vetat nimio & insalubri cibo stomachum

T. XIV.

F

(1) Bibliot. vol. Tom. IV,

onerare. Haec & probare videtur Ramazzinius ipse in suis *adnotationibus* in Cornelii librum, quanquam mirificus esset temperantiae laudator. Cetera, quae post haec scripsit, cum esset jam summa senectute, nec bona valetudine (nunquam enim in otio hebescere & languere voluit) pertinent ab bubuli gregis pestem, quae e Dalmatia advecta misere Patavinum agrum aliasque regiones vexavit, & ad contagiosas febres, quae magnas strages hominum faciebant in universa prope Germania. Vel antequam haec ederet, tanquam senex athleta rudem respicere & patriam cogitare coepit. Id non tulerunt Triumviri Gymnasii Patavini, cujus maximum ornamentum esse dicebant hominem, qui summae doctrinae decus omne virtutis jungebat. Itaque an. MDCCIX. a secunda ad principem medicinae cathedram, qua sponte se abdicaverat Franciscus Spoletus, eundem evexere, assignato illi stipendio DCCL. florenorum cum honorificentissimo decreto, ut suo ipse arbitratu, suaeque voluntate hoc munus coleret. Ad cetera enim valetudinis incommoda accedebat ut caecus esset, quam calamitatem patientis-

ſine tulit; quamvis homini, qui omnem ſuae  
 vitae curſum in labore confecerat, illa eſſet  
 moleſtiſſima. Laborabat etiam ex cordis pal-  
 pitationibus, a quibus ſemel atque iterum in  
 vitae diſcrimen adductus fuerat. Quo in ſta-  
 tu cum eſſet, tam aberat ab inertī, ignava,  
 & ſomniculoſa ſenectute, ut ſemper aliquid  
 dictaret, aureſque optimorum librorum lectio-  
 ne recrearet. Saepe enim illi in ore eſſe ſo-  
 lebat illud Celfi: *ignavia corpus hebetat,*  
*labor firmat, illa maturam ſenectutem, hic*  
*longam adoleſcentiam reddit.* Et vires qui-  
 dem animi tum adeo firmæ erant in eo, ut  
 adoleſcentiam minime requireret. Ex ſuo mu-  
 nere, ſuiſque ſcriptis & curationibus quo plus  
 gratiæ & gloriæ, eo minus ad ſuos perve-  
 nit opis. Habere enim medicinam quaſtui  
 indecorum eſſe dicebat; præter quam quod  
 res domeſticas non admodum curabat. Erat  
 vero diligentiffimus in diligendis & colendis  
 amicis, in exequendis iis, quæ Dei Numini  
 tribuuntur, & in diſcipulis ſuis non ſolum ad  
 medicas res, ſed etiam ad omne officii mu-  
 nus inſtituendis. Dum ſe parabat ad docen-  
 dum, oppreſſit eum mors, quam attulit apo-

84 BERNARDINUS

plexis (1) Sepultus est in Aede B. Helenae sine ullo titulo, quem postea adjecit ejus fratris filius Bartholomaeus Ramazzinius, qui & vitam carissimi patruī declaravit, in qua copiam magis rerum, quam elegantiam laudaveris. Monumentum autem est hujusmodi:

BERNARDINO RAMAZZINO CARPENSI

PHILOSOPHO AC MEDICO

IN MUTINENSI ACADEMIA

PRIMO MEDICINAE THEORICAE PROFESSORI

POSTREMO

IN PATAVINO LYCEO PRACTICAE MEDICINAE

PROFESSORI PRIMARIO

QUI SUMMA LITERARUM JACTURA

OCTOGENARIO MAIOR E VIVIS DECESSIT

NON. NOVEMBRIS AN. SAL. NOSTRAE

MDCCXIV.

INSCRIPTIONEM HANC POSUIT

AMANTISSIMUS EX FRATRE NEPOS

BARTHOLOMAEUS RAMAZZINUS

MEDICINAE DOCTOR.

---

(1) Vide quae de illius morte & laudibus scripsit Morgagnius de sedibus & causis morborum &c. epist. III. n. VIII. epist. VIII. n. XXIX. ep. IX. n. VIII. ep. XVIII. n. XVI.

Satis de hoc summo viro dictum erit, si illud addidero unum, quod sane ad ejus gloriam plurimum facit, vacasse scholam, quam rexit, annos ferme quatuordecim. Non deerant, qui eam peterent, probabiles medici, sed, ut ait Facciolatus in libro, quem inscripsit *Fasti Gymnasii Patavini*, Triumviri litterarii hoc quoque nomini tanto tribuendum putarunt, ut diu quaereretur, qui pro dignitate succederet.

## O P E R A E D I T A .

**De Bello Siciliae :** Cento ex Virgilio ad invictissimum Galliarum Regem Ludovicum XIV. Mutinae apud Demetrium Degni 1677. in 4.

**Applausi festivi del Panaro per l'ingresso solenne in Modena della Duchessa Margherita Farnese d'Este dopo la villeggiatura di Sassuolo, Canzone In Modena ; per gli Eredi Cassiani in fol. senza nota d'anno .**

**Exercitatio Jatrotopogetica, seu Responsum ad scripturam quandam Exc. Dom. Annibalis Cervii Doct. Med. Mutinae per Cassianos 1679 in fol.**

**Relazione di Bernardino Ramazzini sopra il parto , e morte della Illustr. Sig. Marchesa Martellini Bagnesi con una censura dell' Eccell. Sig. Dot. Gio. Andrea Moniglia, e risposta del medesimo Ramazzini alla detta Scrittura. In Modena per gli Eredi di Viviano Soliani 1681. in fol.**

**Risposta alla seconda Censura dell' Eccell. Sig. Dottor Gio. Andrea Moniglia. In Reggio per Prospero Vedrotti 1681. in fol.**

**Risposta alla terza Censura dell' Eccell. Sig. D. Gio. Andrea Moniglia stampata a colonne colla trisposta del Sig. Moniglia. In Modena per gli Eredi di Viviano Soliani 1682. in fol.**

**Risposta alla quarta Censura dell' Eccell. Sig. Dott. Gio Andrea Moniglia.**

In solemnī Mutinensis Academiae Instauratione O.  
ratio. Mutinae typ. Haer. Cassiani 1683. in 4.

De Constitutione anni 1690. ac de rurali Epidemia,  
quae Mutinensis agri, & vicinarum regionum co-  
lonos graviter afflixit, Dissertatio, ubi quoque ru-  
biginis natura disquiritur, quae fruges & fru-  
ctus vitiando aliquam caritatem annonae intulit.  
Mutinae, typ. Haer. Cassiani 1690 in 4. *Lau-  
di merito datur Ramazzinio, quod inter primos  
de constitutionibus annorum, & de morbis, qui  
in iis dominati sunt, scripserit. Primus etiam ru-  
biginis naturam observavit, & quamvis ejus ob-  
servationibus plauserint rerum naturalium inquisito-  
res, non vidit tamen inter parasitas, ut dicitur,  
plantas illam esse annumerandam.*

De fontium Mutinensium admiranda scaturigine, Tra-  
ctatus Physico-Hydrostaticus. Mutinae typ. Solia-  
ni 1691. in 4.

De Constitutione anni 1691. apud Mutinenses Dis-  
sertatio. Mutinae apud Haer. Cassiani 1692 in 4.

De Constitutionibus annorum 1692. 1693. 1694. in  
Mutinensi Civitate & illius ditione. Mutinae typ.  
Ant. Capponi & H. Pontiroli 1695. in 4.

Ephemerides Barometricae Mutinenses an. 1694. una  
cum disquisitione causae ascensus, & descensus  
Mercurii in Torricelliana fistula juxta diversum  
aeris statum. His accessere Epistolae Exc. DD. Jo.  
Baptistae Boccabadati & Francisci Torti. Ibid. 1695.  
in 4.

*Ephemerides Barometricae cum disquisitione causae ascensus & descensus Mercurii in Torricelliana fistula Mutinae olim editae, nunc Patavii recusae cum tota controversia, quam idem (Ramazzinus) habuit cum D. G. C. Schelamero in xilionenfi Lyceo Med. Prof. Hisce omnibus jam editis accedit nova Epistola ejusdem Ramazzini ad Nob. Virum D. Lucam Schroekium A. N. C. Praesidem cum solutione Problematis ex invento celeberrimi Viri D. Gothofredi Guilielmi Leibnitii. Patavii typ. Jo. Bapt. Conzatti 1710. in 4.*

*Francisci Ariosti Libellus de Oleo Montis Zibinii, seu de Petroleo agri Mutinensis libellus M. S. membranis editus ab Oligero Jacobeo. Hafniae 1690. nunc ad fidem Cod. M. S. ex Bibliotheca Estensi recognitus, & recusus, adjecta ejusdem argumenti Epistola Bern. Ramazzini Prof. Mutin. Mutinae; typ. Anton. Capponi 1698. in 12.*

*De Morbis Artificum. Mutinae per Ant. Capponum 1700. in 8.*

*Oratio saecularis, quam primum habuit in Patavino Athenaeo die 12. Dec. 1700. Venetiis Per Aloysium Pavin. in 8.*

*Medicam artem navigatoriae similem esse, Oratio habita in Patavino Athenaeo. Mutinae typ. Ant. Capponi 1703. in 8.*

*Theoricæ Medicinæ nullum jus esse, ut supra Practicam dominium affectet, Oratio ibidem habita. Patavii per Conzattum 1707. in 8.*



- Orationes Variæ Jatrici argumenti, quas in Patavino Gymnasio pro anniversaria studiorum celebratione habuit Bern. Ramazzini. Ib. 1708. in 8.
- Constitutio algidissima anni 1709. Oratio nona habita Patavii die 13. Maii cum primum primariam practicæ Medicinæ Cathedram conscenderet. Patavii ap. Frambottum & Konzattum 1709. in 8.
- De Principum valetudine tuenda Commentatio. Patavii ap. Konzattum 1710. in 4.
- De contagiosa Epidemia, quæ in Patavino agro, & tota ferme Veneta ditione in boves irrepsit, Dissertatio; Ib. 1712. in 4.
- De Morbis Artificum Diatriba, Mutinæ olim edita; nunc accedit supplementum ejusdem argumenti & Dissertatio de Sacrarum Virginum valetudine tuenda. Ib. 1713. in 4.
- Annotationes in librum Ludovici Cornelli de Vitæ Sobriæ commodis. Ib. 1714. in 4.
- Opera omnia medica & Physiologica. Accedit Auctoris Vita a Barth. Ramazzino Med. Doct. ejus ex fratre nepote scripta: Genevæ sumpt. Cramer, &c. 1717 in 4. *Anno post edita ipsa opera Londini fuerunt, iterumque an. 1750. Venetiis vero impressa fuerunt an. 1742. Ex iis operibus quædam in Italicam, Anglicanæ & Germanicam linguas conversa antea fuerant. Ad Ramazziniuni etiam pertinent capita multa, seu enarrationes librorum, quæ sunt in ephemeridibus Litteratorum Parmensibus.*

*Multa ejus feruntur carmina , ex quibus unum hoc  
loco exscribemus , quod ex eo cognosci potest quam  
bonus poeta & prudens medicus esset . Scripsit il-  
lud ad Michaellem Capellarium tum sibi , tam Mu-  
sis carissimum virum , qui erysipelate laborabat .*

*Crura tibi , ut scribis , dirum erysipelas adurit ,  
Vir bone , nec reperis qui levet arte malum .  
Plurima promittent medici ; namque hoc medicorum est ,  
Sed tu ne fidas , nam dare verba solent .  
A pingui & oleo , veluti angue & cane caveto ,  
Unguina succenso dant alimenta foco ,  
Pinguia quin faciunt partem putrere perusam ;  
Nasceturque ulcus , quod cacoethes erit .  
Nec minus herbarum succus apponere tentes ,  
Crura nec , ut mos est , lacte favere velis .  
Talia quippe nocent , coguntque recurrere morbum ,  
Qui ex imo ad summum pelliciendus erat .  
Quid faciam ergo , inquis ? Tu sustine & abstine , tali  
Decubitus criseos est mihi crede loco .  
Interea in lecto recuba , & suffusa rubore  
Aere ab externo membra tuere precor .  
Sic enim poterit sensim expirare quod urit ;  
Haec sat nota Coi sunt documenta senis .  
Tute ergo observa , ac tristes animo expue curas ,  
Sitque bene ut valeas unica cura tibi .  
Noli dum langues Musis Phoeboque videri  
Tam carus , quin sis carior ipse tibi .*

## ANGELUS FABRONIUS

CLEMENTI SIBILLIATO SUO

S. P. D.

**T**ot fere sententiae, quot homines mihi esse videntur de Grammaticorum studiis. Qui haec ita efferunt quasi ex multis nobilissimisque disciplinis componantur, qui contemnunt ut levia, ut putida, ut ineptiarum & tricarum plenissima. Athenaeus quidem dum irridere vult medicos ait, nisi extarent grammatici eos omnium maxime ridiculos fore; contra ea Quintilianus in immenso litterarum campo primum locum assignare grammaticae cultoribus videtur, quod illorum ars, quae recte loquendi scientiam & poetarum enarrationem profitetur, omnia ea (sunt autem haec infinita) quae propria sunt oratorum ac poetarum contineat. Hinc illam necessariam pueris, jucundam adultis & senibus praedicat, & solam, quae omni comitata stu-

diorum genere, ne excepta quidem astronomia & musica, plus habeat operis, quam ostentationis. Neque minus inter se homines discrepant de tradendi grammatices praecepta ratione. Qui illa ita dilatant, ut volenti omnia comprehendere nil sit nisi grammaticum tota vita legendum, qui breviter ita premunt, ut absint arida omnia, sicca et exanguia, quibus tenelli puerorum animi terreri atque opprimi solent, et perpauca, quae traduntur, monitoris magis non fatui, quam acuti magistri esse videantur. Adde, quod in tanta opinionum varietate & scriptorum multitudine neminem unum invenies, qui malit aliorum vestigiis insistere, quam nova comminisci, ceterosque omnes allatrare. Hinc Varro (qui quantusque vir!) litterarum porcus a Palaemone appellatur, Priscianus tanquam infidus Graecus, qui Latinae linguae fucum facere voluit, ab Alvaro traducitur, inelegantissimus vel in ipsis suis elegantissimis Valla dicitur a Ramirezio de Prado, non solum errores, sed & monstra Scioppius objicit Donato, Servio, Charisio, & furiose invehitur atque bacchatur in Alvarianos.

omnes, ille vero miserabilis litterator nominatur ab Hornio, vir desultoriae levitatis a Labbaeo, canis grammaticus a Lambecio; totam artem Alvari levem & nugatoriam esse contendebant Graviniani, Lazzariniani alique plures; Lagomarsinius vero & cum eo Jesuitae sui omnes scripta recentiorum grammaticorum alia falsa, alia inepta, alia prope monstrosa, alia plane ridicula, tanti certe non esse existimabant, ut a veterum magistrorum consuetudine atque institutis esset recedendum. Neque minus hi digladiabantur cum iis, qui affirmabant illos errare magistros, qui Latinae linguae praecepta non vernaculo, sed Latino sermone ipsis discantibus prorsus ignoto tradebant, quod idcirco inventum esse videbatur, vel ut pueri Latine interrogando ac respondendo naviter audere discerent, vel ut, aucta difficultate atque labore discendi, taedio afficerentur, & Latinae linguae notitiam assequi se posse diffiderent. Nunquam dicendi is finem faceret, qui omnium Grammaticorum pugnas non dicam enarrare, sed vel leviter recensere vellet. Omnino si Latinae linguae laus ne-

que tota, neque praecipua in soloecismis vitandis consistit, sed in ipsa potius plena ac tereti compositione verborum, in colore, in succo, & in habitu quodam, ut nihil claudicat, nihil diffluat, nihil fluctuet, sed tota permixta & temperata numeris aequabiliter constanterque feratur oratio, non video quid ad hanc rem conducere possint innumera Grammaticorum praecepta, quae, si dum scribimus, obversabuntur animo, tot vinculis erimus adstricti, ut nos commovere nequeamus. Ab illorum tyrannide nos vindicare poterit continua optimorum scriptorum lectio, a quibus nostra & colorabitur, & roborabitur oratio, neque ab illis discemus solum eleganter, apte, circumscripte, & numerose loqui, sed & soloecismos fugere. Nihilo tamen minus si quispiam Grammaticorum opera se egere arbitrabitur, paucis eorum monitis contentus erit, & mirabitur aliquando in multis vel tradendis, vel addiscendis hominum ingeniosissimorum atque otiosissimorum totas aetates fuisse contritas. Quae huc usque de Grammaticis attigi ad eos spectant, qui dum tricas & molestias pariunt adolescen-

*tibus, toti sunt in suis efferendis ineptiis; neque dubito quin quae Grammaticae obijci solent vitia, potius sint hominum, quam artis, cujus praecepta se tradere profitentur. Est enim quoddam grammaticae genus, quod cum philosophia non solum commercium habet, sed ab ea prorsus pendet, & in quo multi, ac praesertim Galli, hac nostra aetate gloriose atque utiliter versati sunt. Magnum ingenii humani opus fuit regulis linguas, quas necessitas, non ratio peperit, subicere, quod paullatim propter rei difficultatem perfectum est. Necesse enim fuit ex ingenti immensoque campo illa, quae casus genuerat, redigere in quasdam rationes praeceptionis, & quae incondita & inconstantia erant, revocare ad ordinem atque ad certa principia. Philosophi (& horum quidem munus est moderari linguas, ut & scriptorum ornare, suosque illis terminos assignare) qui in hac re elaborarunt, praecepta quidem tradiderunt, sed ut plerumque solent scientiarum inventores, qua processerint via, & quam ad regulam ipsa praecepta direxerint, minime declararunt. Quapropter*

qui philosophari cupit in re grammatica tractanda sedulo investigare debet rationem causamque omnium praeceptorum, quae communia sint omnibus linguis & immutari non possint, quae propria unius, quid casus aut negligentia, quid ratio peperit, quid consuetudini, cujus gratia aliquando peccare licet, quidque antiquitati sit tribuendum, quid ex una in alteram linguam infusum sit, quo modo ex plurium commixtione quaelibet tamen suam quamdam propriam retinuerit naturam atque indolem, quae congruit cum populorum moribus ac fortuna, & si vis etiam cum caeli temperie, quae exiguis contineatur finibus, & quomodo hi dilatari possint, sic ut verborum copia rerum copiam aequet, quae sit moderata, quae effrenata libertas, quae verba magis sint apta ad exprimendam rerum naturam, ut species veluti quasdam objiciant, quibus animi pulsentur, quae dignitatem habeant, quae plebejorum ac peregrinum redoleant, & demum, quoniam oratio ad animorum sensus exprimendos reperta est, & verba sunt idearum notae, quid hominum natura postulet,

ut



ut facile & cum jucunditate in eorum animos penetrare possimus. Sane inficiabitur nemo harum similiumque rerum investigationem opus maxime philosophicum esse, neque mediocri logices & metaphysicae praesertim eger eum subsidio, qui illud tractandum suscepit. Ut tu novisti multa hujusmodi Lazzarinius tuus in adversaria sua retulerat, quae perierunt vel negligentia illius, vel invidiorum culpa. Non mediocrem tamen famam collegit, quod libera voce admonuit Italos suos, quae damna apportarent juventutis vulgares grammaticae magistri; quos ceterosque eloquentiae corruptores, ut graves adversarios, constantissime refutavit; & vestigia, in quibus ille institit, non pressa leviter ad exigui praedicationem temporis, sed fixa ad memoriam omnium sempiternam fuisse videntur. Hujus vitam tuo maxime impulsu a me conscriptam, mi amicissime Sibilliate, te sic accepturum confido, quasi tabulam, in qua carissimi parentis imaginem, non illis tuis coloribus, sed rudi penicillo expressam possis intueri. Solitus enim es dicere tibi avum Lazzarinum fuisse, patrem autem Jo.

T. XIV.

6.

*Antonium Vulpium, quod horum utrique successeris in munere publice tradendi Graecas Latinasque luteras. Omnes autem te hac conjunctione dignissimum putant, ac tantummodo succensere tibi videntur, quod Lazzarinum imitatus multa & magna latere finas in scriniis tuis, quae publicam lucem non solum non reformidant, sed etiam postulant. Vale, & cum Patavium redibo, me non solum, ut antea, importunum exactorem, sed etiam furem, non invidum, ut ille, qui Lazzarinio scripta surripuit, experiere. Aliges me licet ad rupem, me nunquam poenitebit fuisse Prometheum, qui, ut ille de caelo ignem, sic tibi ardentia & victura in omne tempus scripta abstulerim.*

*Pifis III. Non. Martii MDCCLXXXIX.*

## DOMINICUS LAZZARINIUS.

**D**ominici Lazzarinii vitam eo libentius explicare aggredior, quod non solum Orator bonus, & Poeta summus, sed etiam sapientissimus homo fuisse mihi videatur. Et cum omnes gradus aetatis illius, cumque studia, & quo tempore ista didicerit considero, sic miror ipsum, ut nesciam an alius nostra patrumque memoria extiterit, cui plus debeant litterae ob earum causam alacriter susceptam fortissimeque defensam. Neque quidquam illi obfuit inimicorum, quos multos & potentes habuit, aut invidia, aut odium, quin immo ad augendam celebritatem sermonis hominum haud mediocriter conduxit. Est enim quoddam calumniae genus, quod clamores efficit, & quod non modo patienti, sed etiam libenti animo ferre solemus, quia adhibetur ab iis, qui vel superbia, vel obstinatione quadam sententiae id tantummodo probant, quod ipsis libuit. Sed ab initio est ordiendum. Nobilis hic patronus, custos & defensor optimorum

studiorum natus est XIII. Kal. Septembris an. MDCLXVIII. in oppido Piceni, cui nomen Murrum, quod Macerata millia passuum septem abest. Eo in oppido Lazzarinii multa praeclara majorum vestigia habent, neque monumenta defunt ad probandum, ipsos vel illud, vel vicinum pagum tenuisse aliquando in sua potestate atque ditione. At & domicilium Maceratae habent, & inter Patricios, antiquissimosque cives illius urbis numerantur. Multi clari viri illustrem familiam illustriorem fecerunt, ex quibus memoratur praesertim Nicolaus senior, Ferrariensibus Marchionibus, & Bessarioni Cardinali magno ingeniorum aestimatori ob excellentem doctrinam in Graecis & Latinis litteris acceptissimus (1). Pater Do-

---

(1) *De eo haec scripsit Apostolus Zenus*. Tom. V. Biblioteca Poetica volgare. Niccolò Lazzarini da Moro. gentiluomo Maceratese, fiorì verso l'anno 1490. Insegnò Lettere Greche e Latine a' figliuoli del Duca di Ferrara. Fu poeta assai culto e leggiadro, benchè non arrivasse a quella pulitezza, con la quale dopo lui scrissero il Sanazzaro, il Bembo e gli altri.

minico fuit Franciscus Maria, quem puer amisit, mater Ludovica Guasparrinia, femina insigni nobilitate & eximia virtute praedita, a qua liberaliter educatus fuit. Puer frequentavit Jesuitarum scholas, & magna acuti & acris ingenii signa dedit. Audivit quoque Philosophiae, Theologiae & Juris prudentiae doctores, & nondum expleto decimo nono aetatis anno, illa doctrinae insignia acceperat. Sed haec ne ad laureolam quidem satis esse putavit. Nam cum intellexisset perridiculos esse, qui artes rhetoricas exponebant, quod nil nisi insolens, ineptum ac puerile confectarentur, ab ipsis Philosophis de rebus non necessariis argutissime disputantibus aniles ineptias efferri, Theologos, ac Jurisperitos fontes rerum non videre, & disciplinas, quas profitebantur, indotatas, incommitatas & incomptas esse velle, semet industriae suae poenituit, & ingenue fassus est:

*Nil equidem didici Picena doctus in urbe,  
 Et si quid didici non meminisse velim.  
 Me melius veteres lecti docuere parentes,  
 Cum mihi gymnasium gramen & herba foret.*

Improbans igitur omne id, quod didicerat, ad se ipsum retexendum toto pectore incubuit. Magnam se habere gratiam Angelo Politiano ajebat, quod ejus scripta, quae forte ad suas manus pervenerant, sibi monstraverint viam, quae ducit ad politio-rem elegantiam, reconditioremque eruditionem. Ea propter diu noctuque omnium bonarum artium scriptores, ac doctores & legebat & pervolutabat, & brevi eo pervenit, ut perbene & Latine & Etrusce scribere putaretur. In quo ut socios comitesque haberet, coepit exagitare atque infectari perversam, quae tum in more erat, docendi rationem, suos maxime admonens, ne operam perderent in audiendis magistris, qui cum sibi semitam non saperent, ceteris monstrabant viam. Ex quo factum est, ut magna Jesuitarum praefertim in eum exarserit ira, quae ne morte quidem ipsius sedari potuit. Coactus Lazzarinius sustinere quotidiana convicia, minime despondidit animum, ardentiorique studio in incoepto itinere permansit. Arripuit incredibili labore, cum ipse sibi dux et magister esset, Graecas litteras, quas tum perpauci

in Italia discebant, renovavit studia Philosophiae, & Juris prudentiae, & homine Augustiniano auctore & doctore, animum applicuit ad illud Theologiae genus, quod sequi solent recti verique cupidi. Ex quo tempore tanto amore exarsit in illud Ecclesiae lumen Augustinum, ut quoad vixerit ejusdem opiniones summa constantia, libertateque defenderit, ipsumque pie sancteque coluerit. Hujus pietatis indicium esse potest Latinus hymnus, quem de eodem inchoavit, quemque non perfecisse dolemus: magniloquentiam enim poetae prodit. Eximium ingenium Lazzarini jam publicum theatrum exposcebat, in quo cum gloria versaretur; quod respicientes ejus cives an. MDCLXXXX. munus illi assignarunt docendi jus civile in patrio Gymnasio. Huic sane satisfecit magna criticae & eruditionis copia, seque non modo legum Romanarum, sed & Juris publici, & omnis antiquitatis bene peritum ostendit. Quadriennio post jussus est explicare Pontificium jus, neque ejus modo schola, sed & domus magna quotidie discipulorum frequentia celebrabatur. Natura enim impellebatur, ut

prodesse vellet quamplurimis, in primisque docendo, rationibusque prudentiae tradendis. Eo etiam accedebat studium poesis, ceterarumque humaniorum litterarum, quae ut eluerent sordes, quibus jamdiu obsoleverant, nulli ipse pepercit labori. Ea propter vetus Academia *Catenatorum* reviguit, & nova instituta est, cui nomen Colonia Elvia, quia deducta putabatur ex Arcadia Romana, qua per illa tempora nulla celebratior erat Academia. Qui huic praeerat (Custodem appellant) Marius Crescimbenius, quocum Lazzarinius patriam communem habebat, eliciebat ab eo eruditas epistolas & carmina, petiitque aliquando ab ipso pro sua amicitia & pro suo perpetuo studio in Italicas litteras, quas praesertim excoluit, ut oppugnaret eos, qui Latinam linguam Italica copiosiore aptioremque ad poesim, eloquentiam, historiam, philosophiam, omnesque eruditas quaestiones tractandas affirmabant. Qua de re ipse opus composuit, quod ex hominum memoria excidisset, nisi Romae in Tabulario Arcadum extarent litterae ad ipsum Crescimbenium, quae declarant quid ipse, quoque ordine scri-



psferit (i). Cum Dominicus numquam relaxaret animum a maximis, quas in studiis

---

Alfesebeo Carissimo

Quanto alla mia Censura dell' amico, sappiate, che ella è ritrovata, e formata così. Io prendo a biasimare quella strana, e bestial sentenza d'Opico, che uomini intendenti non possono non essere innetti, parlando volgarmente; e che la lingua Latina alla nostra sopraffa di copia, di numero, e di ricchezza. Nel proemio riprendo generalmente coloro, che lasciano d'adoperare la nativa lingua per usar la straniera con molte ragioni, ed autorità tolte da quel che sopra ciò dissero e Tullio, e Plinio, e Dante, ed altri uomini dottissimi. Poi m'avanzo a dir l'opinione, che ebbero della lingua Latina uomini dottissimi, ed i Latini medesimi; poi mostro con l'autorità di coloro, che tradussero la Filosofia Greca, come Teodoro Gaza, Ermolao Barbaro, ed altri, che la Latina per una somma penuria di voci è poco atta ad illustrar le cose filosofiche. In poco mostro, che ci è meglio adoperar la Toscana, che la Latina. Voi vi vedrete le ragioni, quando averete in mano l'opera.

adhibebat, contentionibus, consecuta est summa gracilitas, & infirmitas corporis, quae a

---

Tutta la disputa è divisa in due parti. Nella prima pongo la storia della nostra lingua; dove discorrendosi di tante forti di favole, che abbiamo noi, e componimenti, la lezion riuscirà dilettevolissima, ed attissima a provar la mia sentenza. Poi farò chiaro, che i Latini tutte l'opere, che han fatto, le han tolte da Greci, non solamente quanto al ritrovamento della Favola, ma ancora quanto al metro, e confronterò molti versi di Virgilio con quelli di Esiodo, Teocrito, ed Omero, e di Catullo con Callimacho &c. donde mi farò largo a lodar la lingua Toscana, che per la diversità del metro, non ha avuto quell'ajuto dalla Latina, che la Latina dalla Greca, nel dar fuori tante maniere di comporre; poi discorrerò con l'ordine d'Ermo gene delle virtù, che può aver una lingua, e le vedremo tutte, la Dio mercè, esser nella nostra in miglior grado, che non sono nella Latina; e certo vi si diran delle buone cose. Nella seconda parte parlerò del metodo della nostra lingua, dove vedrete la nostra star al confronto della Greca, e sopravanzar la Latina; dico lo vedrete, perche si diran le cose in maniera,

vitae periculo non procul abesse putabatur.  
Itaque & amici & medici illum hortabantur,

---

che non si potran negare. Ed Opico avrà poto gusto, cred'io, in veder derisa quella sua unica ragione, che la lingua Latina è miglior della nostra per la diversa inflessione de' casi ue' nomi, e conjugazioni de' tempi ne' verbi. Mi dispiace, che in una lettera non può capir tutto: basta l'opera sarà di 20. e più fogli, e spero di farmici più onore, che egli non ha fatto con tutti i suoi opuscoli. Intanto poi parlerò Latino; questo per difendere la nostra lingua con quelle armi medesime, con le quali è stata offesa, ma questo mio parlar Latino mostrerà di volta in volta ad arte qualche scarfezza di voci, e l'impossibilità di dir latinamente quello che nella nostra lingua si direbbe con leggiadria. In fine passerò a tacciar il giudizio, che egli fa d'alcuni uomini dell'ultimo nostro secolo, e particolarmente di Bacon di Verulamio, ch'egli chiama latinissimo, e farò vedere, che questo uomo per altro dottissimo, ed eccellentissimo Filosofo, nella sua Istoria della vita e della morte nè ha servito alla lingua Latina, nè ci ha potuto servire. Ma non voglio più tediarvi, oltrechè son certo, che mentre vi scrivo così compendiosamen-

ut desisteret litteris vacare. Remisit quidem aliquid de pristino labore, valetudinemque recuperavit. Tum Perusini vehementer illum rogarunt, ut Quinqueviratum litibus iudicandis (Auditorem Rotae nominant) acciperet. Homo, qui in summa comitate habebat etiam severitatis non parum, illud munus exercuit magna cum opinione non solum doctrinae, sed etiam integritatis. Proderat quoque multis, qui cupidi erant humaniorum litterarum, inter quos honoris causa nominare lubet Angelum Mariam Quirinium, qui postea ex Monacho Cassinensi factus est S. R. E. Cardinalis (1); & cum videret se esse acceptissimum

---

diosamente quest' opera, io ve la confondo. Rosendo m'impedisce dallo scrivervi più a lungo, ed intanto vi saluta caramente. Addio a rivederci Sabato.

- (1) *Ita ille* in Comment. de rebus ad se pertinentibus. Munus Auditoris, ut vocant Rota, gerebat eo tempore in urbe illa (*Perusiae*) Lazzarinus, Professoris vero inter suos Franciscus Burgosius. Ambo post aliquot annos Patavini Athenaei cathedram sunt assecuti, ex qua deinde Burgosius ad

universo populo Perusino, illud curare unum videbatur, ut in illorum commodis augendis nunquam non grata animi sui benevolentia appareret. Tum quoque magnam inivit amicitiam cum Franciscano homine Burgosio, quem postea collegam habuit in Patavino Gymnasio; et quia plurimum tribuebat ejus in rebus divinis doctrinae, quaedam de suo addidit ad illa, quae ipse litteris mandaverat *de Ecclesiasticae historiae in Theologia auctoritate & usu*, quaeque anno MDCCII. Perusiae typis impressa fuere. Jam coeperat Dominicus absentibus etiam esse notus, & Florentiam, Bononiam & Romam venit, sperans ex artibus, quae valent ad concilianda hominum studia, & quae admirabilem dignitatem

---

Catanensem Episcopatum ascendit. Quod par illud doctorum virorum Perusiae nactus fuerim, quodque ad familiares eorundem sermones admissus, multa a Burgosio praecepta hauserim de saniori theologia sectanda, a Lazzarino autem de politiciori litteratura excolenda magno me in lucro deputasse profiteor.

& pergratam utilitatem solent habere, uberes se posse fructus percipere. Florentiae vixit in primis cum Salvinio, Magliabechio & Capaffio; Bononiae cum Josepho Urſio, & Manfrediis fratribus; Romae vero in intimam familiaritatem pervenit Gravinae, Garofoli, Dé Miro & Fontaninii, & gratiam inivit ab hominibus, quorum dignitas vel erat jam, vel futura erat amplissima, Corſinio, Lambertinio, Caſonio, de Via, Imperiali, Spinula atque Paſſioneo. Suspectus erat iis, qui Jeſuitis favebant, his vero omnino inſenſus ob multas cauſſas, ſed praefertim quia auctor putabatur cuſuſdam libelli editi Caefenae, qui nomen prae ſe ferebat Franciſci Bagnarii (1)

---

(1) *Huic titulus eſt: Animadverſiones & notae in Emmanuelis Alvari Grammaticas Inſtitutiones, Authore Franciſco Bagnario Viſtulo ec. Caefenae 1704. Adverſus illum prodiit libellus alter, qui inſcribitur: Bagnarius Poedagogus ad ſcholam revocatus, in quo omni contumeliarum genere laceratur Lazzariniuſ. Quamquam non laudaverim quod ipſe ſuſceperit inimicitias adverſus Jeſuitas tamen majores ab ipſis accepit injurias, quam tulit.*

quoque exagitabatur Alvari grammatica, ut putida, & tricarum plena. Negavit constantissime Lazzarinius se quidquam hujusmodi confecisse, quamvis ei esset persuasum male ab Alvaro, ejusque interpretibus consuli studiosis Latinae Linguae, hancque non ex infinitis obscurisque Grammaticorum praeceptis, sed ex veterum Scriptorum lectione atque imitatione comparandam. Causa etiam fuit apertior magis magisque alienandi ab se Jesuitarum animos. Porro ecquod factum in Litteratorum Republica non dicam audacius, sed impudentius commissum fuit, quam revocare in dubium auctoritatem veterum scriptorum veterumque diplomatum? Utrumque gessere Jesuitae Harduinius & Germonius; & de Germonio quidem tum maxime sermo erat, qui an. MDCCV. *Disputationem* ediderat adversus Jo. Mabillonium defensorem acerrimum & interpretem eximium veterum diplomatum, glorians *se artem illius diplomaticam nullam fecisse*. Defensionem arripuit Mabillonii Justus Fontaninius, Germonii scriptores ephemeridum Trevoltiensium. Hos confutandos suscepit Lazzarinius tum amicitia Fontaninii, tum veritatis studio adductus.

Quae ipse scripsit edita Parisiis fuere, an. MDCCVI. Dominici Passionei ea in urbe tum commorantis cura, ad quem suam ponderosam epistolam apologeticam miserat. Ridet primo impudentiam insolentemque Germonii, qui paucis ineptisque chartis convellere se posse putavit, quod Mabillonius multis, laboriosis doctissimisque *de re Diplomatica* statuerat. Deinde ad rem propius accedens probat quantum intersit tum Christianae tum civili Reipublicae firmam esse veterum diplomatum auctoritatem; ex his etsi quaedam sint falsa, perpauca tamen hujusmodi ad nos pervenisse, & esse notas optimas ad illa dignoscenda; omnia vero conficta fuisse a Monachis, hominibus institutione sanctis & religiosis, non posse affirmari nisi ab iis, qui toti sunt ex fraude & mendacio compositi. Multa false, & firme & graviter dicit, ut aperiat quibus artibus Trevolticae abrogare fidem dictis atque argumentis a Fontaninio allatis, & facere studuerint, & in extrema epistola ait se se brevi Roma discessurum, reservavisseque ad Athenarum suarum (sic Murrum appellare solebat) opum & requiem confectio-

nem



nem cujusdam operis, quo certe innuebat Latinos Dialogos *de corrupta eloquentia*. Nihil iis erat odiosius & molestius Jesuitis, quia fama nuntiabat scriptos illos esse elegantissime, & liberrime, immo fortasse asperrime insectari rationem, quam ipsi in docendo sequebantur. Ne quod, tum promiserat, praestaret, fecit petulantia Germonii ejusque defensorum, qui ita clamabant, ut nullum obstrependi finem facere velle viderentur. Germonius etiam Lazzarini epistolam ad Passioneum, seu ad amicum Parisiensem, de qua supra diximus, notulis quibusdam aspere & insulse momorderat; & homo, cui facile ardebat animus, & cor cumulabatur ira, minime a se obtinere poterat, ut patienter ferret inimicorum injurias. Itaque *Defensionem in Germonium* confecit, quae typis impressa fuit studio docti viri Neapolitani Cajetani Lombardii. Alloquitur Germonium ipsum, ac si praesens esset, cum judiciali quadam asperitate, & cum sententiarum aculeis. Ignorare ipsum ostendit quid intersit inter atticos, veteres, urbanos sales, quibus illa ad Passioneum epistola abundabat, & convicia ex trivio sum-

pta, quibus se ipsum infectatus est. Probat etiam eundem nihil didicisse de scribendi Latine elegantia, quod ea reprehenderit, quae sunt elegantissima, & in multis ipse peccasset, & omnino barbare scriberet. Dum vero rationem poscit quare quidque ipse & Trevoltien- ses dixerint adversus se, Fontaninium & Ma- billonium, sic instat, urget & premit adversa- rios suos, ut nullum ipsis effugium relinquat, convincatque ipsos non solum indocte, sed et- iam impie fecisse, quod minime sincera esse judicaverint vetustissima diplomata, quibus mi- rifice Ecclesiarum, Monasteriorum, Regum no- bilissimarumque familiarum historia comproba- tur atque illustratur. Rediit paullo post ad eandem rem, scripta ad Fontaninium epistola, non quo veritatis causa novis egeret argumen- tis, sed ut deceptos a Germonii fautoribus fuisse probaret Scriptores ephemeridum Parisien- sium & Batavarum, qui de tota hac contro- versia falsa & inverisimilia narraverant. Ex- tat & alia, sed brevis, Epistola ad Fontani- nium ipsum, qua laudat M. Antonium Gattum, quod defensionem illius adversus Jacobum Ber- nardum suscepisset. Fertur & alia hujusmodi

scripsisse, quia non facile obliviscebatur injuriarum, & quia fortis & constans in tuenda veritate & amicis videri volebat. Ceterum non est tacendum, quod ad laudem illius haud mediocriter facit, senem improbasse, quae juveniliter exultans ad irridendum Germonium acrius persecutus est, quanquam id, quod in eum jactarunt adversarii, convicium, quod ipse respondit, urbanitas vere possit appellari (1). Eodem tempore, quo illa exaravit, Italice reddidit librum Aristotelis *de mundo*, quo

- (1) *Hinc factum ut ad Germonium scriberet: quo quidem sit, ut qui nostra illa joca legerint, rideant, qui tua vero maledicta horreant. Infinitus essent si eos nominare vellem, qui scripta Lazzarini in Germonium laudarunt. De Germoniana quidem Oratione pronuntiarunt Scriptores Actorum Lipsensium politissimo dicendi genere illam conscriptam fuisse. Cum autem Germonius (addunt ipsi) castissimae Latinitatis studiosus vellet videri, & Lazzarino diligentissimo certe Ciceronis acmulo quaedam styli vitia objecerit, hic non sua solum verba vindicat, verum etiam Germonium reprehendit, quod scripserit. T. IV. Sect. VIII. P. 355.*

nihil eloquentius se unquam legisse, & rapi omnino amoenitate aurei illius fluminis (sic enim a Cicerone Aristotelia copia appellabatur) dicebat. Quamquam & illum ipsum in Latinum converterit vir sane doctissimus Budaeus, hunc tamen longe abfuisse ab elegantia Graeci scriptoris merito judicabat Lazzarinius, ut in nova interpretatione conficienda esset opera ponenda. Hanc ad Gravinam & Garosolum misit, qui Graecas litteras sic amabant, ut sine iis nullam esse eruditionem arbitrarentur. Post id quaedam Sallustii Graeci philosophi & Lycophronis convertit, & illa priora edita Venetiis fuerunt an. MDCCX (1). Nullam omnino extare Graecorum scriptorum interpretationem ipse concupivisset, parum adeo sibi satis faciebant, qui in ejusmodi re elaboraverant, quod judicium si non superbum, nimis certe severum facile dixeris. Et quamvis Petro Victorio tantum impertiebatur laudis, quantum viro Graecis litteris doctissimo debebatur, hujus ta-

---

(1) *Extant in opere, cui titulus: Osservazioni critiche del Dot. Girolamo Baruffaldi in difesa del Chiaris. March. Orsi.*

men interpretationibus non plane poterat esse contentus. Quod sane miror; sunt enim splendidae verbis, acutae, prudentiaeque plenissimae. Graeca ipse praesertim tractavit, cum Bononiae annum & amplius fuisset, dum illi praeerat Casonius Cardinalis, tum propter illius amicitiam, tum propter doctrinarum, quae in illa urbe semper floruerunt, cupiditatem. Quae vero Graecos scriptores imitans studii delectationisque gratia litteris mandabat, aut in *Gelatorum* Academia, aut in amicorum corona, qui saepe conveniebant apud Iosephum Ursium, recitabat. His artibus exercitationibusque effecit, ut omnium sermone ejus nomen celebraretur; quapropter magnum se additurum decus Gymnasio Patavino judicavit Venetus Senatus, si ipsum ad docendas in eodem Graecas & Latinas litteras vocasset. Quingentorum florenorum stipendium ei propositum fuit, neque omissa praeconia, quae declarabant quantum illius doctrinae tribueret (1). Tam lipe-

---

(1) *His verbis scriptum est Diploma.* Non permesso alle moleste indisposizioni, che affliggono la salute

rali, tamque honorificae invitationi cessit Lazzarinius, & Patavium venit ineunte an. MDCCXI. Priori oratione, qua ingressus est Academiae fores, causam egit strenue Graecarum literarum. Probavit enim sine iis neminem bene Latinam linguam callere, atque ad eloquentiam, eruditionem, perfectam cognitionem historiae, ma-

---

dell' Ab. Sebastiano Melchiorri d'assoggettarli al grave peso della Cattedra d' Umanità Greca e Latina, ricercano i riguardi essenziali dello Studio, che vi resti sostituito altro soggetto, che ben corrisponda alla sua importanza. Avutesi perciò fondate relazioni, che l'Ab. Domenico Lazzarini di Macerata unisca alla nobiltà de' natali gli ornamenti di perfetta erudizione, e che con l'opere date alla luce abbia fatto conoscere la rarità ed elevatezza del suo ingegno nel fondato possesso che tiene nelle scienze, ben rilevano i Riformatori nostri opportuno l'incontro di promoverlo alla Lettura stessa . . . . . con annuo stipendio di fiorini 500.

*Dat. ex nostro Ducal Pal. die 18. Dec. 1710.*

gnarumque artium disciplinas posse pervenire (1). Clamore etiam atque consensu doctorum corripuit vulgares magistros, planeque esse quod ferri non posset, ostendit. Si Facciolatum audimus, ut olim Faselo contigit, Lazzarinius cum eam orationem habuit, deficiente memoria, repente obmutuit, sed Faselo animosior locum tenuit, & quod reliquum erat de scripto pronuntiavit. Alia & innuit Facciolatus de Lazzarinio, ex quibus apparet honori invidisse collegae. Ait enim illum vix

---

(1) *Summis laudibus hanc orationem extulere Antonius Maria Salvinus, Lez. 48. & Ap. Zenus, Lettere T. I. Cum vero Lazzarinius ipse ad suos scriberet de plausu, quo excepta fuit haec oratio, ait. Se avrò la stessa fortuna nel giudizio di tutta l'Italia, come ho avuto quà, posso consolarmi delle mie gravi fatiche. Non mi stendo a dir molti particolari perchè &c. Dirò non dimeno, il che è venuto più dalla fortuna, che dalla virtù mia, che più d'una volta mi turbaron gli evviva, che mi si facevano sotto voce, e che finito che ebbi s' alzareno a voce alta,*

Graeca delibasse, cum ad Patavinos venit, in quo perspicue mendacium mihi esse videtur; magis existimatorem metuendum, quam admirandum Oratorem fuisse, solitumque iisdem de rebus quasi dictata decantare, neque a commentariolis suis discedere; refugisse etiam ab e-  
dendis in vulgus suis orationibus, cum se putaret satis magnam adeptum esse dicendi gloriam, eamque etiam majorem visum iri, si in existimantium arbitrium sua scripta non venissent. Quod judicium cum ipse probare videatur, inimice cum illo egisse judicandus est, qui illam priorem orationem typis, absente invitoque fortasse auctore, commisit. Sed ita erat natura comparatus Facciolatus, ut multa illum tangeret cura gloriae suae, nulla alienae, & vel ipsas laudes, quas raro summis viris tribuebat, malevolentia aliqua suffunderet. Gravis profecto, elegans, & eloquentiae luminibus distincta est illa oratio, quam aliae plures consecutae sunt, ex quibus apparet Lazzarinum fuisse antesignanum eorum, qui optima studia defendebant, & corruptores eloquentiae castigabat. *Quod se animo Christiano & pacato facere profitebatur, quia nemini erat inimicus*



& dolebat tantummodo *esse gratiosos homines, qui barbariem & vaniloquentiam ex sophistarum latebris revocatam juventuti obtruderent.* Ex multis, quas in Academia Patavina habuit, orationibus tres tantummodo extant, neque tertiae extrema manus accessit. Priorem, quae sola vivo auctore prodiit in lucem, edita Bassani *castigatione* quadam ita cavillatus est Antonius Platus Leoninus Carpenfis, sub quo nomine latuisse putatur Jesuita Aghilera, ut in ea non insulfitas modo atque insolentia, sed tanquam insania quaedam appareat. Sed haec facile erat contemnere homini, qui quoties dicturus erat, complebatur schola, significabatur a multiplici corona silentium, deinde crebrae assensiones, multae admirationes, risus etiam cum volebat, & cum volebat indignatio. Cum vero eloquentiae praecepta tradebat, quae ceteri magistri tenui quodam exanguique sermone disputant, hic cum omni gravitate, eruditione & jucunditate explicabat, sic ut mirifice ad dicendum acueret, aut adjuvaret in eo juventutem. Hoc & concedebatur ab iis, qui sine invidia judicabant, fuisse illum ingenio prudentiaque acutissimum in interpretandis Graecis

Latinisque exemplaribus, & in exponendis iis; quae pertinent ad poesin, historiam, artes, in quibus veteres valuerunt, ritus, ceremonias, institutiones atque consuetudines, quas tum in publica, tum in privata re tenuerunt. Tali modo discipuli non solum ab eo accipiebant, quibus studendum esset rebus, quod ipsum tamen erat iis temporibus magnum, sed vias earum rerum, rationemque cognoscebant. Miraberis profecto ex acroasibus, quas publice in schola habuit, dum an. MDCCXV. Aristotelis poeticam interpretabatur, fluxisse tragoediam *de Ulyssæ juniore* Italicis carminibus conscriptam. Non admodum facere illam videbatur, sed decies repetita a Monachis Benedictinis, qui sunt ad S. Justinae, cum placuisset, & cum illius exemplaria foeda mendis ad multorum manus invito auctore pervenissent, ipse de poliando edendoque, quod occultare speraverat, cogitavit. Imitatus est Oedipum Sophoclis. Nam Graeci poetae fabula tota pendet ab eo, quod Oedipus agnoscit se matrem uxorem duxisse, & patrem occidisse, nostri ab eo, quod Ulysses Junior agnoscit se uxorem duxisse filiam, & filium omni virtute praestantem occidisse. Nec filii oc-

cisio unitati nocet, quin immo ipsam agnitionem admirabiliorem facit, & magnam vim habet ad sensum movendum. Id sane spectavit in primis, ut omnes dramatis partes optime inter se congruerent, & quae artis magistri tradunt praecepta, se servasse judicaretur. Quanta etiam adhibuit dictionis ornamenta, quanta elatio verborum & sententiarum in choris! Quanta ubique dignitas, gravitas, venustas atque elegantia, quanta felicitas in transferendis ex Graecis ad Italicas musas sententiarum leporibus! Omnino Lazzarinium Graeca perfecte novisse, & Italica poesi plurimum valuisse, habuisse teretes aures intelligentque iudicium, atque a natura ad sensum, & ad grandia effectum fuisse, ex hac una liquere potest traegodia. Nihilo tamen minus Scipio Maffejus (de Jesuitis non loquor, quorum suspecta tum maxime erant iudicia) qui inimico semper animo in Lazzarinium fuit, maximeque postquam hic libere exposuit, quae reprehendenda duxit in illius Merope, plura Ulyssi objecit. Cetera inter aiebat haud ferendum esse hominem, qui nimium

*Voces tristificas chartis promebat Hetruscis,*

& in eo peccasse poetam, quod patrem, filium filiamque omnium aerumnosissimos non propria, sed avorum culpa populo spectandos praeberit. Qui contendunt praecepisse Aristotelem ne in theatrum inducamus Heroas virtute praestantes, qui a prospera in miseram devenerunt fortunam, minime ad philosophi sensum penetrasse videntur. Omnino si voluisset, Lazzarinius non modo ad tragici, sed etiam ad comici poetae laudem aspirare potuisset. Noverat mores hominum, habebat salis non parum in irridendis illorum stultitiis, & mirum quantum valebat in exprimenda rerum natura, quod vel ex ejus familiaribus sermonibus intelligebatur. In hoc genere nil extat illius nisi Comoedia, quae inscribitur *La Senese*, quaeque genere jocandi eleganti, urbano, ingenioso, faceto referta est. Habet & sua vitia si non in inventione, in dispositione certe atque ordine, quae agnoscebat & improbabat Auctor ipse, sed de iis emendandis nunquam cogitavit, quod illam se per jocum ad oblectandos S. Justinæ Monachos, qui eandem primum egerunt, dictasse dicebat, & quod nunquam emanaturam putaverat. Verum nimis temere, atque injuriose

judicasse videtur Maffejus, qui nulla re ipsam commendari, nunquam risum, semperque tædium movere pronunciavit. Si quis erit etiam, qui non prorsus dignum Lazzarinio judicet sacrum melodrama, quod inscripsit *il Tobia*, quamvis habeat versus libere fluentes & elegantes, non vehementer repugnabo. Istud enim raptim scripsit, ut Oratorianis præsbyteris morem gereret; & ingrate & imperite etiam (nam multa peccarunt) ii fecisse videntur, qui locum illi dederunt inter selecta ipsius carmina. Qui de edendis alienis scriptis laborant, etiam atque etiam videre deberent quid, imprudente & invito auctore, exciderit, quid ipse pervenire in manus hominum concupiverit, quid inchoaverit, quid perfecerit, nec sibi tantum arrogarent, ut probent ea, quae ille improbavit. Sic enim melius & scriptorum famae & litteris consultum esset; & sane poeta non multis eget carminibus, sed paucis, in quibus omnia sint apta atque perfecta, ut ad nominis immortalitatem possit pervenire. In omnibus rebus difficilis est optimi perfectio atque absolutio, sed praesertim in poesi, quod cum intelligeret

Lazzarinius, ex se perpauca extare volebat (1), ex quibus iudicium tantummodo facere possent homines, quam amicas haberet Latinas atque Italicas Musas. Merito quidem Joannes Antonius Vulpus appellavit omnibus numeris absoluta pauca illa Latina carmina Lazzarini, quae cum suis edidit. Redolent enim Augusti aevum. Illa vero Italica epigrammata de Petrarcha, deque illius & suis amoribus, ut sensum movent, ut implent aures, ut sunt tenera, morata, mollia & plena artis atque elegantiae! Et si in senecta reputavit miserrimum fuisse deditum amatoris levitatis, ut beatam inter caelites vitam desperare videretur, repente ad spem rapitur, dum Christum intuetur, ejusque mortem contem-

---

(1) *Hac de causa fortasse Lazzarinius tanquam sua se tantummodo agnoscere dicebat quatuor illa Italica epigrammata, quae relata fuerunt in part. IV. operis, quod inscribitur: Rime d'alcuni illustri Autori viventi aggiunte alla scelta d'Agostino Gobbi, quanquam constaret alia hujusmodi plura ipsum confecisse.*

platur, ex quo materiem sumpsit omnium fortasse elegantissimi epigrammatis. Quanquam putei sicte loquutum fuisse Lazzarinium, dum ait saepius amore se flagrasse in adolescentia, seque provectiore etiam aetate in amorem incidisse, qua de re Latinam elegiam composuit; ad vivum certe exprimebat quod volebat, & imaginibus agentibus & insignitis animabat. Quapropter verè posse dicere videor; perpaucas illius carminum pagellas multorum poetarum volumina superare. Imitari atque exprimere cupiebat Graecos poetas, ut non solum praeceptis, sed etiam exemplo suo admoneret homines, fontes rerum quaerere, rivulos non consectari. Ut verò iis consuleret, qui sine cortice nare non poterant, multae Graeca in Italicam linguam convertenda suscepit. Nisi mos illi fuisset deserere, quod inchoaverat, plura huius generis haberemus; neque extat nisi Sophoclis Electra, cui nec extrema manus quidem accessit. Quare qui exultasse laetitia visi sunt, Jacomellius & Lagomarsinus, quod in ea nonnulla reprehendenda invenerunt, reminisci debebant, neque perfecisse, neque edidisse hanc interpretationem

Lazzarinium, cui sane non erat incognitum, quid ad perfecte reddendos interpretandosque Graecos Tragicos conduceret. Qua de re libellum confecit, quem periisse cum aliis illius scriptis de Poetica, deque Eloquentia, qui sublati illi fuerunt (sua enim negligentissime adservabat) vehementer dolemus. Porro amicis Lazzarini intuentibus in eum crebro in mentem veniebat vereri ecquodnam iudicium posterius facturi essent de illius natura admirabili, & exquisita doctrina & singulari industria. Nam cum adduci nunquam posset, ut in uno aliquo opere poliendo perficiendoque diu ac multum insudaret, sic ut illum magis studium ipsum exercitatioque, quam fructus & gloria delectaret, & multi essent inimici, qui de illo libenter detraherent, fore tempus videbatur, quo magna illius in litteras merita ignorarentur. Haec autem modice illum tangebant, in id unice intentum, ut discipulos suos, ceterosque studiosos litterarum consilio et opera juvaret. Nascenti etiam laudi, dignitati virtutique praefuit multorum nobilissimorum juvenum, quorum nonnullos convectores habuit, atque ex his sic semper dilexit



xit Prosperum Columnam, qui ad summam amplitudinem pervenit, ejusque fratres, ut non cum ullis conjunctius vixisse videretur. Cum vacabat vero a docendi munere, libenter faciebat itinera vel ut amicos, vel ut suos Maceratenfes reviferet. An. MDCCXVI Mediolanum venit, ibique a multis & praefertim ab illius civitatis Archiepifcopo, apud quem habitavit, honoratus fuit. Inde Auguftam Taurinorum acceffit, magnifque praemiis, quae recusavit, ad docendum in illius urbis Gymnafio invitatus fuit (1). Romam & rediit anno Jubilaei, Pontificatum Maximum gerente Benedicto XIII., laudesque fummae, quas de fe ab hominibus doctrina excellentibus praedicari audiebat, magnam vim habebant ad magis

*T. XIV.*

I

---

(1) Sic ille ad Galeardum fuum fcribens. Rex Sardiniae me largiffimo ftipendio fextertiorum quadraginta, five ut Graeci dicerent, centum milio invitavit, ut in fuo Lyceo eloquentiam profitear. In officio atque fide erga Venetam Rempublicam fum, atque ero.

magisque inflammandum animum, qui id unum egerat, ut litteris & Italiae gloriae prospiceret (1). Quod a natura Lazzarinius habuerat genus singulare acuminis, quod arte & exercitatione limaverat, in notandis reprehendendisque scriptorum vitiis, saepe amici curiosius ab illo eliciebant, quid de celeberrimis judicaret. Non dubitabat ipse quod sentiebat, aperire (nihil enim in eo erat nisi ingenuum, ut diceret magis convenire aperte odisse, quam fronte occultare sententiam) ac saepe eveniebat, ut ea, quae eximia & praeclara plerisque videbantur, ipse parva duceret. Usque eo morosus & difficilis erat,

---

(1) *Sunt qui tradunt illum & sustinere debuisse, dum Romae erat, molesta multa ab iis, quos adversarios habebat, quos cum ferebat, agebat gratiam fortunae constantiaeque suae, quae ad hanc experientiam se exercuerat. Fertur & irae aliquid concessisse, scripto Italico epigrammate, quo alloquitur Petrarcham, cujusque est initium,*

Sacro mio Cigno, e ancor non piove mai

ut ei non satisfaceret magnus ille Lucretii interpres Alexander Marchettus, et Tragica Merope Italicae scenae a Maffejo restituta, cujus iudicii sui rationes plures scripto, quod est in manibus hominum, exposuit. Hinc, ut erat credibile, excepit odia atque injurias; nam Maffejus quidquam de sua, Franciscus vero Marchettus quidquam de patris, qui jam obierat, gloria detrahi non facile sinebant. Nos minime pronuntiabimus num dilutae fuerint Lazzarinii reprehensiones. Nam etsi maculis quibusdam Merope, & Lucretii interpretatio carere nobis etiam non videantur, negare tamen non possumus excitandam potius, quam reprimendam fuisse summorum hominum industriam, qui talia ediderunt, quibus merito Italica poesis gloriari possit. Facilius est vitia, quam virtutes videre, neque severe agendum est cum iis, qui, quaedam licet peccaverint, prope jam absoluti atque perfecti in arte, quam tractandam susceperunt, fuisse videntur. At sunt nonnulli, qui certe gloriosius putant, quam omnino non adversarios habere; neque dubitabit quisquam Lazzarinum fuisse paullo intemperantiorem in

coarguendis alienis erroribus. Parum absuit etiam, quin dissolveretur amicitia, quam jamdudum copulaverat cum viro omnium fortasse eruditissimo Antonio Muratorio, earum rerum causa, quas ipse litteris mandaverat de Ludovico Castelvetro. Haud enim ferendas esse arbitrabatur contumelias, quibus praesertim Hannibalem Carum comprovincialem suum, quo neminem Castelvetrius infestiores habuit, Muratorius oneraverat. Illius se defensionem suscepturum professus est, sed ita ut omnes intelligerent, philosophiam se docuisse quemadmodum adversus amicum se gerere deberet. Existimabat Muratorius ad hanc pugnam non sua sponte, sed Fontaninii importunissimi adversarii sui cohortationibus Lazzarinum impelli, & huic ita rescripsit, ut nihil se male ostenderit, quam ut amicitiae officia diligenter sancteque servarentur. Verum vel quia Lazzarinus illi, cui erat iratus, propter singularem hominis doctrinam & gravitatem quotidie aliquid iracundiae remittebat, vel quia raro instituta absolvebat atque interrupta contexebat, minas, quas jactaverat, evanescere sivit. Sunt qui arbitrantur ab ipso prodiisse

scripta quaedam plena maledictorum & conciviorum in Muratorium pro Caro & Petrarca, sed non dubito qui haec affirmarunt, quin male oderint Lazzarinum ipsum. Res est testata multis monumentis eundem abstinuisse hujusmodi injuriis, illas a Blasio Schiavo Estensi conflatas, & quae ipse extrema aetate exaravit in disputatione & dialogo, dum valetudinis ergo commorabatur in Euganeis montibus prope Petrarcae aedes, pro hujus defensione, affluere humanitate, lepore, sale atque eruditione libero homine digna (1). Sed haec publica luce caruerunt;

I 3

---

(1) *Josephus Bartolius Patavinus, qui fuit ex Lazzarini discipulis unus, haec de illius dialogis testatur: Vero disegno delle due Tavolette d'Avorio chiamate Dittico Quiriniano, Ragionamento II. in Parma 1757. Ben è sciagura, che anche il Nipote dell' immortal Muratori abbia nella bella vita, che del Zio stese, denigrato alquanto la fama del Lazzarini, dipingendolo Autore d'alcune opere, le quali io meglio di tutti posso asseverare, che infallibilmente sono dello Schiavo, i cui originali furono presso di*

quod sane miror, quia tantus erat amor illius in Itatorum Lyricorum principem, ut nihil supra posset. Qui aiebant idcirco refugisse Lazzarinium a prodeundo in publicum, quod melius putabat dicere se posse, quam scribere, quod peringeniosis hominibus, ueque satis doctis plerumque contigit, minime sane nouerunt vim ejus ingenii atque doctrinae, quae non tam in ejus familiaribus sermonibus, quam in scriptis spirabat. Verum solitus ipse, quae chartis mandauerat, maxime intentis oculis,

---

me lungo tempo, e che affatto diverse farebbero quando composte l'altro le avesse. In difesa del Petrarca contro il Muratori dettò bensì, ma assai civilmente, il Lazzarini certi Dialoghi tra Giovane e Vecchio da me veduti, anzi in parte nella mia puerizia imitati; e contro l'opera postuma del Castelvetro, massimamente in difesa di Platone, altro lungo scritto eziandio formò, cui pure io ricordomi d'aver letto. Per dare autentiche prove di quanto affermo, m'abboccherò in Macerata col nobil nipote del Lazzarini &c.

acerrimeque contemplari, raro sibi, qui in omni re absolutionem perfectionemque desiderabat, satisfaciebat, saepissime etiam quod magna alacritate inchoaverat, seponebat, & cum ab eo quaererent amici, quare aliquid ex se minime pateretur extare, respondebat se in scriniis relicturum magnorum operum fundamenta, quae susceptione magis prima, quam perfectione essent judicanda. Petiit ab eo aliquando vir nobilitate praestans, cui propter amicitiam auctoritatemque nil se negare posse putabat, ut de antiqua sede Cenomanorum, de qua magna tum orta erat disputatio inter Scipionem Massejum Veronensem & Paulum Galeardum Brixensem, sententiam suam exponeret, & quamvis ea quae scripto mandavit plena essent eruditionis, doctrinae, elegantiae atque festivitatis, & controversiam omnino tollere viderentur, ipsa tamen minime vulgavit, neque ab aliis vulgari sivit. Factum bene ac praeclare a Julio Baitellio, qui tres Lazzarinii epistolas de hac ipsa quaestione ab heredibus impetratas quadriennio post mortem illius emisit. Priori adversus Massejum Lazzariuius probat distichon illud

*Flavus, quam molli percurrit flumine Mela,  
Brixia Veronae mater amata meae,*

dignum Catullo esse, neque aliena manu elegantissimae elegiae, in qua Januam loquentem inducit, adfutum, conjiciendumque ex eo Veronenses aliquando in Cenomanis fuisse numeratos, ac proinde Veronam Brixiae subiectam, ut capiti, seu *μετροπολι* gentis Cenomanorum. Cui Veronensis poetae testimonio minime adversari, quae de Cenomanis vicinisque regionibus tradiderunt Polybius, Livius & Plinius, quin immo ab illorum dictis ipsum mirifice confirmari secunda atque tertia epistola convincit, in quibus de veteri Italiae geographia plura differuntur. Omnino fuisse Lazzarinium antiquitatis litterate peritum non ex his modo patet epistolis, sed ex iis etiam, quae de antiquis Picenis rogatu Marefuschii Cardinalis exaravit. Judicium Romae fieri debebat, qui vere Piceni essent dicendi, resque judiciali dicendi genere erat tractanda. Cum autem ipse abhorreret a re civili, occultari nomen suum in iis, quae scri-



psit, concupivit, totumque hoc forense negotium prudentiae, atque doctrinae collegarum suorum Polenii & Rivae se commisisse agebat. Redolent tamen hac de re scripta ejus stilum, qui magis etiam apparet in epistola quadam ad Fontaninium, qua eruditius propositam quaestionem dissolvit. Saepe eveniebat ut Lazzarinius pro sua humanitate & doctrina de hujusmodi controversiis sententiam exponere rogaretur, & siquid habebat, quod docere fideliter posset, non illo instrumento forensi, litigioso, arido, tracto ex jurisconsultorum opinionibus, quod exiguum sane est & mendicum, sed exquisitae, & undique collectae & comportatae eruditionis apparatu se amicis satisfacere debere putabat. Ornabat orationem quasi colore quodam, & succo suo, & si quid interdum persecutus est acrius, quamvis istud cum bonis rebus conjunctum esset, & hilariorem orationem faceret, reprehendendum tamen et fugiendum in senecta putavit. Sic ille cum prospera fortuna functus esset, & famam, honores, & pecuniam (nam illius stipendium ad mille usque florenos & amplius auctum fuit) et gratiam ob-

tinuisset, & valetudine integra ad magnos in studiis excipiendos labores usus fuisset, coepit an. MDCCXXXIII. stranguria, febribus, aliisque incommodis affligi. Fortem se praebuit in iis ferendis, & quantum poterat, non intermittebat studia doctrinae, & quae sui muneris essent. Qui in his exequendis negligentem illum fuisse affirmant (1) aperte calumniantur; & vir ad omnia summa natus, majorem quidem gloriam consecutus fuisset, nisi a conficiendis operibus discipulorum suorum utilitas ipsum abstraxisset, in qua procuranda neque diligentiores, neque majorem invenisses. Nec valetudinis solum incommodis, sed & animo iis temporibus angebatur, quod Academicis feriis, dum aberat Patavio, a discipulo, cui patuit aditus ad bibliothecam suam, ablatis quidam rariores libri, & quod majus erat, scripta sua de eloquentia atque poetica. Detecto furto, biennio ferme postquam illud factum fuerat, occultari voluit, ne

---

(1) Facc. Fast. Gym. Part. III. p. 245.

fraus & scelus nocentissimi juvenis odio civium, & magistratus judicio subiceretur. Hac ipsa vero de causa cum tristiculos vidisset fratris sui filios, quos secum habere voluerat propter mores suavissimos, & propter expectationem, quam suorum concitaverant, subridens iis inquit: *bono estote animo; non despero enim quae multis commentationibus multoque labore de poetica litteris mandavi, posse me brevi retexere: omnia enim ferme in memoria haerent.* Et manum quidem operi admovit, sed ne longius procederet magna impedivere valetudinis incommoda. Homo, qui suis scriptis numquam contentus erat, cum semper melius aliquid quaereret, sic tamen probabat de poetica libros, ut dignos Veneto Senatu, cui destinaverat tamquam testes sempiternos meritorum illius erga se, suaeque pietatis, dignos aetate, usu, & nomine suo putaret. Abhorrebant enim a communibus praeceptis; investigabant ortum, progressionem ac vices omnis poesis generis; a natura, ab Homeri, Pindari aliorumque Graecorum magniloquentia vera deducebant praecepta; optime de poesi meritos Graecos, Latinos, Ita-

los nominabant, & omnem antiquorum, & Aristoteleam praesertim poeticam rationem, interpositis undique judiciis, complectebantur. Et in Aristotele quidem diuturna meditatione multa se invenisse dicebat, quae interpretes effugerant, ejusque disciplinae ac rationi maxime consentanea esse poemata Homeri, quem non solum maximum poetam, sed & philosophum summum, & plane oratorem, & tragicum fuisse affirmabat. Non tanti facere videbatur Lazzarinius dialogos sex de corrupta eloquentia, quanti faciebat de poetica libros, quia fortasse verebatur, ne iis plures se laesos esse arbitrarentur; nam quamvis in senectae eundem gereret animum, quem in adolescentia habuerat, magnum, excelsum, apertum & simplicem, Christianae tamen philosophiae praeceptis imbutus lenissime vel cum ipsis inimicis agendum putabat. Sed non facile erat istorum animos mitigare, quos laedendi cupiditas effrenata & furiosa sic rapiebat, ut de Lazzarinio partim ficta aperte, partim effutita temere spargere in vulgus minime dubitarent. Dum aeger erat, noctu surrexit e lectulo, & cum aliquid offendisset, in terram

cecidit. Nemo suorum cum accurrisset, & cum viribus destitutus esset, mutus, exanimatus, & vix vivus prima luce inventus est. Hinc sparsus rumor eundem obiisse, quo nuntio laeti ejus adversarii, qui Venetiis erant, tota urbe disseminarunt propter conscientiam scelerum desperasse Lazzarinium salutem, & recusasse illa subsidia, quae divinitus sunt instituta ad expiandos animos. Res indigna atque intolleranda visa est omnibus, & illam sicut acerbissimam moeruit homo, integer, innocens atque religiosus. Deo vero gratias agebat, quod se in vita diutius esse finisset ad maledicta convincenda, ipsumque placandum. Et sane quot illustria dedit exempla pietatis, fortitudinis, constantiae, atque mansuetudinis? Vivere illi erat de rebus divinis loqui, legere sacros libros (& subter pulvinar habebat Novum Testamentum Graece scriptum, a quo se maxime recreari & ad spem erigi dicebat) & nemo ad eum admittebatur, qui non patientiam virtutemque illius admiraretur. Quo minus vitae sibi restare intelligebat, eo plus religiosi viatici quaerebat, vehementerque postulavit, quan-

quam medici judicassent, non impendere illi mortem, ut Christi Corpus ad se deferretur, in quo suscipiendo tantam caritatis vim, tantam praeteritae, caducaeque vitae poenitentiam, & futurae aeternaeque cum beatis spem prae se tulit, ut omnes, qui aderant, vultu, voce, collacrymatione tanti viri desiderium sibi gravissimum fore ostenderint. Neque multo post ille vitam finivit, cum compleisset annos LXV. menses X. dies XXV. Cadaver deportatum fuit ad S. Andreae, ibique sepultum cum Inscriptione LAZZARINII OSSA. Prope vero sepulcrum sculptum in marmore fuit Graecum epigramma, quod sibi vivens fecerat. Est autem hujusmodi:

Δομνίκος εκ Μουρρου κοσμηθεὶς ἐνθάδε κεῖται,  
ὧς πικρύντης τήλοθεν εκ πατρίδος.

Secundo ferme, postquam ille obierat, mense, Patavina Recuperatorum Academia, pompa, exequiis, quibus nullae celebrationes fuerunt, oratione, quam habuit Josephus Salius, & carminibus ejus memoriam honoravit, cum adessent Decuriones Civitatis, & qui huic

praerat Senator amplissimus Jacobus Soran-  
tius. In ingressu Aedis Eremitanorum, in qua  
exequiae celebratae fuerunt, haec legebatur  
inscriptio.

DOMINICO LAZZARINO DE MURRO PATRICIO

MACERATENSI

GRAECARUM LATINARUMQUE LITTERARUM

VINDICI ACERRIMO

ET IN GYMNASIO PATAVINO EARUMDEM

PROFESSORI EXIMIO

QUI CUM DE TOTA STUDIORUM RATIONE

RECTE SENTIRET

QUOD ANIMO SENSIT LINGUA PROMPTUM

HABUIT

AC JUVENTUTEM SIBI COMMISSAM

SINE FUCO ET FALLACIIS

CONTEMPTA IMPERITORUM FABULA

PLURES ANNOS E LOCO SUPERIORE DOCERE

AUSUS EST

ORATORIAE PORRO POETICAEQUE

FACULTATIS GLORIA

CUM PAUCIS CONFERENDUS

PARUM SIBI SEMPER TRIBUIT ANTIQUIS

OMNIA

PIO VERACI CONSTATI

QUEM DOCTI PROBARUNT SEMIDOCTI  
TIMUERUNT

ACADEMICI PATAVINI

NON SINE DESIDERIO ET LACRYMIS

BENEMERENTI FUNUS INSTAURANT

OBIIT IV. IDUS QUINTILES ANNO A. V. P.

MDCCXXXIV.

Typis impressa fuere, quae & soluta & numeris adstricta oratione de Lazzarinii laudibus dixere Academici, aliique extitere homines clarissimi, qui epistolis & carminibus (1) flebiliter lamentati sunt de tanti viri morte, perinde ac si illa magnum fecissent detrimentum Graecae, Romanae Italiaeque litterae. Ii vero quem vivum fauciverant, mortuum etiam lacerarunt, ut renovasse exemplum mihi videantur illorum Graecorum, qui Nestoris cadaveri, sicuti est apud Homerum, ab Achille interfecti

cti

---

(1) *Ex multis commemorare lubet elegias Latinas Antonii Vulpii, & Castrucci Bonamicii, quibus nihil fieri potuit elegantius atque honorificentius.*



Eti turmatim circumfistentes, impune conviciabantur. Verum si contemnimus, & abjectos illos putamus, qui mortuos & non responsuros lingua & calamo hostiliter adoriuntur, non videbimur nimium Lazzarinii laudi favere. Fortasse vel ipse vivus, postquam adolescentiae impetus deferbuerant, & partae existimationis fructibus fruebatur, conviciatorum maledicta erecto excelsoque animo despexisset. Poterat enim omnia sibi adsciscere, quae sunt magnorum virorum, gloriosumque illi erat graves se suscepisse inimicitias, propterea quod in optimis studiis defendendis a bonorum causa constantissime stetisset. Neque credibile est qui metu non frangebatur, eum frangi gloriolae cupiditate. Quapropter qui ei dant vitio, quod turpiter laudes nonnullorum mercaretur, admodum mentiuntur (1). Tam enim aberat ab hac culpa,

T. XIV.

K

(1) Ita elegans, sed maledicus ille exagitator multorum doctrina excellentium virorum Lucius Sestius Quinti F. Serm. III.

ut hanc in aliis tanquam levis sibi que diffidentis animi signum & saepe & libere reprehenderet. Quis vero est, qui non gaudeat consentienti laude bonorum, incorruptaque voce bene judicantium de eccellente virtute, quorum testimoniis si interdum utebatur Lazzarinius ad retundendos sermones maledicorum conviciatorum, aut ad amovendam ab se aliquam suspicionem (1) non propterea aut levis, aut aura captus frivola, aut superbus erit dicendus? Illae autem virtutes, quae in

..... Ad superos Juvenem Salvinus Ulysses  
Evehit; Etruscum laudat Murranus Homerum,  
Sic afinos videas costas conjungere costis,  
Officioque pari se ultro citroque fricare,  
Quod neuter faceret, fieri nisi posset utrinque.

*Carpitur & in aliis locis horum sermonum Lazzarinius, neque aliter fieri poterat, cum ab homine Jesuita illi prodiiissent,*

(1) *Vide ejus Latinam epistolam ad Gerardum Capassum, quam nos edidimus in fine hujus hominis vitae. Tom. VII. pag. 253.*

ingenii facultatibus, quae in iustitia, fide, constantia ac beneficentia sunt positae, quaeque generi hominum maxime sunt fructuosae, tam altas in Lazzarino habebant radices, ut nulla unquam vi labefactari potuerint. Ex quo fiebat, ut qui propius ad illum accederent, mirifice ipsum & colerent & diligerent. Et si ex his quidam fuerunt, qui dum elaborarunt in ejusdem scriptis colligendis. atque edendis, suorum potius, quam Lazzarini judicio usi sunt, sic ut probaverint quae ipse improbabat, & quaedam etiam ab aliis impetrata, ut se liberaret molestiis, quibus affici solet poetarum genus, illi tribuerint, errasse nobis videntur cum excusatione amicitiae & pietatis. Sane quis tam iniquus est, quem non moveant Facciolati dicta adversus Benalium (1), quo neminem discipulum studiosiorem habuit Lazzarinius, quod' omnem curam ac diligentiam posuit in illius orationibus aliisque scriptis, quae invenire potuit, vulgandis? Nos.

---

(1) Fast. Gym Pat. Part 1. pag. LXII.

quidem illi gratiam non mediocrem habendam putamus, ut & multam habemus Antonio Lazzarinio, qui commentarium de patruī vita edidit, multisque monumentis ornavit, quae dictorum fidem faciunt, ejusque adversarios non inhumanitatis solum, sed etiam amentiae convincunt. Quia vero ingenii virtutes non tam disciplina & exercitationibus, quam natura corroborantur, abstinuit semper Lazzarinus ab iis, quae optimam corrumpere potuissent: somni, cibi potionisque parcissimus, voluptatum, quae animos a virtute detorquent & corpora enervant severissimus contemptor, munditiei non odiosae amator, talis denique vir, quem posteritas admirari & recordari suavissime debeat.

## O P E R A E D I T A .

Praefatio *ad ea, quae exaravit F. Alexander de Bur-*  
gos Messanenſis Theologus Ord. Min. Conv. &  
Hiſt. Eccl. Profeſſ. de Eccleſiaſticae Hiſtoriae in  
Theologia auctoritate atque uſu. Peruſiae 1702.

Dominici Lazzarini ex Nobilib. de Murro Epiſtola  
ad Amicum Pariſienſem pro Vindiciis antiquorum  
Diplomatũ Juſti Fontanini Forojuſienſis. Romae  
per Franciſcum Gonzagam 1706. *Non Romae, ut*  
*titulus prae ſe fert, ſed Pariſiis liber impreſſus fuit*  
*a Dezallierio.*

Dominici Lazzarini &c. Defenſio in P. Bartholomae-  
um Germonium edita ſtudio Cajetani Lombardi  
Philoſophi & Medici Neapolitani. Venetiis per Ni-  
colaum Pezzana 1708. *Haec & alia, quae de*  
*hac controverſia litteris mandavit Lazzarinius, re-*  
*tulit in volumen illius ſcriptorum, quod Romae e-*  
*didit an. 1743. typis Pallearinianis Franciſcus Be-*  
*nalius, de quo infra dicemus. De hac defenſione*  
*vide vol. III. del Giornale de' Letterati d'Italia.*  
Venezia 1710.

Libro degli Dei e del mondo di Salluſtio Filoſofo  
Greco. *Extat in libro, cujus haec eſt inſcriptio;*  
Oſſervazioni critiche del Sig. Girolamo Baruffaldi  
Ferrareſe, nelle quali eſaminandoſi la lettera toc-  
cante le conſiderazioni del March. Giovan Giuſe-  
pe Orſi ſopra la maniera di ben penſare ne com-

ponimenti scritta da un Accademico &c. si trattano varj argomenti rettorici, poetici, che appartengono alla filosofia, alle belle lettere, e ad altre facoltà scientifiche. In Venezia presso Gabriello Hertz 1710. in 8.

Dominici Lazzarini de Murro oratio I. pro optimis studiis habita in Gymnasio Patavino non. Maii 1711. apud Joannem Manfrè 1711.

Ulisse il Giovane, Tragedia; in Padova appresso Gio. Batista Conzatti 1710. in 8. *Alibi quoque ipsa impressa fuit. Vide sis quae de hac Tragoedia scripsit Franciscus Algarottus in epistola ad Albertatum Senatorem data. Dum enim illam summis laudibus effert, ait Lazzarinum non solum sumpsisse multa felicissime a Sophocle, sed etiam non pauca in melius immutasse.*

Dominici Lazzarini Oratio in funere Fortunati Mauroceni, Brixienfis Episcopi: Ferrariae typis Josephi Barberii 1718. in 4. & Venetiis eodem anno apud Angelum Pasinellum.

Orazione detta a nome della Città di Padova in lode dell' Illustrissimo ed Eccellentissimo Sig. Alvise Moccenigo III. Capitanio nella partenza dal suo glorioso Reggimento, e che fu poi Doge di Venezia, composta dal Sig. Abate Domenico Lazzarini: In Venezia per Domenico Occhi 1732. in 4.

La Satire Commedia dell' Ab. Domenico Lazzarini da Morro Maceratese dianzi Professor di Lettere

Greche, e Latine nell' Università di Padova. Venezia appresso Pietro Bassaglia 1734, 1739. 1743. e 1752.

Poesie del Sig. Abate Domenico Lazzarini Maceratese Professore di Lettere Greche e Latine nell' Università di Padova, aggiuntivi altri poetici componimenti di diversi in morte dell' Autore. In Venezia presso Gian Gabriello Hertz 1736. in 8. *Varia Lazzarinii carmina vel separatim, vel cum aliorum Poetarum Carminibus impressa antea fuerant. Hoc in libro omnia collecta fuere, & vel ea, quae ipse improbabat, & fortasse quaedam in iis sunt ab ipso non facta. Primum locum obtinent quinquaginta & amplius, ut dicimus, Sonetti, quibus miscentur novem usque Canzoni. Haec subsequuntur; Tragedia Uliſſe il Giovane, il Tobia Sacra rappresentazione, versione dell' Elettra di Sofocle colle annotazioni dell' Autore, & postremo Rime aggiunte con un saggio di versi Latini. In hoc additamento praeter Latina, & Graeca carmina numero pauca extant triginta ferme Sonetti.*

Osservazioni sopra la Merope del Sig. March. Scipione Maffei, ed altre varie operette, parte finora quà e là disperse, parte non pubblicate dal Sig. Abate Domenico Lazzarini di Morro Patrizio Maceratese, già pubblico Professore di Lettere Greche, e Latine nell' Università di Padova, dedicate all' Eminentissimo, e Reverendissimo Principe Don Prospero Colonna di Sciarra, Cardinale della S. R. C da

Francesco Benaglio Trivigiano, in Roma nella Stam-  
 peria di Niccolò, e Marco Pagliarini 1743. in 4.  
*Benalius*, quo nullum cariorem habuit discipulum  
*Lazzarinus*, retulit in hoc volumen magnam par-  
 tem eorum scriptorum, quae supra commemoravimus,  
 promiseratque se alterum volumen editurum, quod  
 morte impeditus non perfecit. In iis, quae praefa-  
 tus est, multa sane Praeceptoris honorificentissima,  
 & legentibus scitu dignissima narravit. Cetera inter  
 affert Latinum Dialogum habitum olim inter  
 eundem Lazzarinum, Alexandrum Burgosum,  
 seu ut alii malunt Burgos, & egregium ado-  
 lescentem Columnam, cum se se Arquadam, ubi  
 divini Petrarchae ossa cubant, colligendi animi gra-  
 tia contulissent. De Columna vero, ut Lazzarini  
 mirificum in illum studium magis magisque proba-  
 ret, affert versus duos Jambicos Graece concinnatos,  
 qui omnium oculos effugerant, & quæ nihil ven-  
 stius, purius, tenerius (emerferat enim Columna ex  
 incommoda valetudine) fieri ab ipso Euripide potuisset.  
 Extat quoque in eodem volumine Oratio secunda pro  
 optimis studiis habita in Gymnasio Patavino an-  
 MDCCXII. Non solum in orationibus, sed etiam in  
 acrostichis suis renovabat Lazzarinus querelas ad-  
 versus eos, qui aut incautis, aut improbis praeceptis  
 eloquentiam corrumpebant, hac in re fortasse similis  
 Horatiano citharoedo,  
 .... chorda, qui semper oberrat eadem  
 Extant etiam in ipso volumine



Offervazioni sopra la traduzione Toscana di Lucrezio fatta da Alessandro Marchetti indirizzate in forma di lettera a Monsignor Niccolò Casoni. *Hae observationes extant etiam in ipsa Lucretii interpretatione edita Londini, seu verius Venetijs 1764. in 8.*

*Epistolae. Ex his tres, quibus probatur Veronam fuisse in Cenomanis, editae fuerunt in libro, cui titulus: Memorie Istorico-Critiche intorno allo antico stato de' Cenomani, ed a' loro confini. In Brescia dalle stampe di Gian Maria Rizzardi 1750. in fol. Ex- tant alibi aliae ejusdem Epistolae tum Latinae, tum Italicae, quas singulas commemorare minime necesse arbitramur. Majora sane a Lazzarino habuissimus, si accuratius sua conservasset, & inchoata perfecisset. Cum amici aliquid ab eo exigebant, tum ad se excusandum, tum ad ceteros reprehendendos respondere solitus erat; excitanda est animadversio & diligentia, ut ne quid temere ac fortuito, inconsiderate negligerenterque agamus.*

ANGELUS FABRONIUS

JO. BAPTISTAE CASPARI

D'ANSE DE VILLOISON S. P. D.

**M***agna est hominum opinio de Joannis Mariae Mazzuchellii eruditione, magna commendatio scriptorum, magna memoria virtutum illius. Ea propter vitam ejusdem Latinis litteris mandare decrevi, in quo non justum modo, sed & pium officium ei persolvissè facile judicabor. Qua enim pietate ipse fuit erga eos, qui litterarum quasi parentes extitere, in quorum factis exquirendis atque historiae monumentis consignandis totam vitam contrivit, eadem erga ipsum nos esse decet, ac maxime partes istius officii meae esse videntur, quod ingressus sum scribere de Italica doctrina excellentibus. Quod enim munus asserre majus Reipublicae, meliusve possumus, quam proponere ante nostrorum oculos memoriam atque imagines*

*summorum virorum, quos imitentur, & vincant etiam, si id assequi se posse confidant? Neque sane aliter tu fecisti, cum obversarentur tibi illustria exempla Gallorum tuorum, qui in litteris Graecis colendis magnam adeo & utilem operam posuerunt, ut ipsae per eos maxime ad summam amplitudinem pervenisse videantur. Ex illo quidem maximus est fructus, jucunditasque homini sapienti, cum eos se posse aemulari vidit, qui doctrinae gloria praestiterunt; atque dum commemorabuntur nomina (commemorabuntur autem dum honos erit litteris) Budaei, Henrici Stephani, Salmasii, Casauboni, aliorumque hujusmodi plurimorum, tuum quoque nomen celebrabitur, ut pote qui nulli eorum fueris secundus. Atque ut omittam multa, quae ex Graeco in Latinum convertisti, eruditissimisque commentariis illustrasti, quas tibi gratias agere non debent Litterarum Graecarum studiosi, quod nuper illum Poetarum quasi Deum, Homerum non edidisti modo ex pervetusto, qui a Bessarione Cardinali possidebatur, codice, sed ita illustrasti, cum de variis scribendi, interpungendi modis, uten-*

dique criticis, ut loquimur, signis, de variis antiquissimis ejusdem editionibus, ac praefertim duabus illis, quas Aristarchus confecerat, de difficultatibus, quas veteres in eodem explicando invenerunt, & de diversis Graecorum dialectis docte & erudite disserueris, ut adspirare ad laudem ejusdem Aristarchi possis, de quo vere dicebatur, haud Homericum esse, quod ipse non probasset. Neque ego sum ita demens, ut in te commendando aliquam ingenii gloriam consequi, vel aliquid immortalibus laudibus tuis addere me posse putem; satisfacere tantummodo amorì erga me tuo volui, cujus ut publicum testimonium aliquod extet, a te vehementer flagito, ut commentariolum de Mazzuchellii vita in tuo nomine apparere sinas. Hujusmodi solent esse munera eorum, qui litteris dant operam, parvique refert quod sint levidensia. Ea enim offerimus; quae sunt nostrarum virium, nostrique ingenii; & si quid arte, cui inter ingenium & diligentiam perpauillum loci reliquum est, me valere judicabis, oleum & operam in hoc concinnando commentariolo me non perdidisse

arbitrabor. Vale; & fac animo forti magnoque sis, speresque fore, ut fracto impetu levissimorum hominum, qui nil nisi quod novum est probantes avocare nos adlaborant a veteribus exemplaribus, tum Graecae, tum Latinae litterae suam pristinam dignitatem & gloriam consequantur. Cupio a te audire quid nunc agas, & quae pares; nec sane mirabor te tuis, ut egregium artificem, praeclaris operibus laetari. Iterum vale.

*Pis. III. Non. Mart. MDCCLXXXIX.*

## JO. MARIA MAZZUCHELLIUS.

**J**oannes Maria Mazzuchellius veteri & illustri familia natus est Brixiae v. Kal. Novembres an. MDCCVII. Parentes illi fuerunt Fridericus Mazzuchellius vir apud suos clarus gestis magistratibus, juris civilis scientia & honoribus a Veneto Senatu impetratis (Comes enim & S. Marci Eques creatus fuit) & Margarita Muzia, quae orbata viro Sciarra Martinengo, secundo nupsit Muzzuchellio. Joannes Maria, qui secundus erat susceptorum ab iis liberorum, duro admodum initio usus est adolescentiae. Nam cum lacte nutricum, quarum septem usque habuit, gracilitatem & infirmitatem corporis fuisse visus est; ophthalmia ad septimum usque aetatis annum sic laboravit, ut lumina amiserit, eorumque recuperandorum sine mirabili quadam ope divina nulla spes esset; cum vero repentino illa recuperasset, atque sua sponte & cohortatione parentum ad ea studia, quibus pueri ad humanitatem informari solent, con-

citaretur, nactus est praeceptores asperos & pene agrestes, qui ignari faciundae orationis, toti erant in Grammaticorum tricus inculcandis, a quibus natura Mazzuchellius semper abhorruit. Ex quo factum est, ut tum ad eas artes, quae postea tantam gloriam illi pepererunt, durior videretur. Ad ipsas aditum eidem patefecere, dum Bononiae in Collegio S. Francisci Xaverii quadriennium commoratus est, Jesuita Xaverius Quadrius, & qui in eodem Collegio geographiam & Gallicam linguam docebat, Vandellius, ut vero impensissime easdem coleret, factum est praeceptis & voce Dominici Lazzarinii, quem Patavii audiuit, dum in illius urbis Lyceo juris prudentiae operam dabat. Horum studiorum cursum interrumpere illum coegerunt nuptiae, quas anno MDCCXXVIII. cum Barbara filia & herede Philippi Chizzolae junxit, ex quibus bona, liberos usque XII. & multarum virtutum exempla ad hos sancte & liberaliter educandos habuit. Cum illum vero ad certam laudem adhortaretur Paullus Galeardus Canonicus Brixienfis, cum adhortabatur ad historiam litterariam Italiae illustrandam, tantum amicissimi hominis

consiliis tribuit, ut coeperit magnam sibi comparare librorum copiam, quae ad eam rem non solum utilis, sed etiam necessaria esse videbatur. Quid in hoc scriptionum genere posset vel severissimis diligentissimisque inquisitoribus se probaturum confidit, cum an. MDCCXXXVII. emisisset Archimedis vitam, neque multo post Petri Abani, Petri Aretini, Francisci Arisii, Aloysii Alamannii, & Jacobi Bonfadii vitas, quas omnes separatim & diversis temporibus edidit. Quod in Archimedeo necesse erat de rebus mathematicis loqui ad prorsus mirabilia inventa Graeci geometrae exponenda, consuluisse fertur hominem e Franciscana familia clarum Fortunatum a Brixia, quamquam satis in his studiis, ut & in philosophia instructus esse judicaretur. Nemini autem dubium esse potest, cum de insignibus ad laudem viris scribebat Mazzuchellius, quaevisse illum incredibili prope diligentia quidquid de iis memoriae proditum erat, monumenta & testimonia suis ponderibus, hoc est accuratissimis, examinasse, & inter se comparasse, nihil affirmasse nisi quod verum, aut vero simile esset, ut aut accusetur invidie, aut pro-



probabiliter defendatur, & eam Etruscae dictionis elegantiam adhibuisse, quae non habet in se quidquam admixtum dispar sui atque dissimile (in ea enim devenimus tempora malo Italarum litterarum fato, ut nil probare videamur, nisi quod peregrinum oleat) & quae commendatur hoc ipso, quod simplex est, & plane & perspicue res narrat. Quo plura erant in Mazzuchellio virtutis & industriae ornamenta, ut jam nec melior civis & amicus, nec vir clarior in patria esse videretur, eo avidius multi ejus familiaritatem appetebant. Ne vero irasceretur aut intempestive accedentibus, aut importune rogantibus obstabat ejus singularis humanitas, qua omnes complecti, omnibusque lumen consilii & ingenii sui porrigere solitus erat. Atque hoc testabatur mihi familiaris homo, vidisse se in illius domo florem juventutis & nobilitatis, qui sic exercebatur ab eo, ut octavo quoque die aliquid proferretur, quod ad excolendas litteras & studia sua pertineret. Non iis delectabatur, aut utebatur omnino, quae in summa inanitate versantur, multoque minus iis, quae animos aut deterrent,

T. XIV.

I.

aut advocant a religione. Quae conducunt ad moderandam hominum vitam tanquam navigium aliquod fluitans in alto tempestatibus distortarum & pravarum affectionum, illamque oblectandam suavitate politioris humanitatis, in qua perjucunde versari homines solent, illi in amore atque deliciis erant (1). Qui tum fortunatissimus comitatu nobilium juvenum optimarumque artium habebatur, se ab iis sejungere debuit, ut patriae serviret. Huic jus erat aliquem ex suis nobilibus civibus eligere, qui imperium exerceret in Asulanos, quod cum aut tollere, aut infirmare tum potentes quidam adlaborarent, missus est Venetias Mazzuchellius, qui apud Senatum Brixiensem suorum causam defenderet. Habuit sane ejus legatio exitum felicem, neque postea res ulla major accidit, de qua esset

---

(1) Extant bina volumina sic inscripta: *Dissertationi istoriche scientifiche, ed erudite recitate da diversi Autori in Brescia nell'adunanza letteraria del Sig. Conte Giammaria Mazzuchelli. In Brescia presso Giammaria Rizzardi 1766. in 8*

agendum cum Venetis Senatoribus, quae non credita Mazzuchellii prudentiae dexteritatuque fuerit. Ob haec in patriam merita studio civium, ipsiusque Veneti Senatus iudicio multi delati illi fuere honores, atque data gravissima mandata. Praefuit patrio aerario, aedificationi majoris Ecclesiae, & armorum fabricationi, fuit annonarius iudex, curam sustinuit silvarum & militarium stationum, quando Italia, ac praesertim Cisalpina Gallia ardebat bello, quod erat Hispanos inter & Austriacos, arbiter & iudex fuit, idque Principis jussu, quarundam controversiarum, quae ejusdem belli causa vel inter Brixienfes, vel inter hos & vicinos populos extitere, alia plura dissidia pacificator prudentissimus composuit, missus est Mediolanum, ut testata essent jura Brixienfis coenobii (nomen huic S. Juliae) in bona quaedam in agro Cremonensi posita, in quibus aliisque mandatis exequendis nunquam non perutilis ejus & opera & fidelitas judicata est. Donatus aliquando fuit a Veneto Senatu aureo ense, adeo illi pergrata fuit diligentia & assiduitas Mazzuchellii in moderandis iis rebus, quae ad fa-

bricationem armorum pertinent. Regebat tum Brixensem Ecclesiam Angelus Maria Quirinius, a quo Mazzuchellius paroeciae cujusdam caussa, quae prope Celiverganum suum, ubi rusticabatur, erat instituenda, dissensit, quae dissensio conjuncta cum illa, quam commovit Cardinalis ipse de Petri Aretini vita, licet interruperit officia, quae persolvere homini eruditione & nobilitate summa solitus erat Mazzuchellius, hic, reconciliata gratia, intermissa cumulatus reddidit. Contendebat Quirinius culpandam Mazzuchellii negligentiam esse, quod mentionem, ut ipse ajebat, minime fecisset cujusdam Aretini epistolae, ex qua conjectura fieri poterat, hominem impurissimum ad sanam mentem aliquando rediisse; sed facile fuit Mazzuchellio, qui omnia minima videbat, probare, nihil sibi effugisse, atque omne, quod erat in re, diligentissime adnotasse. Sane neminem invenis, qui illum aequaverit diligentia in hujusmodi rebus inquirendis, ut in principibus, qui litterariam historiam apud nos tractarunt, jure meritoque numeretur. Nuntiaverat jam fama illum brevi opus de Italicis scriptoribus,

in quo jamdiu elaborabat, emissurum, cujus primum volumen binas in partes divisum cum an. MDCCCLIII. in lucem prodisset, omnium expectationem superavit. Tanquam ratis in mari immenso ejus vehitur oratio. Sunt enim plurimae artes, quibus liberales doctrinae atque ingenuae continentur, & innumeri homines, qui in iis ab antiquissimis ad haec usque nostra tempora floruerunt, de quibus singulis dicere sibi proposuit Mazzuchellius. Optandum erat, ne ipse tam dilatasset operis argumentum, eorumque tantummodo rationem habuisset, qui omnium judicio bene & praecclare de litteris meriti esse putantur. Sed ipse contulit diligentiam suam ad conquirenda facta non solum eorum, qui in primis, secundis & tertiis subselliis consistunt, sed & eorum, qui longe infra haec sunt, de quibus aliquid scire parum interest. Pergrata tamen multis haec sedulitas erit. Si cui vero Mazzuchellius videbitur diligens magis alienorum judiciorum exquisitor, quam acutus priorum narrator in iis praesertim rebus, quae ad magnarum artium disciplinas pertinent, quaeque tot mutationes vicissitudinesque habue-

runt, non vehementer illi repugnabo. In ea, in qua nunc versamur philosophiae luce, quae in omni scientia dominari videtur, non postulamus modo, sed exigimus ab iis, qui litterariam historiam illustrandam susceperunt, ut non tam describant facta & mores doctorum virorum, quam ut cuique tantum assignent laudis, quantum quisque meritus est in suis edendis scriptis, ut facile intelligi possit, qui sint principes & inventores, qui auctoritatis & inventionis comprobatores atque aemuli, qui correctores & everfores, & quibus denique gradibus ad illa summa atque in omni genere perfecta pervenire potuerimus. Id nos fortasse minime perficimus, dum vitas Italorum quorundam doctrina excellentium Latinis litteris mandamus; conati quidem sumus. Operis omnium fortasse maximi volumen II., quod vitas hominum continet, quorum nomina a secunda alphabeti littera incipiunt, quatuor in partes, totidemque in volumina divisum est, & hic illud constitit. Ajunt plurima parasse Mazzuchellium ad cetera contexenda volumina, quae omnia quinquaginta atque amplius millia vitarum complecti debebant;

sed ut nemo pictor est inventus, qui Veneris eam partem, quam Apelles inchoatam reliquit, absolveret, sic neminem fore existimo, qui rem tantam a Mazzuchellio susceptam ad exitum perducere conetur. Cetera, quae ille edidit, si illa excipias, quae ad illud ipsum opus pertinere poterant, quorumque indicem infra dabimus, tanti non sunt facienda, ut in iis declarandis immorari debeamus. Atque hoc in Mazzuchellii laude ponendum arbitror, quod, ut multi solent, plura ac varia in studia noluit industriam suam distrahi; quae sibi obtingerat, *σπαρτα* nunquam deseruit, sicque ornavit, ut per eam immortalitati fuerit commendatus. Neque mors ei famam peperit. Nam, vel dum in vivis fuit, nemo non ejus doctrinam & virtutem honoravit. Adscitus in illustriores Italiae Academias fuit, e quibus nominare lubet Bononiensem *Instituto*, et nostrates Fursureorum & Apathistarum, Columbariam atque Cortonensem; numismata illi cuderunt amici, & vel inter Siculos inventus est homo nobilitate & doctrina praestans, qui illius imaginem in lapide opere anaglyptico caelendam curavit. Profecto nemo

magis idoneus Muzzuchellio fuit ad parandas retinendasque amicitias, & homo florens aetate, opibus, honoribus, ingenio, gratia, liberis, propinquis, affinibus, amicis, & estimatione integritatis, innocentiae atque prudentiae adeo diligebatur a Brixienfibus suis, ut nihil non illius causa vellent. Ad has res obtinendas magnam vim habuit excellens naturae bonitas, quam ut corroboraret praeclaris institutionibus, quae auctores & magistrum sanctitatis & purioris religionis tradiderunt, omni vitae tempore curavit. Hac indole virtutis & continentiae respuebat omnes voluptates, & cum admonebatur a suis, ut intermitteret studia doctrinae, quae vel in maximis rerum publicarum occupationibus colebat, respondere solitus erat, etsi corpora interdum defatigatione & exercitatione ingravescant, nunquam non animos se exercendo levare, omnesque homines in sua arte exercenda mori debere. Indulgentia in liberos fuit magna, hancque, ut & mores humanissimos sic temperavit gravitate, ut dubium esset, utrum sui illum magis amarent, an venerationem. Ob summam in Deum & homines



caritatem nullum gratius a patria munus accepit, quam ut praeesset carceribus, & quidquid illi committebatur, in quo salus & utilitas hominum contineretur, diligenter adeo curabat, ut suam, non alienam rem agere videretur. Uxorem sane castissimam & sanctissimam, cum VII. id. Novembris an. MDCCLXV. amisisset, lenivit illius desiderium spe ipsam brevi revisendi, neque multos post dies idem vitam finivit. Commune cum femina, quacum conjunctissime vixerat, sepulcrum habere voluit, in quo hoc elogium inscriptum est.

D. O. M.

JO. MARIA . COMES . MAZZUCHELLI.

ET.

BARBARA . CHIZZOLA .

CONJUGES .

NOBILES . BRIXIANI .

HIC . REQUIESCUNT .

HAEC . PIETATE . IN . DEUM .

LIBERALITATE . IN PAUPERES .

ALIISQUE . VIRTUTIBUS .

CONSPICUA .

OBIIT . VII. DIE . NOVEMBRIS .

MDCCLXV.

AET. AN. LVII.  
ILLE . ORBI . LITTERARIO .  
NOTISSIMUS .  
MORUM . INTEGRITATE .  
INSIGNIS .  
PRINCIPIBUS . VIRIS . CIVIBUSQUE .  
CARUS .  
OBIT XIX. D. NOVEMBRIS  
MDCCLXV.  
AET. ANN. LVIII.

## O P E R A E D I T A .

Notizie storiche, e critiche intorno alla vita, alle invenzioni, ed agli scritti di Archimede Siracusano del Conte Giammaria Mazzuchelli Bresciano. In Brescia per Giammaria Rizzardi 1737. in 4. *Hujus operis epitomen retulit Mazzuchellius ipse in Vol. 1. part. II. degli Scrittori d' Italia.*

Notizie storiche e critiche intorno alla vita di Pietro d' Abano, dette dal Conte Giammaria Mazzuchelli in una Letteraria conversazione a' 4. di Settemb. 1738. *Extant in Tom. XXIII. Collectionis Calogerianae, & in Vol. 1 par. 1. degli Scrittori di Italia.*

La Vita di Pietro Aretino scritta dal Co. Giammaria Mazzuchelli, in Padova per Giuseppe Comino 1741. in 8. *Magnam sane ab hoc libro, in quo com-  
paret eruditio, diligentia & elegantia singularis  
laudem obtinuit Mazzuchellius. Ejusdem vitae epi-  
tomen retulit ipse in Vol. 1. par. 2. degli Scrittori  
di Italia. Aliud & fecit Gallus Praeful Boisprous,  
sed in multis ipse peccavit.*

Ristretto della Vita di S. Pancrazio. In Brescia per Marco Vendramino 1741. in 8.

Notizie intorno alla vita e agli scritti del Canonico Paolo Gagliardi Bresciano. *Extant in Tom. XXVII. Coll. Calogerianae, & in Ephemeridibus Lampia-  
nis an. 1757.*

Lettera intorno alla Persona, e ag'li scritti del Dott. Francesco Arisi Cremonese &c. *Extat in Coll. Calogeriana* Tom. XXXI. & in *Vol. 1. par. 2.* degli Scrittori d'Italia.

La Vita di Luigi Alamanni Fiorentino scritta dal Co. Giammaria Mazzuchelli Accademico della Crusca. *Edita semel iterumque fuit Veronae, & Venetiis cum Alamannii carminibus. Relata etiam fuit in Vol. 1. par. 1.* degli Scrittori d'Italia.

La Vita di Jacopo Bonfadio scritta dal Co. Giammaria Mazzuchelli, Accademico della Crusca. *Bis edita fuit Brixiae cum operibus Bonfadii & relata in Volumen II.* degli Scrittori d'Italia. *Auxit ipsam postea Mazzuchellius; & defendit ab iis, qui falso contendebant minime natum Bonfadium fuisse Brixiae, & Brixiana familia. Hac de caussa suorum civium rogatu ipse edidit Brixiae 1748. libellum; cui titulus.*

Lettera del Co. Giammaria Mazzuchelli, in cui si tratta della Patria di Jacopo Bonfadio, e dello stato antico, e presente della Riviera Bresciana.

Prefazione a' Componimenti detti in una letteraria adunanza nel nuovo Tempio de' Padri di S. Filippo Neri della Congregazione di Brescia ne' giorni della sua solenne consecrazione, fatta nell'an. 1746. in Brescia per Giammaria Rizzardi 1746. in 8.

Catalogo delle medaglie di uomini letterati. *Vide ipsum in Voluminibus XXXV. XXXX. XLII. Collect. Calogerianae. Cum Mazzuchellius nunquam finem*

*fecisset augendi hujus sui Musaei, quod viris illustribus omnium populorum consecravit, occasionem dedit operi, quod inscribitur. Musaeum Mazzuchellianum, seu Numismata virorum doctrina praestantium, quae apud Jo. Mariam Comitem Mazzuchellum Brixiae servantur, a Petro Antonio de Comitibus Gaetani Brixiano Presbytero, & Patri-  
cio Romano edita atque illustrata. Accedit versio Italica studio Equitis Cosmi Mei elaborata Vol. 2. in fol. Venetiis. Typis Antonii Zattae.*

Le Vite di Uomini Illustri Fiorentini scritte da Filippo Villani ora per la prima volta date alla luce colle annotazioni del Co. Giammaria Mazzuchelli Accademico della Crusca: in Venezia per Giambatista Pasquali 1747. in 4. *In hoc opus multa addidit Mazzuchellius, quae minime emisit. Quod Jannes Lamius in suis Ephemeridibus quaedam adnotavit, quae emendatione digna putavit, ei per litteras gratias egit Mazzuchellius, quamvis non omnes animadversiones probaret. Nemo enim illo magis absuit a rixis.*

Lettere due, e notizie intorno la Vita del P. Stanislao Santinelli Somaasco. *Extant nelle memorie istoriche del medesimo in Venezia per Giovanni Radici 1749. in 8.*

Lettere quattro. *Extant in libro, qui inscribitur. Private Disavventure di una Donna di vero spirito, ossia Vita della Signora Paolina Rubbi Contessa Carli-Rubbi, in Lucca presso Filippo Maria Benedini 1750.*

Notizie Storiche Critiche intorno agli scritti, e alla Vita di Scipione Capece. *Extant cum poemate de Vate Maximo ejusdem Capeccii edito Patavii apud Josephum Cominum 1751. in 8., & Venetiis apud Remondinos 1752. 1754. in 8.*

Notizie Storiche, e Critiche intorno a Costantino Grimaldi Patrizio, ed illustre scrittore Napoletano. *Extant in Vol. XXXV. Coll. Calogerianae.*

Notizie intorno alla Vita, e alle opere di Antonio Fileremo Fregoso Nobile Genovese. *Extant in Vol. XLVIII. Coll. Calogerianae.*

Notizie intorno a Giusto de' Conti Romano Poeta volgare &c. *Extant in libro, cui titulus; La bella mano di Giusto de' Conti Romano con una raccolta di rime antiche Toscane, nuova Edizione accresciuta della Vita dell' Autore scritta dal Sig. Co. Giammaria Mazzuchelli Bresciano Accademico della Crusca. In Verona presso Giannalberto Tumermani 1753. in 4.*

Notizie intorno a Raffaello Brandolini Fiorentino. *Postquam Franciscus Fogliatius magna ex parte Latine edidisset Venetiis, quae de Brandolinio Italice scripserat Mazzuchellius, hic totam vitam Brandolinii retulit in Vol. 2. part. 4. degli Scrittori di Italia.*

Gli scrittori di Italia, cioè notizie Storiche, e Critiche intorno alle Vite, ed agli scritti de' Letterati Italiani del Conte Giammaria Mazzuchelli Bresciano Vol. I. part. I. & part. II. in Brescia per

- Gianbatista Bossino 1753. in fol. Vol. II. part. I.  
*apud eundem* 1758. Vol. II. part. II. 1760. Vol.  
 II. part. III. 1762. Vol. II. part. IV. 1763.
- Lettera agli Autori della *Raccolta Milanese* intorno  
 al Cardinale Pietro Bembo. In Milano nella stam-  
 peria di Antonio Agnelli 1756. in 4.
- Lettera al Sig. Conte Cavaliere Gianrinaldo Carli  
 Rubbi, in difesa della vita dell' Aretina. *Edita ab*  
*auditoribus fuit* della *Raccolta Milanese* in Vol. I.  
 Milano per l' Agnelli 1756.
- Notizie intorno ad Isotta da Rimini. *Extant in Tom.*  
*I. ejusdem Collectionis Mediolanensis. Auxit po-*  
*stea opus ipsum Mazzuchellius, ediditque Brixiae*  
*an. 1759. Typis Joannis Bapt. Bossini.*
- Notizie intorno alla Vita, ed agli scritti di Benedetto  
 Marcello Patrizio Veneziano. *Extant in Tomo X.*  
 delle memorie per servire all' Istoria Letteraria, in  
 Venezia presso Pietro Valvasense 1757.
- Lettera Dedicatoria premessa a' componimenti Poeti-  
 ci per la professione di S. E. Maria Eletta Zeno  
 nel Monistero delle Vergini in Venezia, in Bre-  
 scia appresso Giammaria Rizzardi 1760. in fol.
- Prefazione alle Rime in lode delle Dame, e de'  
 Cavalieri, che in Brescia nella Primavera del 1761.  
 hanno rappresentata la Tragedia intitolata *Sara in*  
*Egitto* con intermezzi in Musica. In Brescia dalle  
 stampe di Gianbatista Bossino 1761. in 8.
- Eltratto del libro intitolato de' Delitti, e delle Pe-  
 ne 1764. in 4. e giudizio fatto da Zaccaria Gamu-

muzoti Melloni. *Extat opusculum hoc sub nomine anagrammatico Mazzuchellii in nova Coll. Calogeriana: Venezia 1765.*

Poesie Varie. *Extant in variis collectionibus Carminum. Non admodum valebat Mazzuchellius poesi, ipsique solebat esse in ore Horatianum illud:*

. . . . . Mediocribus esse Poetis  
Non homines, non Di, non concessere Columnae.

*Multa ipse inedita reliquit, ex iisque Tragoediam unam, quae inscribitur la morte di Socrate, & binas comoedias. Narratur etiam illum fere ad exitum perduxisse Vol. VII. & VIII. degli Scrittori d'Italia.*



## ANGELUS FABRONIUS

JOANNI BAPTISTAE BODONIO HISPANIARUM

REGIS TYPOGRAPHO S. P. D.

**M**agna laus est & grata hominibus ;  
 unum hominem elaborare in aliqua scientia ,  
 quae sit multis profutura ; maxima vero &  
 prorsus admiranda plures sequi , in iis in-  
 sudare atque excellere , & ex suis curis  
 laboribusque quotidianis aliquid semper in  
 commune conferre . Atqui si diligenter confi-  
 derare voluerimus quid Paulhus Maria Pa-  
 ciaudius potuerit , & quid effecerit , & qui  
 vir fuerit , illum profecto multis , quorum per-  
 vagata sunt nomina , anteponemus . Erat in  
 illo magna dicendi facultas , summa elegan-  
 tia , summa eruditio Graeca atque Latina ;  
 & quanquam videretur tanquam filiolum oscu-  
 lari suam scientiam antiquarum rerum , va-  
 lebat tamen theologia , physica , mathesi ,  
 ethica omniue doctrina , quae rerum divi-

T. XIV.

M

*narum atque humanarum naturam causasque tradit, & omnem bene vivendi rationem tenet atque persequitur. Quis vero illo comior, quis jucundior, quis ad omnem humanitatem accommodatior? De cujus praestanti virtute & doctrina cum vere, graviter ac saepe soleas praedicare, a me tu quoque id vehementer petis, ut ejus vitam Latinis litteris mandem, quasi ego is sim (in quo quidem facis amice) qui immortalitati magnorum virorum facta commendare valeam. Cum statuas & imagines (inquis) non animorum simulacra, sed corporum studiose conquiramus, & suaviter contemplemur, consiliorum ac virtutum effigiem nonne multo malle debemus summis ingeniis expressam atque politam? Si hoc numero essem, confidentius tibi quidem, amicissime Bodoni, morem gererem; sed cum sentiam exiguam in me esse vim ingenii, neque parem esse posse Latine scribendi elegantiam, atque in Paciaudio fuit, & nihil difficilius esse quam exprimere & effingere verbis hominis summi formam, verecunde, vel potius timide aggredior ad id, ad quod me invitas, omninoque*

vereor, ne tua culpa esse judicetur impositi oneris, mea recepti. Utrique fortasse excusationem dabit amicitia, quae summa nobis cum ipso fuit; impetratumque jam a consuetudine esse videtur, ut interdum liceat amici causa peccare. Mihi quidem jucundum fuit abs te officium meum requiri; & si tibi satisfacero, qui es in omni judicio elegantissimus, non admodum ceterorum judicia morabor. De te & de me, quorum causa est communis, nihil amplius dicam. Principia enim verecunda esse debent. Itaque opus aggrediar eo animo, ut tibi rem gratam faciam, cui tantum me debere existimo, quantum persolvere difficile est. Vale.

*Florentiae Kal. Quintilis MCCLXXXVII.*

## PAULLUS MARIA PACIAUDIUS

**P**aulus Maria Paciaudius natus est Augustae Taurinorum honestissima familia IX. Kal. Decemb. (1) an. MDCCX. Vel a prima aetate magni ingenii signa dedit; & quod ager quamvis fertilis sine cultura diligenti fructuosus esse non potest, magnopere curavit ejus pater, quo medico Sardiniae Rex utebatur, ut is ab optimis praeceptoribus in studiis humanitatis erudiretur. Plura a Jesuitis adjumenta habuit, sed majora a Bernardo Lama Neapolitano, qui instaurata per illa ferme tempora Taurinensi Academia, munus in ipsa docendi eloquentiam magna cum opinione doctrinae sustinebat. Huic enim se debere in primis affirmabat Paciaudius quidquid in Graecis Latinisque litteris profecisset. Agebat is XVIII.

---

(1) Facile esset erroris illos convincere, qui ejus diem natalem fuisse tradunt Id. Novembris.

ætatís annum, quando de nomine dando Teatinorum familiæ consilium cepit, cujus tyrocinium posuit Venetiis, duce Camillo Durante. Hujus omnis cura solebat in eo versari, ut tyrones sui non modo in cognoscenda & exercenda virtute, sed & in studiis humaniorum litterarum ac geometriæ instructerentur, ac sæpe hortabatur Paciaudium, ut omnia studia sua in sacram eloquentiam conferret. Quamquam ille non egebat consilio cuiusquam, sed tamen, ut dicitur, excitavit currentem, qui hac in re usus præsertim est præceptore Cajetano Travasa, cujus magnum erat nomen in sacris oratoribus. Et quod nulla res plus apud eum pollebat, quam illius voluntas ac judicium, cum Bononiam venisset, ubi illum abundare oportebat præceptis institutisque philosophiæ propter summam & doctorum celebritatem & urbis, huic laudandarum omnium artium ac præsertim eloquentiæ procreatrici atque parenti ita dedit operam, ut per illam maxime prædicationem nobilitatemque consequi velle videretur. Erat sæpe cum Manfrediis, cum Zanottis & cum Beccario, eorumque consuetudine & præceptis fiebat

quotidie magis doctior. Hoc vero specimen ingenii & prudentiae, quod summis & gravissimis viris unus adolescens ante alios esset carissimus. Aegre se ab horum familiaritate sejunxit, cum quibus & suum iudicium & studiorum vincula ipsum conjunxerant. Iustus enim est a majoribus suis Genuam concedere operam daturus Theologiae, in qua secutus est praesertim Thomistas. Et de illorum magistro Thoma Aquinate aliquando Italicam orationem dixit, quod hoc erat in more positum, ut quotannis ab Arcadibus Coloniae Ligusticae sanctissimi doctissimique viri laudes celebrarentur. Differuit de illius triumphis, ad quod devocabatur, utque antiquitatis se litterate peritum ostenderet, addidit in illam orationem plura, quae declarabant quid essent illi Romanorum triumphi, quid arcus, quid coronae, quid trophaea, quid currus, quid vincli ante currum duces, quid simulacra oppidorum, quid aurum atque argentum, quid vehi per Urbem, quid clamor militum, quid tota illa pompa, qua summorum Imperatorum virtus atque fama celebrabatur. Nec de cruentis modo victoriis, sed & de ludi-

cris plura attulit, in qua disputatione celebriora monumenta commemorat, & interdum etiam explicat, quae ad varios Graecorum Romanorumque ludos pertinent. Quodque victorum laudes carminibus etiam poetarum ornabantur, ipse Italica ode victorias Aquinatis extulit. Haec omnia eo majora visa sunt, quod tum Paciaudius XXIX. aetatis annum vix attigerat. Post id demandatum illi munus fuit publice docendae philosophiae, quod dum sustinuit, multus esse solebat in exponendis Newtoni dogmatibus, ut discipuli sui, se duce, venirent eo, quo sine duce pervenerat ipse. Non probabat tamen illos, qui in uno magistro, tanquam in quadam silice adhaerescere videbantur, & quae de libertate philosophandi exposuit in epistola quadam ad Bartholomaeum Beccarium, quae est in manibus hominum, satis indicant inclinasse illum interdum ad Leibnitii & Cartesii decreta. Sed quae esset ejus philosophandi ratio, quos sequeretur, praesertim intelligi potest ex thesibus, quas publice defendendas proponebat, in quibus judicium & electio non modo rerum, sed etiam verborum dominatur. Nam

cum mature ad elegantiora defluxisset, non solum doctus, sed etiam politus scriptor videri volebat, illos ferme contemnens, qui munditiam orationis a doctrinarum studiis segregandam putant. Jam tentare voluit quid voce, quid viribus, quid spiritu, quid Lingua efficere posset. Munus enim suscepit sacras ad populum habendi conciones, quod toto decennio sustinuit, illustriores Italiae urbes peragrans, & aegre dimisit coactus valetudinis incommodis. Non solum copiose loquente sapientia, sed etiam voce & forma & motu corporis, et reliquis rebus aptissimus erat ad hoc munus; oratione autem celeri & concitata, quod erat ingenii, & verbis effervescentibus & paullo nimium redundantibus, quod erat aetatis, admirationem movebat; quanquam in eo ipso, quo delectationem & plausus aucupabatur, interdum plus nonnullis, quam necesse esset, satisfecisse videatur. In omnibus enim rebus, & vel in ipsis ornamentis videndum est quatenus, in quo Apelles pictores quoque eos peccare dicebat, qui non sentirent quid esset satis. Neque minus elaborabat in exqui-



rendis concinnis sententiis; & quod eloquentiae, sicuti reliquarum rerum, est fundamentum sapientia, locupletabat orationes suas graviorum artium instrumento, & placebat praesertim, cum seligebat aut exempla ex divinis libris, aut praecepta ex his non modo, sed & ex intima philosophia, aut penetrare in animos auditorum volebat, ut flesteret, commoveret, & quocumque vellet traduceret. Exercitatio dicendi atque maturitas aetatis acuit prudentiam, ut jam perfectum quiddam consecutus esse videretur, quando, ut diximus, ob valetudinis incommoda descendere de suggestis coactus fuit. Est in manibus hominum oratio, quam ad Purpuratorum Patrum collegium in Vaticanis aedibus dixit an. MDCCXXXV. de Christi Domini morte, eaque est suaviter & cum sensu scripta; extant & panegyricae orationes de S. Catharina Vastanensi & de Sanctis Cosma & Damiano, quae non carent oratoriis ornamentis, ac demum extat Oratio, nobilis illa quidem, de laudibus Philippi v. Hispaniarum Regis, quam habuit Neapoli an. MDCCXXXVI. cum ei iusta funerum solverentur. Sed de oratoriis exercitationibus Pa-

ciaudii satis dictum erit, si hoc unum addidero, quod poësis plurimum adjuvat eloquentiam, illam quoque ipsum excoluisse, & valuisse ingenio ad condenda Italica carmina, ut judicari ex iis facile poterit, quae praeposuit orationi, quam commemoravimus de laudibus S. Catharinae Vastanensis. In his occupationibus nunquam intermisit studia priscarum rerum, & quoties Venetiis fuit, sic utebatur Apostolo Zeno, ut hunc auctorem & moderatorem hujusmodi studiorum suorum esse praedicaret. Postquam vero usus, auditio, lectio, litterae praeparaverant ipsum ad hoc doctrinae genus, quod subactum ingenium requirit, quo bonos foetus & grandes possit edere, non dubitavit in publicum prodire, edito Venetiis an. MDCCXLII. opere de antiquitatibus Cuprensis, quod ad Hannibalem Oliverium hominem ista doctrina eruditissimum, instituit. Jamdiu fuit inter scriptores controversia de situ veteris Cuprae Montanae, quam eruditiores eo in loco positam dixere, qui nunc *Ripa Transona* appellatur inter Firmum & Asculum e regione Cuprae Maritimae celeberrimae antiquorum Picentum urbis. Ab

horum sententia minime discessit Paciaudius, quin immo motus Frontini auctoritate inter Colonias Romanorum ipsam adnumeravit, collegitque ea omnia monumenta, quae ad probandam illius nobilitatem, antiquitatesque illustrandas conducere posse videbantur. Verum haec illi propria fuisse videtur opinio, ut non duplicem Cupram, sed unam eandemque fuisse existimaverit, velut in duas partes divisam, quarum altera maritima, altera montana dicta sit; ex quo evenit, ut plurima Caprensiū monumenta extulerit, perinde ac si omnia ad unum populum unamque civitatem spectassent. Miror equidem hoc illi persuasum fuisse, cum Plinius & Ptolemaeus Cupram Montanam in mediterraneis Picentum sic collocent, ut facile judicari possit multo plus, quam millia passuum V. distasse illam ab ora maritima. Id aliāque plurima optimo in lumine ceteros inter collocavit Maurus Sartinus Camaldulensis homo (1) qui tamen multas laudes tribuit

---

(1) *Ejus Dissertatio, seu Epistola de Cupra Montana, deque Massatio oppido agri Aesini extat in volum. XXXIX. degli Opuscoli del Callogerà.*

Paciaudii diligentiae & subtilitati atque eruditioni, quas adhibuit tum in colligendis, tum in declarandis Cuprensibus antiquitatibus. Haec homo ingeniosissimus auctoribus eruditissimis inductus arripuit, neque disputandi causa (discrepat enim plerumque ab aliorum sententiis) ut magna pars, sed desiderio aliquid melius afferendi, non solum studiose, sed etiam minute inquirat in ea, quae minus animadversa fuerant, quod ad aliorum auctoritatem extenuandam, & suam confirmandam valebat. Vel ea, quae non meliora (quod de omnibus Paciaudii scriptis facile judicaveris) tibi videbuntur, condita jucundius existimabis. Hac quidem dissertatione suam notam fecit facultatem, ex eaque illud consecutus est, ut facile discerneretur ab iis, qui orationis elegantia, & litterarum varietate minime utuntur. Quoniam vero antiquitatis studia maxime tum vigeabant Neapoli, & quod hujus loci & caeli natura aptissima erat illius valetudini, quae semper fuit tenuis ac saepe etiam aegra, vehementer concupivit in ipsa urbe sedem studiorum suorum collocare. Id. facile obtinuit per Josephum Spinellium Cardinalem

& Neapolitanorum Archiepiscopum, cui satis erat cognitus ex iis scriptis, quae vulgaverat, & ex celebritate sermonis hominum. Fecit vero sapienter, quod hujus congressus, consuetudinemque victus requisiverit, motus admirabili fama doctrinae & virtutum incredibilium, quae specie dispares prudentia conjungebantur. Quid enim tam distans, quam a severitate comitas? Quis tamen illo aut sanctior est habitus, aut dulcior? Quid tam difficile, quam in sacris administrandis, in moribus corrigendis, & in plurimorum controversiis dijudicandis ab omnibus diligere? Consequabatur tamen, ut eos ipsos, quos reprehendebat & contra quos aliquid statuebat, aequos placatosque dimitteret. Jam quantum illud erat, quod in maximis occupationibus suis nunquam intermitteret studia doctrinae, semper aut legens aliquid, aut Paciaudium vocans ad scribendum! *Septem annorum spatium, quo apud te diversor* (inquit ille in Praefatione libelli *de sacris Balneis*) *mihi tam facilem te ipsum praebuisti, ut omnem studiorum meorum rationem exploratam perspectamque habere volueris; saepe mecum de*

*his, quae tua est humanitas, ultro citroque verba serere, & quae aut typis parabam, aut in adversariis seponebam, emendare, vel tuis additis doctrinis augere.* Nactus igitur patronum & amicum qualem optabat, & locum omnibus copiis affluentem ad excolenda antiquitatis studia, sibi id omne suppeditari aiebat, in quo animus ejus libentissime conquiesceret. Conquirebat suavitates undique, aut vetera monumenta contemplans, aut assidens in bibliothecis, aut conferens sermones cum iis, qui excellere doctrina putabantur, aut degens in nobilissimorum hominum flore; idque efficiebat, ut cum gratiae causa nihil faceret, omnia tamen essent grata, quae faciebat. Quaerebatur saepe ab ipso, cujus prudens sincerumque judicium, nihil ut posset nisi optimis rationibus comprobatum & elegans audire, omnes suspiciebant, quid sentiret de scriptis, quae tum multi ad explicandas praeclaras res vulgabant, sed ipse, cum serviebat veritati, nullum verbum insoleus, nullum odiosum proferre audebat, & quod difficillimum est, consequebatur, ut cum exponeret quid sibi optimum videbatur, neminem lae-

deret. Inerat profecto natura philosophia in hujus viri mente quaedam, nec facile invenies cui aequae vivendi via considerata atque provisā fuerit. Ut laudes, quas de illo Neapolitani habebant, posteritati & absentibus propagarentur, aliquid priscorum monumentorum interpretandum suscipiebat, in quo esset subtilitati & novitati locus. *Nonne id agendum nobis est*, scribebat ad Joannem Rainaldum Carlium, *ut materiem subtrahamus iis, qui non philosophorum judicia, sed delirantium somnia venditant?* Cumque ei narraret esse quosdam, qui in hac inscriptione CRESTI GER Christiani aliquid contineri arbitrabantur, multis de causis minime dubitare se ait, ab illa indicari hominem nomine Crestum, qui in domo Caesaris Geruli officium exequabatur. Hac de re tota confecit dissertationem, quam Angelus Calogeraus retulit in XXXXII. volumen opusculorum ad scientias & philologiam pertinentium. Horum similia mittebat ad Lamium & Gorium, & munera hujusmodi exornabat aliis monumentis, quibus utebatur rei probandae & locupletandae causa, & elegantissimis verbis perpolita oratione. Ipsi

& vulgabant si quid perscriberet de Herculanensibus monumentis (1) quae tum detegebantur, & aegre ferre videbantur, si diutius filuissent musae Paciaudii. Interim, dum ipse studiosissime res colligebat, quibus posset juvare se & suos, venit ad eum Hospitalii Marchio Gallorum ad Neapolitanorum Regem Legatus, rogavitque ne gravaretur exponere sententiam suam de Mercurii statua antiquo opere & summo artificio facta, quam per illos dies ipse sibi comparaverat. Nil maluit Paciaudius, quam tanti viri obsequi studio, & cum libellum confecisset, judicium adhibuit non solum ut inveniret quid diceret, sed etiam ut seligeret atque expenderet. Percurrit, quare Mercurius omnium artium inventor, viarum atque itinerum dux, ad pacem faciendam, ad negotia publica gerenda, ad placandos inferos, ad excolendos homines, ad

mo-

---

(1) *Vide* Novelle letterarie pubblicate in Firenze an. 1748. & vol. XXXVIII. della Raccolta del Calogerà.



moderanda astra, ad quaestus pecuniae, mercaturaeque maximam vim habere diceretur, sed praesertim in eo constitit, ut rationem reddat, cur Numinis superis & imis gratissimi signum testudinem in patera positam manu gestet. Aliud nihil attulit, quod probabilius sit, quam illud, quod ex Homero (nisi fortasse alius quaerendus sit auctor hymnorum, qui illi tribuuntur) discimus. *Mercurius*, ait ille, *postquam Apollini furatus est boves, cum in antrum Cyllenii montis confugisset, ibi testudinem invenit. Hanc primum exentravit, deinde sectos calamos per supinae testae oras trajecit, tum calamos corio bovis textit; deum ex duobus brachiis manubrium extendit, & duo illa brachia jugo conjunxit, a quo duxit septem chordas per manubrium, & corium, quo calami & cavum testudinis tegebatur usque ad umbilicum, qui erat supra fundum testae.* Tali modo cognito curvae lyrae inventore, facile fuit Paciaudio declarare quid significat testudo in hoc aliisque monumentis, quae enumerat, expressa. In extrema dissertationis pagina de Pantheis Diis disputat, quorum in numero Mercurium collo-

care minime dubitavit. Qui reprehendere solent antiquarios, quod saepe aut levia, aut a proposito aliena, aut non apta, aut ante pedes posita conquirunt, laudabunt Paciaudium, quod nunquam usus sit imprudenter eruditionis copia, & illa delegerit, in quibus maxima sunt argumentorum momenta. Ut in vita, sic in scriptione nihil est difficilius, quam quid deceat videre; nihilo tamen minus nunquam decori ignorance peccasse Paciaudium dixeris; qui cum non minus fugiendam sibi esse existimaret negligentiam (aliter enim fuisset & in amicos, & in semetipsum, & in artem, quam profitebatur, inofficiosus) non recusabat quid de alienis operibus judicaret, dicere. Franciscus Victorius Eques, cum per illos dies dissertationem Romae vulgasset *de vetustate & forma monogrammatum sanctissimi nominis Jesu*, doctam illam quidem, ut assolebat, atque laboriosam, edidit cum ipsa quatuor numismata, in quibus se specimen quoddam ejusdem monogrammatum videre, quaeque ad Alexandrum Severum Caesarem pertinere putabat. De his habuit Paciaudius quid sentiret (& ut aperiret sententiam suam ro-

gavit illum quidem Victorius) non habuit autem quid amico assentiretur. Emisit itaque libellum, quo se aliquid melius allaturum, & si non quid esset, quid non esset saltem se probaturum sperabat. Etenim Gnosticis, magiae, & si quid est hujusmodi ineptiarum cultoribus (fuit enim tempus, quo superstitio fusa per gentes oppressit omnium ferme animos, atque hominum imbecillitatem occupavit) tribuit Paciaudius, quae Alexandro Scvero mire convenire Victorius affirmaverat. Amuleta igitur esse illa numismata pluribus argumentis probavit, & ad amuleta commode referri docuit Alexandri Macedonis, Herculis & Minervae, asinae pullum lactantis, & scorpionis imagines, atque litteras in iisdem sculptas. Cum vero de aetate numismatum ambigi posset, pluribus conjecturis ducitur ad suspicandum a Juliano Apostata fuisse eadem cusa, qui quidem magnam tribuebat auctoritatem divinationi, atque adeo venerabatur Alexandrum Macedonem, ut illius animam se habere gloriaretur. Quae scripsit Paciaudius, quanquam magnas laudes tribuerit amico, durius tamen hic accepit, quam ipse

voluisset, & quam homines belli solent. Dissertationem itaque apologeticam anno post Victorius Romae emisit, qua suam se confirmasse sententiam, & diluisse tum omnia, quae illi objecerat Paciaudius, tum illam de amuletis opinionem arbitratus est. De re dubia nos minime judicabimus. Illud tamen addemus unum, Victorium pro se multa habuisse doctorum hominum judicia ac testimonia, quibus si esset probatus, omnibus se esse probatum sperare debere aiebat. Fecerunt vero uterque sapientissime, quod post haec mutuis adeo certarunt officiis, ut nulla inter eos intercessisse querimonia videretur. Postquam revocavit animus Paciaudius ab hac subtili disputatione, coepit majora cogitare, & nihil dubitans quin praedicatio gestorum Emanuelis Pinti Hierosolymitani Ordinis Magni Magistri justa & grata videretur (magnis enim ab illo affectus fuerat beneficiis, dum sacras Melitae conciones habuit) illa numismatibus in aere incisis exprimenda suscepit. Omnino sic habeto; quidquid arte, ingenio & notitia priscarum rerum fieri potuit ad tot emblemata atque inscriptiones in-

veniendas, id summo studio Paciaudium consecutum fuisse, & dum contemplamur concinne adeo expressam imaginem virtutum Pinti, & factorum illustrium, quae, illo duce & Magistro, Hierosolymitani milites gessere, illi gratulamur, quod talem praeconem invenerit. Fecit vero ipse humaniter, quod & sui & universi Ordinis nomine gratias Paciaudio honorificentissimis verbis egerit, & mittere satis large miserit. Tum nemo non intellexit quam hic sapiens esset cognitor omnis antiquitatis, & quam scienter illa uteretur ad multa; qua propter minime arrogantiae crimen extimescebat, si se tenere omnia illa putabat, ex quibus ars & scientia efficitur. Illum cohortationes multorum stimulant, ut in lucem proferret, quae inclusa sunt in Graecorum monumentis, iisque obsequi meditabatur. Sed Spinellius, cujus nutu & arbitrio studia sua moderabatur, illa potiora ducebat, quae ad antiquitates Christianas spectant, neque hospitem suum monere cessabat, ut ex iis laudem & gloriam maxime quaereret. Qui sunt ab his studiis alieni levja fortasse putabunt, quae de Capuanis carr-

panis quibusdam differuit, in illarum originem inquirens, & de veteri Christi Crucifixi signo, & antiquis Crucibus, quae Ravennae sunt, ad Antonium Franciscum Gorium scripsit. Sed juvat majorum nostrorum instituta, & quae ab ipsis ethnicis sumpserunt, ut religiosa facerent, investigare, quod ad pietatem & eruditionem colendam maxime conducit. Gorius vero cum de Crucibus scribendum suscepisset, & unum Paciaudium ex omnibus ad hujusmodi res explicandas maxime aptum cognosceret, ut omnino de Ravennatibus loqueretur, affectus est. Constat ille praesertim in signo omnium fortasse vetustissimo, quod habet Crucem ex ligno bisido & furcillato in modum litterae Y., atque hujusmodi Crucis Christum Jesum suffixum fuisse, hoc aliisque monumentis comprobatur. Mirari vero se ait Lipsium affirmasse, non satis dilucide veteres scriptores Crucis formam innuisse, cum Varro (de L. L. IV.) ubi de vallo, inquit: *quod extrema bacilla furcillata figuram habeant litterae Y.* Verosimile autem videtur cum Judaei Servatorem nostrum probrosae morti dare vellent, usos furca, latronum sup-

plicio fuisse, idque fivisse Deum, ut comprobaretur vaticinium: *Filius hominis non habet ubi caput reclinet*. Ne sine corollario esset isthaec Diatribe sua, illa breviter complexus est explicationem aliorum monumentorum Ravennatium. Aiebat enim Gorius: *jam nostra culpa fuerit, si te, nisi omnia, quae percontati erimus, & quae tu observare potuisti, dum versabare in antiquissima urbe sacrarum concionum causa, dimiserimus*. Pertinent illa ad musiva tessellataque opera Basilicae Urfinianae, ad anaglyphum, in quo Hercules, dum cervam aeripidem aureis cornibus instructam ac dormientem captat, repraesentatur, ad tres sepulcrales inscriptiones, ac demum ad gemmam ex veteri encausto bicolore manum referentem, quae auriculam summis digitis attrectat ac vellicat cum lemmate MNHIMONEYEMOY. Hoc aliisque hujusmodi ecphonematibus, ex sententia Paciaudii, mors adhortatur illum, qui gemmam gestasset, ut sui recordetur; curet se molli-ter, oblectet se voluptatibus, & ut Catullianis verbis dicam, vivat atque amet, nobis cum semel occidit brevis lux. Haec mo-

numenta a nemine, quod sciam, edita fuerant, & hoc praesertim propositum erat Paciaudio, ut scripta sua non tam eruditione & elegantia, quam novitate ipsa, qua maxime delectamur, commendarentur. Ex his peregrinationibus, cum domum Cardinalis hospitii sui revertebatur, secum semper aliquid antiquorum monumentorum afferebat, quo se & illum delectaret, tenens memoria praeclarissimam Platonis sententiam, qui eum esse aiebat honestissimum peregrinationis fructum, si quidpiam domum referas, in quo te deinde meditando scribendoque exerceas. Dum vero morem gerere Cardinalis ipsius voluntati adlaborabat in explicatione sacrorum monumentorum, forte ad illius manus pervenit manu scriptus liber, qui continebat epigrammata de balneis prope Neapolim, incompta illa quidem & rudia, sed quae multarum rerum notitiam, quas scire intererat, suppeditabant. Omnia diligentissime suo more perpendit, & cum editis contulit; haesit vero praesertim in eo, quod de Balneo Episcopi inscribitur, deque ipso libellum composuit. Non solum testimoniis, verum etiam picturis, quae



codicem ornant, probavit fuisse hoc in more positum Episcopis & Monachis, a quibus ad clerum universum transit, ut statis anni temporibus religionis causa balnea adirent, & dum inquit quae quantaque haec essent Romae, Neapoli ac Ravennae, non ad baptismi, ut quidam censuerunt, sed ad lotionis usum destinata (nam Christiani aspersiones, lavationesque ab Ethnicis institutas vel ab ultimis temporibus retinuerunt) docetque qua potissimum aetate thermarum publicarum usus defuit, tum sacrae tum profanae antiquitatis se peritissimum ostendit. Extremo in libro quaedam tetigit de theca argentea antiqui operis ad orbem cereum sacrum, seu ut loquuntur, Agnum Dei custodiendum, cujus schemate operis frontem exornavit, eaque convenientia erant Benedicti XIV. sententiae, qui adversus Panvinium probavit, hujusmodi cerarum consecrandarum usum primis Christianae religionis saeculis invaluisse. Idcirco vero eas majores nostros gestasse putat Paciaudius, ut emendarent perversum morem ferendi obscoena phylacteria, de quo egerat in ea dissertatione, qua suam de amuletis opinio-

nem illum confirmasse diximus. Quando haec edidit Paciaudius adversa admodum valetudine tenebatur Venetiis (eo enim venerat relaxationis ergo, quia tristitia acciderant Spinelio, qui Archiepiscopatu Neapolitano se abdicare coactus fuit) atque id caussae fuisse dicit, cur opus non perpoliret, atque ea rerum copia ubertateque instrueret, quam nunc exigere solemus ab iis, qui antiquitatis studia exercent. Ex quo factum est, ut cogitationem susceperit de illo retexendo, quod & auctoritate summi Pontificis Benedicti XIV. quo teste & laudatore studiorum suorum merito gloriabatur, inductus arripuit. Atque in hoc novo opere, quod octo post annis quam prius ediderat, Romae vulgavit, sibi caput illud visum est, ut quaereret probaretque vel a primis Christianae Reipublicae temporibus usitata fuisse sacra balnea, atque majorum morem illa frequentandi retinuisse consequentium temporum Christianos, ne Episcopis quidem exceptis, quod ut confirmaret novis testimoniis atque argumentis, fecit littarati cujusdam iniquitas, qui cum primum Paciaudii libellus est editus in vulgus, affirmavit rem

ab illo confictam fuisse ab Antistitum dignitate, gravitate atque sapientia abhorrentem. Verum cum omnes caerimoniae, quae ad religiosam munditiem obtinendam pertinent, habeant commune quoddam vinculum, & quasi cognatione quadam inter se centineantur, ejus oratio ad minores lotiones explicandas, quae a majoribus nostris sancte fuerant inventae, veluti sponte sua dilapsa est. Quo sane quibusdam conciliorum sanctionibus & praeceptis Ecclesiae ritibus non parum luminis attulit; utque affluentius undique hauriret argumenta, aliquot nobilissima Latinae, Graecaeque Ecclesiae monumenta, nondum antehac edita cum suis inscriptionibus atque emblematis in lucem emisit. Postquam vero in desuetudinem abierunt balnea aliaeque lotiones, una apud Catholicos viguit aquae consecratae lustratio, quae cum in tantam haereticorum hujus nostrae aetatis invidiam, tantumque contemptum venerit, ut eos si audias, nihil sit magis insulsum magisque superstitiosum, Paciaudius a suscepta disputatione minime alienum putavit, si vetererrimam probatissimamque caerimoniam ab impurissimis

obtreclatoribus vindicasset. Nec sane ambigi potest, id factum esse rite, quod a Patribus laudatur, minimeque eo nomine afficiendum, quo Ecclesiae hostes afficiunt, quos asperius, quam sui paterentur mores, Paciaudius infectatus est. Sed nobis non tam haec summa vis & contentio, quam ab eo extorsit Catholicae religionis studium, quam illa gravissimi sermonis lenitas perplacet, qua veritatis diligentes alloqui solebat. Quorum oculis dum subjecit orthographiam balnei Formosi S. P. ex codice Vaticano descriptam, & alia Christianae antiquitatis monumenta, de omnibus recto quodam sensu dijudicans, veniam petit, quod sibi in priori operis editione de Neapolitanae metropoleos ritibus differenti quaedam haud vero consentanea excidissent, qua errati confessione suum veritatis studium comprobavit. Nec Christiani modo, sed & Ethnici in re divina facienda pure utebantur aqua, ad quam rem puteos alios dedicatos, alios consecratos habebant, cujus argumenti explicationem jam praeoccupaverat Paciaudius, cum an. MDCCLVI. eodem Summo Pontifice Benedicto XIV. auctore, opus Romae

edidisset, quod inscripsit *Puteus sacer Bononien-*  
*sis agri*. Ex hoc apparet Lucium Apusulenum  
 Lucii libertum in eo agri Bononiensis loco,  
 qui nunc *Macaretolo*, vel *Maceretolo* dicitur,  
 suo impendio lauretum servasse, in quo pro  
 Octavio Divi Filio, de Bononiensi colonia  
 egregie merito sacra fierent, quorum ipse ma-  
 gister ac praeses esset, & hac ipsa de causa  
 puteum illic iussisse defodi, quem deinde  
 marmoreo περιόριον circumunivit; atque haec  
 omnia Apollini, Genioque Augusti, cui lita-  
 batur, sacra devotaque esse voluisse. Sed an-  
 tequam sententiam suam exponeret Paciaudius,  
 & monumentum & inscriptionem in eo posi-  
 tam, cujus causa susceptus est labor, expli-  
 caret, haud pauca de puteis antiquorum ac  
 praesertim Graecorum, eorumque usu, cum in  
 aliis rebus, tum in divinis differit, qualis es-  
 set differentia dedicati & consecrati putei ape-  
 rit, & quaedam non communia de lucis sa-  
 cris, in quorum uno positus erat puteus Bo-  
 noniensis, assert. Agenti de antiquis monu-  
 mentis occurrunt in sermone vario multa, quae  
 fortasse iis, qui alieni sunt a litteris aut in-  
 sulsa, aut inopportuna esse videbuntur; sed

quia rei & verbi cujuslibet ratio reddenda est; ac saepe confutanda aliorum sententia (discrepant enim plerumque inter se antiquarii) non facile est invenire, qui paucis sit contentus, quique quod sciat ipse, non tradat libentissime alteri aut docendi, aut dedocendi causa. Fortasse nisi Paciaudius tam multa, tamque erudita de sacro suo Bononiensi puteo (quando enim illi unquam ullus orationis vel eruditae, vel elegantis ornatus defuit?) litteris mandasset, ut sententiam suam plane confirmaret, ambigi posset, num praefendus illi sit Jo. Chrysostomus Trombellius, qui aliam prorsus viam in declaranda hujus putei inscriptione inivit. Existimat enim hunc minime sacrum fuisse, sed ad usum peregrinorum factum, propterea quod putealis aqua sacris faciundis minime idonea illi videbatur. Praeterea non idem est de Genio Caesaris utriusque explicatoris judicium; nam quae noster ad Augustum, illè ad Neronem refert. Contristavit haec sententia Paciaudii Trombellium, & scio cum amicis ipsum conquestum fuisse, quanquam illius mores & vita eundem facile convincere potuissent, non

contendendi, sed veri inveniendi studio veterem amicum ad disceptandum descendisse. Dum haec scribebat Paciaudius commorabatur Romae, cujus urbis domicilium, quod aptissimum erat humanitati & studiis suis, vel ab eo tempore delegerat, quo se disjungere a jucundissima Spinellii Cardinalis convictione coactus fuit. Habebat haec omnia abunde, suorum benevolentiam, potentiorum gratiam, instrumenta ad adipiscendam sapientiam, summum otium, quare magna in spe erat fore, ut per se quoque monumenta gloriae & laudis insignia, quae in Urbe terrarum dominantes veteres condi voluerunt, illustrarentur. Canem venaticum dixisses in conquirendis antiquitatis reliquiis, & dum versabatur cum iis, qui peritissimi esse existimabantur, facile intelligebat nihil esse quod magis expediat in hujusmodi studiis, quam quamdam societatem & communicationem judiciorum atque utilitatum. Porro cum scripta, quae, dum Romae fuit, emisit, cum iis conferimus, quae ante hoc tempus ediderat, maturitatem quamdam ipse consecutus fuisse nobis videtur. Jam sibi hanc vim imposuerat, ut saepe in publi-

cum prodiret iis ornatus atque instructus artibus, quae passim concelebrabantur. Neque illi satis erat litteris mandare, quod probari mediocriter eruditis posset; doctioribus placere & posteritati servire volebat. Antequam Venetiis Romam veniret, cum complures dies commoratus fuisset Ravennae apud Jacobum Oddium Aemiliae Pro-Legatum, secumque detulisset schema veteris anaglyphi, in quo mulier viro, vel parenti jam jam morituro, arrepta ejus dextra, supremum dicit vale (qui mos saepe in Graecis, perraro in Romanis sepulcris apparet) additis in superiori parte binis porrectis manibus, vehementer rogatus est ab hospite suo, ne illius oratio ad hujus rei disceptationem deesset. *Scribe non modo, aiebat Oddius, si quid scies, sed etiam si quid suspicabere.* Et primo quidem illi in mentem venit idcirco manus illas titulo fuisse adjectas, vel ut viatores, illis conspectis, pacem mortuo adprecarentur, vel ut monerentur, heredem, qui aram sepulcralem dedicarat, jugiter rogare, ut terra esset super ossa levis. Atque id suspicatus erat, quod veteres manibus brachiisque ad caelum proten-



tensis se Deos obtestari, eorumque opem prece supplici exorare significarent. Id etiam secum ipse cogitabat, num hae manus, quamvis se-junctae, indicarent connubium & fidem aeternam conjugum. Verum licet haec satis credibilia videri possent, quia tamen aliud invenit, in quo magis acquiesceret, visus est sibi certa aliqua in sententia consistere, postquam collatis inter se pluribus monumentis (quo quidem in toto hoc argumentorum genere nihil est meo judicio ad probandum accommodatius) docuit manus illas in tumultu Demetrii lamentationem lugubrem, fletumque moerentem indicare ob ejus vitae exitum celerem & intempestivum: soliti enim ethnici ob infortunia de Deorum providentia queri, & lamentis non modo, sed & diris ac imprecationibus saepe frenos dare, quod voce enunciare minime poterant, signis, ac praesertim elatis porrectisque in caelum manibus significabant. Quam sententiam ita confirmat Paciaudius, ut magnum numerum inscriptionum colligat, suppleat, interpretetur, & errores nonnullorum scriptorum, quibus illae causam dederunt, corrigat. Sane quis est, quem non mo-

veat monumentis testata ac consignata antiquitas? Quis non illi gratiam habebit, qui omnia sua studia, omnesque labores suos in iis inquirendis explicandisque posuit? Cui non jucunda solum, sed etiam admirabilis minime videbitur sapientia Paciaudii, qui contento cursu ex Latio in Graeciam, ex Republica Christianorum ad Hebraeos transvolabat, ut nosceret qui ritus, qui mores, quae instituta fuerint hominum, ex quorum disciplina consuetudinibusque non pauca ad nos usque dimanarunt? Ut varia haec hominum genera simul conjugaret, anno post quam illa ediderat, libellum sane aureolum *de Umbellae gestatione* emisit. Disputat primo de festis Graecorum, ad quae umbella adhibebatur tanquam sacra supellex, quod vel maxime in iis, quae Baccho dedicata erant, usuvenisse ex ipsis Graecorum libris confirmat. Huic tractationi quaedam adjecit de Festo Tabernaculorum, in quo Liberi Patris caerimonias & umbellae usum recentiores Judaeos impie retinuisse docet. Inquiri deinde quae fuerint Cereris atque Minervae sacra Eleusinia, The-smophoria, Panathenaea, propterea quod in his

umbella religionis caussa deferbatur. Hanc indicium & insigne dignitatis atque honoris fuisse apud Persas, Graecos atque Romanos pluribus testimoniis evincit, ad quod dilatandum argumentum quosdam etiam Constantino-politanae aulae ritus, caerimonias atque officia recenset. Quem usum ex ipsa habuerint veteres in theatris, in deambulationibus, in peregrinationibus, in venationibus, atque in balneis, quanta esset Graecorum superbia atque arrogantia in illa gestanda, qui essent apud hos *METOIKOI*, apud Latinos Ancillae umbelliferae, quomodo ab Etruscis ad hos, & ab his ad Christianos umbellarum usus dimanaverit, suo more & sententiis copiose, & verbis ornate disputat Paciaudius, qui ne quid deesset libro, ex qua materia, quave forma ac figura illae conficerentur, & quam lauti elegantisque & in luxum effusi veteres essent huic etiam suppellectili apparandae ostendit. In extremo capite ea persequitur de umbellis, de apallareis, deque flabellis, quae propria sunt Christianorum, eique laus tribuenda, quod undique conquiescit monumenta ad res, de quibus agebat, pertinentia, quia in

iis maxima praesidia atque adjumenta inveniuntur ad origines declarandas, ad consuetudines defendendas, & ad hostes catholici nominis refutandos. Quapropter qui haec studia vituperant, haud sane intelligo quid laudandum putent. Horum cultor eximius Jo. de Vita Beneventanae Ecclesiae Canonicus, cum patriae suae antiquitates illustrandas suscepisset, a Paciaudio petiit, ut toreuma quoddam interpretaretur, & ex hac interpretatione libellum conficeret, quo *Theſaurum* suum *antiquitatum Beneventanarum* (sic enim opus, in quo mirabilis est copia eruditionis, inscripsit) ornaret. Dicto amicissimi viri lubentissime atque impigre ille paruit, & quamvis deesset monumento inscriptio, quae vel injuria temporum oblitterata erat, vel exfecta ea aetate, qua gentes natione barbarae literis crudele bellum intulerant, ex modio tamen, quem figura affabre sculpta manu tenet, certo conjicere se posse putavit, anaglyptum Beneventanum mensorem frumentarium referre. Nemo sane ignorat usitatum id ac in more positum fuisse apud veteres, ut in sepulchralibus anaglyptis ea insculperentur symbo-

la, quae de arte commonesacerent, quam mortuus aliquando fastidat, sive illa liberalis fuerit, sive mechanica & servilis, quapropter facile erat de hominis officio ex modio iudicium facere. Hoc cognito, inquirendum erat modii genus, quem Italicum, seu Romanum esse multis argumentis ad credendum ducitur Paciaudius. Post id de modii publici frumentarii capacitate & pondere differit, & postquam nonnulla etiam tetigit de mulctra, de mensore oleario & vinario, ut egerat in prima ingressione de mensuris operum publicorum, Domus Augustae in utroque Imperio; Cereris Augustae, agrariis, ripariensibus, atque machinariis, illa diligentissime persequitur, quae pertinent ad declarandam mensuram frumentariorum conditionem, varietatem, domicilium, religionem, immunitates atque actiones, quod in hac omni disputatione sibi praesertim proposuerat. Postremo sermonem convertit ad primaevos Christianos, ut explicet qua de causa ii suis in monumentis mensuris, modii & frumenti symbola expresse-  
rint; quae, aliaeque huiusmodi sapientiae plenissima dum intuebatur, admiratione & iucunditate

suavissima se compleri dicebat, quod non in eorum modo sententiis, sed etiam in nutibus & signis saluberrima vivendi praecepta continerentur. Quid sane exploratius esse poterat, quam illius animus in Christianam Rempublicam ac religiosa instituta? quare agebat gratias fortunae constantiaeque suae, quod illi praesertim studia sua consecrasset. Magnum tum erat quod susceperat, difficile quod pollicebatur, se non communia & a paucis animadversa dicturum de S. Joannis Baptistae cultu. Opus inscripsit: *Antiquitates Christianae*, atque ita illud architectatus est, ut vel iis perplaceret, quibus odiosae sunt caerimoniae religionesque in sanctos homines. De hoc quidem opere nescio quemadmodum exponam; adeo sunt multa, quae incredibili labore ac diligentia ex additioribus sacrae antiquitatis penetralibus Auctor in lucem protulit ad declarandam majorum nostrorum erga Christi Praecursores pietatem. Tempia, baptisteria, musiva, diptyca, picturas, anaglypha, signa, inscriptiones, lipsana, numismata, dies festos, ritus vetustissimos, Ecclesiae preces supplicationesque, hymnos ac laudationes, omnia de-

nique sacrae vetustatis monumenta inquit,  
 ut praeclarum inde munus, atque instrumen-  
 tum ad causae suae defensionem atque operis  
 ipsius ornamentum deferat. His accedunt non  
 pauca eaque eximia monumenta, quae ipse  
 tum primum in aspectum lucemque protulit,  
 quaeque Christianos ritus & veterem liturgiam  
 maxime illustrant, & erroris atque impietatis  
 illos convincunt, qui sacrarum imaginum cul-  
 tum irridere solent. Qui ajunt irritari hos  
 non oportere, ignari sunt veteris disciplinae,  
 atque peregrini & hospites in Christiana Re-  
 publica. Opus praestantissimum dedicavit Pa-  
 ciaudius magno harum rerum aestimatori Be-  
 nedicto XIV. tum sui, tum Hierosolymitanorum  
 Equitum nomine. Nam an. MDCCLV. ante  
 quam illud vulgaret, factus fuerat illorum Or-  
 dinis historicus, quod munus ne frustra assi-  
 gnatum sibi fuisse ostenderet, omnes continuo  
 cogitationes suas ad opus, de quo diximus,  
 convertit. Beatissimum enim Christi Prae-  
 currem idem ille Ordo velut praestantissimum  
 patronum ac sospitatorem observat & colit.  
 In quo cum videret fuisse hoc eidem peculia-  
 re, ut dum sacra peragerentur, ritus quidam

singulares, & multis in rebus ab usitata nunc consuetudine remoti diligentissime custodirentur, de illius liturgia, quasi auctarii loco, censuit quoque sibi esse disputandum. Nec fane paucà notatu digna ei suppeditarunt vetera kalendaria, sacramentaria, omnesque libri rituales, quos qui consulere praetermittunt, nae illos in maximarum rerum ignorance versari necesse est. Egregie cordatus homo Summus Pontifex Benedictus nunquam non retulit gratiam Paciaudio pro tanto munere, & gratulatus est Magno Magistro, quod talem delegisset historicum, qui nobilissimorum militum gloriam esset aequaturus. Nam magna & fortia non modo facere, sed etiam scribere praeclarum est. Sed antequam de ejus historicis scriptis dicamus, rerum & temporum ordo postulat, ut reliqua persequamur, quibus praeclaras res, quae in diuturna obscuritate latuerant, sic aperuit, ut eas cernere oculis videretur. An. MDCCLVI. commentariolum emisit de *Athletarum Κυρίστηαι in palaestra Graecorum*. Exaravit hoc rogatu Caylusii Comitis, & exhortatione Jo. Jacobi Parthelemiei, qui tum cum ipso rusticabatur in Tusculano apud Comitem



Stainvilleum, Galliarum Regis ad Romanum Pontificem Legatum. Exarandi autem causam dedit expulsi operis sigillum ex aere solido musæi Contucciani, exhibens imaginem Graeci Athletæ *Κυβιστῆρος*, qui demisso in terram capite, plantas caelo obvertit, totoque incumbit cernuus armo. Quae de saltatione, ac praesertim cernuatorum, seu cubistarum, seu pe-tauristarum a Graecis, vel ab Homericis usitata temporibus dispersa erant, recta ratione & distributione sub uno adspectu posuit Paciaudius, & multa scriptorum loca aut non bene a ceteris interpretibus explicata, aut non satis animadversa callide & perite notavit, qua re fecit, ut Caylusius (qui quantusque iudex!) mirificum illum esse conjectorem atque interpretem omnis antiquitatis pronuntiaverit. Neque veritus est, ne judicaretur dixisse longius, quam res postulabat. Nam qui de orchestra scripsere, cubisticam saltationem aut leviter perstrinxerant, aut de illa indistincte egerant ac perturbate. Qui vero putant cunctos Graecos pancratiastas exuere consuevisse omnem modestiam in eorum exercitationibus, meriti a Paciaudio arguuntur, qui non ex hoc;

modo sigillo, sed & ex aliis monumentis conficit, diu Graecorum morem tantam habuisse a vetere disciplina verecundiam, ut in ludos sine subligaculo prodiret nemo. Profecto Paciaudius nec doctiores, nec officiosiores facile delegisset Caylusio & Bartelemieio, quibuscum studia sua communicaret, quorum commendatione, seu potius testimonio factum est, ut ipse in Regiam Parisiensem Academiam inscriptionum & humaniorum litterarum, illo ipso anno, cooptaretur. Hoc nihil gratius illi accidere potuit. Etenim de se praedicari & nominari volebat, quod laborum suorum fructum amplissimum esse rebatur. Trahimur enim omnes laudis studio, & vel optimi gloria ducuntur, cui ut serviret plurima eodem temporeolvebat animo, quibus illustraret obscuriora, quae in priscis Graecorum Romanorumque monumentis invenerat. Interea animadversiones philologicas in numos Consulares III Viri Marci Antonii protulit in lucem, quibus obtinuit, ut aliquid certi constitui posset de illius Reipublicae & bonorum pestis legionibus, nonnullisque ejusdem expeditionibus ac gestis, quae obscure & ambigue, aut saltem

inconstanter ab historicis traduntur. Statuit primo Triumviris Rempublicam gerentibus varium minimeque constantem in castris Romanorum pro Imperatorum arbitratu susceptique belli opportunitate fuisse legionum numerum; has supra XXX. ab Antonio fuisse conscriptas; Trajanum legionem tricesimam neutiquam instituisse, Romanaeque militiae primum adjunxisse, sed extinctam abrogatamque, occasione belli Dacici, renovasse; varia uni eidemque legioni adhaesisse nomina, prout rerum conditio ferebat; ac demum monumenta legionum tricesimae & ultra in Donii Collectaneis, quadragesimae inter Fabretti domesticas inscriptiones, & alia hujusmodi tanquam dubia incertaeque fidei immerito a nonnullis traduci. At quia non minus navalibus, quam pedestribus pugnis famam & imperium quaesivit M. Antonius, & varia navium forma in illius numis apparet, de navium bellicarum structura ita differuit Paciaudius, ut multa, quae in disceptationem quaestionemque vocabantur ab eruditissimis viris, se certius explanaturum professus sit. Nam etiam ex Antonii ipsius numis, aliisque com-

pluribus conjectare fas sit, triremes (& de triremibus praesertim quaeri solet) actas fuisse remigibus a prora ad puppim aequae procurrentibus; quia tamen alii occurrunt numi, in quibus remi a thalamo ad tranum ad diversam altitudinem quasque per gradus protensi visuntur, ut clare quavis in trireme appareat fuisse nautas imos, medios, summos, quorum alii longioribus, alii brevioribus navem propellebant remis, idque mirifice confirmant alia antiquissima monumenta, & pictura exquisitissimi operis inter rudera Palatini montis detecta, nec non veterum scriptorum loca plura, tantum his omnibus tribuit Paciaudius, ut nihil habuerit firmitus quod teneret, quam quod illa prodebant. Certius etiam ex aliis numis conjecit quae fuerint dignitates, quas M. Antonius in Republica consecutus est, & dum supposititios ac dubios a genuinis distinguit, & multorum scriptorum errores corrigit, & artificum fraudes detegit, & quaedam praestantiora numismata nunquam antehac vulgata, quae habuit ab amicissimo viro Antonio Sarnianio Veneto Patricio explicat, se rei numismaticae peritissimum ostendit. Est in

extremo libro explicatio tabulae anaglyptae Peloponnesiacaë, quae quod Medicum sellularium repraesentet, occasionem obtulit Paciaudio de veterum medicorum conditione, de eorum veste, sella & hypopodio, de honoribus, quibus illustriores saluberrimae artis cultores affecti fuerunt, & de veterinariae peritis scriptoribus disputandi. Quid rei, inquires, inter M. Antonium, & medicum sedentem in taberna, abaco, ferramentis chirurgicis, & ministro *πυμентаριω* instructa, ad quam nobilis mulier valetudinis causa equo advecta venit? Satis consonum putavit Paciaudius, cum ad Franciscum Roncallium multis litteris, sed praesertim medicina doctissimum dissertationes suas philologicas instituisset, si de veterum medicina quaedam haud communia dixisset, quod donum & amico dignum, & gratum omnibus iis fuit, qui priscarum rerum notitia delectabantur. Laudarunt praesertim Paciaudii opus Scriptores Ephemeridum Lipsiensium (1)

---

(1) Vide Acta Eruditorum an. 1758. a pag. 385. ad pag. 397.

quamquam ab eo dissentire videantur, qui re-  
tulit ad Aeneam atque Didonem veterem, de  
qua diximus, picturam, & factam a Lydio pu-  
tavit. In illa enim potius Annam sororem  
expressam a Marco Ludio fuisse multis argu-  
mentis probant, & ita disputant de medico-  
rum nobilitate, ut suffragari videantur Hei-  
neccio, qui ad eos non adduci aegros, sed  
ipso per domos cursare, contra ac contende-  
bat Paciaudius, pluribus docuerat (1). Cete-  
rum de universo opere sic judicant, ut ex eo  
apparere affirmant, quanta sit Auctoris mode-  
stia atque humanitas, dum ceteros confutat,  
quantum ingenium, quanta eruditio, dum  
suas proponit sententias, quam demum ille di-  
gnus Italia esset, quam dixerant, litterarum  
sedem, eloquentiae domicilium, & praestan-  
tissimorum ingeniorum seminarium quoddam.  
Addunt & illud, ex hoc uno opere intelligi  
posse, quantis illum oporteat esse instructum  
praesidiis ingenii, doctrinae, artium, studii,

---

(1) Antiquit. Rom. lib. 1. Tit. xxv. §. xix.

laboris exercitationisque, qui ad explicandas antiquitatis reliquias aggreditur. His praeconiis alacrior factus Paciaudius cum Musis, id est cum politiore doctrina omnino se commercium habere velle deliberavit; quapropter libentissime omnem captabat occasionem gratificandi amicis ab eo aut postulantibus, aut exigentibus veterum monumentorum explicationem. Cum autem in omnibus illius scriptis de prisca vetustate mirifice eniteat ingenii magnitudo & acumen, bene & sapienter adhibita ratio, atque eruditio, veri inveniendi cupiditas, prudens sincerumque iudicium, oratio plena nervorum atque elegantiae, atque ad persuadendum non modo, sed etiam ad delectandum accommodata, haec in primis eminent in opere, quod inscripsit, *monumenta Peloponnesia commentariis explicata*, ediditque Romae an. MDCCLXI. quo sane effecit, ut nemo antiquariorum, qui peritissimi putabantur, illi anteponeretur. Erat huiusmodi monumentorum ingens copia apud Bernardum Nanium Senatorem Venetum omnibus rebus ornatissimum, sic ut omnes ii, quos haec studia delectabant, cum Venetias accederent, illa visere vellent,

judicarentque domum non domino magis, quam civitati ornamento esse. Quaedam etiam illorum viri eruditione praestantes explicaverant, sed cum ad vetera magnis sumptibus collecta aut per ipsum, aut per majores illius non mediocris postremis hisce temporibus facta fuisset accessio opera praesertim Jacobi Fratris Venetorum classis Praefecti, vehementissime Bernardus rogavit Paciaudium, ut suo more docte & erudite aut de omnibus, quae ornabant musaeum suum, aut saltem de nobilioribus e Peloponneso vicinisque insulis illuc adveclis differeret. Lactatus ille mirifice, si-bique gratulatus est oblatam occasionem fuisse & tanti viri voluntati & suis studiis satis faciendi, & ut esset alacrior ad scribendum, fecit monumentorum ipsorum praestantia, in quibus plurima continentur, quae pertinent ad leges, mores, religionem, magistratus, artesque, quibus Graeci prae ceteris populis inclaruerunt. Duo autem sunt monumentorum genera, quae his commentariis concluduntur, alia quae scripta, alia quae figurata appellantur. Prioris quidem generis omnia quinque & quadraginta late copioseque explicavit Paciau-



ciaudius, sicque ordinavit, ut quae se se, ut ita dicam, mutuis officiis ad verum probandum adjuvarent, conjuncta & sociata essent. Quoniam vero multa erant obscura & ambigua, quoties de iis celebriorum scriptorum sententias attulit, nunquam non interposuit iudicium suum; sed nihil inconsulte ac temere iudicat, & dum ea dicit, quae probabilitate aliqua ejus animum percusserunt, nescias profecto utrum solertiam ejus magis admirere, an verecundiam. Illa, quae habebant facillimam cognitionem, cum de statuis & anaglyptis disseruit, praetermisit. Nolebat enim communia & pervagata, quae fastidium facile pariunt, sed nova & recondita, atque ex interioribus litteris, & praesertim Graecis petita scripto mandare. Neque minus illud vitium fugit, ut incognita pro cognitis haberet, & levibus conjecturis assentiretur, eaque propter nihil dixit de luxatis & hiulcis quibusdam fragmentis, ex quibus aliquid certi, aut probabilis exprimi posse desperabat. Quod a Pindaro dictum accepimus, operis fontem & ingressionem splendidam & magnificam esse oportere, id Paciaudius in suis commentariis edendis praesti-

stuit. Orditur enim ab epigrammate diffractae columnae inscripto, ex quo novum Dianae Κελευσίας agnomen, formam structuramque horologii (donarii genus, de quo cetera marmora silent) & novum Υποδιακονεως officium discimus. Ut suam de horologiis dissertationem illustriorem redderet ex Herculaneis & Antiatis monumentis bina quaesivit & explicavit, quae reprehensionibus causam dederunt. Objurgatio Neapolitanorum multum habuit acerbis; quae vero attulit Winkelmannius (1) ut probaret non ad Fortunam ac fortes Antiates, sed ad Orestis iudicium ab Arcopago pronuntiatum pertinere horologium, & quidquid exprimitur in nobilissimo monumento Antii reperto, quod a Corfiniis possidetur, plena sunt officii ac moderationis, ut non cum homine, cuius opus in caelum extulit, sed cum causa dissidere videatur. Quia mos erat Paciaudio undique arcessere orna-

---

(1) *Vide ejus opus, quod inscribitur; Monumenti antichi inediti, pag. 203.*

menta scriptorum suorum, conjunxit cum dissertatione de horologiis explicationem cujusdam anemoscopii recentissime in agro Romano inventi, quod occasionem illi dedit omnem pene veterum Cosmographiae doctrinam exponendi. Lapis fane pretiosissimus non modo XII. ventorum nomina aptis intervallis distincta, sed & meridianum, aequatorem, utrumque tropicum atque binos polares circulos exhibet, ut exinde accuratum planisphaerium cum anemometro copuletur. Artifex illius fuisse dicitur Eutropius, nec levi conjectura ducitur Paciaudius ad suspicandum, haud distinguendum illum esse ab historico, quem etiam naturae scientia claruisse scimus. Ab his ad legem sacratam Ithacensium transit, quae ita describitur, ut marmor non modo populi illius religionem prodat, sed & sacra Dianae praedia, agros decumanos, frugum vestigalia templo impartienda commemoret, ac diras poenasque denuntiet possessori, aut conductori indictas, qui conventum legemque sancitam violasset; quae quamvis in antiquorum libris disjuncta dispersaeque reperiantur, in hoc tamen Ithacensium consulto col-

lecta conceptisque verbis expressa leguntur. Hinc seges ac materia Paciaudio ad explicanda multa, quae sine eruditione Graeca intelligi non possunt, ut non hominem audias paucis & vulgaribus litteris ad rei antiquariae scientiam, sed multis & interioribus eruditum, qui etiam, adhibita differendi elegantia, cum opus est, ratione & via philosophatur. Ineptus sane judicaret, si omnia singillatim recensere vellem monumenta, quae in hoc opere a Paciaudio & diligentissime & docte explicantur. Is sane multum Graecam historiam Graecorumque instituta, munera, religionem, mores atque artes illustravit, effecitque, ut illos aut inscitiae, aut temeritatis suae poenituerit, qui haec studia sicuti levia contemnere videntur. Nanius ipse, qui sane oculos eruditos habebat, multum per ipsum additum fuisse ornamenti ad musaeum suum iudicavit, quapropter ab eodem, tanquam ab artifice summo postulare non destitit, ut quoniam tantum habebat otii, quantum jam diu non contigerat, & nova interim ex Peloponneso Venetias advecta fuerant monumenta, non gravaretur exaedificare id opus, quod instituerat. Id se

praefitutum ſpoſpondit Paciaudius, quod ex his ſtudiis maximus ſibi fructus eſſet & jucunditas, quodque ſemel iterumque factum promiſſum ſolvere exoptabat de Peloponneſiorum monumentorum ſcriptura ſeparatim & copioſe differendi, ex qua cum de varia ipſorum monumentorum aetate, tum de multiplici Graecorum paleographia aeſtimare liceret. Haec tamen neſtquam praefitit non timiditate & ignavia, ſed quia neceſſitas quaedam illi impoſita fuit omne ſuum tempus omniaque ſtudia ſua ad alienum arbitrium conſumendi. Vivebat, ut ſupra commemoraviſus, ſuaviſſime Romae, quod erat apud multos & Cardinales, & Regum Principumque Legatos propter opinionem doctrinae & integritatis honoratus, quod ſecundum dignitatis gradum a Teatinis ſuis an. MDCCLIII. (Procuratorem Generalem vocant) obtinuerat, & quod non ſolum qui erant eruditi, ſed etiam qui eſſe ſimulabant, ejus jucundiſſimam conſuetudinem requirerent. Sed quia omnes ſapientes feliciter fortunateque vivunt, dum conſulant ſtudiis ſuis & aliorum utilitati, oblatum a Philippo Borbonio Parmenſium

& Placentinorum Duce munus, ut praeesset bibliothecae, de qua comparanda cogitabat, & operibus, quae fiebant ad detegenda vetera monumenta in Placentinis montibus, ubi Velleja fuerat, facile suscepit. Verum antequam illud obiret, negare haud potuit Frederico Marcello de Lantibus Cardinali, quin comitaretur magnae spei adolescentem Aemilium de Lantibus, dum is dignitatis insignia deferebat Choiseullio & Rhoanio Gallorum nobilissimis, quos Clemens XIII. Novembri an. MDCCLXI. in Cardinalium collegium adlegerat. Quod Gallis Paciaudius erat notissimus, magnis ab iis honoribus affectus fuit; eorum litterarios coetus frequentavit, & illustriorum benevolentiam sibi conciliavit. Invisit & Latharingiam, ubi a Stanislaio Rege humanissime acceptus fuit; & cum rediens ad Italos suos transfret Vefontium, cum magna significatione voluntatis collegarum erga se in illius urbis Academiam cooptatus fuit. Tandem exeunte an. MDCCLXII. Parmae confedit, ut ad omnia, quae vellent Princeps & omnium illius consiliorum hortator & auditor Fellini Marchio, praesto esset. Paucorum

annorum spatio (erat enim Fellinius in luxum effusus, ut nil nisi magnificum illum delectaret) hujusmodi instruxit Paciaudius bibliothecam, quae elegantia omnes Italicas superaret, perpaucis copia & raritate librorum inferior esset. Neque illam solum indicibus locupletavit, sed & de rarioribus libris, & de illustrioribus, aut non admodum notis scriptoribus ea litteris mandavit, quae non facile potuisset, nisi fuisset omnibus iis artibus, quae sunt libero homine dignae, perpolitus. In hoc scriptorum genere admirabilis omnino ejus sapientia videri debet, eaque conjici potest, ex iis, quae ipse de praeclarissimo Alcorani codice an. MDCCCLXXII. vulgavit, & hoc ipso anno, tu Bodoni elegantissime, & scriptorum Paciaudii custos diligentissime, de eroticis scriptoribus ex hoc veluti thesauro sumpta emisisti, ut tuam Longi editionem exornares. Neque minus Vellejatibus satisfecit. Scripsit enim de iis copiose, utens Gallorum lingua, notavitque ubi fuerit eorum urbs, a quo quibusque temporibus orta, quos honores acceperit, quos magistratus habuerit, quae bella gesserit, quas leges sanxerit, quas

passa fuerit vices, & quae ad nos usque illius pervenerint monumenta. Haec non solum ordine, sed etiam momento quodam & iudicio disposuit, ut ex quibusdam capitibus recte explicatis ipsius urbis historia cognosci posset. Dissertationem ad Caylusium Comitem misit; sed quae integra referri debebat in Parisiensis Academiae Acta, a scriptoribus quibusdam Ephemeridum mutila adeo ac deformata vulgata fuit, ut Auctor vix illam agnosceret, & pene se frustra laborem in illa contextenda consumpsisse iudicaverit. Sed alia etiam maiora fuerunt, quae curare debuit iussu Parmensium Ducis. Pulsis enim e suo regno Iesuitis, qui scholas in ipso habebant, sic institutioni adolescentium consulendum putavit, ut praeterita tempora minime recordarentur. Instituit & in ipsa urbe Parma publicum Gymnasium, & harum omnium rerum curam & studiorum Praefecturam Paciaudio commisit. Porro ipse quidem factus esse videbatur ad hoc munus, quod & de hominibus, & de doctrinis omnibus rectissime iudicabat. Plura ipsius Ducis nomine litteris mandavit, cum omnia ad certam rationis normam essent dirigenda.



Invitavit homines doctrina praestantes ad publice tradendas disciplinas, & ne ullum ipsi urbi deeret ornamentum, te, immortalis Bondoni, Roma evocavit, ut in eadem omnium nobilissimum typographium institueres, cujus memoria manebit, dum honos habebitur Graecis & Latinis litteris. Atque hae non modo, sed & Hebraicae, philosophia, mathesis, medicina, anatomia, omnisque res physica ita per summos viros excolebantur Parmae, ut in ea musae omnes sedem collocasse viderentur. Vel ipsa spectacula plena erant elegantiae ac sumptus, & siquid erat, quod ad memoriam posteritatis propagandum esset, aderat statim Paciaudius aut architectus operis, aut inscriptionum auctor. Tali modo cum omnium oculi in eum essent coniecti, & bene de nomine & dignitate sui Principis meritis esse judicaretur, quia tamen, mortuo Philippo Duce, adversa Fellini Marchioni acciderunt, quorum causa cedere iis locis coactus fuit, in quae non modo auctoritatem, sed pene imperium tenuerat, particeps illius calamitatum Paciaudius fuit, quasi consiliorum quoque ejusdem particeps fuisset. Sed quam-

vis Fellinio omnia sua studia atque officia pro sua necessitudine & debuisse confiteretur, & praestitisse arbitraretur, quia tamen nihil erat, de quo merito coargui posset (fuit enim semper in omni actione & cautus, & prudens, & providus) magna in spe erat non diuturnam fore rerum adversarum perpersionem ea in urbe, cui tot pepererat ornamenta, & in qua dominabatur Princeps, cujus omnes suspiciebant religionem atque aequitatem. Et hic quidem ubi agnovit Paciaudii innocentiam, & ubi ejus inimicorum, qui tanto viro deesse minime poterant, impetus refederunt, revocavit ipsum ad suum munus pensumque, a quo paucos tantummodo menses absuit, & ad quod libentissime rediit, quamvis in otio & in litteris vivens apud Teatinos suos, remotus ab oculis populi se beatum fore sperabat. Publicum enim esse oportebat suae fidei & innocentiae testimonium, ut ab se se omnem suspicionem propulsaret. Mirabile vero fuit quomodo Christianus & religiosus homo adversam fortunam tulerit: magna enim est vis conscientiae, ut nihil timeant & doleant illi, qui sibi nullius culpae conscii sunt.

Post haec excitatur iterum, si non acerbum & apertum odium, attamen aut invidiae, aut odii non dissimilis offensio, qua de causa Paciaudius, qui tranquillitatem maxime ex-  
petebat, a publicis muneribus se removere, ad otiumque perfugere deliberavit. Aegre id obtinuit a Ferdinando Borbonio; hic tamen coactus ab se dimittere carissimum hominem, ultro pollicitus est ei omnia, quoties redire Parmam vellet. Ut vero rediret triennio post quam illa acciderant, & ipse jucundissime vivebat Augustae Taurinorum in sinu & complexu suorum, vim quodammodo ei intulit, cui idcirco cessit Paciaudius, ut ne quas inimicitias residere in se, ejusque benevolentiae ac fidei minus confidere arbitraretur. Tum in vocibus invidorum resonare coepit quidam moderatius atque humanius, & dum Paciaudius eximium ac singulare suum studium Ferdinando Duci & litteris praestabat, illi plaudere cgebantur vel ii, qui paullo ante fuerant inimici. Cum porro ipse pergeret ad ea solatia, quae non modo sedatis molestiis jucunda, sed etiam haerentibus salutaria ipsi fuerunt, inchoatum antea opus de historia

Magnorum Magistrorum Melitenfis Ordinis ad tria volumina perduxit, vulgavitque Parmæ an. MDCCLXXX. Vestibulum & aditum ad illud fecit illustrem. Nam ea de ratione conscribendæ historiæ præfatus est, quæ illum in dicendo elegantem, in existimando admodum prudentem, & artis, quam tum primum profitebatur, peritissimum declarant. Cum vero historiam suam ab Ordinis ortu repetat, ab iis scilicet temporibus, quibus capta Hierosolyma a Goffredo Buliono fuit, decem Magnorum Magistrorum vitas sic explicat, ut iis omnem rerum memoriam, quæ, ipsis Familiam gubernantibus, acciderunt, breviter, & ut mihi quidem visum est, perdiligenter complexus sit. Sed quid, inquires, postquam Melitenfium equitum res ab aliis historicis litteris mandatae fuerunt, habet opus istud novi, & quod usui esse possit? Illud vero & nova quidem multa, & eam utilitatem, quam requirebat Paciaudius, ut, explicatis ordinibus temporum, uno in conspectu viderent Lectores & quæ ipsi & prudenter & pie & fortiter gesserunt, ut Christianorum gloria propagetur, & qui essent mores, consuetudines,

instituta et leges tenebricosorum temporum, et per quos gradus res Melitenſium, ſeu Hieroſolymariorum equitum creverit, et ad eam, in qua nunc eſt, amplitudinem pervenerit. Ea propter non modo hiſtorici, ſed et politici ac philoſophi ſaepe partes agit, iudicat ſapienter de iis, quae ceteri ſcriptores tradiderunt, et ut diligentiffimus omnis antiquitatis inveſtigator cognosceretur, ſigna, diplomata, ceteraque huiusmodi annofas chartas explicat, interpretatur, omniaque optimo in lumine collocat. Hiſtoriam perduxit ad exitum uſque ſaeculi XII., et ut illa ornatior eſſet, effinxit numiſmata et inſcriptiones, quas maxime convenire Magnis, de quibus ſcripſit, Magiſtris rebusque ab iis geſtis putavit. Et in huiusmodi fictionibus, quarum exemplum primi Galli dederunt, erat ille quidem elegans, felix, copioſus, cujus laudis magnum quidem extabit documentum, ſi a te, Bodoni, proferetur, ut ſpero, in lucem *manuale* tuum *typographicum* Ruſſorum Reginae dicatum, cujus multa praeclara geſta, de quibus nulla unquam ſilebit aetas, ita numiſmatibus ipſe expreſſit, ut nihil excogitari potuerit elegantius. Vellem e-

quidem, ut a te quoque ederentur tot aliae inscriptiones Latinae, quibus ille aut munera mittere solebat amicis, aut mortuos laudare, aut maritalia conjugia fausta precari, aut vota solvere, aut posteris memoriam prodere earum rerum, quas in bonum publicum Principes contulere, aut amicorum ipsorum causa ludere. In his enim omnibus non adumbratam, sed expressam antiquae elegantiae ac festivitatis imaginem licet intueri. Quid venustius, ut unam exempli causa ponamus, illo emortuali canis elogio, quod unum satis esset ad convincendos erroris illos, qui contendunt Latinam linguam minime aptam esse ad exprimendas cum dignitate res ab antiquorum consuetudine remotas?

*Melampo . aëtaeonis . & lyciscae . filio . cani  
venatico . stirpe . cenomano . omnium . quos  
tulit . gallia . transpadana . præstantissimo .  
cui . natura . sic . praevalidos . tribuit . la-  
certos . ars . vero . & institutio . tantam .  
sagacitatem . fidemque . ut . capreolos . da-  
masque . oculis . emissiciis . exploratas . per .  
saltus . et . dumeta . pernix . insequeretur .*

*fluente . quae . semitam . interciperent . im-*  
*pavidus . transnataret . leporum . perdicum-*  
*que . vestigia . olfactu . scrutatus . easque .*  
*deteclas . vigil . tacitus . immotus . observa-*  
*ret . caudaeque . trepidatione . de . praeda .*  
*moneret . levisomnus . excubias . ad . postes .*  
*ageret . fures . latratu . domo . ac . pomario .*  
*prohiberet . neminem . tamen . morsu . cor-*  
*riperet . domino . fidissimus . lares . subeunti .*  
*assultans . blandiretur . noctu . facem . aut .*  
*laternam . dentibus . arreptam . illi . prae-*  
*ferret . viamque . monstraret . mane . coquum .*  
*in . forum . escarium . comitaretur . indeque .*  
*nexilem . calathum . cibariis . refertum . do-*  
*num . reportaret . quin . ad . famem . pel-*  
*lendam . vel . frustulum . suffuraretur . mun-*  
*ditiae . retinentissimus . nullam . aedium .*  
*partem . aut . supellectilem . umquam . foe-*  
*daret . herus . citam . ipsius . mortem . de-*  
*plorans . sepulcrum . dedicavit . in . lucu .*  
*malis . citrinis . confito . ad . oram . lacus .*  
*Benaci . IX . kalendas . sextiles . MDCLXXIX .*  
*vixit . annos . VII . menses . III . dies . XIV .*

Profecto nihil mirabilius elegantia Paciaudii, quae non modo apparebat in omnibus illius scriptis, sed & in omni re, quam gerebat, quaque utebatur. Non enim dedecere religiosum hominem arbitrabatur munditiam, si non sit odiosa, nec exquisita nimis. Idem & festivus atque urbanus, & cum afflueret omni lepore ac venustate, cupide omnes ejus requirebant consuetudinem. Nec sane facile hominem inveneris, qui magis floruerit aut potentiorum gratia, aut aequalium amicitiiis. Coluit vero praesertim illos, tum Italos, tum externos, ac praesertim Gallos, quibus plurimum tribuebat in omni doctrina & arte, qui antiquitatis & eruditionis studia exercebant. Aiebat enim cognationem studiorum & artium non minus esse conjunctam, quam illam naturae. Cum quibusdam illi quoque erat hospitium, narravitque mihi Sibillatus (viri doctrina praestantem, & cui plurimum debeo, saepe et suaviter nomino) cum diversaretur Parmae apud Paciaudium, nihil in illo vidisse nisi quod specimen esset humanitatis, salis, suavitatis atque leporis. Hoc tamen unum in illo se desiderare addebat, ut mollior esset ad alio-



aliorum interdum amplectendas sententias praefertim in philologicis rebus, quae non veritati, sed verisimilitudini plerumque illigatae accipiti Marte oppugnari possunt, ac propugnari. Religionis cultor eximius Romanis Pontificibus, quorum auctoritati & fidei & prudentiae Christus sacra religionemque in primis commendavit, singularem praestitit observantiam, & gloriari in primis videbatur, quod carus fuerit Benedicto XIV. quo sane nemo doctior, nemo sapientior, nemo honoratior extitit. Cum vero incurrebat in aliquem, qui eorum majestatis esset inimicus, qui-que religionis corruptelam moliretur, commovebatur incredibili dolore, & lamentabatur propter multorum delicta etiam ad innocentium periculum exarsisse tempora calamitosissima. Actiones ejus, postremis praesertim vitae suae annis, aequabant religionis ipsius, quam studiose adeo colebat, dignitatem, & praeceptor insignis non tam dicendi, quam vivendi (1) praeclara exempla reliquit ad imi-

T. XIV.

Q

---

(1) Quaedam officiorum praecepta sibi praesertim tenenda putavit, quae scripsit in libello precum, quibus quotidie utebatur.

tandum. Triennio ferme aegrotavit, & dum se exercebat in labore (nunquam enim intermisit studia doctrinae) patientiaque & animi & corporis, illam beatorum sedem contemplabatur, in quam tanquam in portum ex longa navigatione venire exoptabat. Postremo apoplexis illum oppressit, ex qua supremum diem obiit postridie Kal. Februarii an. MDCCLXXXV. bonis omnibus & Ferdinando praesertim Parmensium Placentinorumque Duci magnum sui desiderium relinquens. Sepultus est in Aede, quae est ad Teatinos, & quamvis nullus sepulcrum ejus ornet titulus, diu tamen volitabit per ora hominum Paciaudii nomen, qui adeo litteras adamavit, atque humanitatem. Haec habui; amantiſſime Bodoni, quae de communi amico memoriae proderem, ut ei, etsi nequaquam parem illius ingenio, at pro nostro tamen studio meritoque gratiam, debitamque referrem.

## O P E R A E D I T A .

**Orazione per le lodi di S. Caterina Vastanense detta in Genova nella Chiesa di S. Brigida l'anno 1738. in Genova ec. *Edita iterum Venetiis fuit a Francisco Pittero an. 1752.***

**Orazione detta agli Arcadi della Colonia Ligustica in onore di S. Tommaso d'Aquino il dì 31. di Gennajo 1739. *Edita fuit cum commentariis, quae in illam fecit Auctor, Venetiis 1740. in libro, cui titulus: Miscellanea di varie operette Tom. I. pref. fo Gio Maria Lazzeroni in 8.***

**Orazione per le lodi de' SS. Cosma e Dàmiano, Venezia 1739. *Edita iterum fuit biennio post a Francisco Pittero.***

**Lezione Fisica intorno ai principj Newtoniani al Chiarissimo Sig. Bartolommeo Beccari. *Extat in Vol. IV operis, quod supra memoravimus, Miscellanea di varie operette ec., cujus in VI. Volumine extat etiam Dissertatio***

**Delle antichità di Ripatransona .**

**Ragionamento detto in Vaticano al Sacro Collegio il Venerdì Santo 1745. In Napoli 1745. presso Novello de Bonis in 4.**

**Orazione detta in Napoli ne' solenni funerali celebrati da quella Città nella morte del Re Cattolico Filippo V. In Napoli 1746.**

**Dissertazione intorno ad un'antica Iscrizione al Co. Gian Rinaldo Carli Professore di Nautica nell' U-**

244 PAULLUS MARIA

niversità di Padova. *Extat in Vol. XXXXII. operis, cujus est inscriptio.* Raccolta degli opuscoli Scientifici e Filologici, in Venezia presso Simone Occhi in 12.

Differtazione sopra una statuetta di Mercurio del Gabinetto di S. E. il Sig. Marchese dell' Ospital Ambasciatore di S. M. Cristianissima alla Corte di Napoli 1747. Napoli presso Novello de Bonis in 4.  
Osservazioni sopra alcune singolari e strane medaglie. Napoli 1748. presso Novello de Bonis in 4.

Lettera al Sig. D. Giuseppe di Capua Capece de' 27. Giugno 1747. intorno alle due campane della Chiesa Parrocchiale di S. Giovanni de' nobili Uomini di Capua. *Edita cum Differtatione fuit* del Sig. Giuseppe di Capua Capece intorno alle due stesse Campane. In Napoli nella Stamperia di Novello de Bonis 1750. in 4.

Squarcio di lettera al nobilissimo Sig. Abate Pio Enea Marchese degli Obizi sopra la città di Eraclea o Ercolano. *Extat in Vol. XXXVIII.* Raccolta d' Opuscoli Scientifici e Filologici, Venezia 1748. appresso Simone Occhi. *Non absimilia retulit Jo. Lamius* in Vol. XXXXVIII. Ephemeridum.

Medaglie rappresentanti i più gloriosi avvenimenti del Magistero di S. A. Eminentissima Fra D. Emanuele Pinto. In Napoli 1749. in fol.

De Veteri Christi Crucifixi signo, & antiquis Crucibus, quae Ravennae sunt, Diatribe. Accedunt monumenta alia nondum edita. *Extant in Vol. III.*

Symbolarum litterarum, quod edidit Florentiae  
*Antonius Franciscus Gorius an. 1749. in 8.*

De Sacris Christianorum Balneis liber singularis, Venetiis 1750. Ex typographia Radiciona in 4.

De Sacris Christianorum Balneis liber singularis secundis curis emendatior & auctior. Romae excudebant Fratres Palearini 1758. in 4.

De rebus Sebastiani Pauli Congregationis Matris Dei commentarius epistolaris ad Scipionem Maffejum. Neapoli 1751. apud Novellum de Bonis.

Diatribes, qua Graeci anaglyphi interpretatio traditur Romae 1751. apud Fratres Palearinos in 4.

ΣΚΙΑΔΙΟΦΟΡΗΜΑ sive de umbellae gestatione Commentarius, Romae 1752. apud Fratres Palearinos in 4.

De Beneventano Cereris Augustae mensore ΕΕΗΓΗ-ΣΙΣ. Romae 1753. ex Typographia Palladis in 4.

De Cultu S. Joannis Baptistae antiquitates Christianae. Accedit in veterem ejusdem Ordinis liturgiam Commentarius. Romae 1755. apud Fratres Palearinos in 4.

Puteus sacer agri Bononiensis jussu Sanctissimi Domini nostri Benedicti XIV. P. M. commentario illustratus, Romae 1756. apud Fratres Palearinos in 4.

De Athleatarum ΚΥΒΙΣΤΗΣΕΙ in Palaestra Graecorum Commentariolum. Romae 1756. apud Fratres Palearinos in 4.

Ad nummos Consulares IIIviri Marci Antonii animadversiones philologicae. Accedit explicatio

246 PAULLUS MARIA

Tabulae Peloponnesfis. Romae 1757. apud Fratres Palearinos in 4.

Lettera scritta l'an. 1758. al Principe di Biscari con una medaglia per l'Accademia degli Etnei istituita in Catania. *Edidit hanc epistolam Florentiae an. 1776. cum descriptione Musci ejusdem Principis Dominicus Sestinius.*

Monumenta Peloponnesia Commentariis explicata Volumen 1. & II. Romae 1761. apud Fratres Palearinos in 4.

Costituzione per i nuovi Regj studi. In Parma nella Stamperia Carmignani 1768. in 4. *Ferdinandi Ducis nomine hanc Constitutionem scripsit.*

Regolamento per le scuole del Diritto Civile e Pontificio.

Regolamento per la collazione de' Gradi Accademici. Periodus studiorum.

Ara Amicitiae, Parmae in Foro majori. *Cum monumentum sane nobilissimum factum fuisset, quo posteris memoria proderetur nuptiarum Ferdinandi Borbonii & Amaliae Austriacae, & adventus Caesaris Parmam, Paciaudius inscriptiones fecit, ipsumque monumentum aere expressum scripto declaravit.*

Programma alle muse italiane. *Hoc programate invitantur Tragoediae & Comoediae cultores, propositis praemiis, ad accipiendam Parmensem coronam.*

Ad praeclarissimum Alcorani Codicem Regiae Parmensis Bibliothecae Prologus, ex Regia typographia 1772. in 8. *Codex inter exuvias Magni Visiris*

*Mahometi IV. inventus fuit, quando is Christianorum armis III. Id. Septembris an. 1683. victus fuit. Oblatus ille Leopoldo Caesari fuit, qui ipsum Eleonorae uxori, haec autem Carolo Coetiae Jesuitae Placentino, qui illi erat a confessionibus, dono dedit.*

Epithalamia exoticis linguis reddita. Parmae ex Regio Typographico 1775. in fol. max. *Ad Paciaudium spectant Latinae omnes inscriptiones.*

In nuptiis Caroli Emmanuelis Ferdinandi Sabaudi Pedemontii Principis & Mariae Adelaidis Clothildis Borboniae inscriptiones ad aedes Judaeorum positae. *Auctor harum inscriptionum imitatus est laudandi morem Hebraeorum. Minime commendandas tot alias inscriptiones esse putamus, quae in varias litteratorum ephemerides relatae fuerunt, ipso Paciaudio, dum in vivis erat, permittente.*

Memorie de' Gran Maestri del Sacro Militar Ordine Gerosolimitano Tom. III. Parma dalla Stamperia Reale 1780. in 4.

## ANGELUS FABRONIUS

ANTONIO MARIO LORGNAE  
SOCIETATIS ITALICAE PRAESIDI S. P. D.

**P**hilosophiam, ut est apud Ciceronem, Dii paucis quibusdam veram dederunt, neque aliter sensisse videtur vir omnium sapientissimus Galileus, cum affirmare minime dubitaverit plurimos esse, qui illam ignorant; per paucos, qui minimam illius partem teneant, ac solum Deum universam callere (1). Nihilominus ea est vel ambitio, vel temeritas hominum, ut se putent ad naturae universae, ut ita dicam, animum ac mentem penetrare posse, & confidentissime pronuntiant, quid sit materia, ex qua quaeque res efficiatur, & quae vis sit, quae quidque efficiat, & quae sint causae primae & secundariae omnium pene naturalium effectuum. Quod si

---

(1) Saggiatore n. 2.



*Deus tales nos genuisset, ut illas facile intueri & perspicere possemus, neque in profundo veritatem, ut agebat Democritus, penitus abstruxisset, haud esset sane quod quicquam summos perferret labores in exquirenda doctrina, in qua hanc utilitatem maximam esse arbitror, non ut ad noscenda multa per illam ducamur, sed ut intelligamus pauca hucere, multo majora latere crassis occultata & circumfusa tenebris, in omnibus suspiciendam admirandamque esse summam Auctoris naturae sapientiam atque intelligentiam, illum agnoscendum ex tot mirabilibus operibus, cum horum nihil casu & fortuito fieri potuerit, & esse mundum, & caelum, & astra, & terram & animos, non ut curiose nimis de iis disputemus, sed ut per eos ad ipsum Deum propius accedamus. Qui aliter judicant, & celsi & erecti pollicentur se tot rerum obscuras & ignoratas naturas explicaturos, fucum facere poterunt imperitis adolescentibus, non item sapientibus viris, qui si, ut Socrates ille, non omnium, multarum tamen rerum se incios esse affirmant, & quasdam sic involutas esse, ut earum prorsus desperanda sit notitia. Prae-*

clare porro vir omnium prudentissimus Franciscus Baco a Verulamio studiosos philosophiae admonuit (1), ut tantum uterentur scientia, quantum ad patefaciendam divinam naturam ac voluntatem sufficeret; ut non paucis contenti essent, cum experientia docuerit leves gustus in philosophia movere ad atheismum, sed pleniores hauustus ad religionem reducere; & dum causarum cohaerentiam & seriem contemplantur, meminerint, ut est in Poetarum mythologia, summum naturalis catenae annulum pedi solii Jovis affigi. Quapropter idem nos docet, ut in tractanda omnium nobilissima scientia aequae temeritatem ac timiditatem vitemus, neque amore novitatis ita nos abripi sinamus, ut ad visa, quasi accepta sensibus, animorum assensionem adjungamus. Dum Keplerus totus erat in quaerendis, more Pythagoreorum, suis analogiis atque harmoniis, atque in conficiendo opere, quod inscripsit, Mysterium Cosmographicum, bene ac sapienter a Tychone Braheo admo-

---

(1) lib. I. de augment. scientiarum.

*nitus est*, uti suspensis speculationibus a priori descendentibus, animum potius ad observationes, quas simul offerebat, considerandas adjiceret; inque iis primo gradu facto, post demum ad causas ascenderet (1). *Patuerunt ejus aures hisce monitis, quibus se debuisse grate professus est quidquid de motibus planetarum cum maxima sui gloria invenit. Sed non propterea prorsus analogias deseruit, relinquens omnibus exemplum, quam periculosum & absurdum sit sequi principia & hypotheses a scientiis, ut loquimur, abstractis sumptas, easque ad naturae investigationem traducere. In omni autem re physica quaeri opus esset a quo, & quo modo sit tradita, & per quas vias inventa, & videre utrum judicium magis sit hominis, quam vox naturae, an recte & saepe consultata sit experientia, quid in similibus rebus evenire soleat, & quid sine praejudicata opinione, minimeque consultata metaphysica, statui oportuerit. Haud inficiamur*

---

(1) Vid. ejus notas in editionem secundam *mysterii Cosmographici*.

*experientiam & observationes solas non suffi-*  
*cere ad detegendas causas ex earum effecti-*  
*bus, & ad explicandos effectus per causas,*  
*& tum vocanda est in subsidium sublimior quae-*  
*dam geometria, qua sic utendum est, ut ipsa*  
*non dominetur, sed potius pareat ac serviat*  
*physicae. Duplex in genus dividi solet geo-*  
*metria, in analyticam videlicet & syntheticam,*  
*& utraque plurimum prodesse poterit rerum*  
*naturalium investigatori. Illam adhibebit quan-*  
*do ex phaenomenis aut effectibus vires & caus-*  
*as, quae sunt in natura, quaesierit, hanc*  
*quando detectis causis, id est rerum princi-*  
*piis, quae consequuntur ex iis phaenomena*  
*ostendere voluerit. Sed tum in physica, tum*  
*in mathefi, nisi initium duxerimus ab ~~analyfi~~ analyfi,*  
*id est a principiis, quae revera sint in natu-*  
*ra, periculum erit, ne postquam magno la-*  
*bore fundamenta alicujus systematis jecisse no-*  
*bis videamur, non philosophorum judicia, sed*  
*delirantium somnia extulisse judicemur. Vir*  
*prope divinus Newtonus, unde ceteri exem-*  
*plum recte philosophandi petere debent, post-*  
*quam analytice demonstravit esse generale prin-*  
*cipium gravitatis, totius mundi systema expli-*

care, & hoc quasi gradu quodam jacto. in caelum usque ascendere potuit. Idem per analysim detectis novis & admirabilibus proprietatibus lucis, synthesi utens, rationem reddidit plurium phaenomenorum, quorum causas ceteri frustra quaesierant. Sed dum hac incedens via multa vera antea ignorata aperiebat, alia pro suo summo acumine veluti per transennam adspexit, quae non adeo certa habuit, neque haec cum illis confundenda putavit, & modeste iis Quaestionum nomen imposuit. materiam posteris praebens ad dogmata sua vel amplificanda, vel confirmanda, minime vero refutanda. Sciebat enim ubi consistendum esset, quoties experientiae lumen deerat, seque ipsam patefacere natura recusabat. Idem quam modeste dubitanterque, ut amicorum postulationibus satisfaceret, conjecturas suas proposuit de gravitatis causa, & quidquid de ea dixit, ut & de ceteris potentiis, (danda nobis venia est, ut physicorum more loquamur) quae vires suas exercent in parvas materiae partes, declarant quam esset & acutus & cautus, quam gnarus & obscuritatis rerum & infirmitatis in judiciis, & quam prudens in suis

pronuntiandis, de quibus sane quidquid detrahas, necesse est aut inscitiae, aut invidiae assignetur. Ceteri, qui his naturae & doctrinae praesidiis minime parati ad philosophiam accessere, quantumvis elaboraverint, plura eidem detrimenta, quam adjumenta importasse videntur. Dicturus de Claudio Fromondio apud nos physicae doctor, viro sane acutissimi ingenii, nec mediocris doctrinae, sed quem quasi aestus quidam ingenii quandoque abripuit a recta philosophandi via, haec non inopportune attigisse judicabor. Et quoniam de impudentia dixi, castigemus etiam segnitiam hominum atque inertiam. Nam tanta est utilitatis magnitudo, tanta oblectatio in inquirendis rebus physicis, ut mirer multos ad suscipiendum discendi laborem non impelli. Quas vero tibi gratias agere non debent omnes homines, quod lucem ingenii & consilii tui civibus tuis porrexeris ad mathematica & physica studia excolenda, & Academiam institueris, ut ex iis rebus, quas horum studiorum cultores eximii, quibus Italia gloriatur, invenerunt, Acta conficiantur, quorum jam quatuor extant volumina, docta sane & laboriosa?

*Fremant multi licet , dicam quod sentio : bibliothecas mehercle multorum philosophorum unum hoc opus & rerum pondere & utilitatis ubertate superare . Ac si nos Italos , id quod maxime debet , nostrae Provinciae amor deleat , quo studio inflammati esse debemus , ut quae quondam fuit magistra ceterarum in omni arte praeclara ac disciplina , nunc minime veluti effoetam hebescere & languere in otio , at cum cultioribus copia & praestantia inventorum posse contendere judicetur ? Vale .*

*Pisis Kalendis Maii MDCCLXXXVIII.*

## CLAUDIUS FROMONTIUS.

**F**romondiorum familia, quae ex Burgundia superiori saeculo Cremonam habitatum venit, honestissima est, ex eaque ortum habuit Claudius prid. Non. Feb. an. MDCCIII. cum illi pater fuisset Joannes Claudius, mater Lucia Bindia, quae nobili genere nata erat. Hi quidem curarunt, ut vel a prima ætate bonis ille artibus & disciplinis institueretur, quod in eo elucere ingenium videbant. Sed quae ipse didicit tum in patria, tum Ravennae in monasterio Camaldulensium (horum enim familiae imitatus exemplum Jo. Francisci fratris nomen dedit vere an. MDCCXVIII) neque acuere, neque alere eximium ingenium poterant. Itaque ardebat desiderio invenienti praeceptores, qui sibi rectam studiorum monstrarent viam, & quod deerrantibus minime obtemperaret, aut in eorum monitis minime acquiesceret, castigationis ergo missus est ad monasterium, quod Fontis Avellanae dicitur, in quo desertissima est solitudo. Triennium



nium ibi fuit, & beatus in hoc Eremitio fuisse videtur, quod abundans otio ad cognitionem rerum naturalium comprehendendam (sunt enim in eo loco multa praeclara ad adspicendum) mirifice incensus fuit. Inde autumnis an. MDCCXXVII. rediit ad Ravennates, cum regeret monasterium, ut vocant, Classis Petrus Cagnatus Cremonensis, quo sane nemo erat & prudentior & doctior. Huic facile fuit divinare qui quantusque vir futurus esset Fromondius, quapropter ipsum tradidit in disciplinam Guidoni Grandio, qui tum Pisis mathematicas disciplinas docebat. Quantum in his processerit ex eo conjici potest, quod Grandius ipse eo tempore, quo ab Academia Pisana abesse cogeatur ob impositum illi munus Camaldulensium familiae, ut loquuntur, Visitatoris, Fromondio curam commisit instruendi discipulos suos. Quo privato, & publico etiam universae Academiae testimonio moti ii, qui Francisci Lotharingii nomine Etruriam gubernabant, anno MDCCXXXVIII. munus illi docendi logicam assignarunt. Tum cum animo & corpore languere coepisset Grandius, se illi destinatum iri successorem sperabat Fromondius,

*T. XIV.*

R

sed brevi illius spes evanuerunt, cum non Grandii modo sententia, sed omnium voce unus Thomas Perellius, cujus vitam Italice declaravimus (1), dignus praedicaretur, qui tanto viro succedere posset. Ex quo factum est, ut ejus in Grandium amicitia non minuta modo, sed prorsus diffusa esse videretur. Septennium ferme rexit logices scholam, & omnium utilissima scientia, quae solum & fundamentum est ceterarum, ipso docente, suis praesidiis erat ornata; deinde ineunte an. MDCCXXXV. jussus est explicare philosophiam naturalem, quod se facere posse putavit solis logices, minime vero, quod saepe miraberis, geometriae subsidiis. Ut rationem vero redderet sui instituti, emisit an. MDCCXXXVIII. opus, quod inscripsit: *Nova & generalis introductio ad Philosophiam*, gloriatus se novitate non magis, quam magnitudine rerum ad exquirendas causas excitatum fuisse. Hinc postquam de *Relationibus* (cognitiones enim omnes in *relationibus* positas

---

(1) *Extat illa in volumine 1. degli Elogj d' illustri Italiani.*

esse ajebat) in priori parte operis egit, in altera de natura propria animae atque vi, de materia, de naturalibus effectibus, de tempore & de spatio Leibnizium confutans pluribus disseruit, & dum vim cogitandi perpendit, quam Logici perceptionem simplicem dicunt, & a judicio distinguunt, verum esse judicium affirmat; dum vero suis ponderibus examinat propositionum naturam, non tres, sed septem illas esse contendit, quas sic enumerat & explicat, ut omnem cogitationem motumque animi, qui in vero exquirendo maxime versatur, aperire se posse putet. Multorum ingenia contra illius disciplinam exarsere, & hac etiam de causa ipse in summam invidiam adductus fuit, quod ad convincendas fallacias geometrarum, qui suis demonstrationibus nimium confidentes ratiocinandi regulas, ut exiles nimium, & propemodum importunas ac molestas contemnere videntur, ad examen revocat celebre illud Polenii experimentum, quo esse in natura vires, ut vocant, vivas nimium confidenter probare se posse putavit, nec non effatum illud Grandii, qui de motu aquarum agens, ait *momenta, sive vires motrices fluentium aquarum*

*esse in ratione composita ex ratione sectionum;*  
& *duplicata ratione celeritatum*. Sed quid alii judicarent de suis scriptis non laborabat Fromondius, & fortis & constans in sua philosophandi ratione non paucos sane apud nos abduxit a vera philosophia, quae novitates respuit, nisi suaserint experientia & geometria, id est recta ratio, per quam consequentia cernimus, principia & causas rerum videmus, earumque progressus, & quasi antecessiones non ignoramus, similitudines comparamus, incognita a cognitis secernimus, omninoque cavemus, ne a falsis verique speciem habentibus decipiamur. Quod non eo dico, ut multum de Fromondii laudibus detractum velim; vir sane erat acutus & perspicax, & quando cohibebat assensum ab hypothesebus & visis quibusdam suis, et experientiam consulebat, poterat ad physicorum principum laudem adspirare. Id praesertim intelligi poterit ex illius opere Italico *de oleis, quae devehuntur ex locis pestilentia infectis*, quo nullum majus confecit, quodque unum ad immortalitatem nominis obtinendam illi sufficere potuisset. Causa illius scribendi haec fuit. Contendebat doctus vir Jo. Gentili-

lius, qui Liburni Medicinam exercebat, oleum e Calabria, in qua pestilentia erat, Londinum adveſtum, ſi combureretur, minime pernicioſum fore, cui ſuae ſententiae ut adjungeretur auctoritas & confirmatio magiſtrorum Piſanorum, vehementer poſtulaverat. Cum de hac re ſcriberet Fromondius ad Gottium, illa attigit, quae dubitationem ſibi afferebant, quae ſic male accepit Gentilius, ut ſeptem fere poſt menſes, edita *Philosophica epistola* (ſic enim illam inſcripſit) non ſolum illa reſellere, ſed & detrudere aliquid de fama Fromondii, utens perpetua ironia, ſtuduerit. Id ut ille reſcivit, excaudit, & cauſſam inimicitiarum quaerere Gentilium clomitavit. Igitur ſine mora ſuam deſenſionem ſuſcepit, & quod oblatam ſibi facultatem putabat proferendi in medium phyſica multa, quae diuturna commentatione ac meditatione ſibi paraverat, non ſolum cenſor, ſed etiam magiſter ſui adverſarii eſſe voluit. Edidit itaque an. MDCCXXXV. ſuam Apologeticam reſponſionem, in qua multa ſemina reconditoris phyſicae doctrinae ſparſit, ut dignum aliquid & ſuis viribus, & expectatione hominum (omnes enim multum illius ingenio tri-

buebant) se effecisse judicaretur. Prorsus nova protulit de putrescentibus corporibus, & de inflammatione, quam ipsa subeunt; docuit quam facile oleosa & fluida corpora concipere pestilentiam possint, & quid intersit inter pestifera & venenata; de fluiditate, quam in propriam & impropriam distinguit, copiose differit, eamque pendere putat a mutuo aequilibrio duarum contrariarum virium, elasticitatis scilicet & attractionis, sic ut ubi sit major elasticitas spumescant corpora, ubi major attractio coagmententur et coalescant; quo posito, rationem reddit quare oleum dum frigescit in adeps, atque adeps dum calefcit in oleum atque vapores transeat. Postquam de proprietatibus fluidorum corporum, & de naturalibus horum effectibus disputavit, quaerit causam pluviarum, & illam repetit a vi propria aeris solvendi vapores, sibi que admiscendi, sic ut idem evenire dicat, quod fieri videmus in praecipitationibus, ut loquantur, chemicis. Haec, ut & illa, quae de fulminibus, & tonitribus tradidit, magnopere extulerunt illi, quibus incognitum erat, quid in hujusmodi phaenomenis electricitas possit; ac sane miror in magna, in qua

nunc versamur luce rerum electricarum, superesse adhuc inter nos quosdam, qui renovare Fromondianam doctrinam adlaborant. Eximia putantur illa, quae de inflammatione corporum idem docuit, quaeque confirmasse videntur a summo physico Priestleio recentissime observata, omninoque quae de proprietatibus oleorum aliorumque fluidorum corporum, de aere tum puro, tum imbuto exhalationibus, tum condensato acidis, tum inflammato a putrescentibus corporibus dixit, & merito & jure commoverunt studia physicorum ad illa vel comprobanda, vel infirmanda. Etenim non in omnibus quod verum esset videre potuit, & cum hoc ipsum verum in occulto latebat, si quidquam invenisset, quod sibi simillimum veri videretur, firme tenebat & pugnaciter defendebat. Respondit ad ea, quae quaesita erant Gentilius, tumque adhibita ab illo fuit certa ratio moderatioque dicendi. Tota autem haec disputatio non solum oblectationem attulit otiosis, sed etiam emolumentum doctis hominibus, quod uberes scientiae physicae fontes contineret; ne illa vero diutius duraret, factum est nonnullorum prudentia, ad quorum

consilia docilem adeo se praeiuit Fromondius, ut idem & fortis & acer, & mitis & lenis esse judicaretur (1). Dum exposuit Jo. Lamius suis in ephemeridibus Florentinis quae

(1) *Quae Fromondius ipse ad Gentilium scripsit satis ejus animum mitem & docilem declarant. Sunt autem hujusmodi.* La dichiarazione che V. S. Ecc. nell' ultimo suo libro ha fatto di non voler più distraersi dalle sue occupazioni, mi ha fatto concepire una ferma speranza, che ella sia per accordarsi meco ad una reciproca da me bramata reconciliazione, la quale ci permetta quella tranquillità d' animo tanto necessaria a chi studia. Di buon grado gliene porgo l' invito, poichè quanto mi commosse la sua lettera Filosofica, perchè da me inaspettata, altrettanto imperturbabile sono rimasto al vederne l' erudite sue dimostrazioni, che successivamente vi ha fatte, perchè già io le stavo aspettando. Il troppo risentito contegno da me involontariamente mostrato nella mia Risposta apologetica, e da me non conosciuto, se non dopo essersi nell' animo mio calmata la passione, mi ha pienamente persuaso, che le contese letterarie non sono per tutti i temperamenti; quantunque



continebantur in Fromondii opere, minime dubitare visus est, an quaedam ex iis essent, quae ad veritatem propius non accederent. Equidem (bona venia tanti viri dixerim) absum ab hac sententia. Quanquam enim Fromondius multa acutissime viderit, ut fortasse minime Gentilium ipsum poenituerit ad huiusmodi tractationes eundem impulisse, quaedam tamen protulit, quae aut vetustate

---

se uno de' nostri comuni amici fosse stato più coraggioso nell' intramettersi da principio per togliere alcuni equivoci e rischiare alcune false supposizioni, o relazioni, come da me ne fu pregato, la nostra contesa sarebbe stata certamente posta in istato di non produrre alcuna amarezza. Ma giacchè presentemente ogn'uno di noi ha esposte le proprie ragioni al pubblico, io che debbo esser molto tenuto alla stima, che le è piaciuto di protestarmi nella esposizione delle sue, invito V. S. Ec. a voler dar al pubblico medesimo un segno di vicendevole reconciliazione, accettando la mia servitù ed amicizia, che le esibisco.

Pisa 16. Gen. 1746.

consenuisse, aut novis experimentis inventisque sublata fuisse, aut latere adhuc obscuritate involuta naturae videntur. Quae obscuritas profecto tanta est, ut liceat physico impune fateri, multa se ignorare, & de quibusdam etiam desperandam notitiam. Sane miraberis hominem, qui sine ullo geometriae subsidio satisfieri physicae posse putabat, vel antequam cum Gentilio disputaret, suscepisse defensionem Newtoni adversus Jesuitam Castellium, qui ut magnis claresceret odiis, ejus de coloribus dogmata, quae ipsa luce sunt clariora, convellere conatus est. Patefecit illius fallacias Fromondius una atque altera epistola, quas retulit Lamius in ephemerides Litteratorum Florentinas an. MDCCXXXI. ex iisque apparet scientiam & copiam rerum opticarum ab ipso fuisse comprehensam. Verum non sic laudaverim, quae de corporum fluiditate libello quodam edito an. MDCCCLIV. complexus est. Nil assert quod infirmet, quemadmodum sibi propositum esse dicit, receptas jam de illa sententias; dum rationem reddere vult, quare fluida corpora aequaliter in omnes partes pro illorum altitudine vires suas

exerceant, rem non satis cognitam explicationibus suis obscuriorem facit, & somnia venditare mihi videtur dum affirmat in corporibus solidis superiores partes minime gravare inferiores, illorumque gravitatem pendere unice ab illorum soliditate, tanquam ab instrumento & vinculo, quo subjecta basis pro quantitate materiae, quae est in iisdem corporibus, premitur. Diverfa fluidorum genera esse statuit, affirmatque, quod si illorum elementa, ut docebat Newtonus, dura essent, illa minime vim se se in omnes partes flectendi habitura. Leve esse argumentum ait, quod ex glacie eruitur ad confirmandam aquae elementorum duritiem: aquam enim glaciari contendit non privatione caloris, sed adhaesione subtilis materiae, quam auram frigorisferam appellat. Quae ipse prima in universo opere putavit, quibusque nihil evidentius esse facile sibi persuadebat, infra exscribere minime pigebit (1). Non fluidorum modo, sed & soli-

---

(1) I. Che nel corpo solido la continuata durezza sua serve d' interno, e come instrumentale vincolo

dorum corporum receptam mechanicam se se funditus everfurum palam gloriabatur, & non

---

alla gravità del medesimo per aggravare la sottoposta contigua base in ragione della quantità di materia, che nello stesso corpo si contiene.

II. Che nel medesimo corpo solido la stessa continuata durezza sua serve altresì d'interno, e naturale sostegno a tutte quelle parti, che nella continuata estensione del medesimo si possono concepire; onde niuna delle inferiori inclusivamente alle infime, e contigue alla sottoposta base, soffre alcuna pressione dalle sue rispettivamente superiori.

III. Che in un confuso aggregato di corpicciuoli la discreta durezza serve alla gravità loro d'impedimento, pel quale non può mai aggravare la sottoposta base in ragione della quantità di materia, che nell'aggregato medesimo è compresa.

IV. Che il Fluido è un corpo tutto continuato flessibilissimo, ed elastico.

V. Che il peso de' corpi, quando la gravità loro sia libera da ogni vincolo di durezza, procede in ragione dell'altezza, e non mai della quantità di materia.

solum incognita, sed prorsus falsa approbare illos philosophos ajebat, qui esse in natura motum ut loquuntur, compositum, esse celeritatem in aequilibrio, & hoc non pendere a reciproca proportionem massarum in celeritates affirmabant. Is uno atque altero opusculo de his rebus differuit, & quae attulit, ut rationem redderet, quare aliquid eveniat in actionibus variis corporis, satis redarguunt ejus mechanicarum rerum inscitiam. Toto caelo enim distat argumentatio illius ab ipsa re & veritate. Magni ingenii, magnaeque doctrinae homo si insitas quasdam in animo opiniones evellere, & reprimere novitatis studium potuisset, plurima sane adjumenta hominum vitae, ipsisque physicis disciplinis attulisset.

---

VI. Che nel Fluido l'elastica flessibilità sua serve alla gravità del medesimo, come d' interno, e naturale strumento, per mezzo del quale la pressione procedente dalla gravità medesima si moltiplica per ogni verso in ragione dell' altezza dello stesso Fluido sovrapposto ad eguali superficie: con che rimane totalmente sviluppato il grande arcano della pressione dei Fluidi.

Tantum illius acumini tribuebant medici ipsi, ut saepe ab ipso consilia exquisierint, & illae asphyxiarum curationes, ut unam rem exempli causa ponamus, a Fromondio primum apud nos excogitatae fuerunt. Hujus rei testes habemus Jo. Targionium & Dominicum Barfantium, quibus medicis et amicis utebatur. Ejus quoque auctoritas praeclare insertionem variarum commendavit, et cum facile exponeret in familiaribus sermonibus, quae de physicis, medicis, chemicis, botanicis aliisque naturalibus rebus aut commentatus secum esset, aut ab experientia didicisset, nonnulli sic iis uti posse putabant, ut per ea in opinionem doctorum hominum irreperent. Erant & inter collegas illius, qui eripere ipsi conarentur falsas opiniones, quae cum somniis cognitionem habebant, sed vel quia noster nos delectare solet error, vel quia facile judicamus invideri gloriae ac laudi nostrae, raro aliorum monitis dociles aures praebebat. Eodem tempore, quo Fromondius, physicam quoque Pisis docebat Carolus Taglinius Clanni (1) quod est

(1) *Natus is est an. MDCLXXIX. Postquam Florentiae praeparaverat animum ad doctrinas mathema-*

oppidulum Volaterranae Dioecesis, natus, homo atque naturae et doctrinae genere ab illo

---

*ricas & physicas concipiendas, Pisas in disciplinam Grandii venit, & non parum sub tanto praeceptore se profecisse declaravit, geometrico quodam edito libello, qui illi aditum patefecit ad Academiam Pisanam. Cooptatus est enim in illam an. MDCCIV. Theses, quas discipulis suis, dum physicae erat doctor, defendendas proposuit, magnam illi famam pepererunt non solum apud Italos, sed etiam apud Britannos & Gallos, a quibus in illorum Acalemias, quibus scientiarum & artium incrementum propositum est, relatus fuit. Pertinebant enim ad res, quae in physica primae esse putantur, ad sonum, ad ventorum naturam, ad ortus, obitus, motus conversionesque planetarum, ad barometra, therinometra, hygrometra, & id generis alia. De constructione thermometrorum dissenfit ab eo Reaumurius. Postremo de aere, ejusque natura & effectibus disseruit, quo in opere collegit quidquid ad illa usque tempora diligentiores physici de aere aut excogitaverant, aut invenerant. Tum quoque laudata fuerunt quae de Borealibus Auroris aliisque physicis questionibus separatim edidit. Sed quia parum proces-*

sane disjunctissimus. Hic modestus et prudens nil sibi tribuebat, et cum totam contrivisset vitam in discendis iis, quae Galileus, Torricellius, Academici Florentini, et illustriores tum Britanni, tum Galli philosophi tradiderant, haec sic exponebat discipulis suis, ut alienarum sententiarum collector et illustrator, et cum res posceret, moderator esse videretur; ille confidentiae (quin dicam audaciae?) plenus non nisi nova, et inaudita, et prorsus mirabilia, quae ceterorum dogmata convellerent, se allaturum profitebatur; hic ad scholam veniebat, quasi ex pauperrimo dives factus fuisset alienis copiis a se diuturno studio, ac summo labore acquisitis, et si quid ex se promebat, verecunde et plerumque dubitan-

---

*serat in Newtoniana physica, cum ei de gravitate corporum esset agendum, incurrit in maximas difficultates, quibus se expedire haud facile potuit. In patria vitam finivit an. MDCCXLVII. XIV. kal. Octobris, cum vixisset annos LXVIII. M. VI. D., autem 1111. Sepulcri monumento donatus est, in quo Jo. Lamius elogium scripsit.*



bitanter dicebat, ille, cui propria sententia pluris erat, quam ceterorum iudicium, non solum quae observaverat, sed etiam quae somniaverat sic efferebat, quasi infixae essent in natura, comprehendique ab omnibus facile possent, dum sensibus & ratione uterentur; hic denique nihil affirmabat, nisi quod aut doctorum virorum, aut multarum observationum consensu liqueret, aut vero simillimum esset, ille quod ex sui sane praestantis ingenii viribus, & ex suis metaphysicis hypothesebus derivasset. Nihilo tamen minus Fromondium ad magna, Taglinium ad mediocria natum dixisset, eumque aluisse ingenium mirabilibus visis, hunc quaerendo verum, et diligentia etiam ex tarditate incitasse. Plures aliae erant in his viris dissimilitudines naturae morumque. Summa enim humanitas suavissimique mores Taglinium commendebant; contra ea Fromondius vel levissima de causa concitabatur ira, & suspiciosus adeo erat, ut facile ab iis, cum quibus vivebat, violatum aliquid esse existimaret. Sed haec vitia magnis compensata fuere virtutibus. Fuit enim justus, integer & religiosus, interdum etiam, quod

sane miraberis in homine, ut diximus, iracundo & melancholico perferens injuriarum (nam acerbissima vel a suis monachis perpe-  
ti debuit) in amicos liberalis, discipulorum suorum mirifice studiosus, firmus, stabilis at-  
que constans amicus, ingenuus supra quam credibile est, gravis sine severitate, & sine demissione comis atque affabilis, ex quibus laudem & caritatem multorum, quae sunt vi-  
tae sine metu & cum jucunditate degendae praesidia firmissima, consecutus est. Obiit Pisis, cum ageret annum LXII. in ejusque sepulcro, quod est in S. Michaelis Aede, haec illius amicus Leopoldus Guadagnius inscripsit.

JOANNI . CLAVDIO . FROMONDIO  
 CREMONENSI  
 IN . CAMALD. ORDINEM . COOPTATO  
 MATHEMATICO . GRANDII . DISCIPVLO  
 EXIMIO . PHILOSOPHO  
 QVI . IN . PIS. LYCEO . LOGICAM . ANNOS. VI.  
 DEINDE . ANNOS . XX. PHYSICAM  
 PROFESSVS . EST  
 VIRES . NATVRAE . INGENIO . ACRI . ET  
 SOLLERTI  
 DIVTVRNI . OBSERVATIONIBVS  
 FELICITER . EXPLORAVIT  
 EDITISQVE . LIBRIS . IN LYCEM . PROTVLIT  
 VERITATIS . AMORE . HONESTATE . VITAE  
 CONSPICVVS  
 AMICITIAS . EGREGIE . COLVIT  
 SYMMA . FIDE . BENEFICENTIA . CONSTANTIA  
 VIRO . GRAVI . CORDATOQVE  
 MONVMENTVM . POSITVM  
 VIXIT . ANNOS LXII. MENSES. II.  
 OBIIT . ANNO . R. S. CIO . IO . CC. LXV.

## O P E R A E D I T A :

Due lettere sopra l'ottica del P. Castel. *Extant in ephemeridibus Litteratorum, quas Jo. Lamius edebat, an. 1741. col. 436. 610. 619.*

Lettera al Signore Orazio .... S. in cui si efamina il taglio della macchia di Viareggio. Pisa 1739. per Gio. Domenico Carotti. *Probare nititur fore insalubre, si illa caederetur sylva.*

Risposta Apologetica ad una lettera filosofica sopra il commercio degli olj navigati procedenti da luoghi appestati &c. con l'esposizione e l'efame di essa arricchito di fisiche osservazioni del P. D. Claudio Fromond Pub. Professore di Filosofia nella Università di Pisa. Lucca 1745. Per Filippo Maria Benedini.

Lettera di reconciliazione del P. D. Claudio Fromond &c. e del Sig. Dot. Gentili Medico della Sanità di Livorno. Firenze 1746.

Nova & generalis introductio ad Philosophiam, auctore Claudio Fromond in Pisano Lyceo Philosophiae Professore: Venetiis 1748. typis Josephi Bertella.

Della Fluidità de' corpi, trattato del P. D. Claudio Fromond &c. Livorno 1754. Per Antonio Santini e Compagni.

Examen in praecipua mechanicae principia, Auctore D. Claudio Fromond Cremonensi, Monacho Ca-

maldulensi, in Pisano Lyceo Pub. Physicae Prof. fessore, Regiae Scientiarum Academiae Parisiens. Socio Correspondente, Errantium Firmi, & Physico-Botan. Florent. Sodali. Pisis an. 1758. ex typographia Archiepiscop. apud Joannem Dominicum Carotti.

De ratione philosophica, qua instrumenta mechanica generatim conferunt potentiarum actionibus corroborandis, vel enervandis, Auctore Claudio Fromond Cremonensi Monacho Camald. in Pisano Lyceo Pub. physicae Prof. Regiae Scient. Academiae Parisiensis Socio Correspondente &c. Pisis an. 1759. apud Carotti. *Maxime, & merito quidem, gloriari videbatur Fromondius, quod a Parisiensi Scientiarum Academia habuerit illustre doctrinae suae testimonium, cum an. 1757. ab ea cooptatus fuisset in numerum eorum, qui Socii Correspondentes dicuntur. Ex omnibus enim praemiis laborum, amplissimum est praemium gloria, quae est incorrupta vox bene judicantium de eccellente aut virtute, aut doctrina.*

JULIO MOZZIO

EQUITI ET SENATORI, ET ACADEMIAE

FLORENTINAE PRAESIDI S. P. D.

**N**emo profecto dubitabit, quin in tanta varietate animalium natura homini, ut soli, ingeneraverit cupiditatem cognitionis & scientiae, eique suppeditaverit instrumenta ad verum inveniendum, & ad obtinendam sapientiam. Sed quia objiciuntur saepe oculis formae veri, quae reapse nullae sunt, speciem autem offerunt, easque inconsiderate amplectimur ac fovemus, inde maxime fit, ut optima naturae semina hebescant, ac paulatim oblitterentur. Inducimur etiam in errorem opinionibus vulgi, & sententiis eorum, quos sapientissimos judicamus, atque adeo opinio praejudicata potest, ut etiam sine ratione apud multos valeat auctoritas. His adde pravas consuetudines, quibus facile assuescimus mendaciis, & studia erga populares, sic ut pro varietate regionum variae esse soleant sententiae & dogmata philo-

*sophorum. Germanum interroga, isque solitus jurare in omnia Leibnitii verba, pro certo tibi affirmabit prorsus similia naturam respuere; quod audiens Britannus risu excipiet, quia similitudinem partium multam vim habere ad componenda conjungendaque corpora docuit Newtonus suus. Illi nihil videtur absurdius materie, quae minime constet ex indivisibilibus & inextensis, ut dicitur elementis, & monades suas idcirco extollit; hic somnium putat ab inextenso extensum effici, & materiae omnes proprietates communes esse affirmat illis initiis atque elementis, ex quibus ipsa componitur. Sic attractionis vim Newtoniani omnes in Anglia naturae admodum consentaneam praedicant, contra respuunt Cartesiani in Gallia suis adducti vorticibus, quos ubique, in caelo, in magnete, in exiguis elasticorum corporum particulis videntur sibi intueri oculis ipsis, & propemodum manibus contrectare. Quid? Nonne mirum videri debet in ea, in qua nunc versamur luce de electricis rebus post Franklinii, Becariae aliorumque inventa, tot experimentis confirmata, a Gallis adhuc*

mentionem fieri materiae affluentis & effluentis, quod illius se acerrimum defenso-  
rem Nolletius praestiterit? Omnino tantum  
mores, iudicia, affectus, studia, exempla  
atque usus possunt, ut non modo rerum,  
quae extra nos sunt, sed etiam earum, quas  
insitas & quasi consignatas in animis ha-  
bemus, notitias obscurare possint. Hinc de  
iusto atque iniusto, de officiis, de omnibus  
vivendi praeceptis, de civilibus institutioni-  
bus differunt interdum adeo inter se homi-  
num sententiae, ut ex hac discrepantia con-  
cludi possit, multos versari in summo errore,  
& in maximarum rerum ignoratione. Sunt  
porro artes quaedam, quae rationes dant  
certas & praecepta veri inveniendi, quae  
habent ordinem, & quasdam errare in fa-  
ciendo non patientes vias, sed eae plerum-  
que deferuntur, quod exigunt summum labo-  
rem, & illam difficillimam conjunctionem acu-  
ti ac perspicacissimi ingenii cum bene confi-  
derata, lenta, patienti atque constanti ra-  
tione unam eandemque rem omnesque ejus  
partes diu persequendi. Qui sibi nimium tri-  
luunt praesertim in physicis rebus, & de



*sua vi ac sapientia pene omnia profitentur, meminerint nihil magis officere veritati assequendae quam audaciam, confidentiam atque petulantiam, & in exquirendis rerum naturalium causis idem saepe evenire quod dormientibus, quibus se se offerunt varia visu, quae pro certis habent, quanquam a vero longissime absint. Recordari debes (eramus enim saepe una cum illo) quam pugnaciter Boscovichius noster theoriam suam de naturali philosophia defenderet, quam ab ipsa natura se didicisse, & nihil in physica melius unquam inventum fuisse affirmabat. Irascebatur si quis aliquid illi objiceret, & fore tempus (si superis placebit) praedicebat, quo philosophi omnes tandem veritatis vi convicti suam in sententiam descenderent. Jam gaudebat Jesuitarum omnes scholas personare his vocibus, unicam esse in natura virium legem, quae in magnis distantis attractivae sint, in minimis modo attractivae, modo repulsivae; sic ut quo magis corpora & corporum elementa ad se se invicem accedant, vis repulsiva augeatur, & vel in infinitum usque augeri possit; plures Litte-*

ratorum hominum ephemerides plaussisse huic suo invento; & extitisse hominem Gallum Saurium doctrina physica & mathematica clarum, qui illius fecit explanationem illustrem, retulitque in postremum volumen operis, quod mathesis elementa inscripsit. Quamquam magni ingenii lumen in illa theoria eluceat, sic ut oppugnari, ut & demonstrari non facile illa possit, eundem tamen locum apud sapientiores tenebit attractio Newtoniana, &, quas de ea vir prope divinus proposuit, leges, quasque diligentissimi atque acutissimi physici mirum in modum confirmarunt. Sed ita sumus natura comparati, ut nostris cogitationibus perinde assentiamur, ac si intueremur id, quod nobis in mentem venit, quapropter vere a Cicerone dictum videtur, nihil tam absurdum excogitari posse, quod non affirmetur ab aliquo philosophorum. Nihil tamen minus fuit Boscovichius vir doctrina summa, et animi & ingenii in eo celerrimi erant motus, & ad excogitandum acuti, & ad explicandum ornandumque uberes, & ad memoriam firmi atque diuturni, quibus praesidiis, & prae-

conio suorum adeo famae, cujus cupidissimus erat, vel ab ineunte adolescentia servivit, ut in maxima celebritate atque in oculis omnium vixerit. Quanquam ex mea celebratione nihil illius gloriae addi posse videatur, de ipso tamen semel iterumque scribendum putavi, Italice quidem, ut satisfacerem voluntati Praefidis Societatis, ut vocant, Italicae, Latine, ne deessem instituto meo exponendi in hoc opere vitas excellentium virorum, qui nostra, patrum majorumque memoria floruerunt. Qui utrumque scriptum contulerit, facile judicabit, me non actum egisse, quod vetamur veteri proverbio; si vero tu ita senseris, me non frustra operam consumpsisse, gaudebo, vel potius gloriabor judicio tuo. Ita enim excellis & maximarum rerum doctrina, & scribendi elegantia, ut elegantium Etruscorum non dubitem te praedicare doctissimum, & doctorum elegantissimum. Vale; & quod filio nuperrime avus sis, tibi ex animo gratulor, & Deum precor, ut illum diu sospitem servet, quo aemulus & imitator paternorum studiorum esse possit.

Pi<sup>6</sup>s Non. Sext. MDCCLXXXVIII.

## ROGERIUS JOSEPHUS BOSCOVICHUS

**H**omini Ragusino in pinacotheca Italorum locum iterum (1) dare minime dubitamus, quod is in urbe Italarum principe altus educatusque est, quodque ex ea praesertim fructus percepit amplissimae gloriae, qua immortalitati est commendatus. Is est Rogerius Josephus Boscovichius, cujus magnum est nomen in nostrae aetatis mathematicis, & quo amico & praeceptore vel a prima adolescentia gloriati sumus. Natus ille est xv. Kal. Jun. an. MDCCXI. patre Nicolao, homine tum copiis, tum liberis abundante (sex enim ex Paulla Beterra susceperat masculini sexus, quorum natu minimus erat Rogerius, tres feminini) qui Ragusam concessit ex vicinis regionibus Turcarum ditioni subiectis, eorum avaritiam immanitatemque declinandi causa.

---

(1) Extat in vol. xv. vita Gorgii Baglivii.

Civitate donatus eos obtinuit honores, qui in Aristocratia secundi putantur, cumque eniteretur, ut neque amicis, neque etiam alienioribus deesset opera, consilio atque pecunia, facile multorum benevolentiam atque gratiam sibi conciliavit. Bene etiam de Republica illum meritum esse existimabimus, quod suos sic instituebat liberos, ut aliquando illi ornamento essent futuri. Horum natu maximus Petrus plurimum ingenio valebat, sed is e vita decessit, cum primum servire Reipublicae, & nobilissimi scriptoris famam consequi coepit. Quam excellens esset poeta Latinus Bartholomaeus, ex iis elegiis, quae cum Caroli Rotii aliorumque carminibus saepe editae sunt, intelligi potest. Elegantia enim ac stili nobilitate Propertianas aequant. Vel ipsas feminas in hac familia matre Musa natas dixisses (1), quibus exemplis excitatus Ro-

---

(1) *Haec ille in animadversionibus ad lib. iv poematis de solis ac lunae defectibus. Circumferuntur satis multa elegantissima carmina Petri fratris, quem an. XXII. aetatis suae amisimus, incredibilis juvenis spei, iater quae versiones plures & Ovi-*

gerius ipse, magna a pueritia spectavit. Sic illum tenebat humaniorum litterarum amor, ut nihil acius, & cum Jesuitarum scholas frequentaret, & illustriorum facta & scripta curiose conquireret, nomen dare illorum familiae statuit. Ea propter Romam venit autumnato. MDCCXXV. & itineris socios habuit ipsos praeceptores Bindium & Stephanium, ac Bartholomaeum fratrem, qui duodecim annos ante in ipsam familiam adscriptus fuerat. Tyrocinium ita transegit, ut adolescens, qui Deo mature parere didicerat. Hoc peracto, renovavit studia rhetorices, Scapecchio magistro, cujus scripta & praecepta omni turpitudine superioris saeculi foedata esse videbantur. Feliciori successu audivit in philosophia Carolum Nocetum, qui tamen magis Latina poesi, quam philosophica doctrina commen-

---

dii ex Latino, & Molierii ex Gallico Illyricis versibus conscriptae celebrantur. Impressa sunt ante hosce duos annos Annae sororis adhuc viventis Illyrica carmina Venetiis, quae itidem satis bene excepta sunt a nostrae linguae cultoribus.

dandus est. Teruntur omnium manibus ejus poemata de Iride & de Boreali Aurora, quae saepius edita sunt, sed nunquam melius, quam cum Boscovichius ex discipulo magister factus suppeditavit Noceto illa omnia, quae pertinent ad recentiorē physicā. Quauquam cogeretur non sorbere modo, sed etiam concōquere quae magister Peripateticus proponebat, obversabatur tamen ejus animo species quaedam veri, quae omnino tenuit eum, postquam mathematicis studiis operam dare coepit. Nocetus quaedam in logica tetigerat, quae ad geometriam pertinebant. Horum per se quaesivit demonstrationem Rogerius, & quod sane miraberis, vel eam invenit, quae quadratum hypotenusae aequale esse probat cathetorum quadratis. Quo invento laetus non potuit se continere, quin idem, quod Archimedes ob deprehensam mensuram argenti auro mixti exclamaret, inveni, inveni. Ex eo tempore noctes & dies animus illius concitavit desiderium famam colligendi ex mathematicis disciplinis, & currenti jam calcar addebant illa Noceti praeceptoris:

*Quare agite, o juvenes, magnarum semina  
rerum*

*In vobis fortasse latent; haec pectore toto  
Excolite, & solidas jamdudum extundite fruges;  
Ac magnos superate senes. Nam quis timor uni-  
quam*

*Impediat, vel qua coeat formidine sanguis;  
Ut quod avis licuit, desperent posse nepotes?  
Nunquid ut effoetae torpent ad gramina terrae,  
Partibus amittit vires natura ferendis,  
Nascimur aut homines aliud genus? Addit  
easdem*

*Particulas nobis divinae mentis, & ignes  
Aetherios, patribus quondam quos larga vetustis;  
Nec si olim mater, nunc est natura noverca.*

Non adhuc logices curriculum confecerat;  
cum industria singulari sibi comparaverat pro-  
priam geometriam, & quos gradus ejus in hac  
re inventa habuerint, ex iis cognosces geo-  
metriae elementis, quae postea ab ipso in lu-  
cem sunt emissa, quibus sane nihil facilius,  
nihil compendiosius (totam enim geometriam  
ad XIV. capita, sive, ut loquimur, proposi-  
tiones reduxit) nihil elegantius, nihil ad  
exerc-



exercendos per se ipsos adolescentes, quod maximi momenti in hujusmodi studiis esse putabat, in rerum geometricarum demonstrationibus magis idoneum excogitari potuit. Res percubuit, & in ore atque in sermone omnium coepit esse adolescens, qui non excurrere, sed evolare videbatur. Secundo philosophici stadii anno cum ex consuetudine majorum scholam matheseos ingredi debuisset, quam regebat Horatius Burgundius, brevi eo progressus est, ut magister ipse mirabundus exclamaverit: *iste passis velis ab eo loco solvit, quo vix mihi pervenire contigit*. Diu frustra quaesierat Burgundius solutionem, ut dicitur, irreducibilis casus, & quod sperabat majus aliquid posse effici a discipulo, ad eandem rem investigandam ipsum invitavit. Plurimum in ea laboravit Rogerius, ut aliquando quod volebat se obtinuisse putaverit. De quo cum scriberet ad Bartholomaeum fratrem, qui tum Perusiae philosophiam docebat, ab eo sapienter sane admonitus est, ne frustra tempus tereret in quaerendis rebus, quas assequi non possumus, & ingenii sui magnitudinem ad utiliores usus adjungeret. Multa

praeterea commemorarem, in quibus se exercuit Rogerius, Burgundio auctore, si eorum utilitas ad nos pervenisset. Adjuvabant quidem ad exercendum ingenium in geometria, nec sane melius fieri a praeceptore potuit, quam ut invitaret acutissimum discipulum ad dilatanda atque explicanda quaedam, quae coarctaverat, & peranguste refererat in *principiis suis* ille philosophorum quasi Deus Newtonus, quaeque ipse, non satis a geometria instructus, assequi minime poterat. Tulit fastidium Rogerius, cum principio haereret in multis, postea cum in familiaritatem, ut ita dicam, Newtoni venisset, generaliores & simpliciores quasdam demonstrationes invenit, in eo praesertim quod pertinet ad gravitatem universorum corporum, quibus postea feliciter usus est, ad astronomiam sectiones conicas traducens. Accidit in iis disputationibus, quae privatim & publice habebantur a Jesuitis, in quibus unus eminuit inter omnes Rogerius, ut ipse defendere debuerit quaedam praeceptoris dogmata de maris aestu. Quo studiosius ab ipso abscondebantur quae hac de re didicerat a Newtono, ne a Burgundio cete-

risque Peripateticis, qui dominabantur in scholis, dissentire videretur, eo magis apparere. Burgundius, quasi subito emerfus e diuturnis tenebris, vehementer se assentiri discipulo dixit, ceteri obstinatiores veritatem converterunt in culpam, quod credendum esse agebant veteribus & priscis philosophis, neque ferendos, qui in philosophia aliquid novandum putabant. Nihilominus tamen quod laudatio Burgundii atque auctoritas magni erat momenti apud Nocetum, quo duce, illas disputationes Rogerius habuit, neque eum deseruit, nec quicquam eorum petulantiae, qui illius studia improbabant, concessit. Confecto philosophiae cursu an. MDCCXXXII. grammaticam, ut mos Jesuitarum erat, docere coepit. Docuit primo Romae, mox per triennium, quia in ea urbe gravissime aegrotaverat, Firmi, unde exeunte an. MDCCXXXVI. Romam rediit, ut eas litteras publice traderet, quibus exculti jam grammatica ad humanitatem informari solent. Quod Romani caeli aspiratio ei gravis erat, periculoso iterum morbo tentatus est, ex quo non convaleuit nisi autumnis an. MDCCXXXVII. Post

id tempus satis prospera usus est valetudine ; ut longum vitae suae cursum in labore corporis, & in animi contentione conficere potuerit. Mirum vero videri debet summum ingenium Rogerii quadriennium & amplius tulisse grammaticorum tricas, & magnam habuit majoribus gratiam, cum se ad pertractandos poetas vocarunt. Mirifice enim delectabatur Musis, & tam facilis & expeditus erat ad condenda Latina carmina, ut illa etiam ex tempore funderet. Quia magistri munus postulabat, ut in instauratione studiorum humanitatis aliquid perfectum ingenio elaboratumque industria proferret, dixit carmen, quod postea in poema excrevit, de solis ac lunae defectibus, cui a cuncto confessu plausus multiplex fuit datus. Eodem illo anno, quod ejus schola discipulorum nobilitate florebat, illis recitanda dedit carmen, oden, elegias, epigrammata, & id generis alia de Turcarum excidio (omnes enim boni vota faciebant, ut bellum, quod adversus illos a Caesare susceptum erat, prospere eveniret) illaque picta & polita fuisse omnibus artis coloribus judicatum est. Haec studia atque exer-

citationes minime imminuebant aliquid de ardore, quo ferebatur ad mathematicas disciplinas. His enim tantum temporis concedebat, quantum relinquebatur ei a publico munere; & dum Firmi erat, quaedam ad Burgundium misit, quae hic discipulis suis defendenda proposuit; dolens fortasse quae ipse sero, quae leviter arripuerat, summo studio ab adolescente percepta fuisse. Quod ex majorum instituto post quinquennalem scholam danda Rogerio opera erat Theologiae, ita satisfecit officio suo, ut omnes diligentiam & ingenium admirarentur; sed quia saepe redibat ad mathematicas disciplinas, quas amores suos appellare solebat, vehementer reprehensus est a Timonio, cujus summa erat apud suos auctoritas. Nil enim ille probabat, nisi quod noverat, & nihili ducens existimationes & iudicia posterorum, eum primum esse iudicabat, qui copiose & acute disputare potuisset de scientia, ut loquuntur, media, de probabilismo, & de ceteris hujusmodi quaestionibus, quibus nec mentes aluntur, neque mores conformantur. Nondum Rogerius, degens in Seminario Romano, absolverat Theologicorum

studiorum curriculum, cum jussus est, raro sane exemplo, in Burgundii locum matheseos scholam regere. Tum in suo regno se esse putavit, & amplissima, quae sibi comparaverat praesidia tum ad discipulorum utilitatem, tum ad scholae ipsius ornamentum & decus, luxerunt adeo, ut non solum aequasse, sed etiam vicisse superiorum magistrorum gloriam merito judicaretur. Illa, quae dicuntur matheseos elementa, quibusque utebatur ad erudiendos discipulos, serius in vulgus edidit. Complexus est binis voluminibus geometriam planam, arithmetica vulgarera, geometriam solidorum, trigonometriam cum planam, tum sphaericam, & algebram finitorum, & haec vulgavit Romae an. MDCCLII. biennio vero post III. volumen in lucem emisit, in quo omnem de sectionibus conicis doctrinam exposuit. Nunquam satis horum scriptorum subtilitas atque elegantia laudari potest. Ita nexa & structa sunt, quae ad geometriam pertinent, ita paucis universa haec scientia comprehensa, ut qui haec semel cognita habuerit retinere, & si ingenio valeat, relictas partes per se explere facile possit. Neque de utraque trigono-

metria secus judicaveris. Vere enim gloriabatur Rogerius ita concinne omnia in iis esse distributa, ut quidquid aut addere, aut mutare, aut detrachere voluisset, deterius futurum fuisset. Verum quia eminent maxime, quae ad sectiones conicas spectant, haud pigebit plura de iis dicere. Mirus est nexus rerum, & deductio ex unica definitione ad proprietates omnes, quae sponte se se ostendunt vel iis, qui ad illarum intelligentiam a mathesi minus habent instrumenti. Hujusmodi est definitio: *si ex diversis punctis cujuscumque lineae ducantur perpendiculares ad rectam quamcumque indefinitam positione datam (directricem hanc vocat) & aliae rectae ducantur ad datum punctum quemcumque extra ipsam indefinitam (ideest focum) erunt semper in ratione data.* Hanc lineam sectionem conicam appellat, ellipsim, parabolam, vel hyperbolam, prout illa ratio fuerit minoris inaequalitatis, aequalitatis, vel majoris inaequalitatis. Tali modo retinet vetera Graecorum nomina, sed quae ex cono aliisque mechanicis instrumentis petebantur, ipse in plano felicissime invenit. Ex hac definitione,

quam ceteri aut neglexerunt, aut non satis animadverterunt, quia prima fronte videtur esse sterile quoddam theorema, mirum est quae & quanta, docente Rogerio, profluant. Ejus opus facile assimilaveris magnae arbori, in qua ex unico trunco exsurgant rami, e ramis ramusculi, e ramusculis furculi, e furculis frondes, & ex his flores & folia. Ne quid perfectioni operis deesset, postquam Auctor sectiones conicas in plano quaesivit, in cono etiam investigavit. Mirabile inter cetera est scholion illud, ex quo patet, quod si secetur conus mobili plano & certa quadam ratione, sectiones continuo aliam in aliam transformari, & vel in rectam, quo posito, singulari acumine investigat omnia ea, quae pertinent ad cylindrum, sphaeroides atque conoides parabolicas & hyperbolicas. Quod in universo opere mirabiliter se produnt hae geometricae transformationes, separatim de iis, ut & de quibusdam infiniti mysteriis agendum putavit, ut viam sterneret illis, qui sublimiores curvas noscere, & algebrae secreta penetrare augebant. Dolendum sane Rogerium in his elementis pertractandis non descendisse ad ac-



quationem illam ellipsis, cujus maximus est in astronomia usus. Praeterit hoc ipsum Hospitalius, ne dicam de minoribus sectionum conicarum scriptoribus, sed ab hominibus, quorum eminuit doctrina & ingenii acumen, id non modo postulari, sed etiam propter summam rei utilitatem exigi posse videbatur. Vel antequam haec vulgaret Rogerius, in lucem venerant cum Andreae Tacqueti trigonometria plana, ejusdem trigonometria sphaerica, & dissertatio de cycloide & logistica. Quantum sit harum linearum curvarum usus in mechanica, in arithmetica & trigonometria, nemo vel mediocriter doctus ignorat. Expediebat igitur earum proprietates noscere, idque summi praestiterunt mathematici, unaque cyclois plurimorum ingenia diu torfit, & exercuit. Narrat diligentissime Rogerius quem cursum hauduerit singulorum industria, quid in controversiam, aut disceptationem vocatum ab iis fuerit, quid inventum, quidque eorum inventis se addere posse putaverit. Unica enim & prorsus nova demonstratione exhibet tum perimetri, tum areae dimensionem, eandemque curvam lineam sui ipsius evolutione gigni

confirmat. Attigit etiam nonnulla, quae plurimum mechanicam adjuvant, & si conferes scripta hujusmodi Rogerii cum aliis multis, quae tota in geometriae elementis explicandis versantur, facile intelliges quid inter summos & mediocres viros intersit. Vel ea, quae non meliora tibi esse videbuntur, condita esse jucundius facile judicabis. Nec vero ei unquam materia deerat, ut quotannis exerceret discipulos suos in defensione earum rerum, quae in reconditori mathefi versabantur. Ex quo summa extitit non modo utilitas, sed etiam gloria, cum omnes admirarentur nullum esse tum in astronomia, tum in physica, tum in geometria locum adeo reconditum, quo Boscovichii industria pervadere non posset. Quod per has dissertationes illustris & pervagata ejus fama fuerit, minime pigebit nonnullas recensere. De solis maculis, quas ab ipsius solis atmosphaera nubes veluti quasdam efficiente repetit, & de mercurio solem trajiciente, quod phaenomenon accidit an. MDCCXXXVI. III. id. Novembris ante meridiem, ita differuit, ut ejus dicta rationibus, observationibusque illustriorum astronomorum maxime conspectanea

fuerint. Observatio mercurii eo valuit, ut nodi locus, quod in planetae cujusvis conversione praecipuum est, cognosceretur. Quia vero diligentia cum in omnibus rebus, tum in astronomia plurimum valet, & haec praesertim adhibenda est in instrumentorum usu, quantum illam coluerit Boscovichius, ex dissertatione *de novo Telescopii usu ad objecta caelestia determinanda* conjici poterit. Copiosa, sed paullo abstrusior disputatio fuit de Aurora Boreali, cui causam dedit Borealis Aurora longe maxima, quae apparuit an. MDCCXXXVII. XVII. Kal. Jan. Fuit enim luce tanta, ut terram combustura videretur. Valde assentiebatur Mairanio, qui ejus, ut ceterorum omnium hujusmodi phaenomenorum, causam assignandam arbitrabatur atmosphaerae solari versus terram decidenti. Sed dissidebat ab eo in dimetienda altitudine, quae major apparebat ex calculis Boscovichii, qui in sua supputatione rationem habuit vis centrifugae ortae ex conversione atmosphaerae solaris circa ejus axem. Quantum multa sint in physica & gravia & utilia accurate copioseque a philosophis disputata, latissime tamen tum patere videbantur ea, quae

ad telluris figuram pertinebant, atque haec quaestio tum communis erat omnium philosophorum: Binas de iis dissertationes conscripsit Rogerius, quarum altera exposuit veterum argumenta, quibus non satis recte utebantur ad probandum terram sphaericam esse (ex iis enim nil aliud conficitur nisi arcuatam esse atque globosam) altera quid ex recentiorum vel hypothesebus, vel observationibus erui posset ad illa infirmanda. Prorsus id se confecisse putavit Rogerius, nihil esse quod evincat tellurem, quae ad sensum sphaerica est, vel protrahi ad polos, vel comprimi, & nihil ex ejus figura ad motum ejusdem suadendum elici. Ceteri, qui consecuti sunt philosophi, & recentissime etiam magni nominis mathematicus Placius (1), quamvis acutissimi & diligentissimi fuerint hujus figurae investigatores, quam ellipticam esse multis de causis suspicantur, nihil tamen statuere potuerunt, quod non incurrat in aliquam diffi-

---

(1) *Memoires de l' Acad. des Sciences* an. 1772. II.  
Part. p. 536,

cultatem. Elegans est dissertatio *de circulis osculatoribus*, qua efficitur, ut eorum naturam non solum animo contemplari, sed ipsis prope modum oculis videre possimus. Via enim Euclideae traducuntur ii ad conicas sectiones, unde ad ceteras lineas curvas gradu facto, breviter explicat Auctor quid de omnibus sentiat, & qua ratione uti iis possumus in methodo infinitorum. De qua methodo sic postea disseruit, ut quamvis synthesi in primis valeret, eamque maxime excoleret, & eam in primis exercendam esse censeret, pervasisse tamen ad reconditoris algebrae penetralia videatur. Profecto, etiam si nulla esset utilitas ex mathematicis disciplinis, tamen ipsae propter se ipsas diligerentur, cum in ceteris studiis umbram quidem & imaginem veri, in his ejusdem expressam effigiem intueamur. Cum vero ipsas traducimus ad physicas res, nihil invenimus firmitus quod teneamus, quam quod illa suadent, idque ut perspicuum esset discipulis suis, tribus dissertationibus complexus est Rogerius, quae *de motu corporum projectorum in spatio non resistente*, *de viribus centralibus*, & *de inaequalitate gravitatis in diversis terrae locis* traduntur a receptoribus

philosophis. Horum inventa non modo illustravit, sed quaedam praetermissa ab iis, quaedam obscure levitorque tacta aut supplevit, aut novis argumentis confirmavit. Ne quis vero abuteretur subsidiis, quae ab analysi suppeditantur, unum proposuit exemplum ex Euleri mechanica de transformatione curvarum in rectas (1) aperuitque quid esset illud, quod tantum virum inducere in errorem potuit. Quae differuit in schola *de motu corporis attracti in centrum immobile, viribus decrefcentibus in ratione distantiarum reciproca duplicata in spa-*

- (1) *Eulerus Tom. I. Mechanicae par. 762. affirmavit: si vires sint in ratione distantiarum reciproca triplicata, vel majore, delatum ad centrum debere nusquam amplius reperiri, sed quasi subito annihilari, valore nimirum formulae, quae distantiam exprimit post appulsum ad centrum abeunte imaginarium sive impossibile; si vires sint in ratione minore quam triplicata, sed non minore quam simplici, corpus pariter delatum cum infinita celeritate debere cursum retro flectere: & solum ubi vires sint in ratione minus quam simplici, debere appellere cum velocitate finita, & ultra progredi.*

*tiis non resistentibus, & de viribus vivis relata fuerunt in Acta Academiae Bononiensis, cui ipse erat adscriptus. Iis quidem temporibus quaestio longe maxima putabatur, quae erat de virium vivarum mensurandi ratione, quaeque illustriorum mathematicorum ingenia diu exercuerat. Certandum & sibi putavit Rogerius, sed ita, ut hanc controversiam vel componendam, vel dirimendam, vel potius omnino tollendam esse contenderet. Vires enim vivas in natura nullas esse affirmavit, easque esse inutiles ad explicanda phaenomena, quae a sola mobilitate pendent, ut haec a vi inertiae, & a causis, quae ejus statum mutant. Omni-  
no, ait Auctor, si rite notetur series tota velocitatum, quae generantur, vel extinguuntur a mortuis viribus, sive a potentiarum actionibus, computando ipsarum incrementa, vel decrementa a vi, quae agit, & tempore, quo agit, habebitur omnium phaenomenorum determinatio, adeoque & explicatio. Hanc ipsam dissertationem primum editam an. MDCCXLV. cum misisset Rogerius ad Mairanium, de quo supra mentionem fecimus, & in hac ipsa quaestione exercitissimum, rescripsit ille se prorsus proba-*

re ejusdem sententiam, ac brevi fore, ut philosophi ab hujusmodi controversia abstinere, de qua cum pluribus verbis, quam opus esse videretur, ut pote de nominis quaestione, postea disputasset Franciscus Zanottus, tantum & ipse tribuit huic dissertationi, quantum tribuere veritati necesse erat. Quae revera in natura existant dominanturque vires, quid agant, quibusque legibus subjectae sint, & quomodo mensurandae differuit postea Rogerius separatim, & illud omnium corporum tum terrestrium, tum caelestium naturale principium, gravitatem scilicet optimo in lumine collocavit. Quidquid docet, docet feliciter, & mirum omnibus videri debet solvi ab eo synthesis ope problemata, quae illi impervia esse videbantur. Cujus rei ut unam rem exempli causa afferamus, solutionem commemorabimus problematis mechanici de solido maximae attractionis, quod ea admirabiliter laudata sit a Montignio, qui ad eam Rogerium ipsum invitaverat. Ceterum dum explicat virium theoriam, fortasse plus aequo sibi plaudit, quod & ipse aliquid confingere potuit, quo nihil evidentius esse putabat, adeo faciles sunt homines ad ea probanda, quae ipsi



ipsi invenerunt. Bene posuisse videbantur Newtoniani dogmata sua de gravitate, tum in magnis, tum in parvis distantis, de quibus sic differuit Boscovichius, ut quae in iis corrigere se posse putavit, deteriora fecerit. Nam ex illius sententia lex virium in majoribus distantis accedit quam proxime ad rationem reciprocam, ut loquuntur, duplicatam distantiarum, in minimis vero ab eadem recedit in immensum, atque exponitur ab eo per curvam quamdam, cujus postremum crus accedit ad curvam gravitatis Newtonianae quam proxime, in minoribus vero distantis contorquetur circa axem, & in minimis exhibet repulsionem auctam in infinitum, ubi in infinitum distantiae decrescant. Ilinc, si ipsum audis, gravitas est tantummodo quidam ramus legis generalis virium, a qua unica lege repetenda sunt omnia naturae phaenomena, omnes corporum proprietates, & omnes motus. Quae pluribus in dissertationibus tanquam semina quaedam hujus doctrinae sparserat Boscovichius, paullo latius dilatavit postea, cum una alteraque dissertatione de lumine egisset. His praesertim gloriabatur, invitabatque om-

nes ad illarum dogmata propugnanda, quin immo irascebatur, si quis aliquid iisdem opponeret atque objiceret. Jesuitae soliti admirari omnia ea, quae a suis prodibant, compleverant scholas hocce Boscovichiano systemate; & quoad ipse vixit illud pugnacissime defendit, perinde ac si ab eo vox naturae exprimeretur. *Prorsus mihi persuasum est*, aiebat ille, *extensionem accurate continuam, & soliditatem ac impenetrabilitatem ex immediato contactu ortam non esse absolutas materiae & corporum proprietates, ut illas nullo modo esse proprietates ipsorum arbitrer. Censeo igitur materiam omnem & corpora constare punctis prorsus indivisibilibus & inextensis, quae puncta semper a se invicem distent aliquo intervallo, quod imminui possit in infinitum, sed auferri non possit sine compenetratione punctorum. Haec puncta puto praedita esse a natura viribus quibusdam, quae in minimis distantibus cogant ipsa a se invicem recedere, quas idcirco repulsivas appello, & quae, imminutis in infinitum distantibus, augeantur in infinitum, auctis autem distantibus, minuantur, donec in quadam di-*

*stantia, adhuc tamen perquam exigua, nullae sint, tum directione mutata ad accessum determinent, & attractivae dicantur, ac crescant itidem & decrescant, ac plurimis vicibus directione mutata, migrent ex attractivis in repulsivas, ac viceversa: exponantur nimirum per ordinatas ad curvam lineam, cujus abscissae exprimant distantias, & prout illa curva axem in pluribus punctis secans ordinatarum suarum directionem mutet, mutetur & virium directio. In hujusmodi disputatione dicendi assiduitas aluit confidentiam, fiebatque ut & suorum & sui judicio dignus putaretur, qui novam conderet physicam. Sed antequam de iis dicamus, quae postea vulgavit ad suam comprobendam ac dilatandam sententiam, dicendum videtur de aliis illius scriptis, quibus cognitis, facilius rationem & viam, quam in suis studiis tenuit, considerare poterimus. Ex quo tempore coepit mathematicis rebus operam dare, erexerat animum ad excolendam astronomiam, & quod maxime admirabiles sunt annui motus, sive aberrationes illarum stellarum, quae fixae vocantur, & quod ex iis maximum argumentum eruitur ad*

suadendum telluris motum, de ipsis ita disseruit, ut satisfecerit & astronomis, & illis; qui, neglectis observationibus & rationibus, se religione obstrictos putant, ut terram quiescere affirmant. Etenim ne hos irritaret suam quamdam rationem proposuit, qua omnia phaenomena, quae se se moventi telluri tribuimus, vel ipsa quiescente, explicari possent (1). Ipse & locos alios gravissimos ex

---

(1) *Hanc suam sententiam hisce verbis exposuit in supplementis ad lib. 1. Philosophiae recentioris a Benedicto Stajo versibus traditae. Sit vis inertiae non absoluta, sed respectiva respectu spatii cujusdam, quo tellus & astra omnia includuntur, ac maneant cetera omnia, quae a quibusvis recentioribus philosophis, ut Newtonianis, requiruntur, & id spatium aliquando quiescat, habebitur absolutus telluris motus, quem ipsi Newtoniani requirunt. Incipiat jam illud spatium moveri motibus omnibus contrariis, & aequalibus iis, quibus movebatur tellus, tellus ipsa respectu ejus spatii perget moveri eodem modo, ac prius, sed is non erit motus absolutus. Omnino absolute quiescet ab ipso spatio mobili retracta tantum, quantum intra ipsum spatium per reliquas vires progreditur, quae absolutum ejus motum non gignent, sed ejus translationem impedient. Vide etiam Dissert. de maris aestu.*

astronomia, postquam de ea in universum & de observationibus rite instituendis, & de lentibus & telescopiis dioptricis disseruerat, tractavit. Egit enim separatim *de cometis, de determinanda orbita planetae ope catoptricae ex datis vi, celeritate ac directione in dato puncto*, qua sane dissertatione nihil elegantius fieri potuit, *de methodo a se excogitata adhibendi phasium observationes in eclipsibus lunaribus, de lunae atmosphaera, de aestu maris, de subtilitate solaris lucis*, atque hujus generis aliis. Quaedam vero, quae anguste refererat in his dissertationibus, dilatavit postea, novisque aut argumentis, aut observationibus confirmavit. Nam quoties ei se se occasio obtulit, ut prudenter posset intexere in iis, quae postea elucubravimus, operibus, quae in schola disseruerat, aut de iis mentionem faceret, nunquam illam dimisit(1).

## V 3

---

(1) Hoc praesertim praestitit in iis v. voluminibus, in quibus collegit opera pertinentia ad opticam & astronomiam.

Nobilitatus cum jam ipse esset multitudine & praestantia rerum editarum, & praeconiiis praefertim suorum, qui neminem illi parem ponebant, consulebatur, adhibebaturque Romae in omni re, quae ad mathesin quomodocumque pertinebat. Diximus alias (1) de controversia sane acerrima, quae in ea urbe fuit propter metum ruinae Vaticanæ tholi. Rogerius in ea sententia fuit vitium ab illo factum fuisse, atque huic ferreo circulo consulendum, eamque ut probaret, bina edidit scripta. Oppugnarunt alii, ac praesertim Bottarius & Ravilliasius, & in discrepantia voluntatum & scriptorum de iis rogatus est magni nominis mathematicus Joannes Polenius. Convenit inter illum & Rogerium de cingendo tholo ferreo circulo, sed hic de Polenio justam se querendi causam habere putavit, quod a se surripuerit inventum illud geometricum, quo probatur ferrum in orbem circumactum sex amplius agere, quam si ad perpendicularum insisteret. Haec querela diffuit a-

---

(2) *In vita Joannis Polenii Tom. XII,*

micitiam, quam similitudo studiorum contraxerat, quanquam affirmaret Polenius de se male existimandi se nihil loci Rogerio dedisse. Inter haec alia plurima geometrica in lucem emisit, quibus locus datus est in ephemeridibus Litteratorum, quae a Fratribus Paleariniis Romae vulgabantur; & quae problema solvunt de hora maximorum & minimorum aestuum, quod & solverat Daniel Bernoullius analysis ope, & quae methodum docent elevandi infinitonum ad quamcumque potentiam, maxime laudata fuere ab harum disciplinarum cultoribus. Cum vacabat a schola, & in Tiburtinam, vel in Tusculanam villam recreandi animi causa concedebat, nunquam erat otiosus: conquirebat monumenta antiquitatis, & de quibusdam, ut de horologio solari quodam, & de Aegyptio obelisco, qui solis umbras, ac dierum noctiumque magnitudines indicabat, sententiam suam explicavit. Cum vero vel in otio redibat ad studia sua mathematica & astronomica, tanta erat contentio animi, ut aliquando in ipsa villa Tiburtina ortum incendium, ex quo omnes effugiebant, ipse, veluti alter Archimedes, qui habens animum occupatum in pulvere mathe-

matico ignoravit patriae direptionem, quasi quodam aestu ingenii procul a terra abreptus minime senserit. Mirum vero videri debet virum, qui pervaserat adeo ad abstrusiora mathematicarum disciplinarum, nihil abnuere solitum fuisse studiis eorum, qui aliquid in iis proficere cupiebant. Contempsit enim semper eos, qui trifiti & recondita natura ita student litteris, ut sibi soli sapiant. Omnino videri volebat se esse unum hominem ad morum, sermonum, ac voluntatum omnium, cum quibus vivimus, varietatem accommodatissimum, & nihil magis velle, quam inservire communi utilitati. Expri-menda tum illi fuerunt, quae videbantur verosimiliora de aere, cum de turbine rogatus esset dicere, qui magna Romae ejusque agro importaverat detrimenta. Quaesivit etiam ab illo, qui Arcadum Academiae praeerat, ut uberius & planius, collegas suos docendi causa, explicare vellet, quae Nocetus de Aurora Boreali versibus Latinis cecinerat, statimque Rogerius detulit ad eorum coetum Dialogos v. Italice scriptos, in quibus erant sententiae ad probandum accommodatae & verba ad audiendum jucunda. Mairanius ipse & hos dialogos & cetera, quae



exaravit Rogerius ad explanandas Noceti, vel potius sui ipsius sententias, adeo probavit, ut cum secundo edidisset suum opus de Boreali Aurora, nihil illis potuisse fieri melius judicaverit, sibi gratulatus sit, quod cum tanto viro consenserit (1). Quod iudicium alio quoque cumulavit. Obtinuit enim ab Academicis suis Parisiensibus, ut Rogerius unus ex iis esset, qui *Correspondentes* appellantur. Laudes & tribuit magnas in illo ipso opere Mairanius Dissertationi Rogerii de Lunae atmosphaera, ex qua una conjici posse affirmat, quam doctus physicis esset, & quam exercitatus in astronomia; ac prorsus assentiri videtur eidem, si Luna atmosphaeram habet, hanc dissimilem esse terrestri, talem denique, quae aquam, minime aerem imitetur. Nec minorem laudem consecutus est Rogerius ex iis, quae de iride ad illustrandum alterum Noceti poema breviter exposuit. Quae de angulo maximo & minimo iridis, secutus

---

(1) *Vide Traité physique & historique de l'Aurore Boreale, seconde edition. Paris 1754. pag. 304.*

Newtonum, attulit, separatim etiam edidit in ephemeridibus Palearinianis, quod gestiebat palam omnibus facere quantum in matheſi valebat. Facile enim potuit eas omnes de iride formulas demonſtrare, quas tantummodo indicaverat Newtonus ipſe. Ab hoc vero diſſentit, ut et a Lipſienſium Aëtorum Scriptoribus in eo, quod ille a Marco Antonio de Dominis, hi a Keplero ſurripuiſſe Cartesium explicationem hujus ipſius phaenomeni affirmaverint. Galli, qui Cartesio maxime gloriantur, plauserunt Rogerio, quod a tanto viro furti ſuſpicionem amoverit. Quapropter in illis ephemeridibus, quae Sapientum appellantur, non de hoc modo opere, ſed & de ceteris fere omnibus a Rogerio vulgatis honorificentiffime judicarunt. Miſit idem aliquando ad Pariſienſem Academiam ſcriptum de erroribus Jovis & Saturni, ad quod pertractandum argumentum praemio ipſa excitaverat celebriores aſtronomos. Obtinuit illud Eulerus, quanquam pronuntiaverint Academici non minus ſatiſfeciffe propoſito argumento Rogerium. Verum quia non providerunt, ut eſſet unde par pari referretur, doluit id ve-

hementer Rogerius, deliberavitque se non amplius in hujusmodi curricula descensurum. Quod & fecit, praesertim cum illi fors satis amplum in Urbe terrarum principe dedisset campum, in quo ejus ingenium excurrere, cognoscique posset. Hic

..... *quem sidera mundi,  
Vires, mensuras, rationes, pondera rerum,  
Et numeros audit pubes Romana docentem* (1)

ita de se praedicari ac nominari volebat, quasi de uno homine, qui restituerat suis rationem veram philosophandi, quam consuetudo vitiosa detraxerat. Quapropter pollicebatur omnibus sibi magnae curae fore, ut Jesuitae non tam mathematicarum & physicarum rerum studiis, quam ceteris facultatibus celebrarentur. Et ei jam nihil noceri poterat ab obstinationibus Peripateticis, cum illius studia probarent maxime qui ad Catholicae Ecclesiae gubernationem

---

(1) *Stajus Philosoph. Cart. lib. v. pag. 256.*

cula sedebat Benedictus XIV. & ille omnis liberalis artis fautor eximius, quo praesertim Pontifex utebatur in administratione Reipublicae, Cardinalis Sylvius Valentius. Pervenit ad horum aures Rogerium cogitare Americam (1), ut eum meridiani circuli gradum metiretur, qui sibi ad quaestionem de forma terrae dirimendam (non enim poterat in alio-

(1) *Rem ita narrat Boscovichius ipse in nota quadam lib. IV. de Solis ac Lunae defectibus.* Petierat Lusitaniae Rex Joannes V. decem e nostra Societate mathematicos a nostro supremo Praeside, Praepositum Generalem appellamus, qui in Brasiliam navigarent, & mappas delinearent regionum cum Hispanis commutandarum, ac limites definirent: ego me ad id opus obtuleram ei, qui Regium Legatum agebat tum Romae apud Pontificem, eratque itidem e Societate nostra, ea conditione, ut mihi simul liceret metiri meridiani gradum, quem cum Quitensi conferrem definito paullo ante a Parisensibus Academicis; & quidem non solum annuerat ipse, sed facultatem illico ab ipso Praeposito Generali mihi impetraverat. De discessu cogitantem Cardinalis Valentius continuavit in urbe, & Pontificis nomine imperavit, ut quae pro Brasilia medita-

rum mensuris acquiescere) aptissimus videbatur. Id autem penitus in animo illius infederat, si duo gradus in meridianis duobus diversis circulis cognoscerentur, quorum graduum latitudo esset eadem, ac mensurae nequaquam inter se, quod valde suspicabatur, consentirent, id argumento tandem fore meridiauos non omnes ejusdem figurae esse, terraeque formam revocari ad calculos nondum posse. Pontifex, qui cum esset doctissimus, amplificare litteras maxime studebat, Valentio mandavit, ut retineret hominem in Italia, invitaretque ad quaerendam terrae formam in ipsa Pontificia ditione; se enim instrumenta omnia, quae ad rem tantam opus essent, praestitutum. Commodum autem accidit, ut qui gradus metiendus per Valentium proponebatur, is pariter esset latitudine, atque ille, quem antea

---

bar, in ditione Pontificia exequeret; qua in re quantum ipsi debeam, cognosceret sane quicumque perpenderit ea, quae insequentibus annis in Lusitania acciderunt.

Caillius in Australi Gallia metitus fuerat, ut gradus obvenire nullus posset ad id, quod Boscovichius volebat, accommodatior. Qui simul ut id sensit, sibi gaudens, nihil prius habuit, quam ut occasionem arriperet, nullamque interposuit moram, quin se colligens de universa illius mensurae ratione secum ipse constitueret. Quod cum fecisset, atque instrumenta parasset, socio sibi adscito Christophoro Majerio Britanno mathematico e Societate Jesu clarissimo, in viam confestim se dedit. Roma, qua in urbe metiendi initium fecerat, superatis deinde celsissimi Apennini montibus, opus usque Ariminum deduxit, totumque illum meridiani circuli arcum studio tanto dimetitus est, ut omnium, quicumque adhuc hujusmodi dimensionibus claruerunt, vel vicerit diligentiam, vel saltem aequaverit. Interim dum eum, quem dixi, arcum metiebatur, non praetermisit modo huc modo illuc divertere ad geographicas tabulas urbium, oppidorumque, quibus tota illa regio frequens est, quod etiam Pontifex jusserat, emendandas. De his rebus omnibus librum an. MDCCLVII. edidit, quem inscripsit: *De litteraria expeditione per Pontificiam ditionem*,

quem partim ipse, partim Majerius composuerat. Totum ipse postea in epitomam redegit, quam ad Bononiensem Academiam misit, ut in illius Acta referretur. Profecto oportebat gradum illum, quem Caillius in Gallia dimetitus fuerat, si certa esset, eaque, quam multi volebant, telluris forma, illo majorem esse, quem Boscovichius in Italia metiebatur, omnemque differentiam in hexapedis ad summum octo consistere. Atque in novem constitit supra sexaginta. Differunt inter se aliae dimensiones, quae postea, ipso Boscovichio auctore (1) factae fuerunt, cujus differentiae causam nonnulli mortuum attractioni praesertim tribuerunt, cujus & Boscovichius tantam vim esse vidit, ut neque sensum omnino fugiat, & errores possit parere in his, quae aguntur, mensuris non ferendos. Jam si conseras omnia, quae ad hanc usque diem peracta sunt, laudabis quidem &

---

(1) Ipse quidem Hungariae Reginam & Sardiniae Regem hortatus est, ut illa per Scherfferium & Liesganighium, hic per Beccariam meridiani gradus dimetiendos curarent.

Principum liberalitatem, qui nulli pepercerunt sumptui, & mathematicorum industriam, qui gravissimos perpeffi sunt labores, ut quaestio gravissima solveretur; dolebis vero hominum conditionem, qui dum verum quaerunt, in eas saepe difficultates dilabuntur, ut illud latere magnis obscuratum & circumfufum tenebris confirmant inviti. Quia mos semper fuit Rogerio geometriae vim in difficiliorum problematum solutione experiri, in quo quidem neminem superiorem habuit, nec uti algebraico calculo, nisi ad colligendas ex geometricis solutionibus breves formulas, quae unico obtutu solutionum ipsarum fructum exhiberent, nec integrali calculo unquam, nisi ad ipsas geometricas solutiones confirmandas, hunc ipsum morem tenuit in hoc opere, quod commendari etiam voluit solutione illorum problematum, quae ad gravitatis leges, & ad causas, quae illas perturbare possunt, pertinent. Neque commendatur minus opusculo quodam, quo plures rationes persecutus est rectificandi, ut dicitur, instrumenta, quae ad dimetiendos meridiani gradus sunt necessaria, errores aestimandi, corrigendique, habendique in universa hac re exercen-



cenda regulam, qua vera & falsa judicentur. Quapropter qui talia tentare voluerint, Boscovichium praeceptorem habere minime recusabunt. In hoc exequendo negotio, quod susceptum est exeunte an. MDCCL. duos ferme annos consumpsit Rogerius, neque incommoda solum gravissima sustinuit, sed etiam in vitae discrimen venit. Concidit ponticulus ligneus, dum per illum transibat; parum absuit, quin propter Tiberis inundationem fame consumeretur, cum in loco Ostiae proximo consisteret. Pertinuerant aquae ad tabulatum usque tugurii, in quo habitabat, nec quidquam suppeditari poterat cibi a naviculariis, qui omnis carebant. Ab hominibus etiam, qui magicas artes eum exercere putabant, a bestiis, a turbiniis, a tempestatibus eidem pericula fuerunt, de quibus saepe loquebatur, quod ei jucunda erat omnium suarum rerum narratio. Sed in tantis molestiis attulerunt magnam delectationem observatio rerum naturalium, quae mirabiles philosopho videbantur, poesis (& de poliando augendoque de solis & lunae defectibus poemate tum maxime cogitabat) exercitationes geometricae, cum ab eo exigeretur,

ut, quae instituerat edere matheseos elementa, absolveret, caeli & caelestium phaenomenorum contemplatio, & liberale hospitium, quo Arimini acceptus est a veteri amico Francisco Garampio Comite. His levamentis adderem societatem Majerii, nisi is difficili & morosa natura fuisset, quae in dementiam usque abiit. Quin miserrimam omnino esse dicemus conditionem hominum, quod talis fuit exitus vitae duorum summorum mathematicorum, qui laborem utilem adeo & gloriosum susceperunt dimetiendi Italici gradus, nihilque unquam recusarunt, quo et se possent juvare & suos? Hoc studium publici commodi facile obtinuit a Boscovichio, ut confecto illo negotio, propter quod non admodum magnifico praemio donatus a Pontifice fuit (centum enim tantummodo centusses & auream pyxidem illi dedit) redierit ad scholae occupationes, & erat Romae libentissime, quod ei patebant domus potentiorum, quod omnes ejus doctrinam honorabant, quod gaudebat epulis extructisque mensis, & quod ibi multa industriae subsidia atque instrumenta habebat. Maxime vero laetabatur multos jam esse in-

ter Jesuitas suos, quorum laudes, dum physica & mathematica publice docebant, magna ex parte ad se redundabant. Plane hoc spectavit Carolus Benvenutus, magni ingenii magnaëque doctrinae homo, qui cum edidisset an. MDCCLIV. *synopsin physicae generalis* & dissertationem *de lumine*, ingenue confessus est se a Boscovichio praeceptore sumpsisse omnia ea, quae tantos plausus & clamores moverunt. Ipse vero Boscovichius quotannis e schola matheos aliquid emittebat dignum suo nomine, quod scientiam, quam profitebatur, illustrabat. Ut sibi etiam versibus Latinis acquireret famam, magnopere studebat, & in Arcadum coetum saepe veniebat, deferens aut philosophica, aut, ut carminum delectaret varietas, describens ea, quae maxime digna memoria esse videbantur. Versibus aliquando expressit celebriorum tum mathematicorum, tum philosophorum imagines, saepe etiam in Regum laudes ejus oratio excurrit, movitque maxime plausus, & clamores suscitavit, cum de aegrotante Summo Pontifice Benedicto XIV. carmen composuisset, cujus haec fuit sententia:  
*Laetare, incolumis Roma, salvo Principe.*

Consuetudinem eorum artificum imitatus, qui ut pretium operibus majus invenirent, marmori adscripserunt Praxitelem suo, interdum Rogerius breve aliquod carmen confecit, quod fictum pro antiquo dixit, sed non adeo videtur mihi fuisse idoneus, ut in hoc illudere potuisset intelligentibus scribendi existimatoribus. Promptus erat ad pangendos versus, ornabat etiam eos sapientibus sententiis, sed frustra in iis quaesieris illam aequalem perpolationem perpetuamque elegantiam, quam tantopere in veteribus scriptoribus admiramur. Praeter quam quod nimium sua suspiciebat Rogerius, ut potuisset limae laborem ferre. Ex illo etiam genere festivitatis, quo semper Catullus, interdum etiam Martialis excelluit, laudem quaesivit, sed saepe frigidus erat, & dum, quod in homine mathematico miraberis, ad gloriam suam ducebat esse permagnum, recitare in conviviis, in congressionibus familiaribus, quae condiderat hujus generis, epigrammata, pariebat vitiosam offensionem atque fastidium. Verum quis tam durus, qui non veniam dandam putet homini, qui habebat causam celebritatis & nominis a gravissimis utilis-

simisque disciplinis, quod ad laudem quoque poetae adspiraverit, & illud litterarum genus coluerit, quo vel agrestiores capiuntur? Omnino jam bene egit, quod inflammavit Benedictum Stajum, hominem sibi officiis, usu, consuetudine & patria conjunctissimum, qui gloriabatur se esse imitatore studiorum illius, ad explicandam versibus Latinis recentiorum philosophiam; neque inflammavit modo, sed plura eidem suppeditavit, quibus opus immortalitate dignissimum perficeret atque illustraret. Ipse jam suarum virium periculum antea fecerat, cum sex libris totam Cartesianam philosophiam complexus esset, illam quidem magis Musarum ingenio, quam veritati judicioque naturae accommodatam. Post id animum ad Newtonianam versibus exornandam convertit, quin maxima rerum difficultate ac magnitudine deterreretur. Nemo enim vel in poesi exercitissimus cujusquam facultatis esse putabat, posse versibus expoliri universam motuum doctrinam, quam mechanicam vocant, Keplerianas leges, varios & impeditos lunae cursus, atque alia hujusmodi tum caelestia, tum terrestria phaenomena, quae a gravitatis vi promanant,

illa item, quae lucis & colorum naturam explicant, omnia denique illa, quae licet Newtonus ex naturae & geometriae recessibus in lucem proferre studuerit, delitescunt tamen adhuc adeo, ut nisi mathematicorum lingua exponi posse videantur. Ista tanta tamque multa sic a Stajo perfecta sunt, tamque optimis atque ornatissimis versibus declarata, ut per eum nullis terminis circumscribere ac definire jus suum poesis videatur. Nunquam mehercle hoc dicerem, ne aliquid tribuere amicitiae judicaret, nisi jam constaret inter doctos, a nemine unquam, ex quo poetarum artificia extiterunt, majorem difficilioremque rem fuisse susceptam, feliciorique successu absolutam. At licet Stajus plane philosophiae satisfecerit, quia tamen multi erant loci, qui uberiores explicationem desiderabant, quosque suos proprios esse dicunt, qui in physica & mathesi cognoscendis atque tractandis omne suum studium posuerunt, illorum illustrandorum partes sibi sumpsit Boscovichius, neque repugnabit Stajus, qui ab amico multa didicerat, & qui magnum ornamentum operi suo ab illo accessurum minime dubitabat. Quaecumque ergo res incidit, quae phy-

ficorum & mathematicorum more & lingua esset explicanda, in ea se prudentissimum & peritissimum Boscovichius ostendit, nec sententias modo aliorum, sed & suas ita declaravit, ut appareat multa per ipsum fuisse inventa, & licuisse ei illa sua facultate & copia, qua res difficillimas lineari, ut appellant, geometriae subijciebat, quacumque vellet vagari. Etsi nullo aliud opus Boscovichii extaret, ex hoc tamen uno quam magnus & admirandus fuisset mathematicus conjici posset. Hujus operis I. volumen Romae in lucem venit an. MDCCCLV. II. quinquennio post, III. vero non expectatum modo avidissime, sed etiam postulatum saepius a Rogerio desideratur adhuc, quamvis spes sit non latum Stajum, ut quae ipse tanto cum labore perfecit (ad decem enim usque libros opus perduxit) diutius publica luce careant. Quare autem Boscovichius id non fecerit, quod promiserat, utebatur excusatione itinerum, maximarumque occupationum, quibus ejus vita districta fuit, postquam adhiberi est coeptus ad publica negotia. Cum scirent Lucenses quantum is valeret in aquarum scientia, & harum causa magnae iis essent contro-

versiae cum Etruscis, illum habere patronum concupierunt. Rogatus a Philippo Bonamico, se ad hanc causam minime accessurum respondit, nisi Pontificis & Majorum suorum jussu. Cum data esset venia, ipse Lucam venit an. MDCCCLVII. Quanquam dederint operam Lucenses, ut convenirent mathematici, qui de controversia judicium ferre debebant, nihil tamen actum est, adversante maxime Emmanuele Richecourtio perpetuo illorum inimico, qui tum Francisci I. Caesaris nomine ad Etruriae gubernacula sedebat. Infecta igitur re, donatusque mille centussibus Romam rediit Boscovichius, & tum magnis precibus ab eo postularunt Ragusini sui, ut Parisios concedere vellet ad placandum Regis Galliarum iratum animum, qui ab iis aliquid factum male querebatur de homine, qui sua negotia Ragusae procurabat. Valentius Cardinalis, qui nolebat tantum virum ab Italia abduci, ita rem egit cum Pontifice, ut ipse in se suscepit negotium illud, transegeritque felicissime cum Regis ipsius Legato, qui tum Romae erat, Choaseullio. Post id Rogerius rediit ad Lucenses, inde Romam, ac demum cessit precibus eorum, qui in dan-



do munifici erant, & in postulando humanissimi, ut Vindobonam concederet causam Reipublicae acturus apud Caesarem, quoniam a Richecourtio nisi verba obtineri potuerant. Annum ferme integrum Vindobonae commoratus est, ejusque opera magni sane fuit Lucensibus, qui illi acceptum retulere, quod Richecourtii irae, qui se illos ipsos submersuros aquis Sexti, seu Bientinenfis lacus aiebat, tanquam frena a Caesare injecta fuerunt. Pro quibus in Rempublicam meritis, non modo publicis litteris illi gratiae actae fuerunt, sed & data munera regia, & ipse inter Patricios Lucenses relatus. Nullo non honore Vindobonae affectus fuit ab iis, qui aut muneribus, aut nobilitate generis, aut divitiis ibi praestabant, & singularis benignitas Caesaris, & summae virtutes ejus uxoris Theresiae ejusdem poetici ingenium provehebant. Bellum tum iis erat cum Borussiae Rege, & ob reportatam victoriam Colinensem poema incepit, quo canere bellum illud, & viros, qui militari gloria excelebant, sibi proposuit. Primum illius librum brevi confectum obtulit Theresiae Reginae, sed quia multa adversa postea accide-

runt, opus e manibus deposuit. Quoniam vero fructus aliquis sui Vindobonensis otii extarre volebat, Carolo Scherfferio Jesuita suafore, suam universae physicae theoriam, quam antea tantummodo variis in dissertationibus adumbraverat, ita dilatandam suscepit, ut in illa omnia naturae phaenomena, omnesque corporum proprietates, ut ita dicam, condi & collocari voluerit. Quod miraberis sane, quadraginta dierum spatio, ipso Scherfferio adjutore, absolvit librum, quem inscripsit: *Theoria philosophiae naturalis redacta ad unicam legem virium in natura existentium*, quique editus Vindobonae, post discessum ab illa urbe Auctoris recusatus quinquennio post fuit Bassani a Remondinio, quia mendose multa facta fuerant in illa priori editione. Si Boscovichium audisses, nihil hoc opere majus & gloriosius unquam ipse confecit, quo superasse ipsum Newtonum arbitrabatur, quod quae hic a duabus, vel tribus legibus repetebat, ipse ad unicam, simplicem, continuam revocaverit, quae in eo nititur, ut sit inter omnia materiae puncta vis quaedam mutua, quae a distantis pendeat, quibus mutatis, sic illa mutatur, ut in alijs at-

tractiva sit, in aliis repulsiva, sed certa quaedam, ut ipsi videbatur, & immutabili lege. Nulla, ex ejus sententia, est continuitas vera, sed tantummodo apparens. Et re quidem vera, si corpora quaedam ita inter se distent, ut angulum minorem sexdecim secundis minutis efficiant, unum tibi esse corpus videbuntur, quamvis duo sint. Quid igitur? Verum ne esse putabimus Boscovichianum systema (sic enim appellari volebat) quod totum continuitatis legi innititur, quam locum habere affirmabat in omnibus corporibus, & in minimis materiae elementis? Haec alii viderint; at vel diffidentes facile fatebuntur, totum hoc inventum fuisse excellentis cujusdam ingenii & singularis, quod elucet maxime in difficultate solvendi difficillima mechanices problemata sola Euclidae geometriae ope, eaque, ut & cetera omnia physica phaenomena ad unicum caput, seu principium referendi. Profecto si probare potuisset Boscovichius corporum elementa, ut sunt simplicia, esse quoque inextensa, nec argumenta ipsius in aliqua inductione posita fuissent, fortasse se omni reprehensione liberaasset. At in hujusmodi rebus vix quidquam consti-

tui posse videtur, quod non gignat opiniones varias atque incertas. Quia vero idem leviter tetigerat ea, quae ad centrum percussione per-  
 tinent, dilatanda esse putavit, idque praestitit in epistola ad Scherfferium, qua ipsum opus clausit. Quod percrebuerat jam fama Rogerii apud exterarum nationes, hujus fructum colligendi causa, postquam Lucensium mandatis satisfac-  
 fecerat, & in Italiam redierat, deliberavit de longioribus suscipiendis itineribus, sperans ex iis se posse reportare ad Italos suos instrumen-  
 ta sapientiae. Ex liberalitate Lucensium tantum jam coegerat pecuniae, ut satis esset huic de-  
 siderio suo, in quo exequendo quatuor & amplius annos consumsit. Peragravit universam fere Italiam, inde in Galliam, atque in Bri-  
 tanniam concessit. Londinensis commoratio ei praesertim gloriosa fuit. Relatus enim est in Regiam Academiam, & ut gratus pro tanto be-  
 neficio cognosceretur, nuncupavit illi tum pri-  
 mum editum suum poema *de solis ac lunae defectibus*, quod in v. libros divisit, & ad-  
 notationibus illustravit, ut facilius, quae versibus persequitur, intelligi possent vel ab iis, qui imperiti sunt rerum caelestium atque geome-

tricarum. Late quidem patet hoc poema, & pertinet non ad eclipses modo, sed etiam ad totam caelestem physicam, & ad praecipua Newtoni dogmata, quem merito invocavit, tanquam poematis ipsius Numen.

*Tu decus Angligenum, atque humanae gloria  
gentis,*

*Tu majus mihi Numen eris, Newtonae, repostos  
Cui primo penetrare aditus, penitusque latentes  
Sponte dedit vires natura, arcanaque jura  
Discere, & attonitum late vulgare per Orbem.  
Tu vacuas nosse primus qua lege per auras  
Attracta arcano se foedere sidera ducant,  
Insectantque viam, mediumque immobile  
circum*

*Aeternos renouent gyros, per inane Cometae,  
Quo fugiant, longo donec post tempore tristem  
Restituant terris vultum, crinesque cruentos:  
Nosse etiam, coeli cum parte feruntur eadem,  
Jupiter, & multo genitor jam tardus ab aevo,  
Cur turbent motusque suos, comitumque ca-  
teruas:*

*Non illi irarum memores, sed amore novato,  
Quo rursus amplexus, rursus oscula mutua  
poscunt.*

*Fata vetant conferre globos, jubet ire per  
auras*

*Impetus, & rursus oppositas discedere ad oras,  
Dum se iterum juncti quatuor post lustra re-  
visant.*

*Nequidquam incertos dubiis erroribus orbes  
Implicuit, curasque diu delusit inanes  
Cynthia: tu retegis, tu certis legibus arctas.  
Quid memorem alternos motus, quibus alta  
tument*

*Obiicibus ruptis consurgunt aequora fluctu,  
Tum redeunt retro, rursusque in se ipsa re-  
fidunt?*

*Quid pressam Terrae formam circum undique  
dorso,*

*Quae tumet in medio, atque polo subsidit  
utroque?*

*Diversis diversa locis quid pondera? vel quid  
Vim cuncta Eoas urgentem sydera in oras,  
Annuaque imbriferi celerantem exordia veris?  
Omnibus haec ignota olim mortalibus, acri  
Vidisti ingenio primus: nunc, te duce, molles  
Jam pueri in ludis, primoque docentur ab  
aevo.*

*Nec minus illa quidem vel quondam incogni-  
ta, vel nunc*

*Per te jam pueris, teneris & nota puellis,  
 Aeternum peperere tibi nomenque decusque.  
 Scilicet in prima nascentis origine Mundi  
 Quae niveis Charites digitis tenuissima lucis  
 Fila colorato duxerunt flamine, & aureo  
 Texuerunt fulvum neclentes pectine telam,  
 Inspiciens oculo dispescis primus acuto,  
 Filaque diffocias, atque acri singula sistis  
 Obtutu contemplanda, & quem quodque colo-  
 rem*

*Exhibeat, quantumque, doces, de tramite recto  
 Intortum deflectat iter, vel quanta requirat  
 Intervalla viae, ut certa vice; si nova se se  
 Corporis obiciat facies, aut pergere porro,  
 Aptius, aut retro fiat resilire repulsum.  
 Tum si plura simul coeant, quem mixta co-  
 lorem*

*Component, vel quo percellent lumina nisu.  
 His ita perspectis, prono jam cetera victor  
 Persequeris cursu & campo expatiaris aperto.  
 Nam quodvis filum, quae lamina materiai  
 Transmittat, reddatve, magis prout crassa,  
 minusve;  
 Deinde doces, pleno radius cum venerit albens  
 Lumine, quae coeptum producant flamina  
 cursum,*

*Quae redeant, qui proinde color seu transpiciatur,*

*Sive oculis se se reflexo lumine fistat.*

*Hinc formas rerum externas, & particularum  
Deprendis variam molem, textumque, & opaco  
Quae sint caeca sinu, quae corpora pervia  
luci,*

*Quae certum servant, & quae variata colorem  
Pro vario positu mutant oculique, sinque.  
Cur tenerae viridi frondes velentur amictu,  
At nimio exustae flavescant Solis ab igne;  
Unde rosis ardens vultu rubor; unde, ni-  
grantes,*

*Purpura, quae violas tristi circumfidet umbra,  
Canaque cur puro niteant candore ligustra;  
At contra tenerae cur levia colla columbae,  
Et bullae pueris lusus, tenuesque capilli,  
Filaque, quae molli deducit aranea succo;  
Et gemmae, & pluvio pendentes aere guttae  
Mille trahant varios adverso sole colores.  
Haec primus comperta vides, simul abdita  
pandis*

*Mille alia atque alia accumulans; totumque  
per Orbem*

*Diffundis late. Stupet alta mente volutans  
At-*



*'Attonitum mortale genus tam multa repente  
Eduſta, atque adeo brevibus concredita chartis:  
Plus unum vidiffe hominem, quam viderit omne  
Naturam inquirens ſapientum turba per ac-  
vum.*

Hos verſus idcirco attulimus, ut ex iis iudi-  
cium fieri poſſit de univerſo poemate, quo  
praefertim gloriabatur Boſcovichius, cujus mul-  
tas decades verſuum ſaepe memoriter re-  
citabat, quodque tertio edidit Pariſiis anno  
MDCCLXXIX. cum illud Gallicam in linguam  
convertiſſet Barruellius non ſine corollario car-  
minum & adnotationum. Is ſane ſeciſſet ei-  
dem magnam injuriam, qui in dubium revo-  
caſſet tam facilem habuiſſe illum Calliopem  
in hoc poemate condendo, quam habebat  
Uraniam, dum caeli motus & aſtra ſeruta-  
batur. Quod maximi momenti eſt ad bene  
noſcendas ſolis, & omnium planetarum &  
cometarum diſtantias obſervatio tranſitus ve-  
neris ſub ſole, qui raro evenit, laetabatur  
ſibi Boſcovichius futurum hoc phaenomenum  
an. MDCCLXI. non. Junii; nec ſe modo, ſed  
et ceteros aſtronomos invitabat ad illud ob-

T. XIV.

Y

servandum. Retulit ad Academiam de errore quodam Hallei, qui dum an. MDCCXV. docuit Academiam ipsam, quae loca maxime huic observationi instituendae idonea essent, & quae discrimina temporis ex diversitate locorum futura essent, duorum quorundam angulorum subtractionem pro summa adhibuit. Academia & sua sponte, & vocibus etiam Boscovichii excitata misit hac de causa binos astronomos ad insulam S. Helenae, totidemque ad Sumatram insulam, & tum ipse Byzantium cogitabat. Serius illo venit, & antequam Venetiis solveret, illa in urbe phaenomenon avidissime expectatum, ut potuit (non enim locus opportunus erat, carebatque ipse idoneis instrumentis) observavit. Illo tempore, quo Londini fuit, non modo in flore doctorum hominum versabatur, sed etiam in aula familiariter vivebat cum Guilelmo & Henrico Principibus. Visitabat celebriores artifices, & cum Dollondio saepe sermones habuit de perficiendis telescopiis, & quid judicandum esset de Euleri opusculo quodam, in quo calculos nectens varios, & analogia nescio qua utens, conjecit lentes ubique posse fieri binis vitris

aquam continentibus, in quibus non esset radiorum distractio metuenda. Formulas etiam adhibuit, quibus statim cognosceretur, quae utrilibet vitro sphaericitas conveniret, & quo modo essent ambo inter se componenda. Ingeniosissima excogitatio, & Eulero digna. Sed Dollondius cum formularum periculum fecisset, exitus non respondit, quod illum commovit, ut experimenta caperet alia atque alia. Inter haec comperit, si duo quaedam vitrorum genera adhiberentur, radiorum coloratorum distractionem non pariter in utroque fieri, majoremque in uno esse, quam in altero, proportionem ad subducendos calculos commodissima. Hac re cognita, facile intellexit homo acutissimus prismata & lentes ita ex his vitris conformari posse, ut si apte jungerentur, sic se mutuo radiorum refractiones compensarent, ut nulla tandem esset distractio; habereturque, quod fieri non posse putaverat Newtonus, refractio colorum experta. Quod ut comprobaret, lentes illico ex iis, quae dixi, vitris, confecit. Bellissime res successit. His deinde telescopia condidit, quorum unum cum Boscovichio ostendisset, hic vix quidquam fie-

ri perfectius posse judicavit. Sed non satis erat id vitii telescopiis adimere, quod ex coloratorum radiorum distractione manabat, nisi & illud demeretur, quod forma parit. Nam cum lentes vix aliam accipere formam possint, nisi sphaericam, inde fit, ut radii ab uno objecti puncto prodeuntes, vel si nulla fiat coloratorum distractio, nequaquam tamen possint omnes in unum punctum colligi. Huic malo succurrit Clairautius, mathematicus Gallus suae aetatis facile princeps. Speravit is, ut si sphaericitates diversae apte inter se componerentur, vitium, quod reliquum erat, tolleretur; neque id speravit solum, sed etiam perfecit. Nam cum varios vitrorum modos, lentiumque genera quam varie jungi possent, secum ipse perpendisset, atque omnia in formulas conjecisset, vitra undique perquisivit, si quae essent in Gallia, quae cum illis, quibus Dollondius utebatur, possent comparari. Quae-  
renti fortuna non defuit. Vitra ergo, qualia sibi optaverat, nactus, lentes Parisiis fieri jussit ad id, quod volebat, aptissimas, & telescopia confecit, quibus nihil est adhuc illius. Exposuit deinde haec omnia eleganti

sermone in Parisiensis Academiae Commentariis annorum quinquagesimi sexti, & quinquagesimi septimi supra millesimum septingentesimum. Post haec pro amicitia, quae illi cum Boscovichio intercedebat, ei per litteras significavit, quoddam se vitri genus reperisse e Germania advectum, a quo radiorum coloratorum distractio duplo est major, quam quae a vitris communibus esse solet; hac proportionem miram iis formulis, quas ipse tradiderat, simplicitatem addi. Haec Dollondii & Clairautii inventa. Dignus erat, qui his succederet Boscovichius. Is ergo in provinciam jam occupatam veniens, aggredi id voluit, quod erat reliquum, quodque est maxime in invento quovis desiderandum; ut omnia nempe, quaecumque antea sunt tradita, in unum colligantur, iisque & brevitatis addatur & simplicitas. Id ille scilicet in recentissimo hoc invento mire praestitit, ut jam videatur res tota ab eo magis petenda esse, qui illam illustravit, quam ab iis, qui invenerunt; id quod novum non est in plerisque inventis recens editis. Sermone ergo fecit doctissimum, quem ad Academiam Bononiensem misit, eique locus

datum est in Parte I. Tom. V. Commentariorum ejusdem Academiae. Hoc ille Clairautii formulas complexus est elegantissimas, demonstrationesque formulis dignas; quippe hae summam continent. Ac ne nihil de suo praeter brevitatem simplicitatemque addidisse videretur, descriptionem in extremo adjunxit instrumenti cujusdam mirabilis ac plane novi, quo facile cognoscatur, quae cuique vitro vis sit ad radios vel refringendos, vel distrahendos. Hoc instrumentum, ut quod suum est, arbitrato suo appellavit, dixitque vitrometrum. Hyalometrum fortasse dixisset, si Graecis auribus servire voluisset. Latinis maluit & nostris. Quanquam haec acciderint postquam Rogerius ad Italos suos redierat, narrationem tamen eorum minime sejungendam putavimus ab iis, quae vidit & fecit in Anglia, quod Dollondii consuetudo occasionem illi dedit haec ipsa pertractandi. A Britannis ad Batavos & ad Belgas venit, inde ad Gallos rediit, singularesque illi habiti honores fuerunt ab iis omnibus, qui in litteris excellere, atque his favere putabantur. Quanquam id nonnullis leve videri possit, non tacendum ta-

men putamus, Cordaram & Cunichium, qui inter Iesuitas scribendorum carminum elegantia eminebant, ita luisse de ficta Rogerii coma, qua utebatur coactus mutare religiosa vestimenta, dum degebat inter haereticos, ut apothecis quamdam illius fecerint. Interea tempus advenit, quo Petrus Corrarius Venetorum ad Turcarum Regem Legatus Venetiis discedere debebat. Hominis amicissimi, cujus gratiam versibus etiam sibi Rogerius conciliaverat (nam an. MDCCLVIII. carmen vulgavit de nuptiis Joannis Corrarii ejusdem filii & Andrianae Pisauriae) beneficio usus, cum eo navigavit. Mos est Venetis navibus suis Tenedum usque advehere Legatos, qui ex eo loco Byzantium trajecturi, Turcarum triremes conscendunt. Dum has Corrarius opperiebatur, quaesivit cum Rogerio quid superesset antiquorum monumentorum eo in loco, qui habebat maxime causam celebritatis & nominis ab illis Virgilii versibus:

*Est in conspectu Tenedos notissima fama*

*Insula, dives opum, Priami dum regna manebant;*

*Nunc tantum sinus & statio male fida carinis.*

Pretiosa marmora, columnas, parietinas, arcus, inscriptiones Latii lingua exaratas, quas invenerunt, non ad illam vetustissimam, sed ad recentiorem Trojam Augusti Caesaris aetate conditam pertinere judicarunt, & haec omnia ita descripsit Rogerius, ut antiquitatis se litterate peritum ostenderit. Septem menses Byzantii fuit, ibique graviter adeo aegrotavit, ut de ejus vita omnes desperarent. Quantas tum habuit declarationes amoris Vergenii Comitis Gallorum Legati, viri sane summi, cui neminem aequaveris tractandarum rerum publicarum prudentia atque dexteritate! Erat & carus, commendatione maxime Maclefieldii, qui praeerat Londinenſi Academiae, Jacobo Porterio Anglorum Legato, & cum eo, postquam convalescerat, ineunte aestate an. MDCCLXII. Byzantio discessit. Vidit multas urbes Turcarum imperio subjectas, Moldaviam & Poloniam, & quae observaverat diligenter non solum, sed etiam minute descripsit, ex qua descriptione opus confecit Bassani editum an. MDCCLXXXIV. cum hoc titulo: *Giornale d' un viaggio da Costantinopoli in Polonia con una relazione delle rovi-*



*ne di Troja.* Quae ad Moldaviam pertinent, quanquam quae scribebat plena essent festinationis & pulveris, maximi putantur, quia declarant qua ratione illa tum gubernabatur ac regebatur, qui mores, & quod commercium esset incolarum. In Polonia iterum aegrotavit, quae aegrotatio, maximaque frigora, & Ruforum Imperatoris mors causa fuerunt, ne ad illos proficisceretur. Dimissus a Porterio, & male habitus a Chirurgo imperitissimo, qui ut cruri mederetur, perniciem universo corpori moliebatur, Varsoviae duos ferme menses commorari coactus est. Nihil illi fortunatius fuit quam invenire in illo regno Adamum Czartorisikium, quem Romae ad algebrae studia instituerat, cujus officiis ab universa Czartorisikiorum & Poniatowiskiorum familia, aliisque nobilissimis Polonis, quacumque iret, singularia beneficia & honores accepit. Diversatus etiam est in suburbis Varsoviae apud Pomium Galliarum Regis Legatum, ejusque in domo, concurrentibus ad eum videndi causa potentioribus Polonorum, qui tum sua concilia habebant, multas observationes astronomicas instituit. Tandem, sicuti summe concu-

pierat, Decembri an. MDCCLXII. Vindobonam  
 rediit, ibique quatuor & amplius menses fuit.  
 Discessit ab illa urbe cum Liešteinió Prin-  
 cipe, ex cujus comitatu cepit maximum fru-  
 ctum, donec Romanis suis redditus est, qui  
 aegre tulerant tantam vim ingenii diutius pe-  
 regrinatam fuisse in alienis terris. Fervebat  
 tum maxime magnum & arduum opus exsic-  
 candae Pontinae paludis, eique praeerat Bo-  
 naccursius Cardinalis. Hic secum habere vo-  
 luit Rogerium, ut quae consulta fuerant, prae-  
 sertim a Gabriele Manfredio & Romualdo  
 Bertallia, si recta ipse judicasset, ad exitum  
 pervenirent. Multa is scripto mandavit, quae  
 declarant fuisse illum prudentissimum & cau-  
 tum in alienis sententiis perpendendis, suisque  
 proponendis. Egit etiam separatim de exca-  
 vando Anxuris portu, & sicuti antea fece-  
 rat de Antiati, rationem consiliorum suorum  
 pluribus probavit. Quanquam se penitus infi-  
 nuaverat in ea, quae celebriores mathematici  
 tradiderunt de aquarum scientia, nihil tamen  
 intolerabilius & periculosius esse dicebat, quam  
 velle revocare omnia ad mathesin; consulen-  
 dam experientiam, caute & lente agendum, &

illum luxum mathematicum (sic enim appellabat) suspectum esse debere iis, qui sciunt magna ex parte universam hanc scientiam a physica pendere. Quis esset sensus Rogerii de his rebus, ex iis facile cognoscet, quae Antonius Lecchius ab eo deprompsit, ut multorum mathematicorum vanitatem coargueret, qui dominari se putant in universa hydrostatica, ne quis specie rerum deceptus incerta pro certis, quod summae stultitiae esset, habeat. Eodem tempore, quo Boscovichius invitatus fuit ad visendam Pontinam paludem, litteras a Senatu Mediolanensi accepit, quibus vocabatur ad tradendas mathematicas disciplinas in Gymnasio Ticinensi. Romanus Pontifex ab se invitisime dimisit hominem, qui publicis suis rationibus utilissimus fore videbatur; sed quia ita evocabatur, ut nihil acrius, & quia impellebatur a suis, ne munus sibi gloriosum obire differret, Ticinum concessit vere an. MDCCCLXIV. Oratio, quam habuit in ingressu muneris, multa, varia & copiosa fuit, sed non puris & electis verbis, quod ab homine mathematico minime exigebatur, composita. Ad eas laudes, quas habuit de Ticinensi Gymnasio, addidit non

parum de suis, de itineribus a se factis, de honoribus sibi tributis a Germaniae Principibus, a Stanislao Lotharingiae Duce, cujus laudes etiam Latinis versibus cecinerat, & a celebrioribus Academiis, ac de quibusdam sui & aliorum inventis, & de illo praesertim utilissimo lentium acromaticarum. Triennio postquam ibi erat, cum nescio quid invidiolae inter eos exortum fuisset, molestias a collegis habere coepit, quas homo nimium sui amans minime patienter ferebat. Sed aequi judices libenter confitebantur, illius Gymnasii gloriam niti etiam Boscovichii laudibus, quod judicium maxime confirmarunt Dissertationes illae quinque editae anno MDCCLXVII. Vindobonae *de recentibus compertis ad Dioptricam pertinentibus*, quo opere merito gloriabatur Rogerius, quod omnibus, quae ab illo vulgata fuerant, si quid iudico, sit anteponendum. Vel ab an. MDCCLXIII. quo idem miserat ad Academiam Bononiensem Dissertationem *de recentibus compertis pertinentibus ad perficiendam Dioptricam*, de qua supra mentionem fecimus, fidem suam obligaverat, se hoc argumentum uberius tractaturum, ubi per tempus licuisset. Ne autem cito licue-

rit, fecerunt mandata, quae habuit a Summo Pontifice Clemente XIII. tum Pontinae paludis, tum Ariminensis portus caussa, qui cum esset obstructus, navibus minime aditum dabat, diligens praeparatio earum rerum, quas publici doctoris munus exigebat, & quae referre debuit ad Senatum de principe Mediolanensi Templo, de cujus fastigio perficiendo cum cogitaretur, timor erat, ne novo ferendo oneri par esset aedificium. Tandem anno MDCCLXV. cum satis otii nactus fuisset, biennii intervallo interrupta iterum in manus sumpsit, suppeditavitque Scherfferio suo materiem operis, de quo diximus, & Bononiensi Academiae opusculum sane grande *de unione colorum post alios per binas substantias, ac unione multo majore per tres*, ex quo maximum ornamentum accessit Volumini II. Partis V. Commentariorum ejusdem Academiae. Plures ipse antea observationes habuerat in hanc rem inquirens, sed non satis accuratas, quod caruerat idoneo instrumento; quo sibi comparato, quod optabat invenit, inventumque laetitia elatus multorum & doctrina & nobilitate praestantium virorum tum Ticini, tum Mediolani oculis subjecit. Venit

quoque ad Rogerium illud visendi caussa Dux Eboracensis, qui tum per Italiam iter habebat, & a Clairautio aliisque illustrioribus mathematicis, quibus communicare de rebus suis consueverat, ob hujusmodi inventum singulares retulit laudes. Sed ut propius eas, de quibus commemoravimus, dissertationes antingamus, laudi dandum est Boscovichio, quod machinam excogitaverit, quae mirificum praebet usum ad definiendas, interque se comparandas qualitates, ut loquuntur, refractivas & distractivas vitrorum, de qua egit in prima dissertatione Quae ipse experimenta habuit sui vitrometri ope, ita describuntur in secunda dissertatione, ut ex his maxime cognosci possit, quomodo duabus lentibus duorum tantummodo colorum unio fiat, quomodo tribus bini extremi colores cum medio copulentur, & alia hujusmodi plura, quae ad diversam colorum unionem pertinent. Quaerit in tertia dissertatione, quomodo fiat, quod lumen cadens supra lentem sphaericam parvae magnitudinis & crassitiei, distribuatur super parvum circulum, quod oritur ex errore sphaericae figurae, quod problema & novitate & difficultate rei mathematicorum allicere sane debebat indu-

striam. Fatetur Boscovichius plurimum in eo insudasse, & miror equidem, cum ingredienti in rem ipsam ea se se obtulerint, quae facile in analysi exercitatissimum virum eo, quo tendebat, perducere potuissent. Sed nihil detrudere Boscovichii gloriae videbor, si affirmavero in illa facultate non adeo ipsum valuisse, ut in synthesi valebat. Non enim omnes omnia possumus; & cum jamdiu illi mos esset nihil earum rerum legere, quas nobiliores analysis, ut & ceterarum doctrinarum cultores in lucem emittebant, ignoratis illorum inventis, multis inferior esse debebat. Et dioptrica quidem adeo indiget sublimiori analysi, ut si quis contulerit, quae vir summus Eulerus edidit de ipsa an. MDCCLXIX. cum iis, quae antea vulgata fuerant, ceteros omnes longe multumque superasse videatur. Attamen non mediocria sunt, quae invenit Boscovichius, ut ipse quoque merito ad inventoris laudem aspirare potuerit, nullusque, ut arbitror, inficias iverit et nova & praeclara esse quae assert in IV. & V. Dissertatione, dum quaerit quis sit focus luminis reflexi a superficie posteriori cujusdam lentis, quod in ingressu atque egressu binas pati-

tur refractiones, & qui sint foci luminis, quod in una, vel pluribus lentibus reflectitur & a prima & a secunda superficie, quibus explicatis, rationem se reddere posse putavit cujusdam luminis erratici, quod apparet interdum circum corpora, quae telescopio videmus. Alia multa praetermittimus sane & ingeniose excogitata & feliciter demonstrata, quae mirum in modum has dissertationes commendant. Has quadriennio postquam ediderat, ut planum faceret iis, qui opticae studere incipiunt, eamque exercent, quid esset illud, quod per se consecutus fuerat, & ab aliis didicerat, libellum Italice scriptum in lucem emisit, quo universam telescopiorum dioptricorum doctrinam elegantissime persecutus est. Inter haec egerunt cum eo Londinenses Academici, ut Academiae nomine & sumptibus se in Californiam trajiceret ad observandum veneris sub sole transitum, quod an. MDCCLXVIII. accidere debebat. Ille omnia perpeti paratus, quibus se se magis magisque extolleret, & ingenium proderet, se non recusare onus respondit. Sed dum cogitabat Americam, expulsi ab ea fuerunt ab Hispaniarum Rege Jesuitae, quod ei omnem gloriosissimi

mi



mi mandati exequendi spem ademit. Id vehementius doluit, quod a multis & magnis molestiis, quas trahebat ex Ticinensi commoratione, abesse optabat. Quapropter illud non multo post molitus est, ut sibi concederetur revivere Galliam & Belgium, quo itinere invidorum injuriam, suamque morositatem fecit illustrem. Bruxellis dum erat, quod jamdiu ex crure laborabat, medicum adhibuit rusticum quemdam, qui crurum Deus appellabatur, quod elogium curatione Rogerii comprobavit. Quando ipse in Italiam rediit, magno cum animi sui gaudio e Ticinensi Academia, sexto post anno quam in illam venerat, ad Palatinas scholas (sic enim nominabatur Gymnasium Mediolanense) translatus est. Sed qui locus tranquillitatis plenissimus ei fore videbatur, attulit gravissimas molestias, tantum ut de eo cedere coactus fuerit. Quod miraberis, vel de suis Jesuitis justam querendi causam habuit, quorum aliorumque invidorum artibus factum est, ne amplius praeesset Astronomicae speculae, in quam non mediocres labores atque sumptus impenderat. Tum oblatam sibi occasionem arripuit comitandi Muti-

nenfium Ducem, qui specie magis, quam re gubernabat Mediolanensem Provinciam, ad balnea Abani, ex quo loco litteras dedit ad Firmianum Comitem, cujus nutu omnia gerebantur, quae declarabant se minime Mediolanum rediturum, nisi pristinam suam dignitatem & locum recuperasset. Ut vidit male se rem habere, eam, quam frustra ad illud usque tempus quaesierat, tranquillitatem expetens, a negotiis publicis, a luce hominum se remove, & in patriae otium confugere deliberavit. Inter haec Venetiis ad decem ferme menses commoratus est, qua in urbe erat libentissime, quod se insinuaverat in familiaritatem Gallorum Regis Legati, & multorum nobilitate, & honoribus praestantium virorum. Sed dum expectabat tempus idoneum ad navigandum Ragusam, ictu Pontificii fulminis concidit (fato nescio quo misero ipsius Pontificiae majestatis atque litterarum) omnis Jesuitarum Societas, quem casum doluit vehementer, quamvis de ea deferenda aliquando cogitaverit. Tum mutationem consilii sibi faciendam esse duxit, & cum in Etruriam venisset, suavor ei fui, ut respiceret Academiam

Pisanam, omniaque expectaret a Petri Leopoldi Magni Ducis liberalitate. Eodem tempore invitabatur a Mercio Comite Caesaris ad Galliarum Regem Legato, ut apud se diversaretur, & quod desiderio flagrabat revisendi Parisios, & quod mihi certum non erat quibus conditionibus in Academia Pisana constitisset (quam non erat dubium fore illas honestissimas) comitem se praeiuit Bordio Ludovici xv. a cubiculo, qui ex itinere Italico revertebatur ad Gallos suos. Quod praemonueram accidit, ut Magnus Dux mihi mandaverit, litteras ad Rogerium darem, confirmaremque illum in voluntate opticam docendi D. centussium stipendio in Academia Pisana. Serius ei redditae meae litterae fuerunt, quas dum expectabat, vinci se passus est a consiliis eorum, qui quae oblata fuerant Regis ipsius nomine ab iis, qui rem maritimam administrabant, haud recusanda esse suadebant (1).

---

(1) Les intentions (*sic ille*) du Roi Louis xv. en me fixant dans ses Etats se trouvent clairement ex-

Qui tum fortunatissimus habebatur, quod mille & quingentorum centussium stipendium obtinuerat, quod non tanquam advena, sed tanquam popularis (sic enim Rex ipse jusserat) degebat in urbe, quae lux orbis terrarum, & omnium doctrinarum sedes esse putatur, & quod vivebat amicissime & familiarissime cum iis, quorum praecipuae partes erant in administratione Reipublicae, tantas postea perpeffus

---

primées dans les deux Brevets, que S. M. me fit expedier, l'un aux Affaires etrangeres, & l'autre a la Marine. Apres l'eloge le plus flatteur de mes Ouvrages, le premiere ajoute expressement = qu' ils ont engagé S. M. à me fixer en France par ses bienfaits, de maniere que je puisse me livrer sans distraction à l'attrait des meditations sublimes, & a mon zele pour l'accroissement des Sciences = Le second me donne le titre de = Directeur d' optique au service de la Marine pour perfectionner l'optique, & particulierment la theorie des Lunettes acromatiques, dont la marine a besoin pour les observatoires astronomiques, & pour le service des vaisseaux =.

est molestias, ut hoc suum turbulentissimum tempus quoties conferebat cum tranquillissimo, quo ei frui in Etruria licuisset, dolere videretur, quod meis amantissimis consiliis minime paruisset. Ipsa fortuna excitavit multorum invidiam: ejusmodi etiam erant mores Rogerii, ut nesciret obsequio, patientia ac lenitate molire adversariorum animos; respuebat morosius aliorum ineptias, suas extollebat, nimis ingenuo liberoque fastidio quorumdam vitia detestabatur, minime noverat illum pervagatissimum versum, qui vetat artem pudere proloqui, quam factites; omnino nimium loquax homo, nimium sui diligens, perpetuus recitator suorum Latinorum carminum non factus videbatur ad artem, quae monet delicate & caute agendum cum iis praesertim, qui inconstantia, mobilitate levitateque gaudent, & ceteros homines prae se pene agrestes putant. Habebat Parisiis apud Mirabojum, virum multis editis scriptis de Republica bene gerenda clarum, colebat astronomica studia cum veteri amico suo Landio, & Messierio; erat saepe cum Saverio, & quo magis ab his aliisque ejus doctrina praeedicabatur, eo magis exardescerebat iracundia

eorum philosophorum, qui Encyclopedistae vocabantur, quibus intollerandum videbatur hominem Jesuitam & alienigenam tantis praemiis affici, quae ipsi frustra postulassent. Horum quoque artibus factum est, ne ipse in Regiam Scientiarum Academiam cooptaretur, cujus rei obtinendae magnam spem illi fecerant Aiguillonius & Millaboissius. Crescebat in dies singulos adversariorum numerus, qui ne quidem artes, quibus magnus erat, Rogerio concedebant. Id magnopere valuit ad excitandam illius industriam, quantumque posset in optica, cujus perficiendae cura in primis illi mandata erat, multis scriptis confirmavit. Horum causa magna illi fuit controversia cum Rochonio & cum omnibus fere Academicis, qui ab illo stabant. Uterque enim dici volebat inventor micrometri prismatici, & Rogerius, cujus jam nomen & honos inveteraverat & illi urbi & hominum famae & sermonibus, doluit vehementissime perfidiam quorundam, qui, ut suspicionem & crimen furti facerent ad captandam Academicorum gratiam, non solum animum erga se, sed & testimonium inverecunde mutarunt. Majore quidem opus erat vel ar-

te, vel diligentia, ne ab iis, quorum eminebat malitia, deciperetur, sed in Boscovichio nihil erat nisi simplex & sincerum, & cum nihil celaret, eum necesse saepe fuit poenitere suae ingenuitatis. Praeter opticam magnopere de astronomia elaboravit, & quantum posset in ea, probaverat jam Academiae vel ab eo tempore, quo erat in Italia. Miserat enim ad ipsam bina Latina opuscula de ratione determinandi orbitam parabolicam cometae per tres observationes, quae non admodum magno locorum intervallo factae fuissent. Edita ipsa fuerunt ab Academia (1), sed necesse fuit Rogerio eadem tueri apologia, novisque argumentis prolata a se se confirmare. Quod non sine corollario fuit. Nam cum in eadem re diu multumque haesisset, geometriae atque astronomiae haud mediocriter consuluit. Ampliavit postea methodum suam, quae locum tantummodo habebat in orbitis parabolicis,

Z 4

---

(1) Vol. VI. des memoires envoyés par le Savans étrangers.

etiam ad ellipticas, & opportunissimam esse ostendit ad definiendas orbitas planetarum omnium per tres observationes non proximis, sed distantibus in locis habitas. Nemo non videt, quod si optime procedunt quae ingeniose excogitavit Boscovichius, quantis calculis, quantisque laboribus liberarentur astronomi, atque in omnibus hujusmodi rebus quid difficulter fieri, & quid facile fieri possit oportet considerare. Id spectavit semper in omnibus suis scriptis Rogerius, sive mathematica, sive astronomica tractaret; & cum saepe eveniat in geometria, ut commoditati ingenium sit impedimento, ipse sic suum acuebat, ut inveniret quae vel minus exercitati in erudito pulvere mathematicorum assequi possent. Tantum vero valuit in astronomia, ut ex ejus inventis commentationibusque ad illam disciplinam plurima commoda venerint, ac plures inflammaverit, e quibus extitit vir regia stirpe ortus, ad illam ex se addiscendam. Atque si hoc loco comprehendere vellem narrationem omnium illarum rerum, in quibus elaboravit Rogerius, dum Parisiis erat, nimium profecto fatigarem lectores. Earumdem indicem infra subjiciemus,



ex quo satis intelligi poterit, nulli fere opti-  
ces, & astronomiae parti ipsum vacasse, quin  
quod voluerit consecutus sit. Porro sunt adeo  
multa, ut ex iis quinque volumina confecerit  
edita Bassani an. MDCCLXXXV. Nuncupavit  
haec Ludovico XVI. Gallorum Regi, a quo  
summa acceperat beneficia, & veniam obti-  
nuerat redeundi ad Italos suos, eorundem o-  
perum perficiendorum atque edendorum cau-  
sa. Ea propter, postquam per plures menses  
Pisciae in Etruria commoratus esset apud a-  
mantissimum discipulum suum Franciscum Puc-  
cinellum, Bassanum concessit, ibique fuit  
biennium & amplius apud Remondinium ty-  
pographum. Vulgatis operibus, rediit in Etru-  
riam, cum illi hospitium praebuissent Mona-  
chi Vallumbrosani. Quoniam tum saepe eram  
cum ipso, facile obtinui narrationem earum re-  
rum, quae ad ejus vitam pertinebant, quibus-  
que usus sum in hoc concinnando commenta-  
riolo. Ex Etruria Mediolanum profectus est  
ea mente, ut commentaria ad recentiore  
philosophiam Latinis carminibus a Stajo expli-  
catam jamdiu promissa absolveret, & cum i-  
psa ederet. Haec cura magnopere illum tan-

gebat & propter praestantiam operis, & quod ei occasionem dabat sub uno veluti adpectu ponendi quidquid dispersum erat tot in scriptis ejus, quibus rem physicam & mathematicam illustraverat. Id magna ex parte, ut diximus, praestiterat, cum sex immortalis operis libri Romae editi fuissent. Quatuor restabant alii, neque ii mediocris momenti. Continere enim debebant explicationem proprietatum omnium luminis, atque propterea opticae, catoptricae ac dioptricae elementa, & illustrem explanationem suae de philosophia naturali theoriae. Jam tum, cum minime illi vagare licuisset, brevior fuisset illius oratio, & coangustasset ea, quae antea verbose nimis, atque interdum prope fastidiosè exposuerat. Verum, quae meditabatur, ad exitum perducere minime potuit. Paucis enim post mensibus quam Mediolanum venerat, coepit morbo tentari, qui in stupiditatem primo, mox in dementiam & furorem abiit. Nemo sane non lamentabatur tanti viri calamitatem, in quam & inciderant bini alii illius fratres, quasi hoc nativum malum esset. Nec mediocre erat insaniae indicium, quod timore perculsus vide-

batur, ne sibi pecunia, qua abundabat, supereretur ad vivendum, & ne satis famae ex editis scriptis collegisset. Cum vero redibat ad se se, illustria pietatis in Deum signa dabat; & ab homine, in quo nihil fuit unquam falsum & imitatione simulatum, veridicae mittebantur voces de humanarum rerum contemptu, ut angi videretur, quod omnem fere aetatem in doctrinarum studiis contrivisset. Quanquam, dum sanus erat, multas ab iis, qui Caesaris nomine ad Insubriae gubernacula sedebant, voluntatis erga se significationes habuisset, laudis tamen cupiditas fecit, ut id doleret, quod ab iis minime in quibusdam rebus publicis, quae ex mathematicorum sententia gerendae erant, adhibitus esset; dolebat etiam quod opera sua Bassani edita haud multos invenirent emptores, quas aliasque ob causas adeo commotus dicitur, ut insanire incoeperit. Sed hoc valetudinis magis, quam animi vitium erat, & cum ad cetera incommoda accessisset ut, peripneumonicus esset, vitam amisit id. Febr. an. MDCCCLXXXVII. Sepultus est cum pompa funeris in Aede, quae S. Mariae Pedonae dicitur. Laudatus publi-

ce fuit Ragusae a Bernardo Zamagna, cujus magnum nomen est in Latinis poetis. Guido vero Ferrarius, & Stephanus Morcellius titulos fecerunt, qui in ejus sepulcro inscriberentur, cum tam ingratam minime fore posteritatem arbitrantur, quin monumento tanti viri memoriam decoraret.

## O P E R A E D I T A .

- De maculis solaribus. Exercitatio astronomica habita in Collegio Romano. Typis komarek. 1736.
- De mercurii novissimo infra solem transitu. Dissertatio habita in Seminario Romano. Romae typis Antonii de Rubeis 1737.
- Constructio geometrica Trigonometriae sphaericae: Romae typis komarek 1737.
- De Aurora Boreali, Dissertatio habita in Seminario Romano. *Semel atque iterum edita Romae est an. 1738.*
- De novo Telescopii usu ad objecta caelestia determinanda. Dissertatio habenda a PP. Soc. Jesu in Collegio Romano. Romae ex typographia komarek 1739. *Integra edita fuit an. 1740. in Actis Lipsiensibus.*
- De veterum argumentis pro telluris sphaericitate, Dissertatio habita in Seminario Romano S. J. Romae 1739. typis Antonii de Rubeis.
- De Telluris figura, Dissertatio habita in Seminario Romano, Romae 1739. typis Antonii de Rubeis. *Eadem impressa Lucae fuit an. 1744., sed mendose.*
- De circulis osculatoribus, Dissertatio habenda a PP. S. J. in Collegio Romano: Romae 1740. ex typographia komarek.
- De motu corporum projectorum in spatio non re-

sistente, Dissertatio habita in Seminario Romano S. J. Romae 1740. typis Ant. de Rubeis.

De natura & usu infinitorum & infinite parvorum, Dissertatio habita in Collegio Romano S. J. Romae 1740. typis Komarek.

De inaequalitate gravitatis in diversis terrae locis, Dissertatio habita in Seminario Romano S. J. Romae 1742. typis Ant. de Rubeis.

De annuis fixarum aberrationibus, Dissertatio habita in Collegio Romano S. J. Romae 1742. typis Komarek.

De observationibus Astronomicis, & quo pertingat earundem certitudo, Dissertatio habita in Seminario Rom. S. J. Romae 1742. typis Antonii de Rubeis.

Disquisitio in universam Astronomiam publicae disputationi proposita in Col. Rom. S. J. Romae 1742. typis Komarek.

Parere di tre matematici sopra i danni che si sono trovati nella cupola di S. Pietro sul fine del 1742. dato per ordine di N. S. Bened. XIV. *Conjuncta opera hoc scriptum ediderunt Boscovichius, Thomas Seurius, & Franciscus Jaquierius*, qui anno post ediderunt quoque

Riflessioni de' PP. Tommaso le Seur, Francesco Jaquier dell' ordine de' Minimi e Ruggiero Giuseppe Boscovich della Comp. di Gesù sopra alcune difficoltà spettanti i danni e rifarcimenti della Cupola di S. Pietro proposte nella Congregazione

tenutasi nel Quirinale a 20. Gennaro 1743. e sopra alcune nuove ispezioni fatte dopo la medesima Congregazione.

De motu corporis attracti in centrum immobile viribus decrefcentibus in ratione distantiarum reciproca duplicata in spatiis non resistantibus, Dissertatio habita in Col. Rom. Romae 1743. typis komarek. *Eadem prodiit* an. 1747. in Comment. Acad. Bononien. Tom. II. Part. III.

Nova methodus adhibendi phasum observationes in eclipsibus lunaribus ad exercendam geometriam, & promovendam astronomiam, Dissertatio habita in Col. Rom. Romae 1744. typis komarek. *Eadem prodiit* Lucae an. 1747., *paucis quibusdam mutatis & additis*.

De viribus vivis, Dissertatio habita in Col. Rom. S. J. Romae 1745. typis komarek. *Integra relata quoque fuit* in Comment. Acad. Bononien. Tom. II. Part. III. *Alibi & recusa fuit*.

De cometis, Dissertatio habita a PP. S. J. in Col. Rom. Romae 1746. typis komarek.

D' un antica villa scoperta sul dosso del Tuscolo, e di alcune altre rarità, che si sono tra le rovine della medesima ritrovate. *Extant haec in ephemeridibus Litteratorum editis per Fratres Pallearios Romae 1746.*

Dimostrazione facile di una principale proprietà delle sezioni coniche, la quale non dipende da al-

tri teoremi conici, e disegno di un nuovo metodo di trattare questa dottrina. *Extat ibidem*.

Dissertazione della tenuità della luce. *Extat ibidem an. 1747.*

Dimostrazione di un passo spettante all'angolo massimo e minimo dell'Iride, cavato dalla proposizione IX. par. II. del libro dell'Ottica di Newton con altre riflessioni su quel capitolo. *Extat ibid.*

Metodo d'alzare un infinitinomio a qualunque potenza. *Extat ibid.*

Parte prima delle Riflessioni sul metodo di alzare un infinitinomio a qualunque potenza, e par. II. *Extant ibid. an. 1748.*

Notae ad Carmina Caroli Noceti e S. J. de Iride & Aurora Boreali, Romae apud Palearinos 1747. *Ampliatio cujusdam problematis de boreali aurora, quod hoc loco solverat Boscovichius, habetur in Dissertatione quadam P. Lunardi S. J.*

De Aestu maris, Dissertatio habita a PP. S. J. in Col. Rom. Romae 1747. Typis Komarek. *Hanc subsequi debebat Pars II., quae nunquam prodit. De hac vide: Expedit. Litterar. & Supplement. Philosophiae Stajanae Tom. II.*

De Lumine, Dissertatio Pars I. & II. propugnata in Sem. Rom. S. J. 1748. *Illam alteram edidit de Rubis, alteram Komarek.*

De materiae divisibilitate & principiis corporum Dissertatio. *Quaquam illam defendendam proposuerit*



*rit Auctor an. 1748. serius tamen impressa fuit Lucae in collectione illa, cui titulus: Memorie sopra la Fisica e Istoria Naturale di diversi Valentuomini, in Lucca per li Silani e Giuntini in 8. In hac collectione extat etiam praeter alia Boscovichii,*

Problema mechanicum de solido maximae attractionis cum ejus solutione.

Soluzione geometrica di un problema spettante l'ora delle alte e basse maree e suo confronto con una soluzione algebrica del medesimo data dal Sig. Daniele Bernoulli. *Extat in ephemeridibus litterarum Romanorum a Paleariniis editis 1748.*

Dialogi Pastoralis v. sull'Aurora Boreale. *Extant ibid.*

Dimostrazione di un metodo dato dall'Eulero per dividere una frazione razionale in più frazioni più semplici con delle altre riflessioni sulla stessa materia. *Extat ibid. 1749.*

De determinanda orbita planetae ope Catoptricae ex datis vi, celeritate & directione motus in dato puncto; Exercitatio habita a PP. S. I. in Col. Rom. Romae 1749. typis komarek.

Sopra il turbine, che la notte tra gli 11. e 12. Giugno del 1749. danneggiò una gran parte di Roma, Dissertazione del &c. Roma 1749. appresso Niccolò e Marco Pagliarini.

Lettera del P. Ruggiero Giuseppe Boscovich della Comp. di Gesù al Sig. Ab. Angelo Bandini in risposta alla lettera del Sig. Ernesto Frexman sopra  
T. XIV. A a

l'obelisco d'Augulto. *Extat in ephemeridibus supra memoratis an. 1750. De hac re alia & scripsit Boscovichius ad eundem Bandinium, quae hic retulit in opus, Romae editum, quod inscripsit: De obelisco Caesatis Augulti e Campi Martii rudibus nuper eruto.*

De centro gravitatis, Dissertatio habita in Collegio Rom. S. J. Romae 1751. typis komarek. *Eadem aucta paullo post prodiit iterum cum titulo; De centro gravitatis, Dissertatio publice propugnata in Collegio Romano S. J. auctore &c. editio altera. Accedit Disquisitio in centrum magnitudinis, qua quaedam in ea Dissertatione proposita, atque aliis affinia demonstrantur. Romae typis & sumptibus Nicolai & Marci Palearini.*

Elementorum matheseos ad usum studiosae juventutis, Tom. 1. Pars. 1. complectens geometriam planam, arithmetica vulgarem, geometriam solidorum, & trigonometriam cum planam, tum sphaericam Pars. II. in qua algebrae elementa traduntur. Romae 1752. excudebat Generosus Salomoni. *Biennio post, quamvis non iterum opus impressum fuerit, mutata est inscriptio, eaque sic habet. Elementorum universae matheseos Auctore &c. & binis voluminibus adjunctum est tertium cum hoc titulo.*

Tomus III. continens Sectionum Conicarum elementa nova quadam methodo concinnata, & Dissertationem de Transformatione locorum geometricorum

rum, ubi de continuitatis lege, & de quibusdam infiniti mysteriis, Romae Typis Salomoni 1754. Tria haec volumina iterum impressa Venetiis fuerunt an. 1758., sed mendosissime. Venantius Momaldinus cum an. 1745. Romae edidisset Elementa Geometriae Tacqueti addidit in illa Trigonometriam sphaericam Boscovichii, quae magis expolita prodit in opere, de quo nunc dicimus. Addidit quoque ejusdem Tractatum de Cycloide & Logistica. qui etiam seorsum impressus est.

Lettere due sopra alcune curve. Extant in opere Jo. Baptistae Soardi edito Brixiae 1752. cum hoc titulo. Novi instrumenti &c.

De Lunae atmosphaera, Dissertatio habita a PP. S. J. in Col. Romano. Romae 1753. typis Generosi Salomoni.

Osservazioni dell'ultimo passaggio di Mercurio sotto il sole seguito a' 6. di Maggio 1753. fatte in Roma, e raccolte dal P. Ruggerio Boscovich, con alcune riflessioni sulle medesime. Extant in ephemeridibus Litteratorum Romanorum ejusdem anni.

P. Rogerii Josephi Boscovich S. J. inter Arcades Numenii Anigrei Ecloga recitata in publico Arcadum consessu primo ladorum Olympicorum die, quo die Michael Joseph Moreius Generalis Arcadiae Custos illustrium Poetarum Arcadum effigies formandas jaculorum ludo substituerat. Romae 1753. cum ceteris carminibus, quae hac occasione recitata fuerunt.

Poema versibus heroicis, dum effigies Stanislai Poloniae Regis in publico Arcadum coetu erigeretur, Auctore &c. Romae 1754. typis Salomoni. *Poema recusum fuit Nancei cum versione Gallica.*

De continuitatis lege, & consecrariis pertinentibus ad prima materiae elementa, eorumque vires, Dissertatio habita a PP. S. J. in Col. Rom. Romae 1754. typis Generosi Salomoni.

De lege virium in natura existentium, Dissertatio ec. 1755.

De lentibus & Telescopiis dioptricis, Dissertatio habita in Semin. Rom. Romae 1755. typis Ant. de Rubcis. *Postquam hujus dissertationis pluria exemplaria in vulgus fuerant sparsa, binae mutatae fuerunt paginae.*

De litteraria expeditione per Pontificiam ditionem ad dimetiendos duos meridiani gradus, & corrigendam mappam geographicam jussu & auspiciis Benedicti XIV. P. M. suscepta a Patribus S. J. Christophoro Maire & Rogerio Josepho Boscovich Romae 1755. in Typographio Palladis, excudebant Nicolaus & Marcus Palearini. *Si bina excipias opuscula Mairii, omnia quae in hoc volumine continentur pertinent ad Boscovichium. Mappa vero geographica ditionis Pontificae ex communibus observationibus confecta est. De hac litteraria expeditione misit opusculum ad Academiam Bononiensem, quod relatum fuit in Vol. IV. ejus Commentariorum.*

Aduotationes & supplementa ad philosophiam recentiorum Benedicti Stay. Tom. I. Romae 1755. typis Nicolai & Marci Palearini. *Duae prodierunt simul editiones. Tomus vero II. prodit an. 1760, & qui supererat Tomus III. prodire debebat Mediolani, cum omnia jam parasset Boscovichius, quae ad illum pertinebant. Quae obsisterint causae, ne quod nuntiaverat, perficeret, diximus in fine hujus vitae.*

De inaequalitatibus, quas Saturnus & Jupiter sibi mutuo videntur inducere, praesertim circa tempus conjunctionis. Opusculum ad Parisiensem Accademiam transmissum, & nunc primum editum, Audore &c. Romae 1757. ex typographia Generosi Salomoni.

Pro Benedicto XIV. P. M. Soteria, & aliud carmen de illo, quod ex periculosa aegritudine emerferat. Romae 1751. typis Palearinis.

In nuptiis Jo. Corraii & Andriae Pisauriae nobilissimis Venetae Reip. Senatoris familiis Carmen &c. Romae 1758. typis Paleariniis. *Nimis longum esset si omnia minora Boscovichii carmina recensere vellem, quae aut separatim, aut conjunctim cum aliorum carminibus edita fuere. Quanquam Latinam poesim praesertim excoleret, quaedam etiam Italica carmina condidit, & miraberis sane tantum sibi in poetica tribuisse, perinde ac si ab ea unice nominis immortalitatem sperasset.*

Scritture d'acque per una controversia della Chiesa di S. Agnese di Roma. Roma 1757.

Philosophiae naturalis theoria redacta ad unicam legem virium in natura existentium, Auctore &c. Viennae in Austria 1758. *Paullo post editum iterum opus fuit in ipsa urbe. Quod in has editiones multa irrepperant menda, tertio edendum opus ipsum, quo praesertim gloriabatur, curavit Venetiis an. 1763. ex typographia Remondiniana.*

De Solis ac Lunae defectibus libri v. Rogerii Josephi Boscovich S. J. ad Regiam Societatem Londinensem, Londini 1760. in 4. *sine typographi nomine. Idem poema recusum fuit Venetiis an. 1761. apud Zattam cum additamento in fine. Demum anno 1779. prodiit ipsum Poema Parisiis in 4. cum hoc titulo. Les eclipses Poeme en six chants dediè a S. M. par M. l'Abbè Boscovich, traduit en François par M. l'Abbè de Barruel. Ipsa epistola dedicatoria versibus scripta est. Idcirco vero autum est opus ad sex usque libros, quod cum nimium excrevisset secundi libri magnitudo ob additum illi episodium, in binos divisus est.*

De recentibus compertis ad perficiendam Dioptricam. *Extat hoc opusculum in Tom. v. Part. 1. Comment. Acad. Bononiensis. In 11. vero parte extat & aliud opusculum.*

De unione colorum aliorum post alios per binas substantias, ac unione multo majore per tres.

Dissertationes v. ad Dioptricam pertinentes. Viennae in Austria 1767.

Memorie fulli canocchiali Diottrici del P. Ruggiero Boscovich. In Milano 1771.

Riflessioni sulla relazione del Sig. Abate Ximenes appartenente al progetto di un nuovo Ozzeri sullo stato Lucchese dell' Abate Ruggerio Boscovich. *Extant in opere, quod inscribitur*: Piano di operazioni Idrauliche per ottenere la massima depressione del lago di Sesto o sia di Bientina. Lucca 1782.

Esame del Progetto de' Sigg. Manfredi e Bertaglia in riguardo alle paludi Pontine, e porto di Terracina del Sig. Abate Ruggerio Boscovich. *Extat in Vol. 1. operis, cujus est titulus*: Raccolta delle perizie ed opuscoli idraulici del Sig. Ab. Leonardo Ximenes: Firenze 1785. *Scriptit Boscovichus alia plura ad aquarum scientiam pertinentia, cum saepe de iis consuleretur.*

Giornale di un viaggio da Costantinopoli in Polonia dell' Ab. Ruggerio Giuseppe Boscovich con una sua relazione delle rovine di Troja &c. Bassano 1784.

Rogerii Josephi Boscovich opera pertinentia ad opticam & astronomiam maxima ex parte nova, & omnia hucusque inedita in quinque Tom. distributa Ludovico XVI. Galliarum Regi Potentissimo dicata; Bassani 1785. apud Remondini in 4. *En opusculorum index.*

T O M U S I.

Theoria telescopiorum, quae appellantur acromatica. Opusculum I. De constructione & usu novi instrumenti maxime idonei ad determinandas vires re-

fractivas & distractiva substantiarum diaphanarum.  
 Opusc. II. Deductio formularum pertinentium ad focos lentium cum earum applicatione ad calculandas sphaericitates earum, quae adhiberi debent pro telescopiis acromaticis.

## T O M U S II.

Theoria lentium ocularium cum additamento pro ob-  
 jectivis, Theoria Refractionum Astronomicarum,  
 & alia ad Dioptricam pertinentia.

Opusculum I. De correctionibus pertinentibus ad o-  
 culares, quibus accedit correctio erroris figurae  
 sphaericae objectivi constantis ex unico vitri ge-  
 nere.

Opusculum II. De lente ustoria potissimum ingenti.

Opusculum III. De modo determinandi discrimen  
 velocitatis, quam habet lumen, dum percurrit di-  
 versa media, per duo telescopia dioptrica, alte-  
 rum commune, alterum novi cujusdam generis.

Opusculum IV. De novo genere micrometri obje-  
 ctivi.

Opusc. V. D'une Lunette, qui donne deux images  
 du même objet l'une directe & l'autre inverse, a-  
 vec deux mouvements contraires des objets mo-  
 biles.

Opusc. VI. Lettre à M. Messier sur son observation  
 singulière des petits globules noirs, qu'il a vu  
 monter obliquement sur le disque du Soleil.



Opusc. VII. De refractionibus Astronomicis.

Opusc. VIII. Methodus determinandi refractiones astronomicas per observationes nonnullas cum observationibus ipsis & calculis.

Opusc. IX. Methodus determinandi refractiones astronomicas sine ulla alia suppositione physica praeter aequalitatem motus diurni fixarum intra revolutionem diei unius, ope instrumenti habentis maximam utilitatem generalem in Astronomia.

### T O M U S III.

De orbitis Cometarum, ac novi planetae determinandis per observationes & theoriam.

Opusc. I. De la détermination de l'orbite d'une Comète supposée parabolique par trois observations peu éloignées entr'elles.

#### *Mémoires corrélatifs.*

I. . . . . Construction plane de la Trigonométrie sphérique.

II. . . . . De la manière de déterminer par une seule observation faite au retour d'une Comète connue sa nouvelle route apparente.

III. . . . . Application de la méthode proposée dans l'opuscule pour l'orbite parabolique à la recherche d'une elliptique, quand les observations bien éloignées ne s'accordent pas avec une même parabole.

- IV. . . . . Méthode pour diviser en jours une ellipse d'une planète, ou Comète par construction.
- V. . . . . Mémoire sur les orbites des Comètes présenté à l'Académie des Sciences le 28. Juin 1776.
- VI. . . . Sur l'orbite d'une comète, dont on a les observations dans les deux noeuds,
- VII. . . . De Cometis dissertatio habita in Collegio Romano Anno 1746

*Seconde partie sur la nouvelle planète.*

- Opusc. II. Recherches de l'Auteur avec la détermination finale de sa Théorie.
- I. . . . Des premiers essais sur son orbite en la supposant une comète.
- II. . . . De la détermination de son orbite en la supposant circulaire.
- III. . . . De la détermination de son orbite supposée rectiligne dans un arc petit par rapport au total.
- IV. . . . Recherche de l'orbite dans cette supposition par le temps & lieu de la conjonction avec le soleil & opposition suivante.
- V. . . . Détermination de son orbite par quatre observations choisies de différentes manières.
- VI. . . . Méthode pour déterminer, & corriger l'effet de la courbure de l'arc & de l'inégalité du mouvement.
- VII. . . . Son orbite avec le temps périodique déterminé par quatre observations d'un intervalle

moindre de deux ans après cette correction, bien conforme avec toutes les observations & assez approchante d'une très-éloignée.

T O M U S IV.

De verificatione instrumentorum astronomicorum cum nonnullis eodem argumento affinibus.

- I. . . De verificatione divisionum quadrantis muralis.
- II. . . De examine plani quadrantis ejusdem.
- III. . . De erroribus collocationis quadrantis muralis deprehendendis & corrigendis.
- IV. . . . De verificatione puncti postremi ipsius quadrantis, quod indicat positionem telescopii horizontalem.
- V. . . . De suspensione telescopii quadrantis muralis ope curvae aequilibræ.
- VI. . . . De collocatione & verificatione ingentis quadrantis verticalis mobilis circa axem verticalem cum alidada, quæ in ingenti circulo horizontali notet azimutha.
- VII. . . . De determinandis & corrigendis erroribus axium in quadrantibus & sextantibus.
- VIII. . . . De verificatione divisionum sextantis.
- IX. . . Problema pertinens ad eccentricitatem in circulo verticali, circa ejus axem horizontalem convertatur telescopium affixum alidadae.
- X. . . . De quadam correctiuncula sectorum astronomicorum.

- XI. . . De rectificatione telescopii meridiani Gallice, instrument des passages .
- XII. . . De erroribus lineae meridianae ita deprehendis, ut observationes per eam institutae corrigi possint .
- XIII. . . De determinanda linea meridiana una cum altitudine poli, & declinatione solis per tria extrema puncta umbrae gnomonis notata in plano quovis vel horizontali vel verticali .
- XIV. . . De verificatione machinae parallacticae .
- XV. . . Formules differentielles de Trigonometrie .
- XVI. . . De rhombo micrometrico pro corrigendo effectu ejus positionis obliquae .
- XVII. . . De errore inducto a refractione in usu annuli astronomici applicati ad usum Horologii solaris .
- XVIII. . . De eodem argumento, methodo complicatiore, quae prima in mentem venerat .

## T O M U S V.

- Opuscula varia vel astronomica vel iis correlativa .
- I. . . De disparitione & apparitione annuli Saturni .
- II. . . Sur les éléments de la rotation du Soleil sur son axe déterminé par l'observation de ses taches .
- III. . . De determinatione longitudinis penduli oscillantis ad singula secunda temporis medii .

- IV.... Abrégé d'astronomie pour un Marin.
- V.... Methodus determinandi accuratissime altitudinem poli ope gnomonis supplendo instrumenta ad id necessaria, ubi defint.
- VI.... Détermination du limbe éclairé de la lune qu'on doit attendre au méridien.
- VII.... Méthode pour employer le retour de Vénus à la même longitude par la rétrogradation, pour la détermination des éléments moins certains de son orbite.
- VIII.... Méthode pour corriger les éléments d'une Comète, dont on a la longitude du nœud & l'inclinaison de l'orbite trouvée par un à-peu-près.
- IX.... Autre méthode analogue pour le même objet, & même pour trouver l'orbite elliptique, quand la parabolique ne s'accorde pas assez avec les observations.
- X.... Méthode pour corriger les éléments d'une planète par trois observations.
- XI.... De orbitae inclinatae projectione in planum eclipticae.
- XII.... De orbitae inclinatae projectione in aliud planum.
- XIII.... De calculanda aberratione astrorum orta ex propagatione successiva luminis.
- XIV.... Démonstrations simples de quelques beaux théorèmes appartenants aux triangles.
- Teoria del nuovo astro osservato prima in Inghilterra. *Extat in Vol. 1. delle memorie di Matematica e Fisica della Società Italiana.* Verona 1782.

FRANCISCO DANIELI  
I. C. ET FERDINANDI IV. REGIS  
HISTORICO  
MICHAEL ARCHANGELUS LUPULUS  
S. P.

**Q**uamtum tibi, Vir Cl. nostra gens se debere profiteatur, vel ii omnes norunt, qui te vix nomine perspectum habent. Enimvero tu, Francisce Daniel, tu ferme unus ille es, qui ingenio atque eloquentia prae-  
stans eo unice studia omnia atque labores intendis tuos, ut ejus gloria quam maxime flore-  
at, ac longe apud exteros provehatur. Sane hujusce rei luculentissima habeo testi-  
monia, quae libenter proferrem, nisi de te id omnes uno ore praedicarent. Hoc tamen non praeteream, quod tuae industriae tan-  
tum vetustas debet, quam cui maxime; nam absque te quot patria monumenta quaeso non petiissent? quot vetusti aevi memoriae in dies non evanescerent? ecquam jaclurae vim litterae non fecissent? Tu vero, Vir Cl. qua animi contentione, quantoque labo-

*te, quibusque sumptibus tot pulcherrima marmora jam jam fabrum asciae subjecta ab nefarius eorum manibus non abstulisti? quot, quae in lucem jam prorepserant, fundamentis implendis destinata, in tenebris aeternum conssepulta jacuissent, nisi per te vitam veluti ex naufragio nata essent? Certe tua haec laus tamdiu vigebit, quamdiu ipsa monumenta sunt perduratura; ipsique posterì ab ipsis mutis lapidibus vivam tui nominis praedicationem accipient. Verum ad tuum illud in nostrae nationis gloria promovenda studium redeo. Per te factum est, ut tot viri illustres hac praesertim aetate denati volitent vivi per ora hominum, namque, te potissimum aditente, eorum fama veluti e tenebris edueta ac vindicata est. Quod & facto meo satis abunde demonstrare possum. Quum enim ante hos dies te convenissem, nescio qui sermo natus sit de immortalis memoriae viro Francisco Serao; multa tu de eo praedica-  
 bas atque ego vicissim. Verum quum jam tibi subolisset a me ejus vitam elucubratam fuisse, en tuarum querelarum occasio cur tamdiu eam premerem. Sed quid? me mea-*

*que consilia satis nosti! Tuus nihilominus ille in excitanda Neapolitanae gentis gloria stimulus te adduxit impulitque, ut eam tibi traderem, quo inter virorum doctrina praestantium vitas a celeberrimo Fabronio Academiae Pisanae Curatore conscriptas locum haberet, quod feliciter tibi cessurum ajebas pro veteri ea, quae tibi cum amplissimo illo viro intercedebat necessitudine. At ego: tantumne tu, Cl. Daniel, adolescenti tribuis, ut opusculum ejus dignum censeas, quod in eo opere, tanto cum plausu ab universo litteratorum coetu excepto, prodeat? Tamen quid tibi non parebo, cui tantum debeo, quantum vix persolvere valeam? Libenti igitur animo commentariolum hunc de vita Francisci Serai tibi committo, sed ea lege, modo erudita manu tua magis magisque castigetur, deque illo, velut de re tua cautum velis. Tu interim, Vir Clarissime, quidquid id est aequi bonique fac consulas. Vale, meque ut facis ama ac tuere.*

*Neapoli prid. Nonas Sextiles MDCCCLXXXVII.*

FRAN-



## FRANCISCUS SERAUS.

**E**X praestantissimis viris, quos Campania Felix virtute ac doctrina insignes tulit, unus profecto omnium maxime commendandus extitit Franciscus Seraus, Italiae singulare lumen & ornamentum. Is IV. circiter ab urbe Aversa lapide in eo pago occidentem versus, qui S. Cyprianus dicitur XI. Kalendas Octobres anni MDCCII. natales ex honestis ac piis parentibus sortitus est, Paulo nempe Serao, & Hippolyta Furnia Aversana. Puer ingenii docilitatem, memoriaeque tenacitatem habens, litteris adprime vacavit, gravitatis ac usurae temporis supra aetatem amicus. Quo pueri sciendi ardore excitatus pater doctrinis omnibus, quibus puerilis aetas impertiri solet, eum erudiendum impense curavit. Mox anno MDCCXIV. hortante patruo Antonio Serao, Neapolim deductus est, atque litterario in ludo apud Patres Societatis Jesu non aequales tantum, verum etiam natu majores facile praeci-

*T. XIV.*

B b

vit. Ludicris enim longe sepositis, sapientiae eo usque inhiabat, ut nec sodalium illecebris, nec urbis oblectamentis a suscepto semel studiorum curriculo abduceretur. Illud Quintiliani; *ille se profecisse sciat, cui Cicero valde placebit*, alta mente repostum tenens, Ciceronem tanti, quanti neminem alium faciebat. Ex cujus jucunda assiduaque lectione non minus Latini sermonis elegantiam, quam recte cogitandi, ratiocinandique doctrinam avidus hauriebat,

Porro Latinis Graeca conjunxit, in quae singulari, ultra quam credi potest, studio incubuit. Verum nondum triennium elapsum fuerat, quum e vivis Paullus pater sublatus est. Quo acerbissimo casu a studiis suis aliquantisper avocatus est Seraus. Nam inopino illo fato contristata mater gravem incidit in morbum, extremumque clausura erat diem, ni pro defuncto viro Franciscum natum in ore conspectuque suo haberet. Quare pietatis officio adductus hic fuit, ut ad proprios se lares referret, ibique diutius, quam vellet, detineretur. Ubi vero mater a luctus consternatione se se erexit, e vestigio Neapolim Franci-

fcus remeavit, atque majore animi alacritate intermissa adripuit studia. Interim, quum Mathematicae ac Philosophicae provinciae velificari incoepisset, sedulam utrique operam impendebat, majoremque erga se in diem apud aequales concitabat existimationem. Atque inde profecto fuit, ut eum plerique condiscipuli convenirent, ejusque interiorem familiaritatem & consuetudinem ambirent.

Emensus annuo MDCCXVII. rei Philosophicae stadium, animi aliquantulum pendebat, juris ne scientiam, an medicam disciplinam amplecteretur. At natura, quae in eo efformando totam se se impendisse visa est, non ad politiores tantum litteras, verum etiam ad rem medicam nobilitandam eum delegerat. Itaque hanc ceteris praeoptavit, eique se se totum libenter addixit. Principio ad naturae abdita in humano corpore inquirenda, cadaverum dissectionibus segniter vacavit, atque ex tricosa partium constructione morborum praeludia, signa, progressus felicissime divinavit. Anatomicae scientiae Physiologiam, Chymicam, Botanicen, Pharmaceuticen comites adjunxit. Haec omnia triennio circiter adsequutus, Bla-

fio de Puteo, qui tum non vulgari florebat existimatione, se se tradidit, atque ejusdem methodum curandorum morborum observaturus nosocomia, aegrorumque domos simul circumire instituit. Verum, quum in Regio Archigymnasio tunc temporis medicinam, quae vulgo *practica* audit, Nicolaus Cyrillus consummatae peritiae medicus, domo Grunio, doceret, evenit ut Seraus, qui publicas Cyrilli praelectiones nunquam non audire passus est, ejus doctrina humanitateque maxime captus sit. Hinc, missione singulari modestia a Blasio de Puteo statim impetrata, in Cyrilli fidem se se dedit, quo facem praeferente, intima medicinae sacraria facilius penetravit. Nihil interea de animi erga bonas artes ardore remisit, quin potius auxit. Quum enim Cyrillus, cui amplissima erat bibliotheca lectissimis undequaque libris instructa, eorum libenter copiam Seratio fecisset, is opportunam hanc nactus occasionem, haud ita facile dici potest, quanta animi aviditate, sive humaniorum litterarum, sive medicae artis auctores diu, noctuque voraverit. Inter ceteros Celsum unum veluti omnium facile principem maximi faciebat, nec

diem abire umquam sivit, quin suavissimam aliquam Celsi particulam attigisset, ut profecto quemadmodum Cicero Terentium, ita Seraus Celsum *librum suum* identidem nominaret, nec in provecta etiam aetate ab illius lectione aut commendatione cessarit. Quapropter & adolescentibus omnibus in medicinae studia ingressuris non semel atque iterum legendum proposuit.

Ad haec Historiae etiam, & Geographiae, ceterisque disciplinis haud imparem impertivit operam. Quemadmodum enim in plantis atque herbis usuvenit, ex quibus, quae benignioris sunt naturae, salubriores e solo succos ad coalescendum exsugunt, ita prorsus Serao accidit, ut quum singulari indole esset, meliora ipse sequeretur studia, quibus ad miraculum instructus facillime se se in virorum sapientia & auctoritate praepollentium familiaritatem insinuavit. At vero Cyrillus, quum in dies cognosceret adolescentem doctrina ac multiuga totius antiquitatis cognitione pollentem, omnem industriam ad rem medicam exornandam conferre, eum magis magisque aestimare, sui-que pene loco nati habere coepit. Atque in-

de, ubi ipse prae diurno laborum pondere negotiis quibusque omnibus satis esse non poterat, ut medicis consultationibus per se Serraus responsa daret, & voluit, & imperavit. Sed non heic restitit ejus cura, & studium; otii quippe impatiens, & laboris amicus domi philosophicum ac medicum ludum anno MDCCXXIII. aperuit, qua quidem in exercitatione ita se gnavum facilemque probavit, ut auditorum commodis unice intentus, & mira sibi eos humanitate devinceret, & plana docendi methodo in penitissimos sacratissimarum disciplinarum sensus vel invitos deduceret. Quo fiebat, ut clarorum ea tempestate professorum in se admirationem converterit; quorum etiam exhortationibus excitatus est, ut ad cathedram petendam more majorum accederet.

Ac sane anno MDCCXXVII. publicis indictis candidatorum experimentis, ad primam medicinae theoreticae cathedram occupandam noster, vicesimum quintum annum agens, gravissimorum hominum, Physiologiae Cathedram petiturus, conspectum judiciumque summum laude sustinuit. Anno deinde MDCCXXXII.

in anatomicae cathedrae petitione iterum ingenii sui, plaudente medica Republica, periculum fecit, eamque obtinuit. Demum insequenti anno, nimirum MDCCXXXIII. secunda theoreticae medicinae cathedra ei cunctorum suffragiis, non sine litteratorum gratulationibus, fuit decreta. Duobus vero hisce annis binas ad Regii Archigymnasii alumnos in solemni studiorum anniversaria instauratione elucubravit orationes, quarum alteram publice habuit, alteram non recitavit, quaeque, mandante Caelestino Galiano Archiepiscopo Thessalonicensi, & studiorum amplissimo moderatore, lucem adspexere. Per eadem fere tempora medicas institutiones conscripsit, quas in juventutis commodum jampridem e penu suo elaborarat, omnigena eruditione, judiciiue maturitate praestantissimas, quibus & medicas aliquot diatribas, & nonnulla alia subinde adjecerat. Heic interea Hippolytae matris mors sequuta est, quam vivam insigni pietate ipse coluit, denatam desiderare non destitit. Dolerem novus dolor excepit. Extremo enim autumno anni MDCCXXXIV. magno omnium luctu ac moerore Cyrillus, cui omnia noster

ferebat accepta, ingravescente cordis labe, ac interiora magis infestante, doloribus undique exacerbatus, Deo animam reddidit. Cujus tanti viri fato eo Serai animus vulnere percussus est, ut nunquam processu temporis mitigari potuerit.

Haec quum ita se haberent an. MDCCXXXVII. Vesuvius, qui per septem fere annos quieverat, incendio conflagravit, atque tanta fuit candentium saxorum, quam evomuit, copia, ut horrendum exhibuerit torrentem finitimis oppidulis Orientem spectantibus, exitium minitantem. Novum hoc inopinum portentum Caroli Regis, qui tribus ante annis Neapoli positus fuerat, animum haud leviter perculit. Sapientissimus igitur Rex tantae rei causam posteritati commendare volens, Caelestino Galiano mandavit, ut eam Vesuvii conflagrationem ab Academia adcurate describendam curaret, (ea scilicet, quam is jampridem ex viris doctrina praestantissimis collegerat, cuique Cyrillum praefectum, Seraum a secretis pronuntiavit). Acerrimus is ingeniorum aestimator Galianus Serao statim Regis nomine negotium mandat, qui in se onus recepit, sta-



timque ea de re opus Italico adlaboravit idiomate, ac Regi de litteris benemerentissimo obtulit, qui tamen, ne pulcherrima haec Vesuviani incendii descriptio Italiae tantum finibus concluderetur, nostro iterum praecepit, ut huic Latinam adjungeret versionem, quod & pari cum concinnitate Seraus est exequutus. Quamobrem & sapientissimi Regis gratiam, & ab universa litteraria republica quam maximos sibi plausus conciliavit. Opus enimvero, id est per se prorsus admirabile, quum quidquid est antiquitatis, & historiae, quidquid est elegantiae & eruditionis, in eo plane recondi videatur. Hoc unum tamen prae ceteris hic monendum duco, Gallos nimirum, tanti operis pretium expertos, Parisiis edendum curasse. Interea, quum secundae medicinae *practicae* cathedrae praefectus anno MDCCXL. chronico morbo fuisset correptus, studiorum statim moderator in Seraum cogitationem intendit, ac illum ad sustinendas infirmi vices suffecit; quae e vivis anno MDCCXLIII. sublato, eam nemine contradicente, est consequutus.

Praeterea anno MDCCXXXVIII., quum Xantulus Cyrillus medica Nicolai Cyrilli consilia

praelo dare constituisset, noster maxima in se a Cyrillo conlata beneficia memori recondens animo, iis disertissime praefatus est, vitamque, quam multo ante pertexuerat, adposuit. Neque hanc extremam in praeceptorem fuisse Serai curam atque amorem ex his, quae sequuntur, apertissime dignosci potest. Cyrillus ante annum MDCCXXVIII. Michaelis Ettmulleri opera medica pluribus illustrationibus atque additamentis, in quibus plurima Ettmulleri probata ab eo sunt, ac nonnulla rejecta, ditaverat. Rem adeo aequam Michael Ernestus Ettmullerus, Ettmulleri senioris filius adeo iniquo animo tulit, ut Neapolitanum atque egregium medicum censura conviciorum plenā, quam & actis Lipsiensibus anno MDCCXXXI. inferendam voluit, impetere non dubitarit. Cyrillus, re cognita, apologeticam responsionem statim ad Ettmulleri filii conatus comprimendos instruxit, qua & ab illius se expedire objectis, & suos clarius studuit sensus aperire. Verum haec actis suis Lipsienses vel rogati a Cyrillo inferre recusarunt; adspexit tamen lucem Genevae, extatque in tom. XVIII. Bibliothecae Italicae. Sed ad Seraum redeo.

Hoc eodem anno Ettmullerus F. & triennio post Cyrillus fato intercipiuntur. Univerſa his, utriuſque ſequuta morte, fere omnibus extincta videbatur, quum Cyrilli obitu audaciores quodammodo facti Lipſienſes, tamquam ſuccenturiati milites pugnam redintegrarunt, neminem ſperantes ſecum poſtea congreſſurum. Sed praeter expectationem res evenit. Seraus enim quum Romae apud Leprotum diverteret; renovatam audiens Lipſienſum pugnam, eo animum adjecit, ut Cyrillum a criminationibus purgaret, iisque vindicias omni ex parte munitas perfectaeque elaboratas opponeret. In his certe communi omnium ſententia talem ſe praestitit Seraus, ut eruditionem & ingenium, in primis vero felicem quandam ſcribendi gravitatem omnibus, vel ipsis etiam oblatrantibus Lipſienſibus probaverit. Excusae poſtea hae ſunt in calce conſiliorum medicorum ejuſdem Cyrilli. Ex his igitur unusquiſque videat Seraum Cyrillo tantum tribuiſſe, ut ne plura quidem a filio proſciſci potuiſſent.

Anno poſtea MDCCXLII. VIII. Kalendas Februarias, quum a Rege Carolo ſclopī iſtu

aper cecidisset, maxima omnium admiratione, sex amplius supra quingentos tenelli ac pel-  
lucidi globuli turbidulam aquam recludentes  
ex imo ventre III. Kal. Febr. ejusdem anni  
foras eruperunt. Res nova Carolum Regem  
naturalis historiae amantissimum movit, ut a  
Serao, cujus ingenium jam satis in Vesuviana  
descriptione perspexerat, observationes ea de  
re nova flagitaret. E vestigio in hoc argu-  
mentum diatribam noster conscripsit, quae  
Romanis etiam typis anno MDCCXLV. in litte-  
raria ephemeride Paleariniana excusa fuit. Tum  
eodem anno Mahmudus Turcarum Imperator  
Regem Carolum elephanto in officiosae, nec  
vulgaris amicitiae argumentum donatum vo-  
luit. Monstrosae etiam hujus belluae descri-  
ptionem Rex cudendam esse jussit. Verum  
antequam noster eam evulgaret (evulgavit  
enim eodem anno typis Regiis) vir quidam  
non inglorius, fortasse ut nostro palmam hanc  
litterariam praeriperet, praematuram elephantî  
descriptionem e penu suo festinavit, edidit-  
que. At quum virtus neque eripi, neque sur-  
ripi possit, contra votum res cecidit. Seraus  
enim, licet naturae ad iracundiam minime pro-

clivis, subiratus tamen est, ac manus ad elucubrandum apologeticum libellum extemplo admovit; at tanto is fuit plausu exceptus, ut jure merito laudes in urbe, atque ubique locorum ingentes exegerit. Verum hic Serai Ajax contra omnium expectationem in spongiam incidit. Franciscum enim, magna hujusce opellae parte absoluta, quominus eam consummaret, Hieronymus Frater, Aversae Canonicus doctrina ac pietate spectatissimus detinuit, cui & noster praeter fraternam conjunctionem multum debebat, cujusque enixe operam apud Fratrem, vir ille imminens famae suae periculum veritus, implorarat. Sane si non aliud Serai monumentum extaret, vel hoc unum, licet mutilum, satis esset, quo omnibus versatile ejus ingenium vastaque eruditio innotesceret. Mirum enimvero est, rem tam exigui argumenti a nostro tam granditer pertractatam. Neque filere heic audeo Joannis Baptistae Morgagnii Medici celeberrimi de hoc opusculo testimonium. Maxima apud nostrum is familiaritate utebatur, & uni inter amicos usuvenit, Seraus, ut statim Morgagnio liber perveniret, effecit. Imperfectionis

causam ex amici epistola sensit Vir. cl. vix-  
que ejus lectionem suscipit, quum subito in  
gravissimorum hominum confessu in haec pro-  
rupit: *En Neapolitanorum gloria! hem quan-  
ta eruditio in una & altera chartula!* tantaque  
protinus excanduit ira, quod finem liber non  
viderit, ut pileum, quem capite gestabat, ira-  
tus longe projecit. Nova hac cura expedi-  
tus Seraus in novam incidit curam. Hoc e-  
nim eodem anno trinas de Appulo phalange  
lectiones conscripsit, quae Galiano jubente,  
publici juris factae novam Auctori accessio-  
nem gloriae conciliarunt. His successit anno  
MDCCXLIV. anatomica leonis descriptio, qui  
pridem Kal. Februariis ejusdem anni in Regio  
leporario obiit, quam Regio jussu elaboravit.

Quam plurima alia etiam scripsit, ex qui-  
bus anno MDCCXXXIX. epistolam ad clarissi-  
mum virum de re litteraria publica beneme-  
rentissimum Alexium Symmachum Mazochium,  
quae in calce Mazochiani operis de dedicatio-  
ne sub ascia hodie prostat. Eodem anno, ro-  
gante Marco Poleuo, diligentissimo antiquita-  
tum perscrutatore, atque mathematico nemini  
secundo, commentariolum confecit de rebus A-

lexii Symmachi Mazochii, qui per id temporis quartum supra quinquagesimum aetatis annum agebat. Quamvis vero mutilum illud sit (Seraus quippe curis, nec parvis, distentus quae supererant describere non potuit) praecellentissimi tamen ejus ingenii vis in re tantula mirum quantum adfulget. His absolutis, quum Antonius Leprotus Benedicti XIV. medicus cubicularius anno MDCCXLIV. Seraum de pestis contagione arcenda consuluisse, noster ad epistolam huic dandam se se convertit, in qua stylum praecipue acuit in Chicoyneum, cujus scripta paullo ante Archiepiscopus Galianus ei legenda tradiderat, *orationem nempe Academicam Latinam, qua communis de contagio pestilenti opinio refellitur*, quam anno MDCCXXII. Chicoyneus edidit, & *observationes aliquot genericas de pestis contagio una cum observationibus, quibus remedia indignantur* praeservationis a peste, quae postrema Gallico scripta fuerat idiomate. Anno dein MDCCCLII, a Joanne Bruno medico Meliteni de tabifica contagione prohibenda sententiam rogatus, ei quantocyus ac eruditissime respondit. Scripsit etiam anno MDCCCLV. schediafma de

suffocatis ad vitam revocandis. Haec vero omnia simul collecta extant in opusculis, quae anno MDCCLXVI. Agnelli Lupuli patrui mei desideratissimi cura & studio excusa fuere. Quamplurima alia is pro re nata confecit, quae tum senescentis aetatis causa, tum quod pleraque forte fortuna interciderant, lucem intuita non sunt. Inscriptionum praesertim ingens extat numerus, quas inter praecipue numerantur Coenotaphium Michaelis Archangeli Patricellii mei avunculi magni, Aversae Canonici Archidiaconi, idque Fractae legitur in gentilitio sacello; & inscriptio pro Agnello Vaxallo nostri amicissimo. Carmina quoque diversis temporibus diversa scripsit, quae utinam luce donarentur commodo praesertim hujusmodi cupediarum amatorum. Epistolas insuper Latinas frequentissimas dedit ad viros praeclarissimos Alexium Symmachum Mazochium, & Michaellem Archangelum Patricellium, quarum haud paucae in meis custodiuntur adversariis.

Ad tredecim pene annos secundam medicinae *practicae* cathedram occuparat Seraus, quum ecce anno MDCCLIII. primaria vacat. Et quum Regis aequissimi decreto consuetae petitione



tioni esset publice expofita, quod ejus institutum, vitaeque rationes ab ineunte aetate fufceptae postulare videbantur, ad eam petendam animum adpulit, cui proximis ejusdem anni comitiis quam maximo exterorum aequae Neapolitanorum plaufu LI. annum agens addicitur. His ita fe habentibus an. MDCCLVI. Nicolettam Zaccharelliam viduam honefto loco natam fibi nupfit, ex qua haud degenerem habuit filiam, cui matris memor Hippolytae nomen indidit, quam perfancte educavit, & Francisco Antonio Rossi J. C. in matrimonium collocavit. Interea, curis magis magisque ingravescens, a cathedra fe abstinuit; ne tamen subfecivì temporis horas, quas ex curis prope suffurabatur, deperderet, doctiffimas Joannis Pringli medici Angli obfervationes de castrenfibus morbis anno MDCCLVII. e Britannico in patrium vertit sermonem. Atque hic novus Serai labor non parvo quidem univerfae medicorum genti emolumento fuit. Qui enim antehac Britannici sermonis ignorantia ab earum lectione absterrebantur, eas exinde terere ac prae manibus femper habere coeperunt. Quid quod in lucem vix opus emiffum

tantam Serao famam per universam pene Europam conciliavit, ut immortalitati suum satis commendavit nomen. Ea enimvero facie Pringlii observationes ornavit Seraus, ut nonnisi a se elucubratae viderentur. Praeterea quum celeberrimus doctor Macnlans ex Italia Angliam reversus, eruditissimo Pringlio, observationes de castrensibus morbis a Serao Italo sermone donatas obtulisset, tanto affectus est gaudio Pringlius, ut in grati sui animi testimonium epistolam ad nostrum dare quantocyus festinaverit. In qua quidem Pringlius non solum se ei obstrictum professus est ob mirificas eas laudes, quibus noster in praefatione observationibus praefixa opus extulit, verum etiam adseruit, quod si prius versio isthaec in suas pervenisset manus, quam tertia Anglica prodiiisset editio, usus profecto fuisset additionibus, quas noster duabus reclusit adnotationibus. Mox sequenti anno, nempe MDCCLVIII. Reginae nostrae Carolinae Austriacae FERDINANDI REGIS Uxoris medicus creatur. Quam ornamenti adeptionem magno omnium fere ordinum plausu accepit. Gratulatoriam autem elegantem inscriptionem eidem tum obtulit

ab amicis omnibus Vincentius Lupulus frater  
patruelis Patris mei. Quod gratum amicitiae  
testimonium ipsemet libenter excepit, proba-  
vitque. Deinde anno. MDCCLXXVIII. FERDL-  
NANDI IV. REGIS PII AUGUSTI FELICIS me-  
dicus intimus, totiusque Regni Archiater est  
renuntiatus.

Ultra Pringliani operis versionem nihil  
amplius a nostro est consequutus. orbis litte-  
rarius. Ex iis. vero, quae hactenus. de eo  
dicta sunt, vel cuivis. intelligere. datur, Se-  
raum a natura ingenium, versatile, vel prope  
divinum. sortitum. esse; cuicumque. enim rei  
manus admovebat, ea. quidem. dexteritate atque  
solertia tractabat, ut. nonnisi. huic. unice va-  
casse. videretur, id. quod locupletissime te-  
stantur varia. ejus. opera, quae a. praestantis-  
simo quoque. in eo. genere. elaborata. viden-  
tur. Nam. saepissime., re. postulante, stylos pro  
materiae. varietate, ea. mutavit. sedulitate, ut  
ejus. opera. vix. ejusdem. auctoris. crederentur  
partus. Ad. haec. summa. erat. instructus. eru-  
ditione, qua. potissimum. apud. omnes. commen-  
dabatur; atque. inde. accidit, ut. nunquam fa-  
miliariter, nisi. erudite. etiam, loqueretur, quod

quidem etiam, senescente aetate, in nostro fuit perspectum. Praeterea, temporis ad postremum usque vitae actum quam maxima apud nostrum aestimatio erat. Illud enim Senecae effatum prae oculis semper habuit: *quaedam tempora eripiuntur nobis, quaedam subducuntur, quaedam effluunt. Turpissima tamen est jactura, quae per negligentiam venit.* Quapropter noster meditationi semper, vel scriptitationi intentus, nullam nisi perbreve ad relaxandum animum quietem sibi indulgit. Summo mane surgere in more habebat, matutini temporis quam maxime parcus; nec multum temporis, senex licet, somno tribuebat. Immo ab Agnello Lupulo patruo me audivisse memini, quod quum is Seraam familiariter monuisset, ut tandem senex a laboribus abstinere, is cum Diogene respondit: *Quid? si in stadio currerem, oporteretne me jam vicinum metae cursum remittere, an non potius intendere?*

In artis medicae professione quantum auctoritatis supra ceteros sibi conciliarit, vel inde potest intelligi, quod quocumque vocatus accessisset, tum aegroti familiam, tum decum-

bentem ipsum ad bene sperandum sola sua praesentia erigeret. Ergo ubi ad aegroti cubiculum ventum erat, ex adverso adsidens hominem quam amicissime salutabat, tum sermone ex industria injecto, cum eo verba commutabat, quo tempore ipse frontem, vultum, oculos, loquendi tonum, respirandique rationem quam adcuratissime observabat: ex qua observatione adhibita certiores se, quam ex perterritato pulsu, de aegroti statu capere conjecturam dicere solebat. Tum, collectis unde unde ex artis praescripto indiciis, animum aegrotantis recreare satagens, quae erant sperandae salutis argumenta, suaviter ac diserte ostentabat, tantaque id vi, gratia ac vultus constantia praestabat, ut protinus aeger ex ipsa oratione excitatus, melius se tunc, quam paullo antè agere diceret. Ac vere quidam suus amicus interioris notae, quum exeunte autumnio anni MDCCLXXXII. acuto, difficillimoque morbo correptus, ac plane desperatus decumberet, ad Seraum suum de se bene sperantem intendisset oculos animumque, paullulum erigens ex pulvinari caput Ovidianum illud usurpavit:

*Hujus ab alloquiis anima haec moribunda  
revixit,  
Ut vigil infusa Pallade flamma solet.*

In praescribendis vero remediis adeo parcus fuit, ut nunquam non ipsi adstantes admirati sint, cujusque rei rationem rogatus, eam adfirmavit primam esse medici curam, eamque secundam, tertiam, & quartam, ut nisi proficeret, saltem non noceret. Et enimvero quanti universa pene Europa nostrum fecerit vel ex eo conjicere quisquis potest, quod ex clarissimis, qui ex remota quaque urbe Neapolim adibant, medicis, philosophis, eruditis, nullus umquam Seraum videre, cognoscere atque adloqui praetermiserit. Quibus porro nostrum videre non licuit, epistolis semper illum colere quam maxime delectabantur. Ad haec egenorum miseratione etiam inclauit, quorum indigentiae, quantum fieri poterat, se se adcommodare numquam non studuit. Hos enim medicinae causa arceritus, semper artis praesidio, quandoque etiam rei suae familiaris levamento juvabat.

Ut vero artis medicae peritia ac politioribus litteris nemini umquam cessit, ita & morum honestate. Ingenti enim erat instructus prudentia, quam diuturno litterarum cultu ac experientia non parum acuerat. Constantiae, supra quam credi potest, cultor. Enimvero numquam alicujus gratia vel metu propositi excussit tenacitatem. Humanitatem insuper, mansuetudinem, atque suavitatem adeo cum gravitate temperavit, ut ab omnibus amorem & veluti quamdam reverentiam exegerit. De vigilantia ac laborum perferentia nihil ultra. Non exiguae revera admirationis est, nostrum gravissimis immersum curis quamplurima elucubrasse opera; eruditionibus haud quidem vulgaribus instructa. De alacritate ac celeritate nihil hic; satis enim per se meridiana luce clarius patet, Seraum labores suos ante perfecisse, quam cuiquam suboluisse. Pietatem vero ac Religionem, qua a prima usque aetate fuit imbutus, mira semper, ad extremum usque vitae actum, modestia ac cultu reveritus est. Liberalitate etiam non in amicos tantum; quos ad mensam libenter adhibere moris erat; sed & in egenos mirifice usus

usus est. Discipulos non tantum dilexit, verum & amavit, quos permultos habuit, doctrina ac virtute praestantes, quos heic adducere tum esset longum, tum & odiosum, si quem fortasse invitus praeteream. Illud tamen dicere sat est, horum quam plurimos in medicina facienda praestantissimos extitisse, plerosque in Regia studiorum Academia professores.

Miti porro noster erat natura, ad iracundiam minime proclivi, vultu sereno, atque gravi, sermone perquam jucundo. Elegans non magnificus, splendidus non sumptuosus. Comis insuper non sine severitate fuit, nec sine facilitate gravis. Gloriam, nisi cum honestate conjunctam numquam se cupidum prae-buit. Contentionum inimicus fuit, & si forte aliquando cujusve disceptationis arbiter esset vocatus, quin cuiquam injuriam vel minimam inferret, vel ultro onus renuntiavit, vel discrepantes animos singulari quidem prudentia lenire conatus est. Res omnibus quidem anno MDCCXLVIII. patefacta est. Lutetiae Parisiorum lis eo anno suborta erat de medicorum, & chirurgorum dignitate, eoque pro-



cefferat, ut magistratuum, Regisque ipsius sacratissimi curam providentiamque excitarint. Chirurghi quippe medicae facultatis auctoritatem renuerunt, medicorum jura ac praescripta contemptui habuere, nec passi sunt, eos candidatorum suorum judices sedere. Quamobrem medici, quum quamplurimis argumentis ex unanimi gentium consensu deductis ad tam novos & exitiosos chirurgorum ausus refruendos haud valuissent, illud reliquum fuit, ut ad nostram medicam facultatem, ceterasque Europae Academias recurrerent. En igitur anno MDCCXLVIII. pridie idus Decembres ad Neapolitanam facultatem S. B. I. Martinenyus saluberrimae facultatis Parisiensis decanus epistolam dedit, in qua eruditissimos nostrae facultatis medicos rogavit, ut universae contentionis articulis responderent. Martinenyi epistolae Seraus cunctorum nomine an. MDCCXLIX. XIV. Kal. Majas. adcurate rescripsit (1); rem

---

(1) Hujusce epistolae autographum penes me est una cum Martinenyi litteris.

omnem aperit, ita tamen, ut ejus animo praefixum videatur medicorum & chirurgorum Parisiensium animos lenire ac demulcere. Ajebat enim noster postremo loco, „ nihil hic de ea „ re legibus scriptis traditum; aut praestitutum „ esse: sed omnia passim inter medicos chirurgosque modestia, observantiaque mutua, quae „ viros graves, artem difficillimam gravissimam- „ que profitentes, maxime decet, transigi „. Sicque unius Serai rescripto tota illa dissensio disjecta est.

Nunquam nisi bene de quoque loquebatur, obrectationis quam maxime inimicus. Cunctis se comem atque humanum praebeuit. Quocirca quamplurimos Neapoli amicos; eosque doctissimos habuit, quos inter praecipuum locum obtinent Alexius Symmachus Mazochius Campanus, Regius S. Scripturae interpretes, ac Neapolitanae Metropolitanae Ecclesiae Canonicus, & Michael Archangelus Patricellius avunculus meus magnus, Aversae Canonicus Archidiaconus, ejusque Seminarii moderátor, qui quum Sero adhuic adolescenti virtutis semitas monstrasset, in ejus venit arctissimam familiaritatem. Ejus familiares etiam

iam fuerunt Nicolaus Capassus Regius Pandectarum doctor, Josephus Boncorius linguae Graecae callentissimus, & Ignatius Calcius in Regio item Archigymnasio linguae Hebraicae professor. Nostri insuper familiarissimus fuit Nicolaus Ignarra in Regia studiorum Academia S. Scripturae interpres, & Serenissimi nostri Principis Hereditarii praeceptor. His adnectendi sunt ambo Martini, Nicolaus nempe & Petrus, Felix Sabatellius, aliique permulti litterati viri. Carus ei praeterea fuit Agnellus Vaxallus, Hieronymi F. atque hoc quoque sit Serai bonitatis exemplum, quod cum eo, quem puerum in litterario ludo cognoverat, adeo conjuncte vixit, ut nonnisi Vaxalli morte eorum exciderit amicitia. Intime etiam usus est noster Agnello Lupulo patruo meo desiderantissimo, de medicina nihil quidquam male merito, quem si dicam filii pene locum apud Serazum obtinuisse; non dubito adstipulatores habiturum quamplurimos. Atque haec quidem Neapoli. Exterorum etiam litteratorum amicitia maxime floruit. Ejus enim fama, quum longe percrebuisset, quamplurimos spectatissimae sapientiae exteros in sui

admirationem concitavit, quorum profecto genere sunt eruditissimus Joannes Baptista Morgagnius, domo Foro Livio, anatomes Bononiae Professor, ac medicinae demum Patavii. Celeberrimus Gerardus Vanswietenius; magni Boerhavii auditor, atque Francisci I. Augusti Imperatoris, & Mariae Theresiae Augustae Imperatricis Archiater. Albertus Hallerus natione Helvetius, Boerhavii ac Bernoulli auditor, Regiae Cottingiae societatis, & Academiarum Londinensis, Parisiensis, Bero-  
linensis, atque Bononiensis Socius. Ludovicus Antonius Muratorius, vir rei litterariae publicae bono natus, Mutinensium Ducis Bibliothecae praefectus. Antonius Cocchius domo Mucello, anatomes & medicinae professor, & Magni Etruscorum Ducis antiquarius. Joannes Pringlius, natione Britannicus. Antonius Storchi-  
chius, Swietenii alumnus, Imperatoris, & Imperatricis Archiater. Antonius Leprotus Benedicti XIV. P. M. Archiater. Augustus Tissotus medicinae Agathopoli professor. Augustinus Giuffrida ex Archiatri Cataneis, & supremæ philosophicæ cathedrae professor.

At haec usque ad annum MDCCLXXXIII. obtinere, quamdiu nimirum Seraus inter nos fuit. Verum senio jam prope confectus, ac assiduus debilitatus laboribus fractarum tandem virium conqueri incoepit. Neque haec ad praenuntianda ejus fata suffecissent, nisi superveniens immane rheuma, ut ejus salus in novaculae acie palpitaret, effecisset. Et quidem brevi temporis spatio, ingravescente faucium morbo (qui quidem ei toto vitae curriculo familiaris fuit) nulla salutis amplius spes, maxima omnium contristatione, adfulgebat. Quandoquidem faucibus undequaque inflammatis, quum ne vix quidem deglutire facultas esset, postremis Ecclesiae Sacramentis rite susceptis, vitam hanc aerumnosissimam cum immortali commutavit nonis Augusti anni MDCCLXXXIII. Universo porro Academico- rum coetu, atque Regii Gymnasii professorum, prosequentibus etiam amicis, elatus est, corpusque in templo Montis Virginis, eodemque hypogeo, quo optimus ejus amicus Agnellus Vaxallus illatus, conditum fuit; ubi Hieronymus Vaxallus ex Agnelli fratre filius hanc e regione tituli sepulchralis patrui sui Agnelli epigraphen posuit.

## FRANCISCO . SERAO

IN. ACAD. NEAP. MEDICINAE . PROFESSORI .

PRIMAR

REGIS . NOSTRI . REGNIQ. ARCHIATRO

PHILOSOPHO . AC . PHILOLOGO

APVD . EXTERAS . ETIAM . NATIONES

PERCELEBRI

VIRO . PROBO . SEDVLO . OBSEQVENTI

ET . AMICITIAE . CVLTORI . DILIGENTISSIMO

QVEM . HIERONYMVS . VAXALLVS

ORDINIS . POPVLIQ. NEAP. A . SECRETIS

NE . AB. AGNELLO . PATRVO . SVO

DISSOCIARETVR

HEIC . IN . EODEM . HYPOGEO . COMPOSVIT

ARBITRIO . TVMVLI . SIBI . AB . HIPPOLYTA

FILIA . VNICA . MAERENTISSIMA . PERMISSO

VIXIT. ANN. LXXX. MENS. . X. DIES . XV.

DECESSIT . NON. AVG. ANN. CIOCCCLXXXIII.

QVIESCITE . PAR . NOBILE . AMICORVM

QVANTVM . AMICITIAE . SIT . DEFERENDVM

POSTERITATI . EXEMPLO . FVTVRI

Sit vero, hujusce commentarioli finis perelegans illud carmen, quod sub imagine Francisci Serai Nicolaus Ignarra scripsit:

*Atticus. hic. fodes. an. Laelius. anne. Seraus  
Qui. fide. amicitia. &. gratia. utrumque. refert  
Amicorum. optimo. Nicolaus. Ignarra*

---

## O P E R A E D I T A .

Oratio Πραξιτερικη ad Regii Gymnasii alumnos in  
solemni studiorum instauratione; Neapoli in 4.  
1732. & in opusculis 1766.

Oratio de publicorum Gymnasiorum ad optimam di-  
sciplinam utilitate in anniversaria studiorum in-  
stauratione, Neap. in 4. 1733. & in opusc. 1766.

Istoria dell'incendio del Vesuvio accaduto nel mese  
di Maggio dell'anno 1737. scritta per l'Accade-  
mia delle scienze in 4. Napoli 1738.

Neapolitanae Scientiarum Academiae de Vesuvii con-  
flagratione, quae mense maii anni 1737. accidit  
commentarius. Neap. in 4. 1738.

----- Napoli *Italice* in 8. 1740.

----- Napoli *latine & italice* in 4. 1778.

----- Histoire du mont Vésuve, avec l'explication  
des phénomènes qui ont coutume d'accompagner  
l'embrasemens de cette montagne, le tout traduit  
de l'Académie des Sciences de Naples in *Galli-  
cam linguam versa a Parron de Castéra* in 12.  
Parisiiis 1741.

Vita Nicolai Cyrilli in Regia universitate Neapolitana primarii medicinae professoris & Regiae societatis Londinensis Socii, Neap. 1738, in fronte 1. tom. consil. medicor. Nicolai Cyrilli & in opusculis 1766.

Vindiciae pro Nicolao Cyrillo adversus Lipsiensium responsionem ad virum amplissimum Antonium Leprotum Archiatr. Pontific. Neap. 1738. in calce III. tom. consil. medic. Nic. Cyrilli.

Epistola ad Alexium Symmachum Mazochium Professore Regium & Metropolitanae Ecclesiae Neapolitanae Canonicum an. 1739. ad calcem libelli Mazochiani de dedicatione sub ascia 1766. in opusculis.

Commentariolum de rebus Alexii Symmachi Mazochii in an. 1739. 1766. in opusculis.

Osservazioni sù d'un fenomeno occorso nell'aprire un Cinghiale a 30. Gennajo 1742. Napoli nello stesso anno. Roma appresso i Pagliarini 1745. Napoli 1766. in opusculis.

Descrizione dell'elefante, Nap. 1742. in 4. 1766. in opusculis.

Del discorso di Luigi Vifone intorno all'elefante parte III. che contiene i supplementi e le conseguenze della parte I. e II. 1742. in 4.

Lezioni accademiche della t~~u~~ntola in 4. Nap. 1742.

Saggio di considerazioni anatomiche fatte su d'un leone morto in Napoli nel parco del Re a 24. Gennajo 1744. Nap. nello stesso anno in 4. 1766. in opusculis.

Let.



Lettera a Monsignor Antonio Leprotti medico di S.  
Santità Benedetto XIV. sul contagio della peste,  
Nap. 1744. 1766. in opusculis..

Opuscoli di fisica, e di vario argomento, Napoli  
1766.

Epistola ad Joannem Brunum de contagione tabifica  
Neap. 1757. 1766. in opusculis..

Osservazioni sulle malattie d'armata in campagna, e  
in guarnigione di Giovanni Pringle tradotte dall'  
Inglese in volgar toscano da Francesco Serao con  
prefazione. Nap. 1757..

Schediasma de suffucatis ad vitam revocandis; Nea-  
poli 1766. in opusculis. *Hujus autographum penes  
me est.*

Quae adhuc edita non sunt.

Epistola ad Martinenyum saluberrimae facultatis Pa-  
risiensis Decanum de Medicorum, & Chirurgorum  
Parisiensium dissensione. an. 1749. *Autographum  
in meis adversariis custoditur.*

Confilia medica latino & italico sermone scripta;  
*Horum permulta apud me sunt.*

Institutiones medicae..

Epistolae, inscriptiones, & carmina.. *Epistolarum &  
inscriptionum haud exiguus numerus a me servatur.*

Omnium, quae Quatordecim hisce voluminibus continentur .

## V O L. I.

1. **G**alilaeus Galilejus . . . . . pag. . . . 1.
2. Benedictus Castellius . . . . . 235.
3. Bonaventura Cavalerius . . . . . 267.
4. Vincentius Vivianius . . . . . 307.
5. Evangelista Torricellius . . . . . 345.

## V O L. II.

6. Clemens IX. P. M. . . . . pag. . . . 1.
7. Michael Angelus Riccius . . . . . 200.
8. Alphonfus Borellius . . . . . 227.
9. Alexander Marchettus . . . . . 329.
10. Jo. Baptista Ricciolius . . . . . 359.

## V O L. III.

11. Nicolaus Steno . . . . . pag. . . . 7.
12. Geminianus Montanarius . . . . . 69.

13. <i>Marcellus Malpighius</i> . . . . .	128.
14. <i>Laurentius Magalottus</i> . . . . .	199. X
15. <i>Franciscus Reditus</i> . . . . .	278.
16. <i>Josephus de Papa</i> . . . . .	329.
17. <i>Franciscus Maria Grimaldus</i> . . .	373.

## V O L. IV.

18. <i>Laurentius Bellinius</i> . . . . .	pag. . . 6.
19. <i>Georgius Baglivius</i> . . . . .	77.
20. <i>Petrus Antonius Michellius</i> . . . . .	XII
21. <i>Michael Angelus Tillius</i> . . . . .	173.
22. <i>Jo. Dominicus Cassinius</i> . . . . .	202.
23. <i>Dominicus Gulielminius</i> . . . . .	330.

## V O L. V.

24. <i>Aloysius Ferdinandus Marfilius</i>	pag. 6.
25. <i>Antonius Maria Valsalva</i> . . . . .	65.
26. <i>Victorius Franciscus Stancarius</i> . .	115.
27. <i>Eustachius Manfredius</i> . . . . .	144.
28. <i>Gabriel Manfredius</i> . . . . .	209.
29. <i>Bartholomaeus Beccarius</i> . . . . .	229.
30. <i>Petrus Jacobus Martellius</i> . . . . .	259.
31. <i>Franciscus Algarottus</i> . . . . .	304.

32. *Franciscus Maria Zanottus* . . . . 326.  
 33. *Jo. Benedictus Mittarellius* . . . . 373.

## V O L. VI.

34. *Henricus Card. Norifus* . . pag. . . 8.  
 35. *Philippus Bonarrolius* . . . . . 128.  
 36. *Raphael Fabrettus* . . . . . 174.  
 37. *Jo. Justinus Ciampinius* . . . . . 234.  
 38. *Franciscus Blanchinius* . . . , . 284.  
 39. *Virginus Valsechius* . . . . . 359.  
 40. *Philippus a Turre* . . . . . 366.

## V O L. VII.

41. *Antonius Vallisnerius* . . . . pag. . . 9.  
 42. *Jo. Maria Lancifus* . . . . . 99.  
 43. *Benedictus Bacchini* . . . . . 182.  
 44. *Gerardus Capassius* . . . . . 229.  
 45. *Benedictus Menzinius* . . . . . 264.  
 46. *Vincentius a Filicaja* . . . . . 293.  
 47. *Josephus Averanius* . . . . . 321.

## V O L. VIII.

48. *Benedictus Averanius* . . . . pag. . . 8.  
 49. *Alexander Politus* . . . . . 41.

50. <i>Eduardus Corfinius</i> . . . . .	76.
51. <i>Ramirus Rampinellius</i> . . . . .	143.
52. <i>Guido Grandius</i> . . . . .	186.
53. <i>Jacobus Philippus Maraldius</i> . . .	295.
54. <i>Alexius Symmachus Mazochius</i> . .	330.

### V O L. IX.

55. <i>Nicolaus Fortiguerra</i> . . . pag. . .	10.
56. <i>Scipio Maffejus</i> . . . . .	38.
57. <i>Caelestinus Galianus</i> . . . . .	179.
58. <i>Apostolus Zenus</i> . . . . .	200.
59. <i>Benedictus Marcellus</i> : . . . . .	272.

### V O L. X.

60. <i>Janus Vincentius Gravina</i> . . . pag. 5.	
61. <i>Ludovicus Sergardius</i> . . . . .	68.
62. <i>Ludovicus Ant. Muratorius</i> . . . . .	89.
63. <i>Franciscus Maria Lorenzinus</i> . . .	399.

### V O L. XI.

64. <i>Josephus Augustinus Card. Ursus</i> pag. 6.	
65. <i>Jo. Laurentius Bertius</i> . . . . .	43

66.	<i>Bernardus Maria de Rubeis</i> . . . . .	99.
67.	<i>Thomas Vincentius Monelia</i> . . . . .	148.
68.	<i>Petrus Benedictus</i> . . . . .	174.
69.	<i>Franciscus Maria Card. Cafinius</i> . . . . .	194.
70.	<i>Jo. Vincentius Lucchesinius</i> . . . . .	219.
71.	<i>Jo. Antonius Blancus</i> . . . . .	245.
72.	<i>Alexander Guidius</i> . . . . .	269.
73.	<i>Bernardinus Perfectius</i> . . . . .	298.
74.	<i>Laurentius Lorenzinius</i> . . . . .	318.
75.	<i>Antonius Cocchius</i> . . . . .	392.

#### *V o l. XII.*

76.	<i>Jo. Baptista Morgagnius</i> . . . . .	pag. . . 7.
77.	<i>Jo. Polenius</i> . . . . .	66.
78.	<i>Jacobus Facciolatus</i> . . . . .	118.
79.	<i>Hercules Franciscus Dandinius</i> . . . . .	141.
80.	<i>Camillus Silvestrius</i> . . . . .	177.
81.	<i>Julius Pontedera</i> . . . . .	205.
82.	<i>Eustachius Zanottus</i> . . . . .	241.
83.	<i>Jo. de Vico</i> . . . . .	279.
84.	<i>Jacobus Stellinius</i> . . . . .	318.

#### *V o l. XIII.*

85.	<i>Jo. Bona Card.</i> . . . . .	pag. . . 7.
86.	<i>Leopoldus Andreas Guadagnius</i> . . . . .	46.

87.	<i>Castruccius &amp; Philippus Bonamicii</i>	
	<i>Fratres</i> . . . . .	80.
88.	<i>Petrus Jannonius</i> . . . . .	117.
89.	<i>Iustus Fontaninius</i> . . . . .	202.
90.	<i>Jo. Antonius Vulpius</i> : . . . .	270.
91.	<i>Sertorius Orfatus</i> . . . . .	303.
92.	<i>Georgius Julinus</i> . . . . .	321.

#### V O L. XIV.

93.	<i>Paganinus Caudentius</i> . . pag. . .	11.
94.	<i>Bernardinus Ramazzinius</i> . . . . .	62.
95.	<i>Dominicus Lazzarinius</i> . . . . .	99.
96.	<i>Jo. Maria Mazzuchellius</i> . . . . .	158.
97.	<i>Paullus Maria Paciaudius</i> : . . .	180.
98.	<i>Claudius Fromondius</i> . . . . .	356.
99.	<i>Rogierius Josephus Boscovichius</i> .	284.
100.	<i>Franciscus Seräus</i> : . . . . .	385.

## INDEX RERUM PRAECIPUARUM

QUAE IN HOC XIV. VOLUME CONTINENTUR.

## A

**A**ghilera 121.  
 Aiguillionius 358.  
 Alvarus reprehensus 93.  
 III.  
 Antonius M. de Dominis 314.  
 ..... Triumvir ejus historia 220.  
 Ariostus Franciscus 71.  
 Aurora Borealis 299. 312.

## B

**B**alnea Christianorum 202.  
 Baitellius Julius 135.  
 Barruelli 337.  
 Barthelemicus 216. 218.  
 Beccarius Barth. 183.  
 Benallius Franc. 147. 152.  
 Benedictus XIV. 201. 204.  
 215. 241. 316. 322. 323.  
 Benvenutus Carolus 323.  
 Bernoullus Daniel 311.  
 Bertallia Romualdus 346.  
 Bodonius Jo. Bapt. 177.  
 233. 237.  
 Bonaccursius Card. 346.  
 Bonamicus Castrucci 144.  
 ..... Philippus 328.  
 Borbonius Philippus 229.  
 ... Ferdinandus 235. 242.  
 Borellius Alphonsus 72.  
 Bottarius Jo. 310.

Boscovichius Rogerius Josephus: ejus vita 284.  
 mathesin tractat. 288.  
 docet 294. ejus opera 295. & seq. systema quoddam 281. 305. 330.  
 astronomiam colit 308. 318. 359. ejus carmina 323. 332. itinera 328. 332. 344. 353. 355. Opera optica 339. 348. 359. mors 363.

Brambilla Alex. 54.  
 Brunus Jo. 399.  
 de Burgos Alex. 109.  
 Burgundius Horatius 289. 294.  
 Burnetius Thomas 68.

## C

**C**ajlius 319.  
 Capassius Nicolaus 411.  
 Cartesius 314.  
 Casonius Card. 117.  
 Cassianus a Puteo 19.  
 Castellius 266.  
 Castrensis Stephanus 31.  
 Catharina Russorum Regina 237.  
 Caylusius Comes 216. 218. 232.  
 Cervius Hannibal 65.  
 Clairautius 340.

Cle.



Clemens XIII. 349.  
 Columna Prosper 129.  
 Cornelius Ludovicus 81.  
 Corriarius Petrus 343.  
 Crescimbenius Marius 104.  
 Cupra Montana, ejus antiquitates 187.  
 Cyrillus Nicolaus 388.  
391. 394.

## D

Daniel Franc. 381.  
 Dollondius 338.  
 Durantes Cammillus 181.

## E

Etzmuellerus Michael  
194.  
 Eulerus 302. 314. 338.  
351.

## F

Facciolatus 85. 119.  
147.  
 Faecolus 119.  
 Fellinius Marchio 231.  
233.  
 Ferdinandus II. M. E. D.  
20. 31.  
 Ferrarius Guidus 364.  
 Firmianus Comes 354.  
 Fontaninus Justus 111.  
132. 137.  
 Fromondius Claudius; ejus  
 vita a 256. opera 258.  
 & seq. errores 267. mores  
 & ingenium 272.  
 & seq.

Galeardus 135. 159.  
 Galianus Caelestinius 391.  
392. 398.  
 Garopholus 116.  
 Gattus M. Ant. 114.  
 Gaudentius Paganinus;  
 ejus vita 11. ejus occupationes  
 Romae 15. in Etruriam venit  
20. de illius scriptis judicium  
8. 14. 30. ejus mores  
 & mors 39. 40.  
 Gentilius Jo. 260. 264.  
 Germonius reprehensus  
111.

Gorius Ant. Franc. 191.  
198.  
 Grandius Guido 257. 259.  
 Grammatices, de ea opinioniones 91.  
 Gravina 93. 110. 116.  
 Guadagnius Leop. 274.  
 Gustavinus Julius 31.

## H

Hallerius 79. 412.  
 Harduinius 111.  
 Heineccius reprehensus  
222.  
 Hierosolymitani Ordinis  
 historia 197. 215. 236.  
 Hospitalius Marchio 192.

## I

Iacomellius 127.  
 Ignarra Nicol. 411. 415.  
 Io. Baptista S. de ejus  
 cultu opus 214.

Itis,

Iris, ejus explicatio 187.  
114.

**L** Ama Bernardus 180.  
Lamius Jo. 191. 165.  
266.

Lagomárfinius 93. 127.  
Lazzarinius Dominicus, e-  
jus vita 99. 2 Jesuitis ex-  
agitatus 102. 111. 141.  
146. Graecis litteris do-  
ctus 117. Patavii docet  
118. ejus orationes 121.  
tragoedia 122. comoe-  
dia 124. carmina 126.  
opera deperdita 138.  
mors 142.

Lecchius Ant. 347.  
Leopoldus Austriacus 355.  
... Mediceus 27.  
Leibnitius Guil. 67.  
Leprortus Ant. 399.  
Lombardius Cajetanus 115.  
Lorgna Ant. Maria 248.  
Lucenses eorum contro-  
versiae 328.  
Ludovicus XVI. 361.  
Lupulus Michael Angelus  
382.

## M

**M** Abillonius defensus  
111.  
Maffejus Scipio 123. 131.  
135.  
Magliabechius Ant. 66.  
110.

Mairanius 299. 303. 311.  
Majerius Christophorus  
318. 322.  
Manfredius Gabriel 346.  
Marchettus Alexander 131.  
Marefuschius Card. 136.  
Mazochius Alexius 398.

400. 410.  
Mazzuchellius Jo: Maria,  
ejus vita 158. munera  
165. opera 160. 265.  
mores & mors 168.  
169.

Medicinae simplicis lau-  
des 55.  
Menghinius Petrus 12.  
Mercius Comes 355.  
Messierius 257.  
Millaboifius 358.  
Minerbettus Alex. 34.  
Monelia Andreas 65.  
Montignus 304.  
Marcellius Steph. 364.  
Morgagnus Jo. Bat. 397.  
412.  
Mozzius Julius 278.  
Muratorius Ant. 132.  
Mutinenses fontes 69.

**N** Anius Bernard. 225.  
228.

Neapolitanorum Rex Ca-  
rolus 392. 398. Ferdi-  
nandus 403.  
Newtonus 266. 290. 314.  
330. 353.  
Nocetus Carolus 286. 288.  
312. 313.

## O

**O**ddius Jacobus 208.

## P

**P**aciandius Paullus Maria: ejus vita 180. eloquentia 185. doctrina in rebus physicis 183. antiquis 186. & sequent. munera 229. 232. itinera 230. elegantia 238. mores 241. mors 242.

Pallavicinius Sfortia 39.

Passioneus Dominicus 112.

Patritius Franciscus 68.

Patricellius Michael 410.

Paullus V. 14.

Perellius Thomas 258.

Physica quomodo excolenda 248. 278.

Pindemontius Hippolytus 5.

Pintus Emanuel 196.

Polenius Jo. 359. 310.

Pomius Comes 345.

Pontina palus 346.

Porterius Jacobus 344.

Pringlius Jo. 401.

Puccinellius Franc. 361.

## Q

**Q**uadrius Xaverius 59.

Quirinius Angelus

Maria 108. 164.

## R

**R**amazinius Bernardus: ejus vita 162. carmina

64. 90. opera physica

67. 71. medica 65 71.

75. 79. orationes 77.

murs 84.

Ravilliasius 310.

Redius Franciscus 29. 55.

Richecourtius Comes 228.

Rochonius 158.

Roncallius Franc. 221.

Rossius Franc. 401.

Rospiliosius Julius 34.

de Rubeis Ant. Maria 62.

## S

**S**alvinus Ant. 110.

Sartius Maurus 187.

Scapinellius Lud. 20.

Scherfferius 319. 330.

Sclavus Blasius 133.

Seraus Franciscus: illius vita 385. quam doctus

medicus 387. ejus mu-

nera 390. 400. 402. o-

pera 391 & seq. 401.

mores 407. mors.

Sibilliatius Clemens 91. 240.

Sommaja Hieronymus 33.

Spinellius Card. 188. 197.

200.

Spoletus Franciscus 82.

Strada Famianus 17.

Stajus Benedictus 325.

361.

## T

**T**aglinius Carolus 270.

Targionius Jo. 270.

Taffonius Alexander 20.  
 Terrae figura 300.  
 Thereſia Regina 329.  
 Timonius 293.  
 Tiſſotius 79.  
 Tortius 80.  
 Travasa Cajetanus 181.  
 Triremium forma 220.  
 Trojae deſcriptio 343.  
 Trombellius 206.

## V

**V** Alentius Card. 316.  
 328.  
 Velleja, ejus antiquitates 230.  
 Vergenius Comes 344.  
 Veſuvii incendium 392.

Victorius Franciſcus 194.  
 ..... Petrus 116.  
 Villoſon laudatus 154.  
 Vita de 212.  
 Vitelleſchius Mutius 15.  
 20.  
 Vires vivae an exiſtant.  
 303.  
 Umbellae uſus 210.  
 Urbanus VIII. 16.  
 Urſius Joſephus 110. 117.  
 Vulpus Jo. Ant. 126.  
 Winkelmanius 226.

## Z


**Z** Amagna Bernard. 364.  
 Zanottus Franc. 304.  
 Zenus Apoſtolus. 100.  
 187.

F I N I S.

## ERRATA

## CORRIGE.

Pag. 9. lin. 15. nihilo	nihilo tamen minus pu-
tamen minus deberi	tavi deberi
11. l. 17. detigit	detegit
50. l. 5. Launovio	Launojo
53. l. 1. Italice	Italica
72. l. 9. exugere	exfurgere
10. l. 6. Garofoli	Garopholi
119. l. 5. Fafelo	Fafeolo
125. l. 8. praesbyteris	presbyteris
173. l. 17. Jannes	Joannes
179 l. 16 MCCLXXXVII	MDCCLXXXVII.
193. l. 12. exentravit	exenteravit
199. l. 13. aeripidem	aeripedem
205. l. 10. circumunivit	circummunivit
230. l. 17. Latharingiam	Lotharingiam
245. l. 21. Athleatarum	Athletarum
246. l. 24. programate	programme
310. l. 2. praeconiiis	praeconiis
371. l. 24. ladorum	ludorum



148.  
7.  
57.



